

(1) 7

SCAEVOLAE  
SAMMARTHANI  
POEMATA  
ET  
ELOGIA


*Collecta nunc in vnum corpus, & ab auctore  
partim aucta, partim recognita.*



Augustoriti Pictonum,  
Apud viduam Ioannis Blanceti  
Typographi Regij.

M. DC. VI.

1.6  
H 8 -





EX EPISTOLA P. RONSARDI

*ad J. Ant. Baifum.*



Ij boni, quem mihi librum  
misisti à nostro Sammar-  
thano conscriptum! non li-  
ber est, sunt ipsæ Musæ: to-  
tum nostrum Helicon te-  
stem appello. Quin & si de eo iudicium  
mihi cōcessum sit, velim equidem illum  
omnibus huius seculi poëtis antepone-  
re: vel si Bembus, Naugerius, diuinusq;  
Fracastorius ægrè laturi sint. Dum enim  
perpendo quàm aptè suauitatem carmi-  
nis puræ tersæque dictioni, fabulam hi-  
storix, philosophiam arti medicæ con-  
iunxerit, libet exclamare - deus deus il-  
le Menalca, seculumque istud felix di-  
cere, quod nobis talem, tantumque vi-  
rum protulerit.



IOSEPHVS SCALIGER.  
IVL. CÆSARIS F.

*Ad Chrysæum,*

De Scæuola Sammarthano.


**S**CÆVOLA si cultis mulcet tibi versibus aures,  
Dum tua mens docti pendet ab ore viri.  
Si lepida blandis inhiant tibi mille puellæ  
Eloquiis, animo quæ sitiente bibis.  
Cur felix mecum esse cupis, Chrysæ? quid Ulris  
Quo calî tangas sidera summa petis?  
Ille tenet cælum, cui præstant mille puellæ  
Mille Deas, vnus SCÆVOLA mille Deos.





EX STEPHANI PASCASII  
QUARTO EPIGRAM-  
matum libro.

**S**EV Latios scribat, seu Gallos Scaevola versus,  
Nil Latia aut maius Gallica terra tulit.  
Roma suum iactet, miretur Gallia nostrum:  
Cur ita? pro patria vouit uterque manum.



AD SCÆVOLAM  
SAMMARTHANVM.

**C**VI datum à superis utraque lingua  
Dextrè scribere, Gallicè & Latine,  
Atque utrinq; parem referre palmam,  
Non est SCÆVOLA, sed magis ambidexter.

N. RAPINVS.



GERMANVS AVDEBERTVS

D. MARCI EQVES

Torquatus.

**A**MBIGVAM faciunt palmam tua Galla  
Latinis,

SAMMARTHANE, tuis carmina carminibus.

Et tua nil Gallæ cedit Romana Camœnæ

Musa, nec equali sustinet ire gradu.

Hæc siquidem magnum rediit in mente Maronem,

Ronsardum ingentem nec minus illa refert.

Horum maior uter, vel uter minor? Ipse sibi par

Ronsardus soli est, Virgiliusq; sibi.

Ecquis erit iudex tantorum? Cynthia ipse

Cui potius primas deferat, in dubio est.

Si minor est neuter, si neuter maior habendus,

Nec tu te maior, nec minor esse potes.

Quin potius tu te maior, tu te quoque vincis

Et Latia & Gallæ, SCÆVOLA magne, lyra.



INDEX OPERVM

QVÆ HOC VOLV-

*mine continentur.*

Pædotrophix, siue de puerorum edu-  
catione lib. III.

Lyricorum lib. II.

Siluarum lib. III.

Elegiarum liber I.

Epigrammatum siue Lusuum lib. II.

Sacra Cantica.

*ITEM*

Elogiorum lib. III.





SÇÆVOLÆ  
S A M M A R T H A N I  
PÆDOTROPHIÆ  
LIBER PRIMVS.

AD HENRICVM GALLIÆ  
& Poloniæ Regem.



OS licet illæsi studium immortale  
pudoris  
Dulcia nosse vetet genialis fœdera lecti,  
Et sentire pium tollendæ prolis amo-  
rem.

Hic tamen Aonides (quid enim sine numine vestro  
Fas audere mihi?) hic etiam vestri aura fauoris  
Optanda, hac vestro quarendæ est munere laurus,  
Carminè dum tenui refero quis cultus alendæ  
sit soboli primùm in cunis, cum debile corpus  
Pabula iam exposcit viuo tradenda calori,  
Quis vegetum tenera gliscat compagine robur

*Paulatim, & graciles sese diffundat in artus.  
Tu quoque (nam quæcunque vigent te dante vigorem  
Accipiunt) rege cantantem tua munera vatem,  
Phœbe pater, Geniūque meo concede labori.*

*Fors erit ut majora canam, cum tristis Enyo  
Desierit cecos armare in mutua Celtas  
Vulnere, & externo quasitus ab hoste triumphus,  
Auspiciis HENRICE tuis fortissime Regum,  
Materies aderit nostris accepta Camœnis.*

*Ecquis enim patriæ nasci de funere vates  
Gaudeat, & proprio sua sanguine carmina sædet?*

*Tunc ego siue trahes captos in vincula Persas,  
Siue ferum Eoo pelles de litore Turcam,  
Mahometisque domos & fana incesta reuelles,  
(Nam neque tantus amor laudis, nec tanta cupido  
Augendi latè imperij tua pectora turbet,  
CHRISTI etiam ut sacro signatas nomine gentes  
Impetere, & sædus fraternum abrumpere malis)  
Quicquid ages, tua facta canam, testisque laborum  
Te sequar, & longæ tradam per sæcula fame.  
Ipse pater placidis latum caput exeret undis  
Iordanes, plausūque suo de litore reddet.  
Ipsa è palmiferis mihi respondebit Idume  
Saltibus, & Syry referent mea carmina colles.  
Interea celi venientem in lumina Musam  
Nunc prima ex ipsis iuuat incunabula tuis  
Sumere, & imbelles teneram tractare puellōs.*

Tu verò, mihi quam fausta Iunone dicauit  
 Sanctus Hymen, sanctisque comes concordia votis,  
 Grata animo coniux, vitæ socia addita nostræ,  
 Me quando optata fecisti prole parentem,  
 Nec sinit alma Venus lentas frigescere tædas,  
 Accipe sæcundi communia pignora læti  
 Qua tibi sit seruare via: ne pallida quando  
 Membra animus tenuis linquet diuersus in auras  
 Omnino toti moriamur, at optima nostri  
 Pars superet, gelido exutos quæ corpore manes  
 Componat lacrymans, & iusta nouissima soluat.

Imprimis venerare hominum, Diuūque parentem,  
 Qui tua non sterili turgescere semina campo  
 Concedat bonus, & florentem exornet amœna  
 Prole domum, in seræ solatia blanda senectæ.  
 Huic tu ritè pio memores age pectore grateis  
 Sacra ferens: teneram pacato numine plantam  
 (Ne dubita) infestis nulla inclementia celi  
 Auferet ante diem, speratæque gaudia vertet.  
 Sed semper tepidas Zephyris mulcentibus auras  
 Præstabunt nitidi soles, & nubila pellent.  
 Tu modò cultum adhibe vigil, actutūque benigno  
 Lacte riga, & niueis crescentem prolue riuis.

Nec mihi displiceat quisquis fuit ille sophorum,  
 Qui quondam edixit incundi ut lactis amicos  
 Haud alio potius quàm matris ab ubere rores  
 Exugat puer, atque alimenta beata capeffat.

Hoc adeò rerum illa parens, hoc optima poscit  
 Natura, officiūq; pias in tempore matres  
 Admonet, & soboli prudens accingit alenda.  
 Quippe simul grauida genitale resedit in aluo  
 Semen, & informis cœpit coalescere moles,  
 Augentur geminae felici nectare mammae,  
 Collectamque penum venturo & pabula seruant.  
 Pòst Vbi iam aduenit, vagitūque oris acuto  
 Impleuit cunas miser, auxiliūque petiuit,  
 Ilicet exundans claustris erumpere gestit  
 Humor, & infirmæ infantis succurrere vitæ.  
 Si prohibes, furit in mammis, turbasque dolorum  
 Miscet, & ingrata pœnas à matre reposcit.

Præterea cum res ab eodem semine cretas  
 Dulcior humorum concordia misceat Vltro,  
 An cibus esse potest Naturæ acceptior Vllus,  
 Ipse suo quàm si de sanguine sanguis alatur?  
 Sponte fluunt alimenta suis accommoda rebus,  
 Cognatūque bibunt membra haud inuita liquorem.  
 Non illum aduerso pugnans humore moratur  
 Temperies, via sed facilis se pandit eunti  
 Ocyus, & Letos meliorem educit in artus.

Aspicis vt mollem ætatem quæ plurima ledunt  
 Sæpe mala ad solitas pellant si quando querelas,  
 Maternæ tantū (dictū mirabile) mammae  
 Leniter admota puerilia ad ora papilla  
 Confestim sileat dolor, in ventosque facessat?



*Scilicet ipse suo tanquam de fonte medellam  
 Haurire, & propria se mergere gaudet in unda.  
 Huic etenim iam tum assuevit, cum luminis orbus  
 Impleret tumidi latebrosa ergastula ventris,  
 In quibus ille idem qui nunc quoque corpus alebat  
 Humor, & exiles augebat sanguine venas.  
 Diuersus tantum color est. nam sede relicta  
 Sanguis ubi calido exiliens se pectore miscet,  
 Et sursum niueis loca glandibus alba pererrat,  
 Purpureum ascito mutat candore ruborem  
 Coctior, hincque nouum sibi lactis nomen adoptat:  
 Res tamen una manet. Ceu cum Vulcania pubes  
 Urget opus, rapidumque incendit follihus ignem,  
 Plurima in ardenti candescit pruna camino.  
 Quam si forte auidis libeat subducere flammis  
 Fumantem, & liquida totam perfundere lymphæ,  
 Apparet mutata oculis, positoque rubore  
 Nigricat obscura tinctus ferrugine carbo:  
 Materies penitus tamen immutata remansit.*

*Ille color porro, quo non est mundior alter,  
 Conuenit infanti niuens, ne more ferarum  
 Ora tenella cruor, tanquam de cade recenti  
 Tingat, & à primis sitis impia sanguinis annis  
 Inspiret crudelem animum, sed amabile nectar  
 Mitiget & doceat candori assuescere candor.*

*Ipsæ etiam Alpinis villosæ in cautibus ursæ,  
 Ipsæ etiam tigres, & quicquid ubique ferarum est*

Debita seruandis concedunt vbera natis.  
 Tu, quam miti animo Natura benigna creauit,  
 Exuperes feritate feras? nec te tua tangant  
 Pignora, nec querulos puerili è gutture planctus,  
 Nec lacrymas misereris, opemque iniusta recuses,  
 Quam præstare tuum est, & quæ te pendet ab vna?  
 Cuius onus teneris hærebit dulce lacertis  
 Infelix puer, & molli se pectore sternet?  
 Dulcia quis primi captabit gaudia risus,  
 Et primas voces, & blæsa murmura lingue?  
 Tunc fruenda alij potes ista relinquere, demens,  
 Tantique esse putas teretis seruare papillæ  
 Integrum decus, & iuuenilem in pectore florem?

Felix illa animi, quam non tenet impius error,  
 Cui nec amatorem tam cæca libido mereri est,  
 Posthabita sobole, ut verum malè sanus amorem  
 Vincat amor, matrisque affectus exigit omnes.

Tu, cui concedunt meliorem numina mentem,  
 Sume vltro quodcunque operæ, quodcunque laboris,  
 Ut serues opus ipsa tuum, & pia munera præstes.  
 Quin age (nam me operis digressum à limine primo  
 Non piget hic retro, quò res vocat ipsa, referri)  
 Ne moneo expectes dum claustro exiuerit infans.  
 Sed simul extiterint concepti plurima fœtus  
 Signa, velut solito iam non redeuntia fluxu  
 Menstrua, mammarumq; tumor, laxandæq; demum  
 Cingula, quæque notant prægnantes omnia matres,

*Incipe iam tum operam firmandæ impendere proli,  
Ne tua fortè illam remoretur culpa, necisque  
Causa eadem fias, vitæ quæ causa fuisti.*

*Præcipue angusto ne comprime corpus amictu,  
Quo cingunt se more nurus quas Gallia nutrit,  
Neu miserum infantem vitæ iam à limine torque  
Crudelis, gracili dum te præbere videndam  
Corpore aues, pænasque tui luit ille furoris.  
Nec tibi non etiam ipsa nocet, corpusque coactum  
Ledis, & hinc illum grauiora prioribus vrgent  
Usque mala in fontem, quando ipso in ventre necesse est  
Matris ut affectus proles captiua sequatur.*

*Ergo tibi ratio curandi prorsus habenda est  
Corporis, inclusum gestas dum corpore fœtum.  
Et quoniam morbis animi tanguntur & ipsa  
Corpora, nempe alio Naturæ abducta facultas  
Cum vacat, & solito prohibetur munere fungi,  
Vnde intemperies, crudique grauiissima succi  
Nascuntur damna, & membrorum fœdera soluum,  
Vince æstus animi, nec te immoderata cupido  
Tristitiæ sue, metusue agitent, aut noxia sepe  
Gaudia, & infirmam turbant quæ plurima mentem.  
Sed semper placidum traducas leniter æuum,  
Quæ potes, & placidi custos blandissimus æui  
Præbeat in vacuo facilem se pectore somnus:  
Ille quidem haud nimio torpentia tempore membra  
Qui teneat, sed enim quantum satis esse videbis*

Vtere, dum fessos recreauerit optimus artus,  
 Pellaturque labore quies, labor ipse quieti  
 Cedat, & alternis ambo sua munera præstent.  
 Nec nulla interea nimia sunt damna quietis,  
 Quippe ubi & obstructas vitioso sanguine Venas  
 Implet, & ingentes humorum colligit imbres,  
 Ac viuum densa restinguit mole calorem.  
 Nonne vidēs crassus residet quæ pigra lacunis,  
 Vt putrescat aqua & fœtentem exsuscitet auram,  
 Lucida sed vitreo quæ flumine labitur vnda.  
 Sufficiat blandos in pocula grata liquores?  
 Quare aliquo penitus tibi membra labore fouenda.  
 Motus enim, motûque calor stimulatus ab ipso  
 Absumet facile graue si quid, inutile si quid  
 Officiat, prolesque nouas cum erumpet in auras  
 Te leuiora manent partus tormenta, neque illam  
 Colluuiēs humorum ingens retinebit euntem,  
 Et valida integro superabunt corpore vires,  
 Enit̃ quibus, & maturum carcere fœtum,  
 Tēque simul longa valeas exoluere cura.

Ille tamen labor esto leuis quemcunque capeſſes,  
 Franget enim haud dubiè nimius, viresque resoluet,  
 Quo fit vt aſſuetis interdixiſſe choreis  
 Inducar facile, hæc nuribus licet vna voluptas,  
 Omnibus vna ferè eſt, omniſque atate palæſtra:  
 Fors olim toleranda, grauis dum more Sabina,  
 Seu ludos, poſitis agerent ſeu ſeria ludis,

Perpetuum haud vlla temerabant parte pudorem,  
Atque ipsi intererat seruata modestia ludo.  
Nunc modus omnis abest, penitusque insana puellas  
Vis agit Euantes, mentisque intercipit vsum.  
Bacchari credas, neque cum vinosa Lyæi  
Festa vocant alio lymphata furore Mimallon  
Membra mouet, pedibusque sonantia percutit arua.  
Neu satis exemplis non conuenientibus vtar,  
Crediderim obscæno si qua olim turba Priapo  
Sacra fuit, crotalis vbi cymbala mista crepabant,  
Turpia non alio vibrari corpora motu.  
Sic totæ exiliunt, sic dum vesania feruet  
Penè sua excutiunt nudis velamina membris,  
Sollicitantque viros, connexaque brachia stringunt,  
Atque ipsa ante oculos tantum non corpora miscent  
(Proh pudor!) & Venerem interea, quæ pestis acerbæ  
Prægnantum esse solet, stimulo pungente laceffunt.  
Vos venerem immodicam, ô matres, si cura salutis,  
Vos venerem vitate: sibi nocet ipsa, suumque  
Sæpe retextit opus: cordati qualis Vlyssis  
Vxor amatorum turbam dum fallit hiantem.  
Hinc igitur nimij dum ingens violentia saltus,  
Illinc & prurigo suas agit improba partes,  
Sæpe fit vt crudo mater vexetur abortu.  
Haud equidem certè immeritò: sed enim ille misellus  
Quid meruit, fædi penitus qui criminis insons,  
Necdum vlla ignoti traxit contagia mundi?

Qui fortasse (potens ut Sors agit omnia) magnæ  
Summa olim caperet victor moderamina terræ,  
Aut etiam arcanas naturæ querere causas  
Doctus, inaccessumque animo peruadere cælum  
Spargeret ingentem studiis illustribus orbem:  
Fata modò impleret, neque in ipsis poneret orsis,  
Quam nequedum accepit materno crimine vitam.  
Utque in plebeio lateat sine nomine cæno,  
Ille tamen tua, si nescis, quem viscera portant,  
Ille Dei mundum imperio torquentis imago est,  
Omnia cui parent animalia; cuius in usum  
Quicquid alunt freta, quicquid humusq; & mobilis àër  
Formauit pater, & se illi submittere iussit.  
Et tu depositum hoc non tota mente cauebis  
Ne pereat, quo non aliud præstantius ullum est?

Quod superest, tibi sit potus, tibi cura legendi  
Summa cibi, & quodcunque legis tamen utere parcè.  
Improba ne forte ingluuius etiam optima quæ sunt  
Corrumpat, nimia infirmus cum mole laboret  
Ventriculus, nec iam possit satis esse coquendo.  
Cruda nocent genus omne, nocent & salsa, malâmque  
Si quid amaritiem sapit, ingratumque palato est.  
Mollior esca eadem est melior, Cythereia qualis  
Ales, & ingenij faciens ad acumina turtur,  
Perdicesque, capique, & cui dat nomina Phasis,  
Et vitulus tener, & lactens signe cornibus hædus.  
Quod si larga sinu tellus quæ diuite promit

Oblectant minüs, & mutari prona voluntas  
Appetit æquoreis veniunt quæ obsonia regnis;  
Mollis arenosa potiùs queratur ab vnda,  
Saxa inter, refluxoque alti de litore ponti,  
Quàm qui limoso lentescit flumine piscis  
Crassior, & visco torpentes oblinat artus.  
Pelle sitim lymphis, vel amico pelle Lyæo,  
(Præstat enim) et tamẽ hunc multis quoq; dilue lymphis.  
Nec minus arboreis molles cum sætibus herbæ  
Arida sæpe iuvant iucundo corpora succo,  
Sit modò delectus, semperque tenendus in omni  
Re modus: at servare modum vix contigit ulli,  
Vix grauidæ possunt animos compescere matres.  
Sæpe etiam has monstrosa fames incessit edendi  
Non tantùm viridi immaturos cortice fructus,  
Vilia sed lapidum ramenta, lutumque, simumque,  
Et cinerem immundum, & carioli fragmina trunci,  
Et quæ præterea vitiosa cibaria mille  
Naturæ haud quadrant, aliòsque parantur in usus.  
Vidi ego quæ trepidis cristatæ matris ab alis  
Nequicquam arguto crepitantes gutture pullos  
Corriperetque ferox, & crudos protinus artus  
(Sicut erant) avido crudeliter ore voraret.  
Spumabant labra, & mistis cum sanguine plumis  
Squallens in gremium sanies horrenda cadebat.  
Non alia est torvæ facies truculenta leonæ,  
Cum pellit rabiosa famem, rictuque cruento



*Sanguinolenta vorat Libykos armenta per agros.*

*Dic mihi, Phæbe parens, tanti quæ caussa furoris,  
Quòue modo (nam scire tuum est) quâue artè mederi  
Sit fas, ne miseram perdat cum prole parentem.  
Et vos Hippocratis florentes patris alumni,  
Felices animæ, sese quibus optima pandit  
Natura, & certas morborum noscere causas  
Indulget, fragilique hominum succurrere genti,  
Ne vestris adytis sacrum prohibete Poëtam,  
Cui mouet idem ille ora deus, quem vestra verentur  
Sacra vnum patrémque lyxæ, authorémque medendi.*

*Principio, quæcunque vigent, fusaque per artus  
Augescunt anima, atque aliquo de semine manant,  
Vitale auxilium & recreantia pabula poscunt.  
Atque equidem ipsa suo hærentes in corpore stirpes  
Blanda fouet tellus, & (ne modò desit amici  
Aura poli) præsens alimentum haud parca ministrat  
Radicum officio, trahitur quibus utilis humor  
Paulatim, & toto hinc plantæ se corpore miscet:  
Vnde suus foliis vigor, & viridantia rident  
Gramina, & aërias frondens subit arbor ad auras.  
Quæ verò propriis animalia nata moueri  
Sensibus, haud ullis affixa in sedibus hærent,  
Cum diuisa solo vitalem hinc carpere rorem  
Non possint, aliunde petant alimenta necesse est.  
His ergo illa parens longè ditissima rerum  
Pro locuplete penæ ventrem Natura parauit,*



Hic ubi congestasque dapes, externaque condant  
Auxilia, infirmaque adsint in tempore sorti.  
Quippe etiam hinc tenues se membra in viuida Venæ  
Diffundunt, radicum instar, quibus ille ciborum  
It succus, fessamque instaurat sanguine vitam.  
Nec modus aut requies avidis ante omnia venis,  
Dum quicquid succi est sitis hauriat improba, & omnes  
Ventriculi consumat opes, vacuumque relinquat.  
Quinetiam absumptis opibus, mox impetit ipsum  
(Tantus amor) suetumque agrum disellit iniquo.  
Ille suis damnis dolet, optatumque ciborum  
Subsidium esuriens tanto in discrimine querit.  
Hinc ille est vacuo nascens in corpore sensus,  
Appetere est cuius proprium, quique acer inani  
Sese infert stomacho, & vescendi inspirat amorem.  
Cui si forte loco vitiosus inhereat humor,  
Protinus ipsa loci pro conditione libido  
Appetit & vitiosa, malique ab imagine pendet.  
Ergo ubi concepit mulier, quæque antè fluebant  
Mensstrua crescentis fœtus retinentur in usum,  
Ille tamen, donec firmarit tertia Phæbe,  
Vix horum exiguam potis est depascere partem,  
Quod reliquum est, superas parteis ipsumque redundat  
In stomachum, & prava suffusum vligine tingit.  
Non aliter quàm si opposito pater obice Clampus  
In caput ipse suum refluat, vicinaque latè  
Oblinat exundans informi iugera limo.

Atque ita cū imbutus corrupto humore laboret  
Pregnantum Stomachus, vitiosa hunc sæpe libido  
Corripit, vnde malum Graijs hoc Citta repertum  
Exoritur (nostri Picam vertere Vocantes)  
Quando Vteri mulier sub primum sæpe trimestre  
Multa inhiat, cacòque furore ardescit edendi  
Quæ neque congrua sunt, neque rectus postulat vsus.  
Ni faciat, desiderij (mirabile dictu)  
Hæreat insigne infanti, maculamque relinquat.  
Quòdque magis mirere, auido dum pectore flagrat,  
Qua se parte sui mulier malè prouida fortè  
Scalpserit, ipse sui expressam feret editus infans  
In simili quoque parte notam: grauis vnde puellis  
Sæpe dolor, nuneo quas turpis in ore figura  
Fædat, & in pulcro deformes corpore naui.

Et quoniam secreta semel recludere cœpit  
Se natura mihi, libet hanc euoluere totam,  
Insignisque notæ veras depromere caussas.  
Hanc utique optati vehemens molitur imago,  
Tota vbi vis collecta animæ est, cui plurima seruit  
Spirituum turba, & partem glomeratur ad illam,  
Qua tactus ciet, atque rei secum ipsa cupitæ  
Quam gerit effigiem subiecto in sanguine figit.  
Dumque adeo clausa fœtus latet abditus aluo,  
Maternòque idem est illi cum sanguine sanguis,  
Singula ab alterutro conspirant corpore membra:  
Quo fit vt in matrem pariter, matrísque puellum

*Spiritus intus agat : sed cùm sit durior illi,  
Mollior huic cutis, obsequitur, solusque tenellæ  
More capit ceræ facilis quamcunque figuram.*

*Nunc age, quæ gravidas tanto à discrimine matres  
Vindictæ ars simul & pueros, aduerte, docebo.*

*Multum adeò prodest (modò ne sint illa venenum  
Quæ cupit impatiens mulier) concedere tandem  
Nonnihil, & misero paulum indulgere furori:  
Dum sit enim voti compos, fruiturque petito  
Leta cibo, hinc totum pertentant dulcia corpus  
Gaudia, nativumque agitant per membra calorem,  
Qui coquat humorum omne genus, factoque meatu  
Dissipet in crudo quod corpore lentius hæret.  
Deinde acida imprimis, vel acerba, vel acria cum sint  
Quæ ferme optantur, stomachum his abstergere quidni  
Fas sit, & infixam pituitæ auellere pestem?  
Capparis ante omnes, & amara succus oliuæ,  
Quæque micant rutilis duro sub cortice granis  
Punica mala iuuant, & quæ tulit inclyta Crete.  
Quòd si adbibenda placent & pharmaca, tu licet illis  
Utare, & lapidem moucas haud segniter omnem,  
Dummodo non desit consulti fida medentis  
Cura tibi : at nugas procul amolitor anileis.*

*Omni bus his cecam poteris depellere pestem,  
Et secunda mali partem expectare futurum.  
Qui cùm aderit, magna ter voce vocare potentem  
Lucinam esto memor, totaque incumbere cura*

*Vt saluum emittas nullo discrimine fœtum.*

*Adsit & obstetrix, quæ voce, manûque laborem  
Subleuet, & socio contendat sedula nixu.*

*Tum leni ventrem vnguento, genitaliâque ipsa  
Oblinat, & blando resoluta tepore relaxet  
Claustra vteri, & puero venienti limina pandat.*

*At tu, siue toro decumbes, siue patenti  
Sessilis hærebis cathedræ ( quippe vtraque tuta  
Est via ) quo te cunque loco paritura locabis,  
Forti vince animo quæ tormina multa vigorem  
Frangere consuerunt, partûmque dolore morari.  
Quod si tantæ alacri superent in corpore vires,  
Stare etiam vt pedibus valeas, erit optima stanti  
Conditio: nam sic patula planissima porta  
Fit via, qua nullo anfractu nouus exeat infans.  
Tu modo diductis extremam cruribus aluum,  
Et genibus paulum inflexis expandere porrò  
Ne dubita, rigidisque intendere brachia neruis  
Interea, & valido subnixa incumbere fulcro.  
Tantæ molis erit perituram educere prolem!*

*Has autem meruit primæ vesana parentis  
Ambitio pœnas, & iusti numinis iram.  
Ille etenim verbo omnipotens qui condidit vno  
Omnia fons rerum atque cui nascentis origo,  
Cum mare, cum pictum numerofo sidere calum,  
Libratamque suo fundasset pondere terram,  
Et quacunque vigent ex ipsa orientia terra,*

*Omnibus*

Omnibus vnum hominem præfecerat, omnia solus  
Qui regeret, mundumque sua ditione teneret.  
Huic etiam dulcis rerum comes addita, quicuna  
Florentis vitæ plenissima gaudia tutò  
Partiri, & longas posset componere luces.

Hortus erat, rosei quæ lucida pandit Eoi  
Se regio (Edenem dixerunt nomine patres)  
Dulcibus & pomis, & dulcibus utilis herbis.  
Lenis ubi Zephyri molles tranquilla per umbras  
Aura susurrabat semper, cæloque sereno  
Perpetuum tepidi seruabat Veris honorem.  
Hanc sedem, hæc illis viridaria leta benignus  
Indulsit genitor, lectosque induxit in agros  
Primum hominem, verbis simul hunc affatus amicis;

I, decus atque operis meritò summa vltima nostri;  
Quæ tibi nunc habitare damus felicia rura  
Ingredere, & nostris actutum vescere donis,  
Quæ fecunda tibi, & male-grati nescia cultus  
Terra feret, caræ iucunda in munera vitæ.  
Tantum (si qua tuæ tangit te cura salutis)  
Huic vni memorem iubeo te parcere pomo.  
Dixit, & ostendit pendentes arbore fætus,  
Quorum à viuifico rerum orta scientia succo  
Manabat primum, & studia inconcessa docebat.

Ille Dei monitis & amico numine plenus  
Ibat, & vnanima cum compare letus agebat;  
Vna illis cura ætherium laudare parentem;

Oblatisque bonis & libertate fruisce.

Nondum turpe scelus, sceleris nec debita merces  
Prodierat labor, & queruli denso agmine morbi,  
Et curæ vigiles, & ineuitabile fatum.

Sed simplex animos candor, sed molle fovebat  
Corpus certa quies, & vtrinque erat aqua voluptas.  
Felicis ambo, nisi iam tum infesta maligni  
Daemonis ars nullum humanis durabile rebus  
Esse bonum, nullam pateretur viuere pacem.

Hos ille immemores violato ut fœdere perdat,  
Aggreditur vaser, atque dolos se vertit ad omneis.  
Ac velut aduersis fœtam legionibus arcem  
Captat vbi egregius tacito molimine ductor,  
Obseruat muros oculis, & singula lustrat,  
Num qua parte minus firmo se mœnia vallo  
Militibus præstent cupidis, aditusque patefcat,  
Atque illuc toto irrupens conamine tendit.  
Sic hominum insidians generi teterrimus hostis,  
Pectore quod mulier fragili magis esset, ab illa  
Ordiri, & primum placuit facere inde periculum.

Nec mora, cerulei forma se callidus anguis  
Disimulat: non ille ferus qui stridula vibres  
Sibila; tabificœ minax liuore tumescat:  
Sed blando sensim irrepens per gramina lapsus  
Arboris infaustæ ramis fatalibus hæsit  
Arduus, implicito per mille volumina trunco.  
Tum molles aditus & tempora fraudibus apta  
Legit, & humanis demum sic vocibus insit,

Nam quis te mulier tam vanus detinet error,  
 Ut quos natura dedit indulgentia fructus  
 Ipsa tibi inuideas demens, vescique recuses?  
 Egregium verò imperium, memorandaque iura  
 Ille parens, vni cui cuncta accepta refertis,  
 Atque tibi, atque tuo concesserit ante marito,  
 Si vobis genus omne auium, genus omne ferarum;  
 Atque adeò ingentem penitus subiecerit orbem:  
 Vos autem rerum dominos subiecerit vni  
 Arboris intactæ pomo, nec mandere sit fas.  
 Cuius partem imò tantum si ad moueris ori,  
 Protinus obscuram videas vanescere nubem  
 Ex oculis, victæque iubar caligine oriri,  
 Vnde boni atque mali diuina scientia vobis  
 Prodeat, insignesque nouo iam lumine spargat.  
 Atque hinc ( si nescis ) iniusti numinis illa  
 Inuidia est, dum vos consortes laudis habere  
 Abnuat, & pomis ideo præstantibus arcet.  
 At tu pone metus, & inania despice iussa,  
 ( Nam potes ) erectoque iugum semel excute collo.  
 Aspicias ut prona demissus ab arbore factus  
 Se virides inter tibi ramos offerat vltro  
 Arridens, tangique tuo desideret ore?  
 Carpe age, & oblatus respue muneris usum.

Sic ait, occultoque implet muliebri veneno  
 Pectus, & illicitum vescendi inspirat amorem.  
 Illa leui iam tum ingenio male-provida parens  
 Ocyus & vetito sese contaminat esu.



*Nec satis hoc: simili incautum capit arte maritum,  
Et vocat in partem culpæ. exitiis ambo  
Indulgent epulis miseri, numénque lacesunt.  
Atque hinc prima mali ventura in secula labe,  
Dum pater indignans hæc lumine cernit iniquo  
Omnia, & infandos vlcisci accingitur ausus.*

*Ergo florifero primùm expelluntur ab horto,  
Succeduntque solo tristi, & pro mitibus aruis  
Accipiunt duro fodiendam vomere terram.  
Hic ubi protinus irrumpunt asperissima in illos  
Quæque mala, & diræ circumstant undique pestes,  
Efferaque imprimis venturæ Mortis imago  
Imminet, & iam tum trepidantia pectora vexat.  
Nec spes ulla fugæ, nec amœna in septa reuerti  
Iam licet occludunt aditus in limine fratres  
Aligeri, & stricto venientibus ense minantur.*

*Vox etiam insensu tenebrosa è nube Tonantis  
Fulgure cum horrendo superas audita per auras,  
Quæ non tantùm illos, sed ab illis omne futurum  
Damnaret genus æternis pro crimine pænis.  
Atque adeo infelix tantorum causa malorum  
Supplicium luit hoc admissæ scæmina culpæ,  
Vt quoties pareret, parientem mille dolorum  
Vrgerent species, infestarentque pusillum  
Robur, & optati turbarent gaudia partus.*





SCÆVOLÆ  
SAMMARTHANI  
PÆDOTROPHIÆ  
LIBER SECVNDVS.



ED iam vtero exiuit, vagitūque  
oris acuto

Impleuit celis puer, auxiliumq̃ petiuit.

Vos agite ô similis miseratæ incommo-  
da sexus

Ferte simul vestram huc operam vestrumq̃ laborem

Ferte nurus, notæque alacres incumbite cura.

Pars fessam optato genitricem imponite lecto,

Pars tenerum infantem tepidis inuoluite pannis,

Hæc nitidum statuât repetenda in balnea labrum,

Illâ paret cunas, opere omnis ferueat ædes.

Tūque adeò gnauæ dux præstantissima turba,

Tu fida obstetrix educit ante omnia fœtus

Scinde vigil media qui pendulus exit ab aluo

Omphalus, & turpi noua pondere membra fatigat.

Vtilis antè quidem, dum nutrimenta per illum

Captaret puer, in partes & dideret omnes:

Nunc autem informis, penitusque superflua toto

Corpore pars, postquam iucundæ in munera lucis  
 Peruenit, & melior descendit suppetit usus.  
 Ne tamen accepto puerilis vulnere sanguis  
 Profluat, aut tenues vaneſcat multus in auras  
 Spiritus, augendæ cui vis est insita vita,  
 Stringe prius lana molli, cæsum inde recentis  
 Colline mastiches & olentis pulcre myrrhæ.

Hac olim, ut perhibent, hæserunt parte gemelli  
 Fœmina virque simul, duplicique in corpore corpus  
 Vnum erat: exempto dehinc singula corpora nexu  
 Quæque suos habuere artus & libera membra.  
 Usque adeò humana nulla est constantia sortis.

Nec minùs interea iuuat hîc prudenter acuto  
 Seruare obtutus quæ plurima signa futuram  
 Nascentis pueri vitam manifesta notabunt.  
 Debile nescio quid querulo si vagiet ore  
 Languidus, & lenti fugitiua subinde facesset  
 Vis animi, hinc illum inualido de semine cretum  
 Conyctas licet, aut captiuum alimenta bibisse  
 Noxia, materna vel cum prodiret ab aluo  
 Collisum nimis infirmos nisi bus artus.  
 Omnia quæ instantis præſagia certa pericli  
 Matribus esse solent. tu fessa amplectere amico  
 Membra sinu, infestumque cæue pro tempore calum.  
 Si sit hiems, succede foco: si seniat estas,  
 Quere leni Zephyro loca peruias, & vitale præſens  
 Antidotum interea puerilibus insere labris.

*Quale quod inuentum est magni memorabile Regis,  
Pontica quo vixit Virtus, multosque per annos  
Romuleum ancipiti remorata est Marte triumphum.*

*Nec frustra faciunt qui dulci mollia vino  
Labra rigant, vino antidotum vix certius Vllum est  
Tu verò faciem si languescientis anhelò  
Ore foues, animaque tepens afflante vaporas,  
Forsitan hac illi ante omnes ratione mederi,  
Collapsūque animae possis recreare vigorem.  
Quoque magis patuli se temperet halitus oris,  
Quam prius incipias lenissima pectore flabra  
Ducere, & in pueri torpentes mittere vultus,  
Cinnama, vel si quid, quàm cinnama suauius vsquā est  
Dente tere, & purum hinc fragrantior aëra mulce.*

*Quae si nil prosunt, paruoque à corpore vires  
Abscedunt magis atque magis, penitusque fatiscunt,  
Haud dubiè pallens ipso iam in limine Parca  
Instat, & horrifico venientem destinat Orco.  
Quem tu cunque illi impendes studiosa laborem  
Effluet incassum, & spem euentu eludet inani.  
Sin vitalis erit partus, iucundaque vita  
Nutrimenta aliquo laterum iam robore poscet,  
Eia age ne grato incumbens hic parce labori.*

*Ac primum quoniam immundo de carcere Ventris  
Contraxit toto haerentes in corpore sordes,  
Balnea sunt adhibenda, quibus purgata colorem  
Accipiat cutis, & posito squalore nitefcet.*

Non quo more tamen ( si verà est fama ) solebant  
 Germani veteres, rigido gens vna labori  
 Dedita, quæ teneris Martem spirabat ab annis.  
 Namque recens natos, matrisque à ventre calentes  
 Protinus in gelido glacialis gurgite Rheni  
 ( Haud secus ac viuo candens in flumine ferrum )  
 Mergebant, calique minas, inimicæque mihi  
 Frigora Naturæ à prima iam ætate docebant.  
 Spernere, & humanos durare immaniter artus.  
 Quod quicumque pati potuere, neque algida membra  
 Descriuit subitò viuus calor, ilicet illos  
 Caucasæis ortos de rupibus esse fatendum est.  
 Non illis ego sæmineis concedere mammas  
 Sustineam: tales Gangetica Tigris alumnos  
 Vendicat, & duris gestit nutrire sub antris.  
 Tolle ferum morem, & meliores elige ritus.  
 Ipsa etiam doctis iamdudum exculta Camænis  
 Hunc fugit, atque animos Germania damnat auorum.  
 Quàm melius tepida infantem lustraueris unda!  
 Atque equidem hæc satis est, nec me non iudice multi  
 Quæ miscere solent contemnere cætera debes.  
 Tantum, si tenero vis fortè illata puello  
 Liuentes inter pariendum oppresserit artus,  
 Adde rosas molles, & amœni Veris amicam  
 Anthemida, & viridi nascentem in cortice muscum:  
 Et quæ præterea membris magis apta leuandis  
 Esse solent, nimio si quando labore grauescunt.

*Interèa exiguas paruis cum naribus aures,  
 Atque oculos, ipsūque manu purgare palatum  
 Expedit, & leni digitorum abstergere pressu,  
 Atque rudes animæ imprimis aperire meatus.  
 Dūmque adeò egelidis resoluta liquoribus ipsa  
 Mollescunt membra, & dedunt se mitibus Vltro  
 Obsequiis, lentæ in morem tu flectere cera  
 Sis mentor, & recta quæque exæquare figura  
 Perpoliens, ut primi hominis cū duceret olim  
 Diuinam effigiem (quisquis fuit ille Prometheus)  
 Spirantem artificii læuabat pollice terram.  
 Ni facis, incassum hoc studio tentabis inani,  
 Postquam obduruerint annis venientibus artus.*

*Quinetiam tibi mox durari primula debet  
 Arte cutis, calido ne fortè recenter ab antro  
 Editis insueti frigus penetrabile cali  
 Non ferat, & totis miser artubus horreat infans.  
 Ceu Libyes olim sitienti è rure viator  
 Cū petit Arctoois mutato si dere tractus,  
 Horret ad algorem insolitum, & Borealia flabra  
 Ferre nequit, denso nisi tegmine muniat artus.  
 Ergo cutem ut raram post mollia balnea densas,  
 Hanc totam salis albiduli continge minuto  
 Puluere, nec prima interèa cunabula desint,  
 Linteæque & panni, & leuibus super addita pannis  
 Fascia, multiplici quæ molle volumine corpus  
 Vinciat, æqualique super discrimine serpat.*

Iamque fatigatum tantisque laboribus ægrum  
 Tempus erat puppim optato permittere somno.  
 Sed quia difficilem ieiuno ventre soporem  
 Esse docent vacuo errantes in corpore vana  
 Umbrarum species, & inania somnia veri,  
 Pasce aliquo prius ora cibo: neque dum tamen ista  
 Sit ratio, ut quod alat multum spectare labores.  
 Elige quod purget potius, præque omnibus unum  
 Elige mellificæ vario quem è flore volucres  
 Diuinum aërij concinnant roris honorem.  
 Nec tantum Hybla tibi, nec tantum pulcher Hymettus,  
 Aut quæ melliferas felix alit India cannas  
 Mel dabit eximium & caelesti munere pascet.  
 Ipsa etiam ex omni quæ parte beata superbit  
 Gallia ( præsertim quæ diti Martius ora  
 Dat nomen Narbo & Genium cum nomine seruat)  
 Sufficiet, quo non aliæ preciosius vllum  
 Fundunt nectar apes, niuei seu cura coloris,  
 Sine saporis erit qui sacchara dulcia vincat.  
 Corpore purgato, superest mandare quieti,  
 Mollior & stratis ad somnum imponere cunis.  
 Tu verò pariter fuge frigoris atque caloris  
 Expertem thalamum: nimio de frigore manant  
 Rheumata, spiritibus calor officit, omnia iniquo  
 Sunt extrema loco, medio via tramite tuta est.  
 At muliebre modo ingenium cum nesciat vti,  
 Parte ferè hac peccare solet, dum infantis ineptam

Curam agit, ut plusquam satis est loca frigida vitet  
Semper, & immodico noua membra calore resoluat.  
Vnde graues matrum gemitus, cum dulcis adempta  
Spes perit actutum generis, Viduasque relinquit.

Auctus erat sexus melioris prole cupita

Franciscus, quem magnanimi gens Martia Bruti  
Extremum est venerata ducem, quæ flumine largo  
Labitur Andinæ Ligeris fecunda relinquens  
Arua plage, pontiumque subit pulcherrimus amnis  
Successuque nouo lati sacra templa parentes,  
Et celebres donis onerabant grandibus aris,  
Haredemque senes patri spectare iuuabat  
Imperij, & seros quod nomen abibat in annos.

At puerum nimia dum sedulitate tuetur  
Cæcus amor, neu sopitum fortè aspera ledant  
Frigora, liberiore frui vetat aëris haustu,  
Perdidit heu miserum infelix! & mersit acerbo  
Funere, spemque simul seruandi nominis omen  
Amisit: quippe orba illis superauit in aula  
Fæminæ tantum neglecto ex ordine sexus  
Externos olim soboles aditura Hymenæos.  
Nempe importuni sensim traxere calores  
Spirituum intus quicquid erat, vitamque fouebat.  
Qui dum abeunt, viui simul eduxere caloris  
Natiuos ignes, neque iam vdi tempore somni  
Affuit infirmo stomacho satis vnde caleret:  
Atque ita cum graciles corrupto sanguine venat

*Crudior impleret succus, fugitina reliquit  
Languidulos artus anima, in ventó que recessit.*

*Illum adeò indigna claudentem lumina morte  
Oceanus pater Vt vicino è gurgite vidit,  
Ingemuit, luctumque duci comitatus amici  
Non tenuit lacrymas Deus, indulisitque dolori.  
Illum & Armoricæ fusæ per tristia Nymphæ  
Litora lugubri cum carmine defleuerunt.  
De quibus Vna, Quid ô tamen hæc lamenta sorores  
Funditis, & vano turpatis lumina fletu?  
Scitis enim ( nec cæruleas cælestia fallunt  
Fata Deus ) quanta hoc damno sors æqua rependat  
Commoda, se quibus Armoricum super ardua nomen  
Astra ferat, nostrumque nouis successibus æquor  
Crescat, & Adriacis meritò se præferat undis.  
Nempe dies erit, elato cum sola superstes  
Anna patri, egregio pulcherrima corpore Nymphæ  
Francorum augustam Regem felicibus Vrat  
Ignibus, & tanti mereatur coniugis esse  
Digna comes, seque illius sub iura, suumque  
Imperium placito populorum fœdere tradat.  
Vnde genus, mistæque olim de gente nepotes  
Subcrescent Vallæsiadæ, longè optima bello  
Pectora, nec sacri non obseruantia Phæbi:  
Quorum per varios virtus inuicta labores  
Antiquæ Ausoniæ tumidos premet amula fastus,  
Totamque ipsa suo subdet sibi tempore terram.*



*Et nos tantorum decorum, laudisque futurae  
Partem aliquam iuuat esse, neque hac mercede potenti  
Dotales pigeat Celtae seruire Britannos.*

*His dictis erecti animi, curaue remota.  
Ille tamen iacet interca, tenerosque per artus  
Marcescit, flos ut nimio deiectus ab imbri,  
Quem gremio vixdum ediderat mitissima tellus.*

*Ergo, ne similis tua casus gaudia turbet,  
Ducentem placidos exili pectore somnos  
Ne penitus prohibe infantem felicibus auris.  
Dum porro ducit somnos, age prouida mater,  
Corpore quos toto partus fecere labores  
Paulatim requie blanda compone tumultus.  
Ut iam experrectum, lactisque alimenta petentem  
Tutius ipsa tuo non ingrata vbera pascas.  
Donec enim fuerit luxatis reddita membris  
Temperies, nunquam id tutò prestare licebit.*

*Nec verò, nisi iam pietas in pectore nulla est,  
Languida sic caecae caligant lumina mentis,  
Ut fidei maius alienae pignus alendum  
Credere, quòdque negas mater, venalibus illud  
Sperandum esse putes, demens, nutricis ab vlnis.  
Si tamen optato prohiberis munere fungi,  
Siue quòd aegra negas oneri satis esse ferendo,  
Siue quòd ipse dolet puer, & fortasse verendum est  
Morbida ne infirmi ledant contagia matrem,  
Qua tibi sit nutrix aliunde petenda docebo.*

Elige quæ media est inter iuuenemque senemque:  
 Quæ gracilis, nec macra tamen: cui viuulus oris  
 Est nitor, & sano veniens in corpore robur:  
 Brachia longa, patens pectus, procerâque ceruix,  
 Quæque rubent teretes extanti tubere mammae,  
 Unde pluit niuei quantum satis imbris, & illi  
 Delectus suus est, ratioque haud omnibus vna.  
 Optimus est dulcis lactis sapor, optimus albi  
 Est color, ingratum fugio quod spirat odorem,  
 Et quod, si vngue probes, aut crassum lentius hæret,  
 Aut fluidum cadit. illud item memor aspice pondus  
 Ne nutrix gerat, exacti neu tempora fœtus  
 Longè absint, neu crudum agra proiecerit aluo:  
 Denique non animo, non corpore sordida honestè  
 Sese habeat, durumque hilari fuget ore rigorem.

Forsitan & puerum procul amandabis ad illam.  
 Nempe tibi infirmæ ætatis ne incommoda mille  
 Suaues abrum pant somnos & gaudia turbent.  
 At saltem, nisi iam affectus planè exigit omnes,  
 Quæ misere soboli carpenda sit æris aura,  
 Querere ne pigeat matrem, etatque tenellæ  
 Prospicere, atque grauis vitare pericula celi.  
 Quale fere est quæ pigra palus, limosaque circum  
 Stagna sedent, crassasque exhalant fumida nubes.  
 Sed neque tuta satis domus, optandæ penates  
 Hic vbi sideri radiis malè peruia Phœbi  
 Connallis densos inter iacet infima colles.

*Illa placet, campi quæ sese attollit aperto  
 Æquore, cui ridet tranquillis æura serenis,  
 Cuius & Eoa cùm primum emerſit ab unda  
 Sol nouus albenti lucentes manè fenestras  
 Intrat, & aurato perfundit lumine tectum.*

*At quacunque noui curam meditare puelli,  
 Seu mater, seu tu nutrix aliunde petita es,  
 Abstineas Venere & Baccho, nec iniqua laborum  
 Tædia, nec tristes animi non effuge curas.  
 Ne tamen interea nimia ne crede quieti,  
 Lata sed exercee moderata membra palaestra,  
 Et virides interdum hortos loca dulcibus auris  
 Grata pete, ante epulas & primæ tempora mensæ.  
 Nec pudeat famulus inter secreta latentem  
 Munia obire domi, seu molles sternere lectos,  
 Seu sit opus vili purgatam fursure massam  
 Puluerea in mætra nudis versare lacertis,  
 Aut tenues stupas, aut album pectere linum.*

*Cùm verò accinges te operi, laticemque recludes  
 Dulcissimum, teneroque alimenta parabis alumno,  
 Primula ne infelix ad pocula nauseet infans,  
 Si quæ fortè vdo contractæ à tubere sordes  
 Infecerè sinum, has tepidis ante omnia lymphis  
 Elue, quòdque tibi manabit ab ubere primum  
 Procyce lac: primi iactura facillima lactis.  
 Quippe cutis summa extremis quod partibus hærens  
 Longius à vino natiui fonte caloris*

Distat, & impuro muceſcit inutile ſucco.  
 Quoque rudem edoceas magis, ignarumque libendi,  
 Rore riga niveo inuitans, & mollia in ora  
 Fontibus è geminis purum eiaculari liquorem:  
 Arripiet mox ipſe auidis libata labellis  
 Pocula: neu parua, noua dum Vix incipit ætas,  
 Deficiant vires, & fruſtra optata capeſſant,  
 Proſuerit leni turgentes pollice mammas  
 Interea premere, auxiliũque afferre trahenti.

Non tamen vt penitus largo ſe proluat hauſtu  
 Crediderim fas eſſe: epulas moderare fluenteis,  
 Et conceſſa nega, & ruruſum concede negata  
 Vbera, paulatimque auidum compeſce morando.  
 Qualiter accipitrem dum ſedulus educat olim  
 Siue Rhodi, ſiue æquoreus celſæ incola Crætes  
 Paſtum interpellat remorans, quãſque obtulit auferẽ,  
 Ablatãque ſubinde dapes & pabula reddit:  
 Ne forte immodica volucris ſe ingurgitet ardens  
 Ingluuiẽ, & bene Vix guſtatam deuoret eſcam.

Præterea vigili ſtudio perpende quid ætas  
 Quæque ferat, quid temperies non omnibus vna.  
 Nempe rēcens natis primoque fruẽtibus æuo,  
 Aut quibus eſt tenue infirma compagine robur  
 Parcius indulgere velim, quàm pluſcula ſi ſint  
 Tempora, & in vegeto non deſint corpore vires.  
 Nec tibi quoque die lactandi certa puelli  
 Tempora præſcribo: ipſa ſibi Natura magiſtra eſt,

Hanc

Hanc sequere, & quoties queruli vagitibus oris  
 Poscet opem miser, huic fer opem haud inuita roganti.  
 Nec pigeat strophio toties nudare soluto  
 Rorantes mammas, & te præbere bibendam.

Non illum non vsque tuo sola vbera pascēs;  
 Adueniet tempus, nec te mora longa manebit,  
 Postquam Luna solum bis quarta impleuerit orbem;  
 Cum primi incipient crescenti emergere dentes,  
 Qui solidas adhibere epulas, lactique subinde  
 Parcere, & alternis pastum variare monebunt.

Hic autem grauib; multumque Valentibus Vti  
 Nolo cibus, molli stomacho ne fortè tamultum  
 Commoueas, largo neu plena sanguine vena  
 Spirituum ocludant aditus, & corpora turbent.

Illa etiam suauis quæ sunt iucunda sapore  
 Sæpe nocent, blandæque ipsam dulcedine fallunt  
 Naturam, grati quæ tacta libidine succi  
 Quàm prius acceptam stomachus confecerit escam;  
 Arripit hanc auidè, & venas partitur in omnes.

Quid quod & in bilem facillè se dulcia vertunt;  
 Et varios generant vermes, nisi iustus eorum  
 Sit modus? at seruare modum mortalia nunquam  
 Ingenia, aut iustum quid sit perpendere norunt.  
 Cumque ferè tales cupidissimus appetat infans  
 Ore dapes, tenera his vltro corpuscula replent.

Illum ego mutati sub primula tempora victus  
 Lando cibum ante omnes, lacti quem noueris ipsi

*Per similem. neque enim subito quæcunque nouantur  
 Vsq̃ue adeò sunt tuta, nisi his assuescere discas  
 Arte aliqua, & mediis paulatim extrema petantur.  
 Hinc Vsum & liquidi commendant iuris, & ipso  
 Panem è iure probant, mollémque ante omnia pultem,  
 Sedula quam nutrix diluta lacte farina  
 Condit, & igne coquit, summóque subinde calentem  
 Attollit digito, & tepida flans temperat aura,  
 Vt patulo cupidi mox ingerat ore puelli.*

*Nec minus in tenues panem distringere micæ  
 Sæpe solent, pinguique aliquo seu iure placebit,  
 Seu lacte, aut oleo Græcæ nucis, aut butyro  
 Incôquere, & teneris epulandum inferre labellis:  
 Dum parue incipiant paulatim accedere vires,  
 Et solida carnis proffit vescentibus Vsus.  
 Quam nitido minuens cultello in frustra secabis  
 Tenuia, gingiuæque operam præbebis inermi.*

*Nunc ergo è geminis deducto fonte corymbis,  
 Nunc quesito aliunde cibo saturabis alumnum.  
 Cúmque tibi duplex pascendi copia largè  
 Suppetat, huic succurre lubens alimenta petenti,  
 Dummodo fallaci non decipiare querela:  
 Sæpè etenim non ipsa sitis, non ardor edendi,  
 Sed lacrymas crudis egri mouere dolores.  
 Ab ne pascendi teneat te tanta cupido,  
 Intempestiuus oneres vt debile corpus  
 Importuna cibus, & quod rerum optima nutrix*

*Crescentis vitæ Natura parauit ad vsus,  
 Perniciem in summam, & vitæ discrimina veritas.  
 Hinc etenim ingrati vomitus, & cætera secum  
 Quæ grauis apportat satias incommoda surgunt.*

*Ergo vide quanto à pastu iam tempore distes,  
 Num tumeat duro distentus pondere venter,  
 Crudus an albiduli saccati appareat humor.  
 Quæ tibi si comperta, licet puerilis ad aures  
 Usque sonet clamor, tamen hunc fuge pascere porro,  
 Donec confectas penitus deprnderis escas.*

*Nec nulla interea est moderati gratia fletus.  
 Purgat enim in cerebro si quid graue, si quid aquosum est:  
 Dumque animam pulmo pueri distentus anhelat,  
 Pectora dilatat clamor, viuumque calorem  
 Incendit stomacho, studiūque irritat edendi.  
 Ne tamen & nimio tenerum conamine corpus  
 Rumpat, & affectus animi iam sentiat agros,  
 Illum demulce oblectans, placidūque soporem  
 Concilia motis ad blandula carmina cunis.*

*Tu Verò grauis interea fuge damna veterni,  
 Tu fuge torporem, neque dulci si de veneno.  
 Scilicet hoc omni iam tum ratione cauendum est,  
 Paruula ne multo membra ex humore laborent.  
 Hinc ut manè nouo fugit sopor, humida laudant  
 Balnea, nec tantum his abigunt à corpore sordes,  
 Imbecilla quibus tenerè sese inquinat ætas,  
 Sed tenerum exercent corpus, dum creuerit infans,*



Et sua iam pedibus certis vestigia figat.

Nec minus inde agita, sublatâque mollibus Vlnis  
Interdum exerce leni corpuscula motu,  
Multa-hilari simul ore iocans: neque clausa reconde  
Vsque domi in latebris, sed apertas defer in auras,  
Dum nullæ sudo nebula, dum purior aether,  
Et nitidum lenes ludunt per inane Fauonj:

Vt calo & varia gauisus imagine rerum  
Assuescat luci puer, authorémque potentem,  
Quâ potis, admirans primis agnoscat ab annis.

Verum age, ne te vlla nō doctam in parte relinquam,  
Dicendum & noto lactantis ab ubere matris  
Tempore quo potius diuellere fas sit alumnum.  
Nulla quidem incertæ præscribi regula vitæ  
Certa potest, ita sors mutabilis omnia versat,  
Spēsque hominum dubias, & inania pectora ludit:  
Quod si sponte mea dy me componere curas  
Fortè sinant, fœda neque victa libidine nutritrix  
Intempestiuū turgescat pondere fœtus,  
Funere nec propero, nec abortis languida morbis  
Deficiat, sanè tenerum non ante puellum  
Ablactem, gremio altricis non antè reuellam,  
Quâm sua bis vertens vestigia fecerit annus.  
Tunc etenim paulò iam firmior incipit ætas,  
Tunc opus innatos nutrire valentiùs ignes,  
Et potiore cibo lactis mutare liquorem.

Ah quantos animi, quantos & corporis æstus



*Parue feres! quanto gemitu calum omne replebis,  
 Flebilis, ereptos cum suspirabis amores!  
 Non aliter vinclo sociata puella iugali,  
 Publica forte virum si res in bella vocauit  
 Longinqua iuuenum, & cupidis diuulsit ab Vlnis,  
 Amissæ desiderio dulcedinis agra,  
 Mæstoque absentis misere deperdita luctu  
 Liquitur in lacrymas, & questibus omnia complet.*

*Disce pati, puer: ætherias hac lege sub auras  
 Nascitur infelix hominum genus, ut mala semper  
 Dura ferat, tristisque in luctibus exigit annos.  
 Atque hoc (si memor es) iam tum te fata monebant,  
 Cum fessam exonerans decimo sub mense parentem  
 Signasti querulis primos vagitibus ortus.*

*Ergo modum ut possint venturo afferre dolori,  
 Se remouent oculis ac rarius vbera promunt,  
 Atque sui altrices paulatim obliuia præbent.  
 Sæpe etiam ingrato contingunt felle papillas,  
 Tristis ut à suctu sitientem auertat amaror,  
 Iamque alios adhibent potus, & lacte remoto  
 Prospiciunt aliunde, suus ne deferat humor  
 Corpora. nec verò me iudice mollibus annis  
 Conuenit igniti penetrabile nectar Iacchi.  
 Sed pure potius lymphæ liquor, unde receptæ  
 Mollescant epulæ stomacho, seseque resoluant,  
 In gracilesque fluant nullo discrimine Venas.*

*Nec mora iam Vegetum cernes adolescere corpus,*

*Iam signabit humum pedibus, iam reddere voces,  
Teque duce incipiet tum res, tum nomina rerum  
Discere, & ipse suas depromere pectore curas.*

*At quoniam ex affectu animi mortalia pendent  
Corpora, te si tangit honos crescentis alumni,  
Diuinum imprimis animum rege, nec sine porro  
Delabi in vitium, verget quo debilis ætas.*

*Quin magis ipso vsu Naturæ vt semina vincas,  
Lentum vrge, tristem exhilara, moderare calentem,  
Blandiciis non vi, ne dum contraria vertis  
In studia inuitum, simul ægra in tædia pellas.*

*Atque equidem egregiis ni Mars ferus obstrepat orsis,  
Et vetet inceptos longè producere cantus,  
Non erat hîc vati ratio solius habenda  
Corporis, at rectos etiam componere mœurs,  
Et meliorem hominis partem curare decebat.  
Hoc meus hortatu iam dudum exposcit amico  
Ille sui flos æui heroum è semine cretus  
Scaliger, vnanimi mecum quem fœdere iunxit  
Ipsa olim virtus teneris vtrique sub annis  
Culta diu, & nulla gaudentes fraude Camæna.*

*Scilicet & tempus veniet cùm talia dicam,  
Si modò grata meis aliquis Deus ocia rebus  
Afferet, & faciles venient ad vota sorores,  
Quæ me Pierio infantem lauere liquore,  
Necdum adeò tentatam vlli fœcunda tot inter  
Ingeria, & summos aluit quos Gallia vates*

Promisere mihi integra de fronde coronam.  
 Vix tamen interea quicquam sum grandius ausus.  
 Ecquis enim esse sua potuisset spontis iniquo  
 Tempore ciuili grauius intertadia belli?

Quippe simul solio infelix successit auito  
 Carolus, & fletu præsago regia tinxit  
 Sceptra puer regni auspiciis lugubribus usus,  
 Illicet infernis tristissima venit ab antris  
 Tisiphone, & ceco turbauit cuncta tumultu.  
 Cuius pars nonnulla fui, sic dura ferebat  
 Tempestas, rerumque vices, Phæbique remissus  
 Ardor, & in pretio quæ nunc erat altera laurus.  
 O quantum atatis damna intertalia, quantum  
 Ingenij nobis perit! dum incerta sequentes  
 Irrita nunc palpant fugitiuæ fœdera pacis,  
 Nunc infesta premunt rediuiui tempora belli!  
 Sic hieme in media, dubij si languida solis  
 Lumina fortè micant, minimo vix tempore durat  
 Fulgor, & incerto redeunt sua nubila celo.

Quid quod & illum, animæ pars qui dulcissima nostra  
 Nuper erat, quem ipsis oculis, ipsoque ferebam  
 Pectore, qui me oculis vnum qui mente ferebat,  
 Flore cui in medio (proh Iuppiter!) impia bella  
 Damonem rapuere? meas, carissime Damon,  
 Tecum delicias, mea tecum tota talisti  
 Gaudia, nec nostrum sine te iam vivere vita est.  
 Aspicis ut desiderio turbatus inani

Languida membra traham, festinatósque molesta  
 Ante diem incipiant canos accersere curæ?  
 Illa etiam quam tu quondam laudare solebas  
 Muta silet chelys, aut querulis si forte quid audeat  
 Carminibus, solum tua tristia fata retractat  
 Illacrymans, neque sanguinei discordia Martis  
 Prælia sic illam, tua quantum funera turbant.  
 Qualis ubi amissos caræ telluris honores  
 Imbribus hibernis defleuit nubilus æther,  
 Si quis in aprico seruetur flosculus horto,  
 Qui nondum infestas hiemes & frigora sensit,  
 Illum omnes fixis vnum admittunt ocellis  
 Lucentem, exactique subit noua veris imago:  
 Sic inter fœda impuri contagia secli  
 Castum illibata seruans probitatis amorem,  
 Antiquum niueis renouabas moribus æuum.  
 Cùmque tibi summos apud esset maxima reges  
 Gratia, tu carum interea fidumque sodalem  
 Ornabas bonum, & fortune in parte locabas.  
 Auspice te à rebus quæ mens aliena gerendis  
 Aonia longum desederat abdita silua,  
 Vtilis ipsa suo gaudet nunc munere fungi.  
 Hinc adeò me nec natalis linquere terræ  
 Dulce solum, & tenues mecum aduectare penates  
 Pictanum, huc quando me publica cura vocabat,  
 Nec stabilem electo piguit lare figere sedem.  
 Parce tamen desiderio suauissima parce

*Iuliadum tellus ( patrius nam te quoque nostri  
 Tangit amor ) faxo nobis te prima dedisse  
 Nunquam ut pœniteat iucundæ exordia lucis.  
 Te licet insigni popularis honore Macrinus  
 Ornarit pridem AEolia notissimus ille  
 Arte senex, Latiae qui per vestigia gentis  
 Primus ijt, lyricique fuit laus altera plectri:  
 Non tamen è nostro nullum tibi carmine nomen  
 Spero fore auspicihus superis: mea stamina tantum  
 Lanificæ ante diem parcant abrumpere Parca.  
 Iamque ( sed haud illi sum credulus ) inclyta Vatem  
 Gallia me dicit, patrio seu ludere tractu,  
 Siue per Ausoniae campos libet ire Camœnæ.  
 Tu modò ( nam famæ ius te penes omne perennis )  
 Grata faue mihi Posteritas, quémque auspice Phæbo  
 Non sine felici tibi mandant omine Musæ,  
 Accipe mansurum Ventura in secula Vatem.*

FINIS LIBRI II





SCÆVOLÆ  
SAMMARTHANI  
PÆDOTROPHIÆ  
LIBER TERTIVS.



INC ego quæ dubiæ iam primo à li-  
mine vitæ

Debilia infatum subeāt corpuscula pestes  
( Quandoquidem hæc nostræ superat pars  
Ultima cura )

Expediam, & teneris quæ sit medicina docebo.  
Pauca tamen sequar. ignotum ne fortè per aquor  
Longius errantem externo sub sidere nautam  
Insani abripiant Euri, pellantque latenteis  
Incertum in scopulos & vasto gurgite mergant.

Tu mihi seu Deli materna cacumina seruas,  
Siue iterum humanæ correptus imagine formæ  
Demulces querula Peneïa litora canna,  
Huc pater ô Thymbræe ( tuas hîc pandimus artes,  
Ipsa parens medicas tibi Tellus educat herbas,  
Te tristes fugiunt morbi, tibi semper adhaeret  
Fida Valetudo comes, & iucunda Voluptas )  
Huc ades, ignarumque Via ne desere vatem

o pater, audentemque animis atque alta petentem  
Dirige, neu pigeat toties in vota vocari.

Ecce mihi assurgunt passim applauduntque canenti  
Matres atque viri, quorum pia pectora tangit  
Prolis amor, quernaque intexunt fronde coronam  
Seruanti ciues, & funera acerba moranti.

Ne desint patriæ exhaustæ qui publica damna  
Informesque olim possint sarcire ruinas,  
Impia quas rabies & ciuicus edidit ensis:

Dum fas atque nefas vertere insana potentum  
Dissidia, & cacos populo iniecere furores.

Quorum si nullus modus est, nostrumque cruorem  
Mars auidè sitit, & Gallorum euertere gentem

Immeritam parat, ac ciuili excindere ferro,

Quid tandem iuuat has pueris impendere curas,  
Et velut ad eadem innocuas seruare bidentes?

Scilicet vt matura viros vbi fecerit ætas,

Mutua in arma ruant morituri & sanguine fuso  
Sufficiant belli furiis & pabula præstent!

At certè meliora manent nos fata, neque augur  
Fallor ego, & letum video mox affore tempus,

Cum fessis redeat pax optatissima Gallis,

Auræque exurgant HENRICO Principe sectæ:

Quem calo nobis iuuenem pater ipse Deorum  
Misit, vt afflictis veniat succurrere rebus.

Nos igitur magnis quo iam processimus ausis

Inceptum pergamus iter, gratumque laborem.



- Hei mihi quàm varia circumstant me vndique pestes!  
 Non secus ac vastis Libyæ torrentis in oris,  
 Bagrada quæ steriles findit sinuosus arenas,  
 Olim vt fortè viam deserto in litore carpsit  
 Venator Numida, aut saltus se immisit in altos;  
 Mille illi occurrunt facies & mille ferarum  
 Agmina, nunc toruis oculis leo, nunc fera tigris  
 Emicat, hinc pardus celer, hinc ardentia pictus  
 Terga draco, & multus non vno è semine serpens.  
 Ille animi dubius partes se vertit in omnes,  
 Nèc bene scit tanto è numero, quod denique primum  
 Aut petat, aut caueat monstrum: perterritus hæret.  
 Sic mihi morborum subeunt examina mille,  
 Nec quæ prima meis, quæ debeat vltima telis,  
 Præda peti certum est: dubio mens fluctuat æstu.  
 Atque equidem sine lege vt apes quæ proxima libant  
 Rura vagæ, mihi sic morborum vt quisque canenti  
 Se fortè obtulerit (quid enim est incertius illis?)  
 Hunc referam, nullusque mihi seruabitur ordo.

Iamque adeò ne te per longa exorsa moremur,  
 Sæpe recens natis media qui abscinditur aluo  
 Omphalus, acceptæ iucunda exordia lucis  
 Turbat, & haud vnum accersit per membra dolorem.  
 Siue recens vulnus, seu non seruata ligandi  
 Vulneris apta satis ratio pressum arctius vrit:  
 Seu queruli fletus, aut tussis anhelæ fatigat,  
 Infirmumque agitat crebro luctamine corpus.



*Vnde sit humorum partem concursus ad illam,  
 Quæ dolet, atque ipsum testata rubore dolorem  
 Tota tumet, rapidoque ardens incenditur æstu.  
 Quandoquidem duce natura velut agmine factio  
 Spiritus huc sanguisque ruunt, affectaque membra  
 Pro se quisque iuuare malumque euincere certans.  
 Copia tum verò ipsa nocet, dum vulnera circum  
 Feruet, & insanos moxet importuna tumultus.*

*Sæpe etiam, clauso quoniam dum ventre lateres  
 Captiuus puer hac humorem parte solebat  
 Reddere, in id porrò insistit Naturaque moris  
 Nondum oblita sui quo cæpit tramite pergit.  
 Hinc autem tumido inflatu distenditur ager  
 Omphalus, & Vitrea turgēt pellucidus vnda.*

*Quid quod & hunc aliquis læsit si fortè tenellum  
 Casus, ut humanis incommoda plurima rebus  
 Eueniunt, tota plerunque is prominet alio  
 Prociduus, tenerumque infesto pondere corpus  
 Affligit miserè, & tanquam grauis hernia vexat?*

*Has ergo ut valeant ægris auertere curas,  
 Florentem medici Nardum, cui Celtica nomen,  
 Tundere præcipiunt, & factio pulucre miscent  
 Resina Terebinthe tuæ, intritaque liquenti  
 Græcæ oleo nucis excipiunt, cui dulcis in ore  
 Sit sapor, & leni demulcent vngvine vulnus.  
 Inde etiam tenues flammis graueolentibus urunt  
 Panniculos, cineremque legunt, & amara lupini*

*Semina, quæ Vt rubro diluta fuere Lyæo,  
His bibulas saturant stupas, adhibentque dolenti.*

*Nec minus & linguae imprimis tibi sedula habenda  
Est ratio, quando haud aliud præstantius Vllum  
Concessere hominum generi pia numina munus.*

*Addæ quod in magno hæc pueris lætentibus Vsu  
Esse solet, niueos dum sugit ab Vbere rores.*

*Quam si qua impediunt, curuóque volumine torquent  
Implicitam, & rigido cohibent retinacula nexu,  
Non satis officio est, frustra que tumentia captat  
Vbera, nec presens potis hinc educere nectar.*

*Vnde siti perit in mediis, ceu Tantalus, Vndis  
Infelix puer, & ieiuno corpore languet.*

*Has ergo, si quæ fuerint, abscindere tricas  
Expedi, & curtos quamprimum exsoluere nodos;  
Siue tibi hoc habili chirurgus forcipe præstet  
Molliter excidens siue obstetricis acuto  
Vngue manus, modò quisquis erit qui talia curet  
Vicinas linguae caueat contingere Venas.*

*Illæ etiam haud temerè fecit cui Ranula nomen  
Barbarus (instar enim rana est si exemeris artus)  
Pernicies longè teterrima, quando sub ipsa  
Exoritur lingua, calidóque exæstuat ardens  
Ignetumor, nimia mortem qui mole minatur  
Interdum paruóque animam præcludit alumno.*

*Cui simile id morbi est, cum sæua ardentia flammæ  
Gingiva sæpe in molli tubercula crescunt,*

*Pérque genas collūmque, & tota subinde per ora  
 Purpureum latè spargunt incensa ruborem,  
 Et faciunt febres, & membra doloribus angunt.*

*Nec multū his adeò differre videtur & illa,  
 Quæ pueri fauces grauis inflammatio vexat  
 Nonnunquam, paribûsque solet se prodere signis,  
 Quà teneræ linguae penitis radicibus hærent  
 Exigua glandes: Veteres dixere Latini  
 Tonsillas, & ab his sua morbus nomina sumpsit.*

*Quæ mala corrupto cum fermè à sanguine manent,  
 Ipse autem impuri damnoſo lactis ab haustu  
 Accipiat sanguis vitium, quod acuta redundet  
 Bilis, & inde acri scateant salsugine venæ.  
 Hæ tibi præcipuè partes, tibi sedula nutrit  
 Hoc incumbet onus, proprio de fonte venena  
 Exigere, & prauī noxam depellere lactis.  
 Quare age, quæ pueri teneros depascitur artus,  
 Visceribus finge ipsa tuis hanc gliscere febrem,  
 Nec pigeat tanquam agrotum curare libenter  
 Corpus, & hinc dulcem puppo instillare salutem.*

*Ille autem rapidæ dum sæua incendia febris  
 Mitescant, bibat Idaliis frangrantia siliis  
 Citria quem mittunt aut Punica mala liquorem:  
 Si prius Eoæ succis medicabere canna  
 Incoctum, & pura miscebis largiùs vnda.  
 Tum blando violarum oleo, quod ab igne tepescat,  
 Collum ipsum lauēsque genas, & mollia iunge*

Tempora, & exiguas infunde dolentis in aures  
 Eiusdem pauxillum olei, qua parte laborat  
 Præcipue, ardentemque agro iacit ore ruborem.  
 Nec minus interea reddunt quam trita farinam  
 Hordea, præcipiam candentis flumine lactis  
 Incoquere, & totum emplastris obuoluerè mentum.

Fors etiam grauiora dabunt hæc adia curæ  
 Cum suppuratis abscessibus atria fient  
 Ulcera, quæ toto serpent infesta palato,  
 Depascentque ipsas rabida prurigine fauces.  
 Tu nisi letiferi properas extinguere morbi  
 Semina, gliscentemque alie compescere labem.  
 Quanquam alia esse potest huius quoque pestis origo  
 Lac ipsum, ex aliqua quod contigit esse serosum  
 Parte sui, & crebro gingiuam erodere fluxu,  
 Aut vitium capere in stomacho, se plurimus vnde  
 Attollit vapor, & puerilia fumidus vrit  
 Oscula. Nec modus est vnus ratioque medendi:  
 Multa adeo humanæ reperit solertia mentis.  
 Nulla tamen potior moderata cura dieta est.  
 Hac tu corrige lac vitiosum, nec minus inde  
 Vel violis melle intritis, vel Orontide Myrrha,  
 Et Galla tenui, & Nabathæi cortice thuris  
 Vince vlcus dirum, & serpentina siste venena.

Atque hæc præcipue pueros discrimina tangunt  
 Omnia, quo teneris erumpunt tempore dentes,  
 Dum sibi videns ipse viam molitur, & acri

Humore,

Humore, vt cerebra, gingiuis mollihus instat  
 Improbus, & punctu assiduo retinacula frangit,  
 Senuosque interea toto mouet ore dolores.

Quæ tamen immitis tanta inclementia cali est?  
 Siccine quod vitam foueant, stomachoque ministrent  
 Confectas epulas alimentaque mollia dentes,  
 Inde fit hos tanti vt caelestia numina vendant?  
 Ille quidem fluido querulus puer admonet ori  
 Exiles digitos, & quæ pote se iuuat ipsum.  
 Tu tamen hunc melior nisi uiueris ipsa laborem;  
 Nullus erit. sed enim digitos prius illine molli  
 Vel cerebro leporis, Sicula vel roribus Hyblæ.  
 Tum leni humorem affricu sensim elice, donec  
 Præuius exierit, factoque foramine demum  
 Dens nouus emergat, perque ora rubentia candens  
 Emicet, vt rubris inclusum fortè corallis  
 Candet ebur, facili arte manus quod Dadala rasit.  
 Quod si in crude scat porrò dolor, ablue summum  
 Rore caput tepido aspergens, liquidisque rosarum  
 Imbribus, ac niuea totum super intege lana.

Et tamen ipsa suo nisi munere fungitur alius  
 Nil agis, insano dabit incrementa dolori.  
 Dura igitur quoties fuerit, soluenda liquentis  
 Mellis ope. hoc adeò multos conducit ad vsus  
 Egregium inuentum, quod amico ex æthere fluxit:  
 Siue id ieiuno libauerit ore puellus;  
 Seu balani in formam postico exceperit ano.

*Vel si diuini defecit copia roris,  
Ipsa manu læui nutrix si dissima caulem,  
Betámue, aut viridis radicem ingessit hibisci.*

*Quod tamen huic morbo proprium est, si fusior aluus  
Profluat, & gracili decedant corpore vires,  
Quo magis hanc firmes adhibenda papaueris albi  
Semina, nec desint metuentis frigora myrti  
Acceptæ Veneri bacca, bicolorque Cyperus.  
Quæ simul intrita, & lactis diluta liquore  
Parua salutifero recreabunt corpora potu.*

*Sin dira excruciant ipsum quoque tormina ventrem,  
Et velut infesto vellunt præcordia morsu,  
Iuuerit imprimis calida qui fouerit vnda,  
Quique oleo anthemidis simul aut fragrantis anethi  
Vnixerit, aut veteri quod ab igne cale scat oliuo.  
Nam cutis hinc raræ per aperta foramina transit  
Paulatim insinuans calor, & collecta sub ipsis  
Frigora visceribus pellit, ventosque latenteis  
Dissipat, & morbi causas & crimina tollit.*

*Quid tibi nunc simili notos discrimine vermes  
Persequar, inuisos vermes genus acre veneni  
Imbecilla feris qui morsibus ilia pungunt?  
Namque mala ingluuie lactis cum largius hausti  
Putrescunt latices, crudamque quod exit in aluium  
Visceribus mucosum hæret, pellicque recusat:  
Tunc prudens Natura suas se vertit ad artes,  
Quodque abigi non posse videt, absumere porrò*

Id satagit, variòsque ideò de sordibus istis  
 Lumbricos creat, interno qui viscere serpunt,  
 Materiámque, vnde est illis genitális origo,  
 Depopulant ipsi, & cognata alimenta capeffunt.  
 Ceu quibus est ortus foliis depascitur illa  
 Vere novo celer & variis spectabilis alis  
 Papilio, damnúmque data pro luce rependit.

Verùm vbi pestis edax iam parte vorauit ab omni  
 Quicquid erat, si fortè dapes & pabula desint,  
 Huc illuc se agit impatiens, vacuísque latebris  
 Errat, & infesto morfu in precordia senit.  
 Signa patent manifesta mali. nam fætor in ore est  
 Plurimus, interdúmque animi vis agra fatiscit.  
 Dormitat puer, & tremulis conuiuet ocellis,  
 Nec faciles carpit somnos, temerèque sopore  
 In medio tremit exiliens, quatit arida tussis  
 Pulmonem, & nares prurigo molesta fatigat.

Quare age dede neci, aut quauis ratione latentem  
 Pelle foras hostem: fugiet modò si quid amari  
 Porrigis, imprimisque illud quod nomine vermes  
 Signauere suo semen, seu mitia poma,  
 Seu pultem, aut alias hoc puluere sparseris escas.  
 Felle etiam tauri pallens coniunge cuminum,  
 Et leni summum emplastro super intege ventrem:  
 Pernicies hinc certa fera: nam cætera mitto  
 Plurima quæ prisci variè sanxere medentes.

Ecquid enim numeris includere singula coner,



Materia cū multiplici mihi carminis ordo  
 Crescat, & exacto subeat labor vsque labori?  
 Non mihi si centum dederint in carmina linguas,  
 Centum ora Æonides, mala dicere singula possim,  
 Quæcunque humanam vexant infesta quietem  
 Certatim, insidiâsque parant, letumque minantur.  
 Hinc tristes vomitus, hinc exilit aspera tussis,  
 Hinc paruas animas quæ nigra insomnia terrent,  
 Hinc vigil irrequies placidos quæ carpere somnos  
 Non sinit, illa quidem ex vno manantia fonte  
 Omnia, cū nimio se lacte ingurgitat infans,  
 Nec pote in exiguo stomacho vis tanta teneri,  
 Aut certè negat illa coqui crudūque fatigat,  
 Plurimus vnde vapor lenibus sursum euolat vmbriæ  
 Turbidus, & vana deludit imagine mentem.  
 Qui, quoniam molli vis est innata cerebro  
 Frigida, densatur liquidūque coactus in imbrem  
 (Non secus ac pluuio concreta ex aëre nubes)  
 Labitur, & fluida teneras vligine fauces  
 Radit, & irritat quatientem pectora tussim.  
 Hanc ergo reprime ingluuiem, sedabitur omnis  
 Actutum dolor, & morbi mala semina cedent.  
 Quid loquar & mollis plerunque vt procidat anus  
 Proluuiæ ventris nimia, cum proximus illi  
 Musculus humescit iam laxior, & sua porro  
 Munia obire negat, sursumque leuare cadentem?  
 Tu modò quæ possint adstringere plurima misce,



Decoctisque foue: sed & hunc ante omnia leui  
 Pelle reluctantem licet, egressumque minantem  
 Pelle manu insinuans, atque in sua claustra reconde.

Nec referam fœdos qui tempore lactis achores  
 Per teneri caput erumpunt, faciemque puelli  
 Et sanie taboque fluunt, squalentiæque ora  
 Pinguibus obducunt crustis, locaque omnia complent.  
 Quippe & sponte sua cedunt vltroque facessunt:  
 Et si non cedant, aliquis tamen vsus in illis,  
 Cum cerebri educant sordes & corpora purgent.

Verùm illas dicam papulas, quæ corpore toto  
 Rumpentes rapidæ faciunt incendia febris  
 Interea, niueosque artus infantis & ora  
 Deturpant, & longa sui vestigia linquunt:  
 Siue cute emineant summa, morbi que per omnem  
 Decursum ardentes rutilo velut igne coruscent:  
 Seu gelidi humoris lento torpore grauata  
 Subsident, primo quæque antè rubebat in ortu  
 Pustula, paulatim albescat, latèque vagata  
 Desinat in densas maturo tempore crustas.  
 Nam gemina morbi (quanquam discrimine paruo)  
 Sunt species, vno quas Exanthemata dixit  
 Nomine Paonys fœcunda nepotibus Hellas.

Causa mali impuro feruentes sanguine venæ,  
 Menstrua quem materna, puer dum ventre lateret,  
 Infecere, luisque bibens hinc semina traxit  
 Paruulus, aut has proluuias in carcere fœdo

*Accipit bibulis membris, seruâtque venenâ  
Reliquias, Natura suo quas tempore pellit.*

*Ac veluti totis olim fumantia cellis*

*Feruescunt noua vina, cadisq[ue] erumpere certant,*

*Dum quas contraxit spumans vindemia sordes*

*Eruêtet, purique fluant è vase liquores:*

*Non aliter nouus ingenti luctamine sanguis*

*Æstuat, immundum humorem dum eieçtet in auras,*

*Et penitus toto purum se corpore fundat.*

*Nec desunt alias alij qui querere causas*

*Malint: quicquid erit, certè grauis imminet inde*

*Pernicies puero, neque pestis acerbior vlla est.*

*Heu quoties fletu arguto nutricis amicam*

*Poscet opem! non lactis amor, non cura epulandæ*

*Pultis erit, nulli venient in membra sopores.*

*Ipsa diu ad cunas miserè deieçta iacebis.*

*Roranteis oculos, & tundes pectora planctu.*

*Perfusosque rosis illos, adeoque nitenteis,*

*Tu quibus antè auidis figebas oscula labris*

*Obscænos fluido miraberis vlcere vultus,*

*Nec dicenda loquere. Sed hoc non questibus istis*

*Tempus eget, querenda via est qua tristia cedant*

*Vulnera letiferique mali contagia sistas.*

*Continuò incensos auertere profuit æstus*

*Porrectis gelida riuis, quæ frigeret intus*

*Viscera, sed primo vix id contingat ab haustu.*

*Ergo redintegrant lymphas, vomitûque frequenti*

Efficiunt, ne fortè nouo non vsque liquori  
 Sit locus, & potu repetito incendia sedant.  
 Additur & victus ratio: nam dulcia vitant,  
 Fructusque immodico quicunque humore putrescunt,  
 Tum Syrio rore, aut castia medicata propinant  
 Pocula, quæ inualidi nutrix vice sumat alumni.

Si tamen haud ideo tetri vis improba morbi  
 Cessat, & ardentem nequicquam extinguere febrem  
 Niteris, indomitæque lûis pugnare furori:  
 Cede malo, pserumque, semel quod ferre necesse est,  
 Ferre iube: tantum hoc moneo ne publicus error  
 Te teneat, qui non fallit muliebria tantum  
 Pectora, verum ipsos etiam plerumque medentes,  
 Omnia dum faciunt vt quantuncunque veneni  
 Intus inest penitus se in apertas proferat auras.  
 Quippe adeo plena ingentis res illa pericli,  
 Erumpat ne vi nimia, nec in extera tantum  
 Sauiat effusæ largissima copia pestis;  
 Verum ipsas etiam numerofo vulnere fauces  
 Occupet, obsessæque animæ spiracula claudat.  
 Ille mihi ( ah ! memini ) nuper malus error acerbo  
 Fûnere quadrimum Carolum, trimamque Dianam  
 Abstulit, & gemino spoliauit honore penates.  
 Dy, si qua est pietas & vatum cura sacrorum,  
 Cætera vos seruate tori suauissima nostri  
 Pignora, & inuisam teneris auertite labem.  
 Quæ si quando tamen caros inuaserit artus

( Hoc etas ferat, & non subsit caussa timendi  
Ne loca iam erumpens reuocetur ad intima Virus )  
Ausim equidem egroti salientem incidere venam,  
Humorisque aliò nonnullam auertere partem.

Ne tamen interea restat quod sanguine in ipso  
Corrupti non ejciat Natura, inuanda est  
Auxilys, terra alma sinu quæ diuite promet  
Plurima, teque adeò ante omnes quæ nomen ab Ulmo  
Herba capis, veterum priscis ignota parentum  
Temporibus, nostri decus & noua gloria sedli.  
Insita quippe tuo vis admiranda liquori  
Sudorem elicere immundum, fædamque soluto  
Corpore contagem aërias educere in auras.

Dum porrò incipient heic passim emergere & illic  
Florentes papulae, vigili tunc mente cauendum est  
Ne fortè aut oculos narësue, aut tenuia puppi  
Guttura, pulmonësue, aut intima viscera tangant.  
Has etenim in parteis etiam teterrima scuit  
Pernicies, damnûmque agris letûmque minatur.  
Turgidulos ideo conspergunt luminis orbes  
Siue rosa, niuei seu puro flumine lactis,  
Quod leuiter presso iaculatur ab ubere nutrix,  
Corycioue croco vultus & lumina tingunt.  
Sed neque tutandis oculis non utilis humor  
Punicus, illæsum qui seruat & ipse palatum,  
Ore puer molli si grana rubentia carpat,  
Mansorûmque auído detergat guttura succo.

At nares fouet acris odor porrectus aceti,  
 Pulmonémque iuuant qui Barbaricæ Tragachantæ  
 Somniferum miscent tenui cum lente papauer,  
 Et recreant fessos confecto eclegmate folles.  
 Nec minus ipsius decoctæ vligine lentis  
 Lenia ab inuiso defenderis ilia morbo.

Qui postquam exeruit sese, multaque repleuit  
 Labe cutem, & turpes papulis graue-olentibus artus,  
 Carpe manu ætutum violas, quibus adde virentem  
 Anthemidem, & faciles maluas & furfura misce:  
 Omnia quæ postquam tepidis incoxeris vndis,  
 Turpia membra foue, & totum superablue corpus.

Iamque ô parce puer lacrymis, parce optima mater,  
 Tempus adest, mora nulla, mali cum victa facessat  
 Effera vis tandem, & decedat corpore languor.

Aspicias vt matura suo se tempore prodant  
 Vlcera paulatim eieceto manantia tabo?  
 Si qua tamen rumpi dura cute fortè recusent,  
 Aureola fodiamus acu, saniémque latentem  
 Ducamus, dum tota fluat, dum nullus abundet  
 Humor, & horridulis arefcant vulnera crustis.

Quas vbi purpureâque rosa myrtôque virenti  
 Foueris, atque oleo cerusæ illeueris omnes,  
 Illicet has toto de corpore sentiet infans  
 Effluere, & toto sparsas horrescere lecto.  
 Sic vbi iam reducis brumæ nouus horror adussit,  
 Humoris vacuas frondes, arentia passim

*Labuntur folia arboribus, nudasque relinquunt.*

*Postremò ( nec enim labor aspernandus & ille est )  
 Plurima deformi ne restet in ore cicatrix,  
 Tu quem turgidulo in vitro si coxeris olim  
 Lilia, florentesue fabæ, cannaeque palustris,  
 Aut salicis lentæ serpentes humida circum  
 Litora radices extillauere liquorem  
 Quere tibi: sed & illum adhibent, quem assata capellæ,  
 Lanigeræ aut pecudis sudauerit vngula rorem.  
 Nec minor & timidi leporis taurique cruori  
 Indita vis ( dum feruet adhuc à cæde recenti )  
 Horridulam leuare cutim: tu quolibet horum  
 Vtere, non opis hinc tibi suppetit vnus vsus,  
 Non hac multa tibi desunt in parte reperta.  
 Tantus amor, tanta est seruandi cura decoris!  
 Et meritò: quis enim duris nisi cautibus ortus  
 Diuina eximie non laudet munera formæ?*

*Sed iam acti cursus meta exoptata propinquat:  
 Nunc ego te immanis gelidaque simillima morti  
 Exequar, & summo percurram carmine, labes,  
 Conuentus populi Romæ cui nomina fecit,  
 Dixere à pueris Gray, quod cuilibet æuo  
 Cum noceas, tamen humidulos tua damna pueros  
 Precipue exercent inceptæ à limine vitæ.  
 Tu penitus toto distentis corpore neruis  
 Affligis subita labentia membra ruina,  
 Mentemque interea & sensus intercipis omneis.*

Ille diu iacet exanimis, altóque sepultum  
 Esse putes somno, nisi quod fœdúmque fluentes  
 Ore vomit spumas, inclusæque murmura reddit  
 Stridulus, & tremulo iactantur brachia motu.  
 Sed neque perpetua est subiti violentia casus,  
 Itque reditque viam, & post cæca obliuia rerum  
 Nube dies pulsa redit, & sibi redditur ager.

Vnde adeò morbi mirum genus? áñne quod vñdum  
 Si quando cerebrum pituitæ viscidus humor  
 Largius infarcit solito, iam non patet vlla  
 Spiritibus via, qui magno molimine nixi  
 Contendunt, claustrisque leues euadere certant?  
 Ipsaque neruorum, vt sibi que sunt noxia pellat,  
 Concussu ingenti simul obluētatur origo?  
 An potius gelidi quadam latet aura veneni,  
 Quæ sese intus agenstacitisque meatibus errans  
 Progreditur furtim & summam peruadit ad arcem,  
 Vt cerebro paret insidias, quod vñque repellit  
 Inuisam, & sese infando defendit ab ictu?  
 Hinc & quo tenui mage subtilique cerebro  
 Quisque viget, magis infestæ penetrabilis aura est,  
 Præstantesque viros hæc sæpe ruina profudit.  
 Quid memorem dio Veneris de sanguine natum  
 Romulidem, imperij primus qui flexit habenas?  
 Quid qui hominum mentes mentito numine lusit  
 Vanus Arabs, latèque Asiam Libyámque per omnem  
 Regnat adhuc media mundi plus parte potitus?

*Ipse etiam nostras olim dum carperet auras  
 Quàm prius Oetæis corpus mortale piasset  
 Ignibus & patrio Deus accessisset olympo  
 Ingentis columnen calî, domitorque ferarum  
 Alcides cura fuit haud immunis ab ista.*

*Fortè Cleonæo quondam è certamine victor  
 Dum redit, atque fera exuvias indutus oberrat,  
 Et quâ alta Nemees forti vicina Phliunti  
 Late silua viret, & qua via nota Corynthus  
 Ducit, vbi gemino brevis aquore stringitur Isthmos,  
 Illum adeò improuisa lues nil tale timentem  
 Fudit humi. herois gemit sub pondere tellus,  
 Vicinûque nemus, vicinaque litoris ora  
 Accepit sonitum, & vocis respondit imago.  
 Ceu quondam silua in media, cum naus in usum,  
 Siue iugis, magna Ida, tuis, seu Pelio in alto  
 Sternitur arata pinus labefacta bipenni,  
 Dat sonitum latè ingentem, saltusque remugit  
 Frondens, & rupes, & in altis rupibus antra  
 Ceca sonant, resonâtque cauis è vallibus Echo.*

*Quem pulchra vt viridi collis de vertice vidit,  
 Forte manu plena medicas dum colligit herbas  
 Peonis, intonsi virgo de semine Solis  
 Educta indigenas inter celeberrima Nymphas:  
 Hunc miserans (agnouit enim certissima tanti  
 Signa mali) augustâque viri mirata figuram,  
 Aduolat actutum, siqua succurrere lapso*



Sit potis, & membris inimicum auertere virus.  
Nam pater ipse suas arteis & munera Paon  
Edocuit, Pæbo Paon genitore creatus  
Doctrina ante alios medicus præstantior omnes.

Primum igitur spumis fluitantia turpibus ora  
Tergere linteolo molli, caput inde iacentis  
Tollere, & inserto dentes diducere ligno.  
Mox & colla manusque ambas, & denique divi  
Contraxit quascunque mali vis improba partes,  
Græcæ oleo nucis, in sacra quod fortè gerebat  
Pyxide, collinere & leni componere frictu.  
Tum virides rutas, aut si quid olentius illis,  
Offerre ad patulas nares, dum noxius acri  
Pulsus odore vapor tenues exiret in auras,  
Desereretque artus & sensus redderet agro.  
Qui postquam pariter Nympham cum luce medentem  
Conspexit, pulsa horrenda caligine labis,  
Attonitus, longo post tempore talia fatur:

O quis te superum nobis pulcherrima Virgo  
Misit, ut infandum eriperes miserata dolorem?  
Dy te, quacunque es, tali pro munere seruent.  
Ipse ego si verus vitæ mihi Iuppiter author,  
Mèque suos inter cali quoque regia ciues  
Expectat, nec vana animum præagia fallunt,  
Tempus erit tibi digna memor cum præmia reddam.  
Interea ne me miserum tam fæda ruina  
Percellat toties, & cæpta ingentia turbet,

Quis modus, aut quæ sit seruanda cura salutis  
 Dic precor, & saue me (nam potes) exime pesti.  
 Sic tua, quod meruit, longinquas fama per oras  
 Exeat, & sera æternum per secula crescat.  
 O mihi quodcunque hoc æui traducere tecum  
 Si liceat, firmo inter nos & fœdere iungi;  
 Nulla equidem tristis formidem incommoda casus.  
 Verùm aliò nunc fata vocant, odiûmque nouerca  
 Urget, & iniustos me cogit adire labores.  
 Sic ait, & placita vultus in Virgine figit.

Excipit hæc, Equidem Alcide (nam te tua nobis  
 Dicta satis produnt, & fortis robora clauæ  
 Iamdudum, & cæsi exunias agnosco leonis)  
 Percipio fructum ingentem, nec pœnitet huius  
 Me study, si quid (quod Dyque Deæque secudent)  
 Tantum Heroa iuuo, & vitæ in discrimine seruo,  
 Quare age, & hæc nuper quæ me pater ipse docebat  
 Phœbeus Pæon, quo non præstantior alter  
 Vincere pallentes morbos, & fata morari,  
 Accipe, constantique memor sub pectore serua.

Principio, id morbi generet cum plurimus humor,  
 Profuerint quæcunque calent, arescat ut inde  
 Causa mali, & sicco penitus de corpore cedat.  
 Ergo te ratio fugiat ne congrua victus,  
 Ut quodque est vduum magis aduersumque calori,  
 Hoc fugito: sed nec suavis te oblectet lacchi  
 Copia, non largos impunè iteraueris haustus.

*Nec tremulis porrò labentia flumina lymphis,  
Aut si quid rapida vertigine fertur in orbem  
Te spectare velim temerè, nudàue soporem  
Carpere humo, aut crassi nebulis assuescere cæli.  
Nec minus interea grauium fuge quicquid odorum  
Naribus ingratum est, & ab omni tristia mente  
Tædia, & immundas expelle à corpore sordes.  
Neu tibi opis medica labor atque industria desit,  
Vidistine vnquam gelidæ quod sidere brumæ  
Fronde noua solet in siluis pubescere viscum?  
Hoc lege quod veteris circundet brachia quercus.  
Nulla medela tibi potior, seu dulcia iungis  
Cinnama, diluto & vini latice excipis albi  
Confundens, plenòque nouum bibis ore liquorem.  
Seu combustam hominis caluam, ramosaque cerui  
Cornua comminuis, & factò puluere misces  
Adiungens Arabum suaues ante omnia succos,  
Scilicet vt nullus comedentem auertat amaror.  
Tantum hæc mianè, prius quàm epulas & pocula carpas  
Alternis iubeo te sumere, menstrua donec  
Luna suum cursu exacto compleuerit orbem.  
Nulla mora, inuisi vaneſcent semina morbi,  
Et tecum alma Salus terras comesibit in omnes.  
Tu modò, grata hominum si quid benefacta merentur,  
Viue memor nostri. nec plura effata recessit.*

*Ille oculis sequitur fugientem, & corda recenti  
Saucius aspectu tanta meritisque puella.*

Paulatim ardescit, pulsoque priore veneno  
 Longè aliud sentit tacito sub pectore vulnus.  
 O quoties flagrantem animum vasana libido  
 Incessit temerè quascūque eat illa per oras  
 Velle sequi! sed enim qui monstra domare solebat  
 Cetera, in id tempus domuit quoque victor Amorem.  
 Felix, ô nimium felix, si nullius vnquam  
 Forma loles cæcis mutasset pectora flammis?

Nòn tamen affectu ille pio curæue pepercit:  
 Verùm vbi post longo iam tempore summa relatus  
 Astra super diuūm in numerum, suprema puellæ  
 Tempora vidit adesse (vident quippe omnia diui)  
 Antiquos animo reuocauit gratus amores;  
 Dilectosque sibi putrescere noluit artus  
 Humanum in morem, at meliori sorte beaui.  
 Nec mora, quæ fuerat formoso fœmina vultu;  
 Herba fuit, forma reliquas quæ vinceret herbas,  
 Pæoniam dixere, nec vlla salubrior vsquam est.  
 Nam memor officij Deus, acceptæque salutis,  
 Indidit has vires, vt quam sanauerat herbis  
 Ante luem, ipsa suo sanet nunc optima succo.  
 Addidit & meriti monumentum insigne fauoris;  
 Vt cuicunque recens felicitis pendeat herbæ  
 De collo radix, tali (mirabile dictu)  
 Nunquam peste cadat, voluit quod Delius ipse  
 Esseratum, gnarique obseruauere minores  
 Hactenus, & tanti narrant miracula facti.

Nec piguit memorare, meisque intexere chartis,  
 Quando etiam ficto Variarunt seria ludo  
 Sæpe sacri Vates, & amant fragmenta Camæna.

Hæc ego Pictonicis olim secretus in agris  
 Buxiferos inter colles & confraga saxa,  
 Numen ubi dabat ipse loci gratissimus horror,  
 Cantabam exili quæ se vagus amne per herbas  
 Clanus agit sensim & sinuoso litore serpit,  
 Tempore quo Veteri deductus ab Hectore sanguis  
 HENRICVS, noua spes hominû, noua cura Deorû,  
 Gallica Sarmaticis forti coniuncta gerebat  
 Sceptra manu, & creperi post cæca pericula Martis  
 Optata Vnanimis reuocabat ad otia Gallos.  
 Cùmque suos sacris pius instaurasset honores,  
 Poscebat prolem superos, & supplice voto  
 Coniuge cum Vnanimi, quæ nil augustius vsquam est,  
 Quasque sacras ades, quæque indefessus adibat  
 Tempia Deûm, castas & dona ferebat ad aras.  
 Non hiemis, non illum æstus cura Vlla tenebat,  
 (Tantus amor) non qui mediis sæpe imber in agris  
 Fædabat peditem, atque iter occludebat eunti.

Vos ô, si qua pios respectant numina Reges,  
 Calicola, si quid sancti meruere labores,  
 Este boni, facilèque piis date questibus aurem;  
 Este boni, tandèmq; altam fundate beata  
 Prole domum, & latos natis augete parentes.  
 O mihi fatalem Lachesis si differat horam,

Dum liceat spectare diem, cum mascula proles  
 Spes generis tanti superas in luminis oras  
 Existat sacro ex utero, cum Regia tota  
 Personet ingenti plausu, cum insensa per Vrbes  
 Undique festiuis celebrentur compita flammis,  
 Latitiâque fremat populus, spemque omine fausto  
 Concipiat fore iam ut dubia discrimina sortis  
 Nulla ferat, placida sed longum in pace quiescat.  
 Quodque colunt ultro per tot iam secula nomen  
 Florentes latè populi, quos alta Pyrene,  
 Quos & magna Thetis, magnique sonantia Rhenj  
 Flumina, & aëriis includunt montibus Alpes,  
 Usque colant, seruetque suum fors lata tenorem.

Tunc neque Natura penetrasse arcana latentis,  
 Nec tantum huic operi nos impendisse laborum  
 Pœniteat, nostro si munere regius infans  
 Educendus erit, si non solùm ista capeissent  
 Plebeia præcepta nurus, sed regia nutrix  
 Ipsa etiam colet, ac memori sub mente recondet,  
 Nôstrâque ad augustas iterabit carmina cunas.

FINIS





LYRICORVM

LIBRI DVVO.

E ij



AD

IACOBVM AVGVSTVM

THVANVM V. CL.



*Ecce iterum primi relegens vestigia  
cursus*

*Ire liber gestit, populique in luce vi-  
deri,*

*Auctior ille quidem & Thebano  
insignis amictu,*

*Sed quem multa manent aduerso incommoda seculo.*

*Quippe aut vana leues ludunt præsagia mentes,*

*Aut certè his longam studiis offundere noctem*

*Inuida fata parant, nubèsque infesta propinquat.*

*Sic vbi cæca mouet sperati occasio lucris*

*Per saxa & salebras media de nocte viator*

*It vagus, & calo temerè se credit iniquo.*

*Quid facias? patriæ ornandæ me tanta cupido*

*Impulit, vt nec morum vlla ratione, neque æui*

*Planè habita, hanc etiam Musarum attingere partem*

*Arderem, & votis quemcunque vocatus Apollo*



*Annuerat, sinerem in vulgus properare laborem.*

*Est certè & Musis ætas sua: nil adeò ingens  
In sese orbis habet, quod non crescentibus annis  
Floreat & senio tandem languente fatiscat.  
Grecia sic quondam, sic illius æmula Roma,  
Atque alia, atque alia diuerso sidere gentes  
Quæque suas habuere vices, molliq̃ue receptas  
In gremio dulces longùm fouere Camænas,  
Quas demum sensere mori, cursuque peractò  
Deficere, atque aliis se rursùm attollere terris.  
Nec mirum ipsa suo si tempore Gallia certas  
Fatorum series, immotæque fœdera sentit,  
Quæque priùs pleno nos lumine Musa solebat  
Spargere, nunc vultus paulatim abscondit amœnoi.  
Mène tamen pulcris ideo desistere cœptis  
Inuidiæ nequidquam artes ac tela timentem?  
Non ita Natura ignauo me pectore finxit  
Fida parens, pigroque ætas sic frigore vinxit.*

*Adde quòd & numero è magno, quem Pegasis vnda  
Prolucrat, superant nati melioribus annis  
Pauci aliquot, pauci, sed verum dicere si fas,  
Diuina ingenij vincunt qui laude priores,  
Scaliger ante alios, & tu doctissime Lipsi,  
Quique adeò Latij princeps arcana recludit  
Eloquij, Musasque tenet Passertius omnes,  
Pithæique, Faberque, & pulcro nomine Florens,  
Et gemini Douze, Batano qui è litore fulgent,*

Pieriosque iuuant cursus ac nubila pellunt.  
 Vtique alios taceam mihi vel tu sufficis vnus  
 Auguste, augendis nomen fatale Camænis,  
 Quem sibi Pegasides socium adiunxere, sacrique  
 Muneris in partem dux ipse vocauit Agæus.

Præstantes animæ, Non spes vltima regni,  
 Phœbeum extrema quæ tempore clauditis agmen,  
 Vos dum fata sinent cæptam decurrere vitam  
 Desperare nefas quin sit sua gloria Musis.  
 Nec mihi vel Sicula fecundos messis honores,  
 Vel quæ gemmiferis merces queruntur ab Indis  
 Optarim, aut flauas Hermi rutilantis arenas.  
 Tantum iudicibus vobis mea scripta probari  
 Concedant Superi faciles & Cynthius author,  
 Summa ego sublimi tunc sidera vertice tangam.

Forsan & has aliquod nomen sperare per artes  
 Fata iubent, seroque diu memorandus ab æuo  
 Ad viuum antiquos non vno carmine Vates  
 Expressisse ferar. quod si potuisse negabit  
 Postuma, me certe voluisse fatebitur ætas.



PRÆFATIO  
IN LYRICORVM  
LIBRVM PRIMVM.

---

AD LECTOREM.

**P**indarica, Lector, hoc libelli quicquid est  
Dici volebam, non quidem quod ipsius  
Me dignitatem Pindari iactem assequi,  
Cuius nec hæssemper hîc vestigiis,  
Nam pro instituta vatibus licentia  
Hinc inde numeros lege nulla colligens,  
(Nisi quam meo ipse iure dixeram mihi)  
Inusitadosnectere ausus sum modos.  
Si pauca demas, in quibus seuerius  
Tentare placuit ecquid arduum foret  
Tantum referre pectine Ausonio virum.

Sed cum sit artis ille princeps & pater,  
Visum est ab eius nuncupare nomine  
Hoc qualecunque est quod opus it in publicum.  
Atque vtinam eunti fausta sit profectio,  
Genius neque absit: sed quis hoc tandem sibi

E iiii

*Ausit alieno polliceri seculo?  
Nam per tumultus bellicos canentium  
Audire vatum nec licet iam nœnias,  
Nec si audiantur, Vllus huic scientiæ  
Honos relictus Martis inter munia.*

*Quis ergo, dices, te impotens agit furor  
Sic perdere operam? Immo optimè illam colloco,  
Amice Lector, sic enim demum asperos  
Fallo dolores, temporumque iniuriam.  
Tu si vicissim vis meis frui bonis,  
Fruere, mihi que quod canendo præstitit  
Idem legendo fac tibi hæc præstet chelys.*





SCÆVOLÆ  
SAMMARTHANI  
PINDARICA,

AD  
Christianissimum Regem  
HENRICVM IIII.

---

De victoria Evriensi.

I.

**V**ENVSINA per vireta  
Vatem, Diua, tuum rege,  
Incognitosque vulgo  
Mihi da decerpere flores,  
Vnde egregius texendi artifex  
Principi adstruam meo  
Tortilem nexu Ogygio corollam.  
Iuuat recessus ire per abditos,  
Quà nulla vates antè duxit orbita,  
Nec me peregrinum licet  
Rupes inaccessa aut locorum  
Asperitas salebrosa terret.

## II.

*Vt enim arduum sit illud  
 Quod molimur opus, tamen  
 Vires profectò vires  
 Animòsque dat ipsa voluntas,  
 Laudisq; haud inhonesta cupido.  
 Improbis quid gloriæ  
 Non amor suadet? ruit ipse miles  
 Et liberorum & coniugis immemor  
 Necem in propinquam, tentat impavidus Ligur  
 Intacta nautis æquora,  
 Tantum vt futuris deinde seclis  
 Nomina concelebrent nepotes.*

## III.

*Neque longa forsàn ætas  
 Olim nos quoque nesciet  
 Ausos inusitato  
 Tibi pectine dicere cantus,  
 O inclyte Rex: tu modò gratum  
 Laudis hunc plausum tue  
 Letus exaudi: tibi nam laborum  
 Hæc vna merces. Non ego frigida  
 Sub hiemis ipso fidere receptas canam  
 Tibi tot vrbes, tot relata  
 Ex hoste passim dissipato  
 Litus ad Armoritum tropæa.*

## IIII.

*Sed & hos volens tacebo  
Quos tot iam tibi praeliis  
Vis blandi amica fati  
Cumulauerat antè triumphos,  
Quàm susciperes debita Princeps  
Gallici fræna imperi.  
Vna de multis mihi carmen esto  
Quæsita celo vindice laurea,  
Quà latè apertus Eury campus patet,  
Fusis fugatis hostium  
Turmis, & ipso perduellis  
Militiæ duce Lottareno.*

## V.

*Sator ille nempe Diuûm,  
Quæ sceptræ arbitrio suo  
Lectis benignus olim  
Concedit regibus, idem  
Et constanti numine firmat.  
Iustus hinc celi furor  
Sauit rebelles in populos, neque  
Impias fraudes & iniqua vota  
Iuuat ambientum regna per fas & nefas.  
Quin ille debitas luat  
Pœnas, proteruo si quis audens  
Contra animo superos laceffit.*

## VI.

Tibi quid, superbe ductor,  
 Facto profuit agmine  
 Tot exteræ nefandæ  
 Trahere vndique ad arma cohortes,  
 Belgas, Italos, rebusque nouis  
 Infideles Insubres,  
 Et ( quibus sese veteres triumphos  
 Oblita fædè Gallia mancipat )  
 Truces Iberos, quicquid & coiuerat  
 Ferociorum ciuium,  
 Quos egit in cæcos furores  
 Vel mala mens, vel inanis error?

## VII.

Pius ecce Rex amico  
 Fretus numine, spiritus  
 Qui frangat & rebelles,  
 Tua victor & ausa retundat.  
 Viden' vt patriis latus in armis  
 Martios inter duces  
 Emicet? dextrum prius vt Tonantem  
 Precatus hostes in medios ruat?  
 Vt sternat ense quicquid vsquæ est obuium,  
 Velocis instar turbinis,  
 Aut fulminis, quod iusta Diuûm  
 In pauidas rotat ira gentes?



## VIII.

Procères ô & beati  
Qui vestram liquidò fidem  
Regi optimo probastis  
Tanta in discrimine pugna,  
Quorum eximia virtute stetit  
Publicæ culmen rei,  
Vos quibus tellam numeris ad astra?  
Quis fando possit singula persequi  
Quæ vos madentes impiorum sanguine  
Latè edidistis funera?  
Quot victa summisere vobis  
Colla duces manibus reuincti?

## IX.

Heliconis ille princeps  
Docti præsidium chori  
Vestra omnium Thuanus  
Facta inseret vnus Olympo,  
Siue ille cheli, seu malit tuba.  
Ipse parui conscius  
Ingeni tantum tenui phaselo  
Propinqua rado litora, seligens  
Magno ex aceruo pauca, nec porrò hostium  
Tot per cadentum vulnera  
Vnius Egmundi celebrem  
Sit mihi fas tacuisse cadem.

## X

*Ferus ibat, & paternæ  
 Egmondus necis immemor,  
 Indigna luce proles,  
 Peditumque equitumque cateruas  
 Parte ex alia ductor agebat.  
 Nullus arrogantior  
 Spernere aduersas acies, sibi que  
 Spondere palmam: cumque adeò viris  
 Tot imperaret insolens (nam legerat  
 Hunc Parma qui vicem suam  
 Ad castra Lottarena gentis  
 Duceret auxiliariis agmen.)*

## XI

*Etiam hoc ferociebat.  
 Quin ipsum impatiens mora  
 Et Manium increpabat,  
 Lentumque acuebat ad arma.  
 Cum manifesto in lumine visa  
 Ecce truncati patris  
 Astitit campis mediis imago.  
 Manabat atro tunc quoque sanguine  
 Collapsa ceruix, qualis hanc cum frangeret  
 Iberus olim carnifex.  
 Hoc ore natum aggressa, Quæ te,  
 Dixit, agunt furia, quis error?*

## XII.

Etiámne cade nostra  
Infectas sequeris manus?  
At si tibi quid vsquam  
Animi vel mentis inesset,  
Iniuria te tanta moueret.  
Nam quid heu dignum cruce  
Feceram, infelix? nisi fortè in auras  
Quòd tam impiatam progeniem extuli,  
Ad cetera insons. Tíne quam debes tuo  
Vitam parenti, hanc hostibus  
Impendis, ipsi qui parenti  
Innocuam eripuerè vitam?

## XIII.

Scelus hoc ferum vel ipse  
Pastis in Libya iugis  
Refugerint leones.  
Nec te mihi sanguinis opto  
Ultorem, anima ô vilis & indiga  
Sanioris consili,  
Hanc neque ad curam venio, sed atris  
Vt te inferum umbris deuoueam pater,  
Mortis propinque nuncius. Vix talia  
Cum fumus actutum vt leuis  
Euanuit, fugitque longo  
Cum gemitu aërias in auras.

## XIIII.

*Pavor at repente pectus  
Turbati ducis occupat:  
Qui visu in auspicato,  
Furiis vt concita Manas,  
Territus, amens, sine lege ruens  
Tela se inter Gallica  
Injcit morti haud dubia. Cadentem  
Vidère colles, qui Druidum vetus  
Tenuere nomen, & propinqua Sequana  
Plausum dedere litora.  
Ille impio latè cruore  
Fædat humum moriens & arma.*

## XV.

*Mora nulla, terrefacti  
Occiso duce milites  
Non iam ordines tenere,  
Non cœpta insistere pugnae,  
Sed se trepido temerè cursu  
Vertere in turpem fugam.  
Tūque fax tantorum adeò malorum,  
Bellique princeps ( nec pudor est ) fugis,  
Spem vitæ & omnem ponis in sola fuga,  
Ceu degener lepusculus,  
Qui vi latrantum obsessus omnem  
Collocat in pedibus salutem.*

## XVI.


*Vbi nunc tot arrogantes  
Voces? ille vbi fortium  
Contemptor antè regum  
Animus? fugis, vlla neque vsquam  
Tuta satis via. Quin & proximum  
Amne traiecto iubes  
Dirui pontem, tibi fortè sæuus  
Ne victor instet, qui tamen vndique  
Premit fugaces, atque toto litore  
Deserta cedit agmina.  
Confusus it cælo hinc sequentum  
Plausus, & hinc gemitus cadentum.*

## XVII.

*Iouis optimi propago  
Vos hanc, Aonides Deæ,  
Adoream per omnes  
Latè diffundite terras,  
Vsque à Ligeri Eoum ad Gangem,  
Casspy & sali ostia.  
Dicite Henricum pietate & armis  
Insignem, acerbis temporibus datum,  
Nulli labori non parem, fidei integrum  
Virtute nec superabilem  
Nec arte, subiectis benignum  
Gentibus, indomitis tremendum.*

IN  
TVMVLVM P. RONSARDI  
Ad Abelem Filium.

Strophe 1.

VO te beatam nomine  
Pradicabo potissimum,  
Gallia ô decus, vrbiumque ocelle  
Quæ bellicosi nomine Cæsaris  
Gloriaris ciuitas?  
An quòd blanda loci ridet amœnitas,  
Latisque circum tot places viretis?

Antistr. 1.

An quòd nitentis fluminis  
Diuite allueris vado?  
An quòd mille tuas per officinas  
Nent delicato pollice virgines  
Fila Serum mollia,  
Vnde & crescit opum vis tibi, & vltimus  
Te nouit orbis? Quid sacras tot ædes,

## Epod. I.

*Educta cælo quid loquar palatia?  
 Vna tamen superest  
 Quæ te gloria cælo  
 AEquat, æternum cineres sepulchri  
 Vatis & ossa*

## Strophe II.

*Sub mœnibus servas tuis,  
 Cui nec Vlla parem tulit  
 Aet. is, nec feret. ô mihi verendi  
 Saluete Manes: Vt video lubens  
 Parua tanti nominis  
 Busta & reliquias! Nec piget amplius  
 Dulces quod exul liquerim penates,*

## Antistr. II.

*Dum turbulenta factio  
 Pictones furiat meos.  
 Abundè mihi iam est, benigna postquam  
 Sors inquieti damna tot exili  
 Pensat hoc solatio.  
 At tu (nam vacat & clausa silent fora)  
 Natorum Abeli prima pars meorum.*

## Epod. II.

*Ades virique maximi mecum incipe  
Versibus Aeoliis  
Iustas dicere laudes.  
Tota Ronsardum resonent ab alto  
Fornice templa.*

## Strophe III.

*Qui barba cum nec primula  
Vestiret roseas genas,  
Casto Pieridum calens amore  
Intacta Pindi culmina per nouum  
Scandere ausus est iter,  
Gallósque artis adhuc Pieriæ rudes  
Lyra beavit primus atque plectro.*

## Antistr. III.

*Intonsus illi Cynthius  
Munera hæc dedit, indole  
Captus egregia aurei puelli,  
Tunc cum exeuntem è rupibus Sonum  
Ad suos dimitteret.  
Atque hanc ipse Deus texuerat lyram  
Mira arte calans, finxeratque circum*



## Epod. III.

*Novi labores vatis & nascentium  
 Omnem operum seriem,  
 Quæ longe ante videbat  
 Scilicet vatum Deus & futuri hand  
 Inscius aui.*

## Strophe IIII.

*Illic gemellas fecerat  
 Figurâ illice virgines  
 Cassandram & Mariam, iecur quæ amantis  
 Læsum vstularent dissimili face:  
 Hæc placebat mollior  
 Lascivis oculis, illa severior:  
 Vterque tanto vate dignus ignis.*

## Antistr. IIII.

*Blandi volabant leniter  
 Hinc & inde Cupidines,  
 Harumque ex oculis novæ subinde  
 Flammæ legebant semina, non secus  
 Atque apes dum roscida  
 Hyblæ pervolitant rura, novi legunt  
 In mellis vsum flosculos madentes.*

## Epod. IIII

Inde ebore pictus dedalo & Ladus pater  
 Vindocinos per agros  
 Lento se amne trahebat.  
 Candidæ circum viridi sedebant  
 Littore Nymphae.

## Stroph. v.

Ipsi herbido strati solo  
 Canebant ouium duces  
 Regna Capripedum, leuēsque flammæ.  
 Nutante passim vertice crederes  
 Prona flecti robora,  
 Arrectis & oues ebibere auribus  
 Dulces relictis pascuis querelas.

## Antistr. v.

Hæc inter & potens opum  
 Natura omniferos sinus  
 Pandebat varias trahens figuras  
 Rerum, alma tellus quas alit, ardua  
 Lucidi quas ætheris  
 Celauere domus, materiem optimis  
 Hymnis poëta maximi futuram.

## Epod. v.

*Neque procul inde principes etiam viri  
 Emicuere, quibus  
 Concessura canendo  
 Ipsa Ronsardi chelys haud caducos  
 Esset honores.*

## Strophe vi.

*Atque vnus inter cæteros  
 Ibat sidus vt aureum,  
 Quem clarum & spoliis Gradiui, & ipso  
 Fratris propinquo funere Gallicis  
 Debitum regnis ducem  
 Vsque à Sarmatico litore Vistula  
 Regem sibi vnum plurimus vocabat.*

## Antistr. vi.

*Percussa pectus candidum &  
 Passis Gallia crinibus  
 Flebili prece prosequens euntem  
 Moras trahebat, Quo fugis impie,  
 Nec relictæ in lacrymis  
 Te matris miseret? si quis adhuc amor  
 Præfer Polonis me, fugamque siste.*

## Epod. VI.

*Hæc per ego te vbera, quæ tenellus suxeras,  
Obsecro siste fugam.*

*Hæc & plura: sed ille  
Surdior ponti scopulis cupita  
Regna petebat.*

## Strophe VII.

*Parte operis in summa duces  
Armaque & profugæ Phrygum  
Carinæ monitu Iouis per alta  
Vasti natabant æquora Nerei.  
Ipse princeps agminis  
Francus magnanimo sanguis ab Hectore  
Francorum origo, Gallicæque genti*

## Antistr. VII.

*Novus inditurus nomina  
Tollebat caput arduum,  
Latè Dardaniis micans in armis,  
Ceu purus orto lumine Lucifer.  
Puppi & à picta suas  
Hortatus socios forti animo novas  
Adire sedes, cæptum iter tenebat.*

## Epod. VII.

*Felix reperta nobili ante omnes tuba,  
 Si modo Dy sinerent:  
 At pulcrum improba cæptum  
 Parca turbavit, medióque telam  
 Stamîne rupit,*

## Strophe VIII.

*illum dolenti, & lacrymas  
 Eundenti similem suo  
 Iusta soluere diceres poëta,  
 Ut raptum acerbo funere constitit.  
 Remigésque languidos  
 Errore in medio deficere, & viris  
 Dulcem futura spem perisse famæ.*

## Antistr. VIII.

*Tali laboratum manu  
 Vates accipiens ebur,  
 Miratur speciem, nouóque latus  
 Honore voluit viuida identidem  
 Huc & illuc lumina;  
 Paulatimque fides tentat & omnium  
 In se ora vertens protinus virorum*

## Epod. viii.

*Pictura quicquid continebat fertilis  
 Explicat ingenio.  
 Nam quæ singula vates  
 Ceteri claudunt numeris, hic vnus  
 Omnia clausit,*

## Strophe ix.

*Vt amne passim ditio  
 Nilum Aegyptia iugera  
 Non vno accipiunt vado sonantem,  
 Largi sed vndans copia fluminis  
 Diditur latè, Aethricum  
 Litus dum subeat, seque per ostia  
 Septem aestuoso misceat profundo:*

## Antistr. ix.

*Sic illa inexhausti ingeni  
 Vis nullum sibi terminum  
 Permisit statui. Quid inde honestos  
 Mores, anitum quid referam decus?  
 Nam vetusti sanguinis  
 Fumosa extulerat hunc quoque imagines.  
 At istum honorem vulgus approbarit,*

## Epod. IX.

*Me nulla inanis dona fortune mouent;  
 Quæ bona vera animi  
 Nulla etate caducam  
 Afferunt laudem, seges illa nostris  
 Aptæ Camœnis.*

## Strophe x.

*Dicam oris Hyblæi fauos,  
 Laudabo stabilem fidem,  
 Addam & perpetuum bene instituta  
 Vitæ tenorem, & candida pectora.  
 Nec tacebo præ omnibus  
 Conuietum facilem, qui cum ego Caucasum  
 Extremum adissem Barbarasque Syrtes.*

## Antistr. x.

*Sed quid bonis tot profuit  
 Pollere, inuida si breui  
 Momento hæc Lachesis tulit sub Orcum?  
 Nos, chare fili, quod modò possumus,  
 Visere hoc sacrum iuuat,  
 Et busto querulas fundere nenas.  
 Tu, si sepulchri cura te vlla tangit,*

## Epod. x.

*Manes beatos inuoca, & plena manus  
 Illius ad tumulum  
 Lectos undique flores  
 Sparge, qui nostri modò flos nitebat  
 Vnicus cui.*

---

## AD P. PITHEVM.

## Strophe.



*GE ô candida Pieri  
 Vatis vna voluptas,  
 Arripe plectra, dum nos  
 Ignis nouus excitat ardor,  
 Concinnamus auribus  
 Quod placere Latinis  
 Possit auream Ogygi  
 Vatis ad cytharam.  
 Sed ô decus perenne rerum  
 Nouo quem tu carmine  
 Nunc beabis insolentem  
 Siue hominem seu Deum?  
 Tibine meus erit  
 Grata Pitheus seges,*



*Deorum vnus & hominum amor,  
Sui quem favi liquore nitido  
Bonæ in sinu aluere Gratia?*

## Antistr.

*Tumultus licet hunc fori  
Sæpe dulcibus antris  
Auocet haud volentem  
(Themidis siquidem ille sacerdos  
Et cauet clientibus)  
Te tamen colit vnam.  
Scilicet probè memor  
Quàm tuis placidè  
Quiescat in sacris, quot olim  
Latebras lustrauerit,  
Dum tuos adit recessus,  
Quas neque cuiquam alteri  
Prius aperueras.  
Hei mihi quod aureum  
Virum vrbs impia retinuit,  
Megæra intus æstuante, scelera  
Tot inter hominum furentium!*

## Epod.

*Beata superum cohors  
Quibus est bonorum*


*Salus amica, ne placida adeò  
 Sinite animæ cupita eripi otia.  
 Licet sapienti suam quietem  
 Quis auferre potest, suam & modestiam?  
 Virtus solidi appetens boni  
 Vna vsque permanet  
 Turbas & ad omnes  
 Immota. Pone Pitheum  
 Vbi Adria spumantior  
 Fremit, pone vbi Mars grauius tonat,  
 Semper erit quietus.*

---

## AD IACOBVM AVGVSTVM

THVANVM.

### Strophe 1.


*VM meditor veteri  
 Fidis Aeoliæ  
 Te sonare cantu,  
 Auguste, viden' Phocide tota  
 Nouem repente vt sorores  
 Huc adproperent, vtque marum  
 Ingenti virtutum ex aceruo  
 Pulcra quæque legant,  
 Canentis vnde lato*

*Vatis ori suggerunt  
 Ornandum alumni ad decus fertilem  
 Copia locuplete segetem?  
 Genus hæc patrumque imagines  
 Mibi larga ministrat,  
 Nec inter eos pium  
 Silet parentem,*

Antistr. I.

*Quem pudor atque fides  
 Statuere sacro  
 Principem in Senatu.  
 Hæc diuitias addit anitas,  
 Amica vita beatæ  
 Fomenta: gradus illa supremos  
 Et splendentum fasces honorum.  
 Illa sed melior,  
 Caduca nempe spernens,  
 Digniora sufficit  
 Dona ingeni, dulce fandi decus,  
 Romula pia munera Dices,  
 Sophiam, & rerum latentium  
 Causasque vicesque,  
 Nec ipsa suas in his  
 Omittit artis.*

## Epod. 1.

*Etiamne morum*  
*Huc accedit honos, & illa porro*  
*Omnibus vna præstans*  
*Adiungit almi sanctum amorem numinis,*  
*Adiungit patriæ atque regi*  
*Probatam iniquis temporibus fidem?*  
*Mihi quæ Dearum*  
*Ope ego præstita omnia carpo*  
*Manu statim impigra,*  
*Non secus atque nitenteis*  
*Per prata gemmantia*  
*Flores, rutilum vnde tibi*  
*Sertum gratus offero.*

## Strophe. 11.

*Tu tamen hoc obeas*  
*( Modo si placeat )*  
*Optimè vel vnus.*  
*Nam quid pigeat lumine mentis*  
*Tuas recensere dotes,*  
*Quas ipse tuo carmine dicas?*  
*Qualis pictor, siue ille Apelles*  
*Siue quisquam alius*  
*Et vsu & arte præstans,*

Fortè si pingi velit,  
 Se curiosè hinc & hinc lucido  
 Conspicans speculo, nec ope egens  
 Alia, vultum ipsemet suum  
 Effingat ad vnguem.  
 Sed hoc adco negat  
 Modesta virtus.

## Antistr. 11.

Candidus Ionidum  
 Tibi quicquid amor  
 Præstat inuocanti,  
 Hoc ætheria percitus aura  
 Deo vel impendis vni,  
 Vel si qua Deo proxima castæ  
 Occurrunt argumenta Musæ,  
 Dicta nec toties  
 Loquacibus Pelasgis  
 Arma Phlegres impia,  
 Magni & trisulco Iouis fulmine  
 Tristium obruta corpora Ducum,  
 Miseri nec fata Pergami,  
 Nec somnia vulgo  
 Placencia futili  
 Retexis orsu.

## Epod. II.

Tibi carmen ille  
 Senex diuitis Hufiæ colonus  
 Omnia dura quamuis  
 Authore cælo sufferens incommoda.  
 Felix terque quaterque felix,  
 Quem tot malorum fluctibus obrutum  
 Medios per æstus  
 Placida mens & aurea sursum  
 Modestia erigit,  
 Omnia despicientem  
 Fortuna inanis bona.  
 Quod si mihi dicere fas  
 Que vera esse sentio,

## Strophe III.

Enthea nec temerè  
 Mouet ora Deus,  
 Ad beatitatem  
 Certe haud minima accessio facta est,  
 Quod illa magni Thuani  
 Iobum quoque vox diuina sonat.  
 Quid vero & Romanè loquentem  
 Principem Solymes,  
 Docentis ore cuius,

Non sine afflatu Dei,  
 Præcepta manant Hymetti aureis  
 Dulciora fauis? quid alios  
 Referam Vates, sacra ætheris  
 Oracula, quos &  
 Frequens Latium duce  
 Legit Thuano?

### Antistr. III.

Nam leuiora Viri  
 Memorare opera  
 Forsan haud decebit.  
 Quamquam aligerum prælia & arteis,  
 Nouosque cultus canentem  
 Audire lubens quis neget? ô me  
 Quanta olim pertentat voluptas  
 Alta dum in spatia  
 Et aëris nitenteis  
 Ausseror latè plagas,  
 Quò me potens cumque vel nescium  
 Vatis eximij rapit amor!  
 Et erit quisquam inficetior,  
 Qui carpere tales  
 Remissi animi iocos  
 Licenter ausit?

## Epod. III.

*Sapit ille quisquis  
Miscet dulcia tristibus, nec inter  
Tadia mille fessam  
Leuare mentem negligit. Quis improbet  
Si post pondera tanta rerum,  
Thuane, tantos pro patria tibi  
Obitos labores,  
Leuibus interim atque iocosus  
Honeste temperes  
Otia? Nam neque Pindi  
Saltus amœnos, neque  
Nympharum agiles choreas  
Te solum sequi iuuat.*

## Strophe IIII.

*Publica res etiam  
Sibi saepe suo  
Iure vindicauit,  
Musaque sinu auulsit alumnum,  
Vt vsus hoc exigebat.  
Et nunc ea te quoque cura tenet,  
Dum voluis quod pressam Gradiuo  
Galliam recreet*



*Sequester instituta  
 Pacem à Rege optimo  
 Delectus. ô fausta si sors ferat  
 Cæca Ut impietas & odij  
 Pereant inuisa semina,  
 Mentèsque rebelles  
 Ad officium tuo  
 Lepore ducas,*

Antistr. IIII.

*Gloria quanta tibi  
 Opere egregio,  
 Fama quanta surget!  
 Non Ismary grandius Orphei  
 Fuisse factum feretur.  
 Blando ille feras pectine traxerit,  
 Dum lingua flectas perduellium  
 Asperos animos,  
 Quibus ferociorem  
 Nulla gignit Africa  
 Aut aspidum aut tigrum sanguinem.  
 Cæpta Diij tua prospera velint,  
 Modò perge, Auguste, tam pio  
 Neu parce labori.  
 At ô bona Pax, quies  
 Amica rerum,*

## Epod. IIII,

*Ades & benigno*  
*Tandem lumine nos tuo serena.*  
*Pelle procul furores*  
*Ad vsque Calpen, solis vltimã & domum.*  
*Et, si cura piorum est,*  
*Ne regna deinceps Gallica desere.*  
*Quid enim Dea nobis*  
*Sine tuo fauore beatum est?*  
*Ades bona & bono*  
*Grata fauẽsque Thuano*  
*Quocunque se conferet*  
*Fac illius vt alteri*  
*Semper fida sis comes.*

---

*Ad Iosephum Scaligerum.*

## Strophe I.



*V*ANDO ratum est abire,  
*Nec impotens te gementis*  
*Desiderium patriæ,*  
*Non preces tuorum,*  
*Non moras nequentum amica*

Tot procerum cura moratur,  
 I quò fata iubent, piaque  
 Vocat gentis amor.  
 Non ego crediderim hæc fieri  
 Absque Diuûm numine,  
 Nec arrogare tantum  
 Sibi sors improuida possit.

## Antistr. 1.

Omnibus hunc utique  
 Honestum amorem ipse rerum  
 Certissimus ordo inserit  
 Diis colendum & ipsis,  
 Ut suam seruent parentes  
 Progeniem. Nonne vides ut  
 Si quando hostis adest & Vrbi  
 Minatur pauide  
 Perniciem, properè hinc aliq̃  
 Liberos dulces pater  
 Amandet, imminentem  
 Si possint fallere cladem?

## Epod. 1.

Sic arbiter ille rerum  
 Deus æthere ab alto

Miserè ruentem vbi vidit  
 Caco tumultu Galliam,  
 Te quoque te beati  
 Memorabile pignus Olympi  
 Subtrahi tantæ placuit ruinæ,  
 Magisque tuta in sede locari.

### Strophe II.

Scilicet & Læones  
 Simonidem sic gemelli  
 Quondam hospitio in Thessalo  
 Nil sibi timentem  
 Aedium instanti ruina  
 Eripiunt: qui sacra & ipse  
 Casta Pieridum colebat,  
 Vt ardenti animo  
 Tu quoque nunc ea ritè colis.  
 Et Deum quisquam in fide  
 Profanus elegantes  
 Posthac neget esse poëtas?

### Antistr. II.

O meritò superbam  
 Batauiam, non ferace  
 Tantum vberè pinguis solis

Non situ beato,  
Litoris non portuosi  
Diuitiis, non operoso  
Præstantum artificum labore,  
Sed hoc præcipue,  
Quod tanti ora videre viri,  
Totque fecundi ingenti  
Diuina sensa docta  
Haurire ex voce licebit.

## Epod. II.

At nos abeunte amico  
Simul omnia abire  
Studio dolemus inani.  
Quod te per vlla si pios  
Cura mouet sodales  
Vbicunque eris obsecro nostri  
Sis memor semper, Philique sanctum  
Iouis caueto ledere numen.

IN OBITVM IACOBI  
FAI SPESSÆI V. CL.

*Ad Carolum eius fratrem Senatorem.*

Strophe 1.

**I**AMNE Vides nimis infelix,  
Iamne sentis Gallia,  
Quàm te fata impia tangant?  
Si quem tibi dedere  
Benigna ciuem numina,  
Virtutem auitam pectore qui gerat,  
Qui lacera sarcire ruinas  
Aptus sit patriæ  
Vnguibz actutum hunc auidis rapit orcus & atre  
Lethes gurgite mergit.

Antistr. 1.

Hei mihi quot quantosque vires  
Parca momento breui  
Nobis inuidit iniqua?  
Hæc abstulit Noëum,

*Hæc te Lemuncuri abstulit,  
 Castellumque, & nunc ego quem gemo  
 Fajum, & mille alios, quibus orba  
 Iam tum luminibus  
 Gallia debuerat nimis ab manifesta ruentis  
 Sentire omnia Regni.*

## Epod. I.

*An partes Nemesis suas  
 Hic agit, offensos scilicet ulta Deos,  
 Ob tot crimina criminumque causas,  
 Fœcunda noxæ quas habent hæc secula?  
 Nam penitus pudor exoleuit:  
 Furta nunc fraudeſque, & auara habendi  
 Fert quæcûnque sitis, quicquid & efferum*

## Strophe II.

*Sanguinis improbus audet amor  
 Impias per Gallias  
 Pulso grassatur honesto.  
 Putes genus Cyclopum,  
 Qui quâ iacet quondam ultima  
 Late feracis Trinacriæ plaga  
 Deprensos in litore nautas  
 Raptabant auidi,*

*Carnificumque instar iugulis mucrone recisis  
Fædo more necabant.*

### Antistr. II.

*Multa Virum lita sanguineo  
Membra tabo luridis  
Pendeabant vndique tectis.  
Quæ nec labor coquebat  
Vllus, sed infamem cibum  
Humanitatis nescia pectora,  
Sicut erat, sine lege vorabant.  
Non multum his adeo  
Gallorum distat feritas, quos pectore nullus  
Tangit sensus amoris.*

### Epod. II.

*Deme oris decus insitum,  
Deme vsum eloqui, dixeris esse feras.  
Quales æquore qui vagum sequuti  
Comites Ulyssæ colle Circeo simul  
Sole satæ biberant potentes  
Colchidis succos hominem exuebant  
Mutati stolidum turpiter in pecus*



## Strophe III.

*Hæus ubi nunc veterum illa patrum  
 Caritas doli inscia, &  
 Generis piacura iuuandi?  
 O siderum maligno  
 Nati sub aspectu, quibus  
 Haurire primam hoc tempore contigit  
 Inter tot contagia lucem!  
 Quæ Spessæ tamen  
 Vitabas, tantoque magis tua fama nitebat,  
 Ceu per noctis opacæ*

## Antistr. III.

*Tempora lucidius rutilat  
 Sidus inter nubila.  
 Sit quamuis arida tellus,  
 Fætus tamen beatos  
 Generosa reddum semina.  
 Nec te creatum sanguine nobili  
 Quamuis turpia sæcla vetabant  
 Virtutem exprimere.  
 Atque has Naturæ dotes, hæc insita primo  
 Vita à limine dona*

## Epod. III.

*Bonis auxerat artibus  
 Musarum sacro te pater amne rigans  
 Quem vix attigeras, puellus audax,  
 Cum molle carmen Te tentas senis  
 Ausonio resonare plectro.  
 Dúmque paulatim nouus in tenello  
 Eliscit corde furor, mox etiam ipsius*

## Strophe IIII.

*Romula Virgilij recinis  
 Ore Graio carmina.  
 Miratur mentis acumen,  
 Et gaudio triumphans  
 Subinde amicis te pater  
 Ostentat Ultro, spem senij sui,  
 Quos inter grauis ille Michael  
 Legum primus honos,  
 Astrææ interpres idem Phæbique sacerdos  
 Grati amplexus amici*

## Antistr. IIII.

*Aureolum gremio puerum;  
 Cresce, dixit, o puer*

*Generis spes optima tanti,  
 Cresce in tui parentis  
 Et gloriam & solatium.  
 Si vera nobis indicat indoles,  
 Nec vatem prasagia fallunt,  
 Olim tempus erit,  
 Cum te doctrina insignē Respublica tollet  
 Summo ad sidera plausu.*

## Epod. IIII.

*His dictis senior nouo  
 Incendit cupidum laudis amore animum.  
 Inde atas ubi firma venit annis,  
 Post facta Iuri sacra in aede Pietonum,  
 Primitiasque foro dicatas,  
 Mox datur summo locus in Senatu,  
 Nec desunt iuueni debita premia,*

## Strophe v.

*O tua quàm subito hic patuit  
 Tot graues inter viros  
 Iuuenili atate senilis  
 Constantia, atque prudens  
 In iudicando castitas:  
 Quas te per artes, nec mora, lucido*

*Fama euexit ad aethera curru  
Spectatum populo,  
Spectatum & Regi, Regisque ante omnia fratri,  
Cui Polonia cecidit.*

### Antistr. v.

*Forte suum rigidi extulcrant  
Sarmatæ Regem, neque  
Superabat debitus hæres,  
Et principis legendi  
Urgebat anxios patres  
Incerta dudum cura, fauentibus  
Nunc huic nunc propensius illi  
Consultantum animis,  
Ventorū ut variis impulsū flatibus aquor  
Huc iactatur & illuc.*

### Epod. v.

*At te prouida Principis  
Cura simul longas iussit inire vias,  
In vnum eloquio tuo coacti  
Omnes repulsis ambientium artibus  
Conueniunt, neque conquiescis  
Impiger, donec domino cupitum  
Gens tota imperium, iuræque deferat.*

Strophe

## Strophe vi.

Nunc etiam pater ipse memor  
 Amne toto Vistula  
 Spessai nobile nomen  
 Latè sonat. Quid illè  
 Quid interim rex optimus,  
 Cui tam fideli te obsequio probas?  
 Nempe larem simul atque reuersus  
 Intrauit patrium, (dum  
 Sùpsit ubi auspiciis superis sibi debita du-  
 Fratris funere sceptrum,

## Antistr. vi.

Tale animo meritum reputans  
 Te Senatu in maximo  
 Fisci iubet esse patronum.  
 Quo se orbis in theatro,  
 Animis patrum obstupentibus,  
 Vis illa fandi quàm pote maxima  
 Exeruit: neque postea longi  
 Effluxere dies,  
 Cum te cōsiliū in sacrum, cui præsudet ipse,  
 Sponte admittit & vnum

## Epod. VI.

Deinde rebus in arduis  
 Participem arcani gaudet habere sui.  
 Ecce autem medias fremens per Vrbes  
 Populi rebellis insolens ferocitas  
 Arma mouet subito tumultu.  
 Nullus est legum metus, atque Regum,  
 Diuûm nullus amor, nulla modestia.

## Strophe VII.

Nec propè iam locus ullus erat,  
 Turbidus furentium,  
 Quo non peruaderet ardor.  
 Vix vna fluctuantem  
 Turonum amica ciuitas  
 (Olim negabunt credere posteris)  
 Regem vix exceperat vna:  
 Felix ô nimium,  
 Cui tantæ fidei sæclis præbere futuris  
 Longa exempla licebit!

## Antistr. VII.

Ipsa etiam caput & columen  
 Imperi Lutetia,

*Diuum domus incluta quondam,  
 Defecerat scelestis  
 Adiuncta perduellibus,  
 Pulso Senatu: quem pius ordinem  
 Respectans ante omnia princeps  
 Huius reliquias  
 Colligit & grata Turonum sistit in vrbe  
 Iusti insignia regni.*

## Epod. VII.

*Verum qui reliquos regat  
 Patres, angusto præsideátque loco,  
 Dux legendus erat, nec ille qui iuis  
 E plebe media, sed suo qui lumine  
 Longe alios premat vnus omnes.  
 Ille nam præstans animis ACHILLES,  
 Cui sedes fuit hæc debita principi,*

## Strophe VIII.

*Vincula passus iniqua diu,  
 Spes bonorum maxima,  
 Aberat, vitamque traherat  
 Pro patria atque Rege  
 Inter latrones impios.  
 Hic tu Deorum non sine numine*

*Eligeris, qui nobile munus  
 Illo absente obeas,  
 Desque operam paci, atque tua pro parte labantis  
 sistas pondera regni.*

Antistr. VIII.

*Hei mihi nulla hominum generi  
 Tuta sors usquam fuit!  
 Vix mense exegerat anno  
 Sol inquietus orbem,  
 Cum febris ardor aestuans  
 Aeu te in ipso flore dedit neci,  
 Clarumque atro funere munus  
 Mutauit, nec eam  
 Vxoris vel fidus amor, vel gratia fratris,  
 Vel spes publica mouit.*

Epod. VIII.

*At vos, o pia pectora,  
 Non sum adeo agresti præditus ingenio;  
 Ut lugere vetem: sed huic dolori  
 Modus adhibendus. damna certè publica  
 Flere decet, quod vtiq; tantum  
 Gallia amisit decus, atque lumen,  
 Illis temporibus, cum neque talium*



## Strophe ix.

*Vis numerosa virum est, & eo  
 Res loco sunt maxime,  
 Præstanti egeamus ut horum  
 Industria, fideque.  
 Priuata sed si commoda  
 Spectetis, ecqua sorte beator  
 Iam poterat Spessæus haberi,  
 Quam si desereret  
 Tot monstribus fætam tellurem, ac pura subiret  
 Pacati atria cæli?*

## Antistr. ix.

*Adde quod & vetat ipsa suos  
 Alma virtus emori.  
 Viuet Spessæus, & ora  
 Per erudita vatum  
 Doctis volabit cantibus.  
 Nec me inter illos hæc quoque carmina  
 Quali acumque tulisse pigebit.  
 Quod si cui nouitas,  
 Forsan & insuetus numerorum displicet ordo  
 Nec mollitus ab vsu,*

## Epod. IX.

*Nimirum insolitus dolor  
 Non solito vaturn pectine dignus erat.  
 Quores cunque cadat, profectò nunquam  
 Huius laboris pœnitebit, si modò  
 Grata tibi mea sit voluntas,  
 Candide ô Fai, placidòque vultu  
 Hunc testem officij non renuas mei.*

---

AD P. LAETVM.

## Strophe I.

**D**VM bellica signa secuti  
 Litus ad Britannicum  
 Mente tot curas edaces  
 Tot laborum tedia perpetimur,  
 Patria dulci relicta,  
 Quàm bene Numen amicum  
 Atque tibi atque mihi, facunde Late,  
 Consulit, sors vna quod nos iungit ambos!

## Antistr. I.

*Nam principis ora benigni*

*Quamquam acerba temperent  
 Omnia obtutu vel vno,  
 Quae tamen solatia, quod poterat  
 Candidis Musarum alumniis  
 Gratius esse leuamen,  
 Quam serere alloquia inter sc̃, & prophana  
 Multa vulgo indicta certatim referre?*

## Epod. I.

*Lydia sic gemini  
 Cycni ad vada voce pares edunt sonos.  
 Nec si etiam ingeny nos tardiores  
 Fertili vbertate vincis,  
 Me minus trahit voluptas deliciis  
 Talibus tecum, bone Late, frui,  
 Mella quibus Hyblaea cedunt.*

## Strophe II.

*Nunc ergo vetusta citare  
 Facta praestantum Ducum,  
 Nunc lubet rerum latentes  
 Querere ortus, quae niuis aut pluviae  
 Causa, quid late sonantes  
 In maris alta profundi  
 Praecipitet fluvios, cur astra summo*

*Quadam oberrent, fixa quadam stent Olympo.*

Antistr. II.

*Sapè & meminisse remota  
Patriæ absentes iuuat,  
Vrbis & nostræ superba  
Persequi primordia ab vsque nouo  
Gentis emergentis ortu.  
Scilicet Vt Venus olim  
Saucia cor nitidis Anchisæ ocellis  
Diua mortalem arserit flamma haud inani.*

Epod. II.

*Fertur enim alma Cypris  
Idæ in Phrygiæ riguis conuallibus  
Forte Viri eximiam vidisse formam,  
Dum virenti fusus herba  
Stridula sono cicutæ lata procul  
Rura demulcet, patriûmque gregem.  
Atque equidem (Vt annos decebat)*

Strophe III.

*Tunc mollè canebat amores,  
Regnâque ipsius Dæ,*

*Quam tremunt tellus & æquor,  
 Tota quam magni colit aula Iouis,  
 Te, dea, agnoscit parentem  
 Quicquid vbiq; creatum est,  
 Te sine torpet iners Natura rerum,  
 Ipse mundi ordo tibi se debet vni,*

## Antistr. III.

*Tu ferrea flectere corda,  
 Tu potes coniungere  
 Asperos quamuis amantes.  
 Sis mihi felix vtinam atque fauens.  
 Talia oranti repente  
 Astitit & Tibi præsto  
 (Inquit) adest, tua quã per vota captas.  
 Nympha non vilis tuos sedabit ignes,*

## Epod. III.

*Sed Gnidon atque Paphon  
 Quæ frenat & alta Cytheri culmina.  
 Ille nouo attonitus fulgore primum  
 Artubus totis moueri,  
 Inde sese vbi recepit, nulla mora  
 Diuæ in amplexus ruit, Aeneadum  
 Vnde genus eductum in auras,*

## Strophe IIII.

*Et gentis Iulius origo,  
 Caesar à quo Iulius,  
 Gallia qui dum subacta  
 Signa apud Gallos superesse cupit,  
 Dicitur fundasse celsi  
 Mœnia Iulioduni  
 Haud procul à Ligeris lucente ripa,  
 Nomine & primos suo signasse muros.*

## Antistr. IIII.

*Magni ô monumenta Monarcha,  
 Vosque circum frugibus  
 Fertiles agri & racemis,  
 Limpidi ô fontes, pede qui nitido  
 Picta per prata ambulatis,  
 O domus atque penates,  
 Quando erit ut liceat vobis fruisi  
 Tot semel curis solutum tot querelis?*

## Epod. IIII.

*Mens nisi leua foret,  
 Quæ me ambitio, quis amor nummi improbus  
 Auferat à gremio vestro volentem,*

*Turbidisque addicat aulis ?  
Ipsa sed furore cæco gens hominum  
Inuidet quæ sunt bona vera sibi,  
Anxiaque falsis inhaeret.*

AD FRANC. PVLCRVM

MOTHÆVM.

Strophe I.

**G**ENTIS *Argivæ decus  
Late refulsit, nec Latini gloriam  
Imperii extremæ siluere terræ  
Insignem egregiis belli artibus  
Artibusque pacis.*

*Causam querere si lubet,  
Hæc vna porro est, quod studio pari  
Martem atque Musas nobilis iuuentus  
Vnguibus à teneris colebat.*

Antistr. I.

*Quid iuuat mundi abditas  
Callere causas, quid lepore Tullium  
Vincere, aut cultu numeris Maronem,  
Si ferus obsessis cum manibus*

*Imminebit hostis,  
 Robur non animi tibi  
 Non apta bello dextera suppetat?  
 Si consili expers viriūmque nulla  
 Parte queas patriam tueri?*

### Epod. I.

*Quāto hic splēdidius qui primis vnus ab annis  
 Et re & nomine Pulcer  
 (Antiqui vt genus Appij decebat  
 Romanoque satum sanguine) lauream  
 Iunxit vtramque simul  
 Bellatorque bonusque poëta?*

### Strophe II.

*Sic marina filium  
 Thetidis docebat prouidus quondam senex  
 Arma non tantum Aonias sed artes.  
 Mox etas vbi firma viro fuit,  
 Illicet vel ipsi  
 Formidabilis Hectori  
 Superba Troie Pergama funditus  
 Euertit, alto monte ceu volutus  
 sternit humi sata lata torrens,*



## Antistr. II.

*Magna sternit oppida:*  
*Non tecta fossæ non tuentur aggeres,*  
*Ipsa quæ longos superauit annos*  
*Sylua cadit. Ne te fortissime*  
*Pulcer hoc minorem*  
*Erebus duce, Viuidus*  
*Sanguis inuenta dum fuit integra,*  
*Sic frangis hostes, sic ferox cruento*  
*Demetis obuia quæque ferro.*

## Epod. II.

*Nunc miseros artus nodosa podagra reuinxit,*  
*Infirmæque senectæ*  
*Sæui iugiter additi dolores*  
*Te nexum duplici compede detinent,*  
*Ac solito prohibent*  
*Officio non digna ferentem.*

## Strophe III.

*Ipse te Mauors gemit,*  
*Ipsæ cohortes militum desiderant*  
*Te ducem, & duris quoties in armis*  
*Mentio facta virum est, olim quibus*

Inclytos honores  
Virtus bellica contulit,  
Ad summa cœli sidera te vehunt,  
Notumque Pulcrè nomen atque laudes  
Tota diu sonuere castra.

## Antistr. III.

Fida sed Musæ cohors  
Te veterem alumnum atrocibus non deserunt  
Interim in curis, tibi semper adsunt,  
Solanturque dolentem, & munera  
Quæ prius solebant,  
Vltro nunc quoque porrigunt.  
Hoc tu Dearum numine percitus  
Pugnata cantas principum duella,  
Quorum etiam bona pars fuisti.

## Epod. III.

O Vtinam tali exemplo iam Gallia tandem  
Rectum insistere pergat  
Vera laudis iter! sed inquietis  
Illam vexat agens turbinibus furor,  
Assiduusque comes  
Tam pulcris pavor inuidet ausis.

*Davidis Psalmus Primus.**Strophe..*

**N**IMIS ô beatum  
 Qui nec faciles applicat aures  
 Iniusta consulenti,  
 Ceca nec nocentum  
 Ingreditur temerè vestigia,  
 Neque se prophanis  
 Admiscet irrisoribus.  
 Sed sui legem Dei  
 Casto colens pectore  
 Meditanda nocte dièque  
 Totus in illa est.

*Antistr.*

Erit ille qualis  
 Arboris riguis consita ripis,  
 Quæ latè opaca ramos  
 Explicat comantes.  
 Non illam acris hiems, non torrida  
 Violavit æstas:  
 Sed læta cultori suo

*Fundit annuus opes.  
Sic ille rerum aggredi  
Quicquid volet, irrita nunquam  
Vota videbit.*

### Epod.

*Gens autem impia quæ potentis  
Mandata Dei despicit,  
Instar erit paleæ minuta,  
Primo quam turbine ventus  
Raptam in celeres agit auras.  
Ergo iudicij  
Quando aderit suprema dies,  
Nunquam impius consistet ante  
Iudicis ora Dei,  
Nusquam audebit sanctis piorum  
Sese adiungere cœtibus.  
Vt enim Deo bonorum  
Est vita cordi,  
Sic eodem vindice  
Omnes funditus improbi peribunt.*

# AD MEDICOS ACADE- MIÆ PICTAVIENSIS.

## Strophe I.

**R**OBORE quòd penitus iuuenili  
Septies denos propè natus annos  
Horrendum inuisum morbum  
Stauerim victor, pede  
Calcans superbo belluam nocentem,  
Simne adeò demens,  
Parùm ve numinis memor,  
Acceptum ut referam mihi?

## Antistr. I.

Sed neque Phæbei quoque mystæ,  
Ars quibus firmos homines tueri,  
Vestrum vllus bona tanta sibi  
Arroget, nunquam licet  
Maiore cura præstitum sit vlli  
Officium hoc agro,  
Qui vester, ô viri optimi,  
In me summus amor fuit.

## Epod. I.

*Ardens igne febris  
Torrebat artus iam dies quater septem,  
Nec ultra pote iam pati.  
Iam supremus in ipsis  
Spiritus errabat labris,  
Iam testa læta personabant  
Permisto lacrymis, piisque votis,  
O parce, Domine, parce vox una omnibus.  
Hac inter subito tenues fera pestis in auras  
Abiit, meosque  
Mutato rerum tenore  
Post tot malorum tadia, iam subit  
Alma salus penates.*

## Strophe II.

*Quis neget hoc opus esse Tonantis?  
Quem penes vitæ arbitrium necisque est,  
Cui seruit Natura parens,  
Nostra cui sunt omnia  
Curæ perenni quamlibet pusilla,  
Qui bonus orantum  
Exaudit è cælo preces  
Pronus parcere supplici?*

## Antistr. II.

*Nec minus & vos deinde colendi,  
 Valla summorum decus ô Medentum  
 Penè ipso melior Phæbo.  
 Tu Milo doctissime,  
 Qui cuncta voluis mente perspicaci,  
 Tu Galle, ardua cui  
 Natura se totam exerit,  
 Et cælo, & pelago, & solo.*

## Epod. II.

*Nam quid te memorem  
 Culte ô Citeſi, ciuitatis exurgens  
 Nouum Pictonica iubar,  
 Quo iam ſpondet in vno  
 Patria mille ſibi Hippocrates?  
 Nec ſi hic adeſſes te ſilerem,  
 Pidoxi pater, ordinisq; princeps,  
 Et, quod frequentes prædicabunt poſteri,  
 Primus amor Pugidis Nymphæ, cui ſe Dea  
 Patefecit vni, (primùm  
 Cui vim Naturæ latentis  
 Videre primo contigit, & ſacros  
 Inde aperire fontes.*

## Strophe III.

*Felices quibus ille supremus  
 Vitur rerum pater administris  
 Seruando generi humano!  
 Cuius ipse particeps  
 Factus fauoris luce restituta  
 Gestio, & exultans  
 Vt alter Aeson primuli  
 Florem cui videor mihi*

## Antistr. III.

*Nunc posita renocare senecta.  
 Ore sic pallor, macisq; cedit,  
 Sic fusus per membra vigor.  
 At quibus vos præmiis?  
 Remunerabor? namque vos habendi  
 Nullus amor tangit.  
 Musas amatis, & mihi  
 Non desunt faciles Deæ,*

## Epod. III.

*Quas me olim puerum  
 Ab vsque Thebis, Pindarique Dircai*



*Re ductis penetralibus  
Huc traducere insit  
Ingenitus nouitatis amor.  
Non illa inertes conticescunt,  
Sed laudes hominum Deumque cantant.  
Nec vos tacebunt, ô viri lectissimi,  
Vestra sed innumeros viuens benefacta per annos,  
Neque vos pigebit  
Vitam produxisse vati,  
Aeterni tatis præmia qui suis  
Vindicibus rependat.*

FINIS LIBRI PRIMI.





SCÆVOLÆ  
SAMMARTHANI  
LYRICORVM  
LIBER SECVNDVS.

AD ILLVSTRISS. PRINCIPEM  
HENRICVM BORBONIVM  
Mompenserij Ducem.



**O** FLOS Hæctoridum sidere pulcrior,  
Princeps liligera spes noua Gallia,  
Qui vultu Venerem, pectore Pallada,  
Mauortemque animis refers.  
Vt quondam Æacides puberibus genis  
Inter virgineos delituit greges,  
Dum mox fulminea terribilis manna  
Altum euerteret Ilium,  
Sic inter teneros Pieridum choros  
Ætatis tibi ver transit aurea.  
At nunc tempus adest, cum tua se exeras  
Virtus impatiens mora.  
Iam diues patriis montibus Allobrox,  
Iam toto amne sonante Rhodanus vocat,

*Reſtorẽmque ſibi gaudet ab optin  
Talem Principe deligi.*

*O ſi flammifero dulcis ab æthere  
Pax ad nos redeat, nec fera Gallia  
Iam ſeſe ulterius tot pereuntium  
Turpet ſanguine cuium,*

*Quæ tu in bella rues extera, Barbarum  
Seu Turcam, indomitos ſiue premeſ Scythas,  
Diui nota per exempla Loïſij  
Tanto dignus avo nepos!*

*Non illum oppoſiti terminus Adriæ,  
Non tellus tenuit, non inter inſolens,  
Quin ditis penetrans regna Aſia pio  
Gentes Marte laceſſeret.*

*Illum & ſub Tyriis mœnibus hoſtica  
Fela inter madidum ſanguine Punico  
Viderunt ſocij non ſine lacrimis  
Vitam ponere milites.*

*Fortunata nimis tempora, maſculæ  
Cum virtutis amor, veraque gloria  
Tangebant animos, & pudor & fides  
ſervabant ſua fœdera.*

*Nunc nil egregium nil iuvat arduum  
Moliri, niſi cum ſtringimus impios  
Enſes in patriam, & turbidus hinc furor,  
Hinc auri ſitis impotens,  
Hinc dira ambitio ſœvit, & improbis*

*Virus letiferum mentibus inicit,  
 Audens omne scelus, sit modo perditam  
 Fas explere libidinem.  
 Sed quacunque tamen praelia te manent,  
 Dij faxint patrij, vt per liquidum aëra  
 Bigis conspicuum semper in aureis  
 Te victoria deuehat.*

---

*AD ANNAM IOEVSÆ DVCEM  
 Amiralium Franciæ.*

**I**OEVSÆ pubis gloria Gallicæ,  
 Quem belli honesto puluere sordidum  
 Et sanguine hostili madentem  
 Aula frequens reducem salutat  
 Quæ digna victor præmia, quos tibi.  
 Poscis triumphos? Nam neque tam celer  
 Impleuit augustum superbis  
 Cæsar ouans Latium tropæis,  
 Nec saltuosas impiger Annibal  
 Dum tentat Alpeis & iuga non prius  
 Traiecta, maioris peregit  
 Molis opus. via sic cunteis  
 Tardabat altis rupibus ardua,  
 Qua ponderosas tollere machinas  
 Persaxa præruptosque colleis

*Nec validi potuere currus.  
Sed rebus arctis nescia cedere  
Virtus laborem quamlibet asperum  
Suscepit, HENRICI que faustis  
Auspiciis animosa vicit.  
Mox ingruentum examina militum  
Miratus hostis, tale nihil timens,  
(Nam sese inaccessa locorum  
Crediderat regione tutum)  
Ad prima fœdè prælia concidit  
Nuper feroci pectore, nec mora  
Victoriæ spem abiecit omnem,  
Et vacuas patefecit Vrbeis.  
His fama factis protinus excita,  
Centum ore linguas, centum oculos gerens,  
Ad castra Gallorum citatis  
Lata volat per inane bigis.  
Ducemque partis laudibus inclytum  
Aggressa, Quo te (dixit) amabili  
Sub siderum aspectu recenteis  
Edidit alma parens in auras?  
Virtute & ausis macte age fortibus,  
O digna nostræ materies tubæ,  
Faxo futuri te nepotes  
Innumeros celebrent per annos.  
Dicent iniquis temporibus ratam  
Servasse Regi magnanimo fidem*

*Dum pace polluta rebelles  
 Turbat agens animos Enyo.  
 Sic fata, gratis non sine ausibus,  
 Curru locatum excepit eburneo,  
 Terrâque sublimem relictâ  
 Summa virum super astra vexit.*

---

## De Præfectura Vrbis.

(pagi,



*ON tenais villæ, aut humilis siue nomine  
 Sed vrbis augustissimæ,  
 Pictonicis latè princeps quæ præsidet oris,  
 Quod cura nobis credita est;  
 Da citharam puer, hoc venturi teste Camæna  
 Faxo nepotes nouerint.  
 Nec mea tam vano turgescent pectora fastu,  
 His esse me. Ut parè m putem.  
 At certè haud aberit tantis fiducia cœptis,  
 Nec cæca me pericula,  
 Nec labor, aut quicquid metuunt qui publica curant  
 Franget moueri nescium:  
 Non si bacchantes turbata per aquora venti  
 Cælum solùmque misceant.  
 vsque adeò vestri stimulat me gratia facti,  
 O fida cines pectora,  
 Nec si etiam vobis ipsam deuouero vitam,*

*Fecisse me credam satis.*

*Ecquid enim est maius, quàm lectum ex omnibus vnum*

*Præesse ciuem patriæ?*

*Atlantisque instar, mundi qui sustinet axes,*

*Rem sustinere publicam?*

*Odi ego priuatæ laudat qui commoda vitæ*

*Iners & ignauus domi.*

*Dùmque audit fortes Fabios, magnùmque Camillum,*

*Et illa Martis fulmina*

*Scipiadas, aut qui Gratium feliciter vrbes*

*Virtute rexerunt sua,*

*Non magis afficitur, quàm si Marpesia pigro*

*Cautes rigescat frigore,*

*Nec subito huic pectus laudum succendit amor*

*Pulcherrima æmulatio.*

*Quo fugis, ô demens? an si tibi vixeris vni,*

*Rerumque habenas spreueris,*

*Idcirco seuo patriam evertente tumultu*

*Ruina te feriet minus?*

*Falleris: idem omnes tanto in discrimine ciues*

*Fati sequetur exitus.*

*Ceu ratis infestis vbi naufraga mergitur undis*

*Non ille qui clauum tenet*

*Obruitur solus, sed nautas seuit in omnes*

*Vis impotentis aquoris.*

*Dij tamen in melius malè-fausta hæc omnia vertant,*

*Quæque alma nostras incolit*

Nunc placidè sedes, longum pax incolat, & nos  
 Aetate ditet aurea.

Scilicet haud tanti est seg<sup>num</sup> tibi surgere laudis  
 Querendam ab actis fortibus,  
 Sustineas misera vt patrie lacrimosa videre  
 Furente bello tempora.

In Pædotrophiam nostram, & Iacobi  
 Augusti Thuani v. c. poëma  
 de re Accipitraria.

**I**AM garriebat, iam pede paruulo  
 Tectis alumnus progrediens humum  
 Signabat, & nutrix & alimi  
 Lactis amor tenues in auras

Paulatim abibant. hoc adeò meæ  
 Restabat vnum iam vigilantie,  
 Hunc mille vt infestus docerem  
 Quas fugeret tener & pestes.  
 Cum de propinquo litore Antonum  
 Garumna pleno quæ ruit alueo,  
 Illuxit Augusti politum  
 Vatis opus: neque me, sed omnes  
 Quotquot Camænis dulcibus integri  
 Pudica mystæ concinimus sacra,  
 Perculsi ingenti stupore



Protinus, atque silere iussit.

Ceu cùm remotis Phocidos in iugis

Alternæ Musæ carmina concinunt,

Si fortè inexpectatus adsit

Delius, instituâtque tantum,

Sive ille priscos pectine mobili

Retrahet ignes, notæque pascua,

Seu visa Phlegraei furoris

Bella tonet grauiore plectro:

Silet sororum continuò chorus,

Fusque circum Capripedes stupent,

Vocemque odoratis latentes

Collibus excipiunt Napææ.

Quàm penè lecto carmine tot noua

Miratus vno in corpore lumina

Artis vetustæ, qua recentes

Arduus exuperas poëtas,

Auguste, fregi plectraque cum chely, &

Saltus reliqui transfuga Thespios:

Ineptiarum sic mearum

Pectore me tacito pudebat!

At gloriosum est, & licet imparem

Certare tanto me iuuat amulo,

Quo nulla maiorem tulere

Secula, nulla ferent poëtam.

Quo vate turget magna Eutetia,

Vt patre quondam Præsidi, quem videt

In summo & ipsum iam Senatus

Ordine ritè suo sedentem.  
 Illa quidem ipsa, quarum etiam aureis  
 Naturam & artes versibus explicat;  
 Virtute non vna volucres  
 Dant varios per inane gyros.  
 Nec magnus alii si Iouis armiger  
 Primas meretur, dum rapit & feras;  
 Viros & ipsos dum cruentat  
 Vngue fero metuendus ales,  
 Nulla est minoris gloria pumili,  
 Qui seua pro se bella gerit, suam  
 Nec ipse prædam non reportat  
 Dum timidas fuit in columbas:  
 Tu prima nostri gloria seculi,  
 Magno Maroni proximus, Italæ  
 Dicere fastum gentis vnus  
 Romuleo retudisse cantu.  
 Nobis, minori numine quos agit  
 Phæbeus ardor, sat fueri modò  
 Si prole seruata frequentes  
 Nomina nostra nurus loquentur.

---

Ad Iosephum Scaligerum  
 Iul. Cæsaris F.



OSEPH, sanguis nobilium ducum;  
 Quorum fideli præsidio stetit

Verona quondam, & summa vexit  
Scaligerum super astra nomen.  
Fortuna quanquam blandior improbis,  
Virisque semper fortibus aspera,  
Opes auitas & vetustos  
Merferit exitio penates:  
Nullis procellis tu tamen obrutus  
Effers Olympo conspicuum caput,  
Ceu fluctibus pulsata rupes  
In medio manet alta ponto.  
Aduersa contra fata reniteris,  
Nec sortis villo frangeris impetu,  
Virtutis vnus colenda  
A tenero studiosus æuo.  
Hanc alma mentem Musa tibi dedit,  
Nuper iuuentæ fida comes tuæ  
Cæsus in omnes, imminens  
Præsidium senij futurum.  
Quam tu secutus, non sine numine,  
Qualis Sibyllam Dardanius ducem,  
Profunda noctis regna & umbras  
Tanarij penetras Auerni,  
Semper virentes, Elysia plaggæ  
Visurus agros, & veterum pios  
Manes virorum, quos & Hellas  
Et Latium tulit, imperito  
Ignota vulgo nomina, Pindaros,

Blandâque molles arte Propertios,  
Et vos Catulli, vos Tibulli,  
Virgiliôsq; Maniliôsq;.  
Quorum tibi vni cominus omnium  
Mentes beatas cernere contigit,  
Et si quod arcanum his latebat  
Aoniis aperire mystis.  
Felix laboris primitiis tui,  
Felix & illis quæ melior tibi  
Concessit ætas à Britannis  
Ad rigidos celebranda Bactros.  
Et nostra si quid luminis addere  
Soli corusco Pieris audeat,  
Lubenter hoc quodcunque fido  
Seruiet ingenium sodali.  
Non seua totum te feret Atropos,  
Dicere vatis carminibus tui  
Docti parentis docta proles  
Innumeros celebris per annos.  
At quis Deorum te malus inuidet  
Subinde nobis, nec finit amplius  
Os illud augustum intueri,  
Quod cupida mihi mente curas  
Depellit omnes? huc ades ô tui  
Lux rara seculi, pars animæ meæ,  
Vultûque diuino serena  
Pictonicos, velut antè, colles.

Te noster

*Te noster Vlmus, te pius huc senex  
 Voto impotenti Borderius vocat,  
 Iocos tibi Vertunianus  
 Mille parat studiosus hospes.*

---

## Ad Ianum Antonium Baesium.

**S**ic est, Bæsi, pulcra patrum degener  
 Inventa negligit nepos.  
*Viden' diserta Roma quos lusit modos,  
 Hellasque Roma doctior,  
 Parcens labori ut spernat vsque Gallia,  
 Morémque seruet barbarum?  
 Non illa Homeris, illa non Maronibus  
 Vates minores protulit,  
 Ronsardus ex quo nemini antè peruium  
 Reclusit Aonium nemus.  
 At sacra quorum pectora entheus calor  
 Oestro furente percutit,  
 Certos nec illi verba cogunt in pedes,  
 Legi nec vlli inseruiunt:  
 Tantum similiter desinentibus sonis  
 Extrema claudunt carmina.  
 Quis non leporis confiteri cogitur  
 Hinc deperire plurimum,  
 Tenoris expers Musice dum fluctuat,*

*Vt ebrij Vestigia,  
Nec illa porro mulcet aures suauitas,  
Quam numerus aptus efficit?  
Tu quæ vetustæ culta seruauit modum  
Sectaris, ingressus viam  
Qua nulla Gallos antè duxit orbita  
Longis ab vsque seculis.  
Et ipse simili mentem amore percitus  
Dumeta te per inuia,  
Te per salebras insequor, noua chely  
Senem amulatus Teiūm.  
At cui recentis hoc rud. mentum lyra  
Debetur? Antoni, tibi.  
Vitis repertor Euhyus, frugum Ceres,  
Oliuæ Athenarum Dea:  
Vina offeruntur Euhyo, farra Cereri,  
Oliua Athenarum Dea.  
Ita numerorum Gallicorū principē, &  
Artis repertorem nouæ  
Nefas putarim te nisi primum omnium  
Numeris salutem Gallicis.  
Ergo tepentis aura dum Fauonij  
Sudo renidet æthere,  
Secum lagenam Belnei plenam meri  
Iube Camullus adferat,  
Quæ fons propinquus garrulo salit pede,  
Notasque valles irrigat,*

*Hic Vbi per herbam saepe nudas vidimus  
Saltare fluminum Deas.*

*Adsit nitentes culta Tyndaris sinus,  
Adsint sodales optimi,  
Bellaqua, Grifinus, & vetusta qui lyra  
Coruillus instaurat sonos.*

*Hic fusus vdo gramine inter pocula  
Anacreontis in modum  
Recitabo versus conditos nuper miki  
Anacreontis ad modos.*

### Ad Philippum Portæum.

**P**ORTÆE Aonij delictum chori,  
Quem fausta bona sors alite protulit  
Excultumque per artes,  
Et cana innocuum fide.

*Nimirum ille sapit, qui Genio auspice  
Naturam sequitur perpetuo ducem,  
Ætatisque per omnes  
Dat sese facilem gradus.  
Sic æui teneri mitia tempora  
Dum fluxere tibi, & vix bene primulo  
Vernans flore iuuenta  
Intonsis nituit genis:  
Rlandis Idaliæ saucius ignibus*

Lusisti Aeolia plurima barbito  
Non cessura iocosus  
Lesboæ fidibus lyrae.  
Felix dicta tuis Hippolyte modis;  
Felix Hippolytes nec minus amula,  
Quæ te vate Diana  
Celi se ignibus inserit.  
Non si possideant quicquid ab Vltima  
Lusitana ratis deuehit India,  
Non si mille potenti  
Gentes imperio premant,  
His olim titulis ambitiosius  
Quàm Musæ numeris intumeant tuæ,  
Per quos ore nepotum  
Sperant perpetuò cani.  
Sed nec magnanimi principis interim  
Dotes egregias, factâque fortia, &  
Sanctum pacis amorem  
Arguta retices chely.  
Quid cum maius opus præterea mouens  
Orlandi furias, & Stygio Ioui  
Sacratum Rodomontem  
Heroa resonas tuba?  
Ecce autem Vt veniens te quoque reddidit  
Aetas firma virum, nunc alius tibi  
Rerum nascitur ordo,  
Nec mens quæ fuerat manet.



*Aeternis Sophiae tactus amoribus,  
Musarum illecebris parcere destinas,  
Actaeumque Lycaum  
Mutas Aonia specu.*

*Maeste hoc ingenio: non tibi maximi  
Opportuna deest gratia principis,  
Nec quemcunque capeesses  
Incaustum labor effluet.*

*Huic blandi officio carminis vnicè  
Iam tum carus eras, cum nequedū Vllius  
Sceptra insignia Regni  
Augusta gereret manu.*

*Nec tanti auspicio Herois ad externos  
Te vatem piguit pergere Sarmatas  
Incultamque superbæ  
Gentis barbariem pati.*

*Longi ille obsequij nunc adeò memor  
Vnum te meritò diligit, vnius  
In sermone quiescens  
Sacris te alloquis beat.*

*Terrarum domino sic sua Cæsari  
Virtus Virgilium conciliat, neque  
Sacro iunctior alter  
Hærebat lateri comes.*

## Ad Claudium Pelgċium

**E** procul à patria dilectis mœnibus vrbis  
 Aula vagum prius vna tenebat;  
 Nūc præbet placidas populosa Lutetia sedes,  
 Nobilium domus ipſclita vatū:  
 Hic vbi Pieriis notiſſima nomina ſiluis  
 Portæuſque, patérque Baïſus,  
 Bertaldus, Perróque ſui ſlos aureus æui,  
 Muſarum myſteria tractant.  
 Vos, qua nulla patet pedibus via trita profanis,  
 Per Sophia florentia regna  
 Itis, & arcanos rerum perquiritis ortus,  
 Naturamque reuoluitis omnem.  
 Quis non ſollicitos toto de pectore amores  
 Hæc inter ſolatia pellat?  
 Tu tamen indefeſſus amas (quis credere poſſit?)  
 Et patrij dulciſſima Clani  
 Litora dum ſubeunt, domineque abſentis imago  
 Multa oculis, animóque recurſat,  
 Omnia tunc tacitis turbantur gaudia curis,  
 Tunc ſolito furit igne Cupido.  
 Quid facereſ? hac lege hominum gens exit in auras,  
 Vt Chalybum niſi cincta metallo

Corda geras, te vincat Amor, qui cætera vincit  
 Cali aura quæcunque fruuntur  
 Præsertim egregius quoties ornata puella  
 Dotibus hæc incendia miscet.  
 Qualis ea est, tua quæ iamdudum pectora adurit,  
 Digna æternos vrere duos,  
 Nutrita Aoniis in montibus, altera Sappho,  
 Lesbia si modò casta fuisset.  
 Vix ea formosæ fuerat præstantia Laura,  
 Et tamen hanc pius ille poëta  
 Intactam coluit multos Petrarca per annos,  
 Et cantu super æthera vexit.  
 Non illum ingenue, quas intentissimus artes  
 Cura omni studioque colebat,  
 Primus & à longa reuocabat nocte sepultas,  
 A dulci auertère furore.  
 Ab quoties domina infelix post fata superstes  
 Ingemuit, cælumque perosus  
 Inuisam optauit cum luctu abrumperè vitam?  
 Ille etiam manesque ciebat  
 Carminibus querulis, & nunquam oblitus amorum,  
 Quà Rhodanus fragrantia latè  
 Rura secat, Ligurumque cito pede currit in æquor,  
 Multa lenes iactabat ad aures.  
 Tu quoque, cui faciles pandunt sua sacra Camænae,  
 Cui rerum cognoscere causas,  
 Et varios terræ tractus, & sidera cæli

*Diui concessere fauentes,  
 Non idèò speres conceptam extinguere flammam.  
 Si quis enim est qui mente sagaci  
 Præditus indocta fugiat vestigia plebis,  
 Hac demum Deus hospite gaudet.*

---

*Ad Lodoicum Sammarthanum  
 fratrem.*

**D**VM turbulento conspicuus foro  
 Pericle dignis vocibus intonas,  
 Mirante Pictorum Senatu  
 In media senium iuuenta,  
 Lusuque honesto seria temperans  
 Lectæ puellæ suauibus interim  
 Hæres labellis, quæ beatos  
 Assyria cumulant odores,  
 Me nota amœna rura Beocia  
 Tenent canentem carmina, quæ Dryas  
 Mirata saltu de propinquo  
 Blandisonis iterat susurris.  
 Non acta regis fortia, regij  
 Non acta fratris, Tyndaridæ quibus  
 Cessere fratres, apta nostræ  
 Materies veniunt Camœnæ.  
 Hæc Mantuana commemorent tuba

*Maiore quorum pectus inæstuat  
Furore, conceptumque numen  
Intus agit meliore flamma.*

*Minuto inaudax pectine libera  
Nunc viua canto, nunc nimium diu  
Absentis optatos Neera,  
Qui mihi me eripiunt, ocellos.*

*Beatus ille est, numina quem sinunt  
Miscere curis gaudia tristibus,  
Dulces & imprimis amores  
Mente sequi haud nimium seuera.*

*Nunc Vanitati gens hominum studet,  
Solæque honesti gaudet imagine:  
Quoduis scelus patrare tutum est,  
Dum tetricum simules Catonem.*

*At nuda nostros simplicitas auos  
Magis inuabat, nec lenibus iocis  
Nefas putabant dura acerba  
Tædia sæpe lenare vitæ.*

*Nec furta, cædēsue interea, aut doli,  
Quæque hoc nefando plurima sæculo  
Immania emersere monstra,  
Tunc placidas tenuere terras.*

*Sed pura vitæ fallere nesciæ  
Lucebat omni tempore castitas,  
Fidēsque, candorque, & profanis  
Religio temerata bellis.*

Quid? ille cuius diuite de penu  
 Fatentur omnes se sapientiæ  
 Præcepta deprompsisse, magnus  
 Nonne Plato teneris amores  
 Secutus olim est? neu sua posteri  
 Non facta nossent, ipse perennibus  
 Intexiuit chartis iocosa  
 Ingenue monumenta flammæ.  
 Et nos inanis sepositi procul  
 Errore turba, tam celebris viri  
 Vestigiis, Natura pollens  
 Quò vocat ac Genius, sequamur.

---

Ad Stephanum Pascaſium.



CONTRAHES paucis epigramma verbis  
 Docte Pascaſi, neque te Catullus,  
 Bilbilis nec te soboles faceto  
 Carmine vincet.

Ipse, ne vires teneri pusillas  
 Ingenij gyro breuiore clausus  
 Comprimam, laxis feror huc & illuc  
 Liber habenis.

Debilis primo ac trepidans, sed ipso  
 Excitor paulatim agilis volatu,  
 Missilis vires veluti sagitta ac-  
 quirat eundo.

Quid iuuat vili studio calentes  
 Fraude collectis inhiare nummis?  
 Quid magistratus speciosa profunt  
 Nomina fasces?

Ista linquentur simul hinc migrare  
 Iusserit nullo docilis moueri  
 Cæca mors rerum pretio, neque vllis  
 Aequa triumphis.

Docta sed sacro quibus ora fonte  
 Musa Hyanteis rigat in viretis,  
 Quà nemus lauri placidum beatos  
 Aflat odores,

His manet muto cineri superstes  
 Fama, quæ æternis hominum subinde  
 Plausibus puro recreat receptas  
 Aethere mentes.

Fallor? an summas vbi fata metas  
 Clauserint, ambos quoque nos perennis  
 Aureo curru super alta rumor  
 Sidera tollet?

Te quidem lauro celebrem, foróque,  
 Magne Pascafi, celebrabit ingens  
 Orbis à Peuce viridi ad superbas  
 Hercule Gades.

Sed neque obscurus veluti latebo  
 Fossor aut cerdo, sua quem iacentem  
 Vix videt præsens, penitus futura  
 Nesciet atq.

*ipse iam Clanus pater, ipsa Clani  
 Quæ colit ripas leuium decora  
 Turba Nympharum me: si ripta glaucis  
 Cantat in antris.*

### Ad Nicolaum Sudorium.

**P**RÆSES togata militiæ decus,  
 Quo doctiorem non alium mihi  
 Videre Pimplæis in antris  
 Contigit à puero sodalem.

*Ecquid lubenter nunc subit illius  
 Felicis aui, dulcibus optimas  
 Cum sepe luces, sepe noctes  
 Fallimus in studiis Sororum?  
 Verùm fugacis prima Vbi tempora  
 Fluxere vitæ, & sollicitudinum,  
 Maturior quas ducit ætas,  
 Turba frequens animos adorta est:  
 Vt quemque certis rebus idoneum  
 Natura fati præscia finxerat,  
 Mox Æonum saltu relicto,  
 Mentem aliæ subiere curæ.  
 Nec vna nobis voluitur orbita:  
 Te iura Gallis reddere, me iuuas  
 Aerarium nostri tueri*



Principis, hoc similes in vno,  
 Quòd non inertì pectore patriam  
 lunare pro se quisque fideliter  
 Conamur: at me dignitate  
 Muneris exuperas minorem.  
 Sic fulgidorum copia luminum  
 Cum noctis umbras discutit, omnibus  
 Non vna vis stellis, sed vnum  
 Omnibus officium est micandi.  
 Nunc me, fauebat qui puero, videt  
 Toruo relictus lumine Cynthus,  
 Et cruditis insolentes  
 Auribus apta negant Camæna.  
 Quid, quòd molestis litibus atteror?  
 Notis & ausum credere se viis  
 Negotiorum vorticosa  
 Abripiunt Genium procella?  
 Et oblatrantum feruida vis canum  
 Ceruam innocentem non sinit auiis  
 Regnare lustris, quæ benigna  
 Sors habitare dedit latenti,  
 Sic me immerentem morsibus inuidis  
 Canina rauci monstra petunt fori,  
 Si quæ (dij auertatis omen)  
 Ruribus eiciant auitis.  
 Nec ipse dentes abstinet impios  
 Quo spes in vno nostra fuit sita,

Et quem mihi casus in omnes  
Præsidium fore pollicebar.

Qui se (ne fandum) sanguine dum meo  
Cruentat atrox, hoc dolet vnicè  
Quòd lacrymem latus nec istos  
Dissimulem tacitus dolores.

Tam durus olim non Phalaris fuit,  
Mugire clausos nec vetuit, caue  
Quos ære subiectis cremabat  
Ignibus, exitiale monstrum.

At tu (quietam sic tibi mitia  
Dent fata vitam) quando tibi sua  
Concessit artes illa, terras  
Vltima quæ Superùm reliquit,

Ades Senator maxime, & à malis  
Vetustum amicum fraudibus exime,  
Neu litium mergi profundo  
Me patiare tuum sub orco.

Sic sortem iniquam Cecropij ducis  
Ferens iniquè, non sine gloria  
Inuictus Alcides amicum  
Asseruit Stygiis ab undis.

## DEO.



Qui stelliferis orbibus insidens  
 Humana arbitrio facta regis tuo,  
 Rerum magne opifex, triste gementibus  
 Te nunc vocibus inuoco.

Hinc moles grauium sollicitudinum,  
 Hinc morbi effera vis cedere nescij  
 Miris excruciat me miserum modis  
 Et nocte & vigilem die.

At tu sancte parens (nam tibi debita  
 Castè sacra fero, te veneror Deum)  
 Languenti fer opem, & rebus in asperis  
 Da constantem animum mihi.

Non me lucis amor sollicitum tenet,  
 Inter tot dubia tristitia tædia  
 Vita, nec renuo funera, nec moror  
 Extremam tumuli vicem.

Sed me admissa mouent crimina, dum subit  
 A recto quoties tramite deuium  
 Peccati in laqueos me pede lubrico  
 Error precipitem dedit.

Nec spes vlla, animum tu nisi recreas,  
 Ostendi, que viam, qua melioribus  
 Insistam auspiciis, & patrij poli

*Sublimes repetam domos.  
 O si me ætheriis ciuibus additum  
 Admittas superæ in limina Regiæ,  
 Oblitusque hominem, sidereum tui  
 Vultus aspiciam iubar,  
 Quid me vno poterit esse beatius?  
 Quas nō delicias, quas ego non opes,  
 Et regum titulos, & diademata  
 Celso pectore respuam?  
 Tunc præsentem calens numine gratias  
 Exoluam meritas, atque volubilis  
 Ad cæli numeros Aeolio tibi  
 Laudes pectine concinam.*

---

*Ad Renatum fratrem Archidia-  
 conum Pictauiem.*



*R G O quieto redditus otio  
 Amore Phæbi totus inæstuas,  
 Durique susceptam Gradiui  
 Transfuga militiam relinquis?  
 Non hoc iuuentæ viuida Vis tuæ,  
 Omnemque firmum pectus ad aleam  
 Sperare nos de te iubebat;  
 Sed fore qui veteres auorum  
 Laudes referret, nomen & inclytum*

Rubri quod olim litoribus freti,  
Et pabulosæ notum Idumæ  
Palmiferi sonuere colles.

Quod nec taceret Gallia fortium  
Mater virorum, semiuiri nisi  
Iam Marte neglecto nepotes  
Pierin lateant sub antris,

Fortasse iustis huc rationibus  
Impulsi auorum temporibus sua  
Dum conferentes nulla prisca  
Signa vident superesse laudis.

Nam disciplinæ gloria bellicæ  
Tota exoleuit: imperio ducum  
Audire nunc præcepta recusat  
In scelerum genus omne miles.

Non ille sæuis audeat hostibus,  
Cum publica id res postulat, obuiam  
Se ferre, pro verâque pulcræ  
Laude necem impaudè pacisci.

Laus vna rapto viuere, mollibus  
Parentum ab vlnis vellere virgines,  
Sæuire in imbellem, & nefando  
Iura Deum violare ferro.

Hoc si esset vsus milite, nobiles  
Dum captat olim Cæsar adoras,  
Aut ille qui patris Philippi  
Gesta nouo superauit ausu:

*Non magni habenas susciperet soli,  
 Quæque orbis ingens nomina prædicat,  
 Ignota vili cum popello  
 Cimæriis premerentur umbris.  
 Tu si latronum dux fugis eligi,  
 Tuoque damno crimina non tua  
 Plecti recusas integellus  
 Vitæ ad cò meritaque fama,  
 Iam laudo factum, perge modò, & pius  
 Precare cæptis prospera sidera,  
 Vt cuius auctores fuere  
 Consilium superi secudent.  
 Vita frucentem cælibe virgines  
 Amant Camænæ: cernis vt Aonum  
 Iam se tibi pandant profano  
 Culmina non superanda vulgo?*

---

Ad Regem HENRICVM III. ex  
 Gallico Catharinæ Rupcæ  
 PROTREPTICON.



DIGNIS letus honoribus,  
 Quos à gentibus exteris  
 Tulisti, optime Principum,  
 Reuisis patrios lares

*Ipsò in flore iuuentæ.*

*Nunc & imperium exterum*

*Auito imperio iuuat*

*Mutare, & populos rudes*

*Gallorum populis, quibus*

*Nil politius vsquam est.*

*Festis vndique plausibus*

*Ciues te excipiant tui:*

*Sunt qui munera porrigant,*

*At certè hoc animo, datis*

*Vt maiora rependas.*

*Qui sic dat, nihil ille dat,*

*Dúmque aurum tibi callidè,*

*Dum gemmas rutillas ferunt*

*Isti, vendere veriùs*

*Quàm donare videntur.*

*Munus munere ni luas,*

*Habendi sitis impotens*

*Hos à te procul exiget.*

*At tibi ipsa quod offero*

*Gratum sit modò munus,*

*Gloriosum erit & mihi,*

*Nonstrisque vtile ciuibus.*

*Maestas etenim tua*

*Instar eminet ardui*

*Claro in lumine templi,*

*A quo mirificum petat*

Exemplum tua gens, tuæ  
Ad virtutis imaginem,  
Cuius rebus in omnibus  
Dehinc vestigia seruet.  
Ut rebellia frangeret  
Angli militis agmina  
Magni rex quoque nominis  
Olim non renuit sequi  
Vilis dicta puella.  
Nunc ergo & mihi Virgini  
Quod virtus tua suggerit  
Lubens accipe: perfidos  
Hinc hostes tibi vincere  
Sic fortasse licebit.  
Præclara ut documenta des  
Christiane animæ, Deum  
Antiquis cole ritibus,  
Huius morigerum sacris  
Da te legibus vltro.  
Huic te criminis exhibe  
Purum, huic labe carens dato  
Mens pro thure sit hostia.  
Quippe & in Domini manū  
Regum est ipsa potestas.  
Tu iunctos tibi sanguine  
Rebus præfice maximis:  
At negotia si qua sint



*Momentosa, fidelibus*

*Illā trade mini, tris.*

*Regem hæc præcipue decent,*

*Virtutes cumulis opum,*

*Donis consilia optima,*

*Modestamque libidini*

*Anteponere mentem.*

*Tum prudentia quos gerit*

*Recto lumine limpidos*

*Observare oculos, quibus*

*Quod fuit, quod erit, quod est*

*Visu cernitur vno.*

*Ad recti studium fere*

*Priuatorum homines agunt*

*Legum terrificæ minæ,*

*Aut honesta docentium*

*Blandimenta sophorum.*

*Huc & aspera patræ*

*Linguae verbera conferunt:*

*Amici monitis iuvant,*

*Et qui crimina detegunt*

*Probris turpibus hostes.*

*At, ô gloria Principum,*

*Tu diuinitus insitæ*

*Mentis munere præditus,*

*Tu legum imperiis potens*

*Tibi sufficis vnus.*

*Te non præterit optimi  
Esse munera principis  
Cultu iustitiam suo  
Prosequi, & miserum à malis  
Vindicare popellum,  
Indulgere bonis, malos  
Armis plectere, patrios  
Latè extendere limites,  
Hæc sunt nobilium quibus  
Stat potentia Regum.  
Tu mollis nisi virginis  
Fastidis tenues modos,  
Illa spero dies erit  
Cum tuas grauioribus  
Laudes cantibus æquem.  
Tunc & vndique leniter  
Se trahentis ad herbida  
Clani litora candidæ  
Pictonum tibi concinent  
Mille carmina Nymphæ.*

Ad Iacobum Daudium Perronem,  
Cardinalem ampliss.

**E** finxit Natura parens, doctissime Praesul,  
Omnia Mercurio similem.  
Cumque parvis linguae caelestia dona dedisset  
Qua fluuios ventosque tenes:  
Cum mentem aetheriam, qua ceu talaribus auras  
Findis & astra super veheris,  
Pro virga, Stygiis quae sedibus euocet umbras,  
Doctrinam, geniũmque dedit,  
Quo pius erranteis animas à nocte profunda  
Eripis ad superosque trahis.  
Nec tantũ ignaui tibi cedunt vilia vulgi  
Nomina, degeneresque animae:  
Ipsi etiam inuicti, Maruotia pectora, Reges  
Non renuunt te sponte sequi.  
Mirum igitur si magnanimi te prouida cura  
Principis elegit talem?  
Mœnia qui Romæ magnis de rebus adires  
(Sic quoque Mercurium referens)  
Sacrorumque Patrem, vasto qui praesidet Orbi,  
Mulceres dulci alloquio?  
Tu modò ab hoc pacem exora, patriamque reuise  
Tot miserè afflictam arumnis,

*Aduentuque tuo recrea, cen fidus amicum  
 Turbato latè pelago,  
 Quod simul aspiciunt lati post nubila nautæ  
 Mærorem ponunt animis,  
 Felicemque viam tranquillas deinde per vndas  
 Numine pacato peragunt.*

---

*Ad Nicolaum Rapinum  
 Pictonem.*

**M**ARTIA inter agmina  
 Iam frigidū cui quis ferat poetā  
 Tot, Rapine, cantibus  
 Obtundere aures? Tu vetuste  
 amice,  
 Quem suo bona in sinu  
 Minerua fouit, forsan hunc laborem  
 Non iniquus æstimes.  
 Quemcumque certè lumine haud maligno  
 Musa nascentem videt,  
 Vix est ut illum quamlibet senentem  
 Cura dulcis deferat.  
 Non ille pluris fecerit potentum  
 Sceptra Regum gemmea,  
 Non quicquid auri vel Mydas habebat,  
 Impigri vel Astures

*Laboriosis eruant fodinis.*

*Quid quod & vatum pijs  
Iuuant labores publicoque profunt,*

*Facta dum virum ardua  
Obliuioſo vindicant ab æuo?*

*Ipſe ego tam ſeruudum  
Scribendi amorem, quo ſubinde flagro,*

*Eripi nolim mihi,  
Ne fortè deſim muneri, ſuperba  
Colla dum hoſtium terit*

*HENRICVS ardens, totque nos triumphis  
Ad ſuas laudes trahit.*

*Me pelle ad orbis vltimos recessus,*

*Quaque ſurgentem diem  
Indi ſalutant ſolibus peruſti,*

*Quaque deſertus gelus  
Neptunus vnctis nec patet carinis,*

*Debitam Regi fidem  
Memor tenebo, vita dum manebit.*

Ex Arcoſto.



*NIMIVM ſimplex, auido quæ credis  
amanti,*

*Dum ſancta iurat numina!*

*Nulla in amore fides, & amans dum fallit  
amantem*

Periurijs gaudet suis.  
Præcipue prima vernant quibus ora iuuenta  
Cave puella fidere.  
Quã citò qui leuibus stipulis accenditur ignis,  
Pereunte pabulo perit:  
Tam citò deficiunt iuuenili in corde calores,  
Euandique transeunt.  
Venator cupidus ventos patietur & imbres,  
Optata si fugit fera:  
Inciderit semel in casses, hanc negliget idem,  
Nec persequetur amplius.  
Sic Virgo dum intacta manet, dum pectore duro est,  
Hanc impotenter sedulus  
Ambit amans: idem rigida cessante repulsa  
Potitus illam respuit.  
Non tamen ô teneræ vobis, nō proinde puellæ  
Cauendus omnis est amor.  
Nam veluti nullo foditur quæ vomere tellus  
Sub veris aduentum noui,  
Nullo flore decens, nullis nitet utilis herbis,  
Sed squalet ingrato situ.  
Sic mulier nullos experta Cupidinis ignes  
Ætatem inertem transigit.  
Tu modò ne iuuenum incerto capiari amore  
Quæcunque consulis tibi.  
Nam cæco ætatis male-sane deperit æstu  
In amore si qua est suauitas.

*Nónne vides cruda quos vellis ab arbore factus  
 Acerbitatem vt afferant,  
 At quæ cocta suo mitescunt tempore poma  
 Lenes palato dent cibos?*

---

### Epicedium.



*ASSANDRA flos & gloria virginum.*


*Quasunque tellus Iulia protulit,  
 Ten' pubere intactam sub ævo  
 Cruda nimis rapuere fata?*

*Te mille certatim ambierant proci  
 Formæ potentis munere nobilem,  
 Sed Orcus, eheu! destinabat  
 Ipse sibi hunc cupidus decorem.*

*At inter vmbra forma quid attinet?  
 Nullus colorum Manibus est honos,  
 Omnes simul nigris teguntur  
 Noctibus & fugiunt videri.*

*Certè inuidorum est hoc facinus Deûm,  
 Vt quisque vita dignior, ocys  
 Hunc auferunt, ne quæ perennes  
 Gens hominum mereatur annos.*

## Ad C. Nodanum.


**Q**UOD natale solum Macrino vate tu-  
 mebat,  
 Idem mihi ortum præbuit.  
 Quæ Cereris fœcundus ager tibi, maxime  
 Cæsar,  
 Fundata cingit mœnia,  
 Mœnia quæ latos quondam fouere colonos,  
 Dum blanda ridebat quies.  
 At postquam euersis belli vis impia muris  
 Prædonibus fecit viam,  
 Mox alios aliosque sibi legere penates  
 Quicumque tristis patria  
 Cernere deformes non sustinuerit ruinas  
 Horrenda belli insignia.  
 Sic olim euersæ post vltima tempora Troiæ  
 Mæsti migrabant exules.  
 At mihi Piætonidum placidas ante omnia sedes  
 Amica præstat ciuitas.  
 Illa olim primo puerum suscepit ab æuo  
 Tecum Nodane dulcibus  
 Addictum Musis, tibi quæ sua dona ferebant  
 Larga beata dextera.  
 Illa virum, illa senem longos sibi seruet in annos.



O grande Piætonum decus,  
Urbs opibus populóque potens, pietatis alumna,  
Celebris Astrææ domus,  
Grata bonus statio Musis, arx tuta Gradiui,  
Puro salubris aëre,  
Nobilis, ampla, frequens, spatiosis lata Viretis,  
Templis superbis ardua,  
Pande mihi bona, pande sinum, meque accipe ciuem:  
Tu, luce dum datur frui,  
Da faciles aui cursus, tu lumine cassum  
Leni tege æternum solo.

## FINIS LYRICORVM.





SYLVARVM  
LIBRI III.



SCAEVOLAE  
SAMMARTHANI  
SYLVARVM.

*Liber primus.*

---

In Reditum HENRICI Galliae  
& Poloniae Regis. •



V quicumque avidum vere virtutis  
amorem

Concipis, abiectique fugis vestigia vulgi  
Ardus, & patrio reditum moliris  
Olympo,

Mollia ne speres tranquilla tempora vitae,  
Nec facilem rerum tibi polliceare tenorem.  
Nam quod & immeritis fortuna benignior ultro,  
Largaq; munifici dabit indulgentia celi,  
Mille per hoc casus tibi erit, per mille labores  
Quarendum, fortique animo toleranda Deorum  
Invidia, & duri superanda iniuria fati.

*Vsque adeò certus Virtutis in omnia sudor  
Est comes, ignauasque fouent blanda ocia mentes.*

*Quam nisi fixissent mundo fatalia legem  
Stamina, pro meritis sors si foret omnibus æqua,  
Non te detineant alio sub sidere longæ  
Interualla viæ, ignotique incommoda cali,  
Diuisum dulci à patria, aspectuque tuorum,  
O decus HENRICE imperij quem debita nostri  
Sceptra vocant, poscuntque suo sibi tempore regem.*

*At non præteritos, quosunque prioribus annis  
Ordine perpetuo venerata est Gallia reges  
Vexauit simili fortuna indigna tumultu.  
Vsque nec à prima nascentis origine regni  
Contigit, ut rectore suo ratis antè careret  
Gallica: quin simul ac rapido fera turbine Parca  
Deiecit sublimi aliquem de puppe sedentem,  
Protinus emicuit, qui nantis in æquore classis  
Debitus acceptas regeret successor habenas.  
Ac velut Arctoi longe trans litora ponti,  
Vltima semotos quæ porrigit in sula tractus,  
Esse plagam fama est, certis quæ mensibus anni  
Nunquam Sole caret, sed ab vna parte cadentem  
Dum videt, ex alia paulatim albe'cere notos  
Nascentis radios, & primula lumina cernit.  
Sic nunquam antè suum Manortia Gallia regens  
Visa fuit sensisse mori Vix occidit vnus;  
Cum subitò exortus, qui nubila pelleret, alter,*

*Gratiæque*

Gratâque sedato repararet gaudia luctu.  
 Tu solus, sceptris quo nullus dignior unquam  
 Exstitit inuersâque vices, mutatâque sentis  
 Fata patrum, solioque diu prohiberis auito.

Quid faceres? non te propria sat sorte beatum,  
 Quem magni in partem regni fraterna vocabat  
 Gratia, quem socium summis in rebus habebat,  
 Ambitio leuis, aut regnandi vana libido  
 Abstulit hinc, notam iussitque relinquere terram.  
 Sed tua, quæ factis celsum feriebat Olympum  
 Fama, tot à tenera partos ætate triumphos,  
 Tot captas memorans vrbes, tot missa sub Orcum  
 Agmina, quæstamque armis te vindice pacem,  
 Impulit extremo gentes ex orbe remotas  
 Usque à Sarmatico glacialis litore ponti  
 Te petere, & cupidis dominum sibi poscere votis.

Vix bene contigeras oblatis limina regni,  
 Cum medios inter plausus, & publica gentis  
 Gaudia, certatim tibi quæ omnis sexus & ætas  
 Promittit, & auditis longè maiora tuendo,  
 Miraturque libens, conceptumque auget amorem;  
 Nuncius ecce tibi patria lugubris ab ora  
 Aduolat, immiti fratrem qui funere mersum  
 Nunciet, atque noua dominum te voce salutet.  
 Addit & impexis truculentam errare capillis  
 Perque feras Bellonam vrbeis, perque horrida passim  
 Arua, auidisque animis dirum inspirare venenum.

Exemplum tua gens, tuae  
Ad virtutis imaginem,  
Cuius rebus in omnibus  
Dehinc vestigia seruet.  
Et rebellia frangeret  
Angli militis agmina  
Magni rex quoque nominis  
Olim non renuit sequi  
Vilis dicta puella.  
Nunc ergo & mihi Virgini  
Quod virtus tua suggerit  
Lubens accipe: perfidos  
Hinc hostes tibi Vincere  
Sic fortasse licebit.  
Praeclara ut documenta des  
Christiane animae, Deum  
Antiquis cole ritibus,  
Huius morigerum sacris  
Da te legibus Vltro.  
Huic te criminis exhibe  
Purum, huic labe carens dato  
Mens pro thure sit hostia.  
Quippe & in Domini manu  
Regum est ipsa potestas.  
Tu iunctos tibi sanguine  
Rebus praefice maximis:  
At negotia si qua sint

*Momentosa, fidelibus*

*Illa trade mini, tris.*

*Regem hæc præcipue decent,*

*Virtutes cumulis opum,*

*Donis consilia optima,*

*Modestamque libidini*

*Anteponere mentem.*

*Tum prudentia quos gerit*

*Recto lumine limpidos*

*Observare oculos, quibus*

*Quod fuit, quod erit, quod est*

*Visu cernitur vno.*

*Ad recti studium fere'*

*Privatos homines agunt*

*Legum terrificæ minæ,*

*Aut honesta docentium*

*Blandimenta sophorum.*

*Huc & aspera patræ*

*Lingue verbera conferunt:*

*Amici monitis iuvant,*

*Et qui crimina detegunt*

*Probris turpibus hostes.*

*At, ô gloria Principum,*

*Tu diuinitus insita*

*Mentis munere præditus,*

*Tu legum imperiis potens*

*Tibi sufficis vnus.*

*Te non præterit optimi  
Esse munera principis  
Cultu iustitiam suo  
Prosequi, & miserum à malis  
Vindicare popellum,  
Indulgere bonis, malos  
Armis plectere, patrios  
Latè extendere limites,  
Hæc sunt nobilium quibus  
Stat potentia Regum.  
Tu mollis nisi virginis  
Fastidis tenues modos,  
Illa spero dies erit  
Cum tuas grauioribus  
Laudes cantibus æquem.  
Tunc & vndique leniter  
Se trahentis ad herbida  
Clani litora candidæ  
Pictorum tibi concinent  
Mille carmina Nympha.*



Ad Iacobum Daudium Perronem,  
Cardinalem ampliss.

**L**E finxit Natura parens, doctissime Præsul,  
Omnia Mercurio similem.  
Cumque paræ linguæ cælestia dona dedisset  
Quæ fluuios ventosque tenes:  
Cum mentem ætheriam, qua cœu talaribus auras  
Fundis & astra super veheris,  
Pro Virga, Stygiis quæ sedibus euocet Vmbras,  
Doctrinam, geniũque dedit,  
Quo pius erranteis animis à nocte profunda  
Eripis ad superosque trahis,  
Nec tantũ ignaui tibi cedunt Vilia vulgi  
Nomina, degeneresque animæ:  
Ipsi etiam inuicti, Maruotia pectora, Reges  
Non renuunt te sponte sequi.  
Mirum igitur si magnanimi te prouida cura  
Principis elegit talem?  
Mænia qui Romæ magnis de rebus adires  
(Sic quoque Mercurium referens)  
Sacrorumque Patrem, Vasto qui præsidet Orbi,  
Mulceres dulci alloquio?  
Tu modò ab hoc pacem exora, patriamque reuise  
Tot miserè afflictam ærumnis,

*Aduentuque tuo recrea, cen fidus amicum  
 Turbato latè pelago,  
 Quod simul aspiciunt lati post nubila nautæ  
 Mærorem ponunt animis,  
 Felicemque viam tranquillas deinde per vndas  
 Numine pacato peragunt.*

---

*Ad Nicolaum Rapinum  
 Pictonem.*

**M**ARTIA inter agmina  
 Iam frigidū aui quis ferat poëtā  
 Tot, Rapine, cantibus  
 Obtundere aures? Tu vetuste  
 amice,  
 Quem suo bona in sinu  
 Minerva fouit, forsan hunc laborem  
 Non iniquus æstimes.  
 Quemcumque certè lumine haud maligno  
 Musa nascentem videt,  
 Fix est ut illum quamlibet senentem  
 Cura dulcis deferat.  
 Non ille pluris fecerit potentum  
 Sceptra Regum gemmea,  
 Non quicquid auri vel Mydas habebat,  
 Impigri vel Astures

*Lab oriosus erunt fodinis.*

*Quid quod & vatum piq  
Iuuant labores publicoque profunt,*

*Facta dum virum ardua  
Obliuioſo vindicant ab æuo?*

*Ipſe ego tam feruidum  
Scribendi amorem, quo ſubinde flagro,  
Eripi nolim mihi,*

*Ne fortè deſim muneri, ſuperba  
Colla dum hoſtium terit*

*HENRICVS ardens, totque nos triumphis  
Ad ſuas laudes trahit.*

*Me pelle ad orbis vltimos reſceſſus,  
Quaque ſurgentem diem*

*Indi ſalutant ſolibus peruſti,  
Quaque deſertus gelus*

*Neptunus vnctis nec patet carinis,  
Debitam Regi fidem*

*Memor tenebo, vita dum manebit.*

### Ex Arcoſto.



*NIMIVM ſimplex, auido quæ credis  
amanti,*

*Dum ſancta iurat numina!*

*Nulla in amore fides, & amans dum fallit  
amantem*

*Nónne vides cruda quos vellis ab arbore sætus  
 Acerbitatem vt afferant,  
 At quæ cocta suo mitescunt tempore poma  
 Lenes palato dent cibos?*

### Epicedium.



*ASSANDRA flos & gloria virginum.  
 Quasunque tellus Iulia protulit,  
 Ten' pubere intactam sub ævo  
 Cruda nimis rapuere fata?*

*Te mille certatim ambierant proci  
 Formæ potentis munere nobilem,  
 Sed Orcus, eheu! destinabat  
 Ipse sibi hunc cupidus decorem.  
 At inter vmbra forma quid attinet?  
 Nullus colorum Manibus est honos,  
 Omnes simul nigris teguntur  
 Noctibus & fugiunt videri.  
 Certè inuidorum est hoc facinus Deûm,  
 Vt quisque vita dignior, ocys  
 Hunc auferunt, ne quæ perennes  
 Gens hominum mereatur annos.*

O grande Pictonum decus,  
 Urbs opibus populóque potens, pietatis alumna,  
 Celebris Astrææ domus,  
 Grata bonis statio Musis, arx tuta Gradiui,  
 Puro salubris aëre,  
 Nobilis, ampla, frequens, spatiosis lata Viretis,  
 Templis superbis ardua,  
 Pande mihi bona, pande sinum, méque accipe ciuem:  
 Tu, luce dum datur frui,  
 Da faciles æui cursus, tu lumine cassum  
 Leni tege æternum solo.

FINIS LYRICORVM.





SYLVARVM

LIBRI III.



# SCAEVOLAE

SAMMARTHANI

SYLVARVM.

*Liber primus.*

---

In Reditum HENRICI Galliae  
& Poloniae Regis.



V quicumque avidum verae virtutis  
amorem

Concipis, abiectique fugis vestigia vulgi  
Ardens, & patrio reditum moliris  
Olympo,

Mollia ne speres tranquilla tempora vitae,  
Nec facilem rerum tibi pollicare tenorem.

Nam quod & immeritis fortuna benignior Vltro,

Largaq; munifici dabit indulgentia celi,

Millæ per hoc casus tibi erit, per mille labores

Quærendum, fortique animo toleranda Deorum

Inuidia, & duri superanda iniuria fati.

*Vsque adeò certus Virtutis in omnia sudor  
Est comes, ignauasque fouent blanda ocia mentes.*

*Quam nisi fixissent mundo fatalia legem  
Stamina, pro meritis sors si foret omnibus æqua,  
Non te detineant alio sub sidere longæ  
Interualla viæ, ignotique incommoda cali,  
Diuulsum dulci à patria, aspectuque tuorum,  
O decus HENRICE imperij quem debita nostri  
Sceptra vocant, poscuntque suo sibi tempore regem.*

*At non præteritos, quosunque prioribus annis  
Ordine perpetuo venerata est Gallia reges  
Vexauit simili fortuna indigna tumultu.  
Vsque nec à prima nascentis origine regni  
Contigit, ut rectore suo ratis antè careret  
Gallica : quin simul ac rapido fera turbine Parca  
Deiecit sublimi aliquem de puppe sedentem,  
Protinus emicuit, qui nantis in æquore classis  
Debitus acceptas regeret successor habenas.  
Ac velut Arctoi longè trans litora ponti,  
Vltima semotos quæ porrigit in sula tractus,  
Esse plagam fama est, certis quæ mensibus anni  
Nunquam Sole caret, sed ab vna parte cadentem  
Dum videt, ex alia paulatim albe, cere notos  
Nascentis radios, & primula lumina cernit.  
Sic nunquam antè suum Mauortia Gallia regens  
Visa fuit sensisse mori vix occidit vnus,  
Cum subito exortus, qui nubila pelleret, alter,*

*Gratæque*



Gratâque sedato repararet gaudia luctus.  
 Tu solus, sceptris quo nullus dignior unquam  
 Exitit inuersasque vices, mutatâque sentis  
 Fata patrum, soliôque diu prohiberis auito.

Quid faceres? non te propria sat sorte beatum,  
 Quem magni in partem regni fraterna vocabat  
 Gratia, quem socium summis in rebus habebat,  
 Ambitio leuis, aut regnandi vana libido  
 Abstulit hinc, notam insitque relinquere terram.  
 Sed tua, quæ factis celsum feriebat Olympum  
 Fama, tot à tenera partos ætate triumphos,  
 Tot captas memorans vrbes, tot missa sub Orcum  
 Agmina, quasitâque armis te vindice pacem,  
 Impulit extremo gentes ex orbe remotas  
 Usque à Sarmatico glacialis litore ponti  
 Te petere, & cupidis dominum sibi poscere votis.

Vix bene contigeras oblatis limina regni,  
 Cùm medios inter plausus, & publica gentis  
 Gaudia, certatim tibi quæ omnis sexus & ætas  
 Promit, & auditis longè maiora tuendo,  
 Miratûrque libens, conceptûmque auget amorem;  
 Nuncius ecce tibi patria lugubris ab ora  
 Aduolat, immiti fratrem qui funere mersum  
 Nunciet, atque noua dominum te voce salutet.  
 Addit & impexis truculentam errare capillis  
 Perque feras Bellonam vrbeis, perque horrida passim  
 Arua, aui disque animis dirum inspirare venenum.

Quis tibi tunc, pie Rex, generoso in pectore sensus,  
 Cum pendentem animi, tanto in discrimine rerum  
 Urgeret patriæ te suspirantis imago?  
 Nempe licet firmo te blanda Polonia nexu  
 Stringat, & auelli iucundo regis amati  
 Amplexu neget, auspiciis tamen atque Deorum  
 Numine, qui maiora vocant te ad pondera rerum,  
 Stat reuocare gradum, patriasque reuifere sedes.  
 Sic pius Æneas regni melioris amore  
 Sidonias arces, agramque relinquit Elisam,  
 Et dulce in Latium, promissæque peruenit arua.

Sed desiderium gentis miseratus amicæ,  
 Consilium, mentemq; tegis, tacitumque quicta  
 Nocte capeffis iter, dubiæ te credis & Umbra.  
 Æterni calorurn ignes, tuque aurea Phœbe,  
 Cuius adoptiuum nocturno tempore lumen  
 (Quæ licet) exactæ reparat dispendia lucis,  
 Este boni, & vobis immensi nobile mundi  
 Depositu seruate decus, dum debita querit  
 Imperia, afflictisq; venit succurrere Gallis.

Interea, qualis vacua Minois in acta,  
 Mane nouo, vt primũ lento experrecta sopore  
 Sensit abesse sui pulcerrima principis ora,  
 Nec spes optato iam pascere lumina vultu,  
 Flebilis, incomptosq; diu resoluta capillos,  
 Et mæsto absentis miserè deperdita luctu  
 Dicitur hos celo misisse Polonia questus,

O quis te nostris oculis, carissime princeps,  
 Abstulit, atque nouis turbauit gaudia curis?  
 Ergo ego, sublimi quæ vertice nuper adibam  
 Sidera, nec Scythicas HENRICO principe turmas  
 Sæua nec Herculei metuebam tela Geloni,  
 Nunc subito absentem queror externata dolore!  
 At non hoc Superi miseram sperare iuebant,  
 Cum longum permensus iter, patrio orbe relicto,  
 Scilicet immodico nostri correptus amore  
 Me petis, & cupidis cupidam complecteris vlnis,  
 Sed fore perpetuum hoc ventura in tempora fœdus.  
 Quæ noua nunc primam vertit sententia mentem?  
 Mene fugis? nunquam hoc, nunquam mihi credere de te  
 Fas fuerit, mihi nota fides, mihi nota voluntas,  
 Nec rabidæ Tigres infantem lacte ferino  
 Te sub Causeis enutriuere cauernis,  
 Nec nisi te tua fata trahant, monitûsque Decorum,  
 Sustineas accepta oculos auertere terra,  
 Saltem viue memor, neu curam desere nostri,  
 Absentemque absens (te quando carere necesse est)  
 Auspiciis tutare tuis, & numine firma.  
 Certe ego (quæ me cunque manet fortuna) manebo  
 Fida tibi: non vllò alius mihi tempore princeps  
 Iura dabit: non si solio pater ispe relicto  
 Me velit, & superis mutet Saturnius astris.

Sic ait: accurrunt querulæ ad lamenta sorores  
 Russiæ, Massonia, & flauente Podolia crine,

Et Dryadum intonsis Lituania cincta coronis,  
Præstæque, & Graium cui dat vetus insula nomen,  
Femineoque omnes pertundunt pectora planctu.

HENRICVM totis formosus Vistula ripis,  
HENRICVM saltus, HENRICVM tristia latè  
Rura sonant, resonâtque cauis e vallibus Echo.

Ille viam vorat, & mox Caesaris vsus amici  
Hospitio Italiam, cognatâque tendit in arua.  
Excipit ingenti Venetum studiosa paratu  
Vrbis superi Regina maris, quæ diuite sumptu  
Aeris arces mediis attollit in undis.

Iungunt se Ausonii proceres, blandisque volentem  
Pro se quisque iuuant studiis, certantque merendo:  
lactatumque diu, longisque laboribus ærum  
Imponunt nitidi Eridani lucentibus undis.

Demumque eximius, superatis Alpibus, Heros  
Post tantos animi, tant os & corporis æstus  
Succedit regni, gressumque in limine ponit.

Felices nimium montes, felicia culta  
Allobrogum, quibus infestæ post nubila sortis  
Illuxere sacri primum aurea lumina vultus!  
Et tu, Romulidæ quæ debes mœnia Planco,  
Vrbis gemino vetus amne tumens, vestigia Regis  
Sentis prima tui, solennes prima triumphos  
Instauras, hilariq; adeuntem voce salutas.

Nec sit etiam tacitè labentis ad herbida Clani  
Litora nos reducis diuino regis ab ore

*Disſita ſeiungunt longè loca, durus acerbi  
 Quæ malè iamdudum belli pavor undique vexat,  
 Idcirco miniùs officium præſtare merenti,  
 Abſentiq; pio fauſtam clamore ſalutem  
 Dicere nos, gratòſque procul iuuet edere plauſus.*

*Ergo agite, ô veſtro fidiffima pectora regi,  
 Dicite iò ciues, bonà cuncti dicite verba:  
 Omnis letitiæ ſexus vacet, omnis & ordo,  
 Nec pateant vllæ feſtiua luce tabernæ,  
 Quæque prius belli horribiles clauſere tumultus,  
 Nunc potior iubeat ratio fora clauſa ſilere.  
 Ite, & odoratos per compita ſpargite flores,  
 Et feſtos de more choros indicite leti,  
 Fumidâque oblatiſ onerate altaria donis.*

*Ipſe ego pars veſtræ quamquam tenuiſſima turba,  
 Conſpicuus, lauròque caput redimitus olenti  
 (Nam me etiam atheriis ſacer ignibus implet Apollo)  
 Dum ritè excelsis operatur cernuus aris,  
 Votâque pro reditu ſoluit ſuſcepta ſacerdos,  
 Carmine plauſibili celebriſ redeuntis honores,  
 Virtuteſque canam vates, & fortia facta.  
 Scilicet Æoniis veniens vt Nais ab antris  
 Hunc olim egreſſum materna exceperit aluo,  
 Creſcentiſque ſibi teneros aſſumpſerit annos.  
 Mox, cùm rara genas nequedum lanugo notaret,  
 Ipſe ſuos animos generoſa in pectora Mauors,  
 Vincendiſque acrem ſerus inſpirarit amorem.*

Nunc pro fratre pio pia cū ter sumpserit arma,  
 Ter retulit fracto speratum ex hoste tropæum,  
 Ter vota dedit seruatis munera templis.  
 Quid delata loquar sacra moderamina clāssis,  
 Quam faciunt CHRISTI signata nomine gentes  
 Vnanimi consensu omnes, atque agmina iungunt  
 Impia belligeri contra molimina Turcæ?  
 Quod nisi quæ seuis tunc arsit Gallia bellis  
 Hunc remorata suos meritò seruasset in vsus,  
 Non vna audacem repulisset palma tyrannum,  
 Libera sed priscos reuocaret Græcia cultus.

Tu victor, tu bellipotens, tu gloria regum.  
 Tu rursus orbis amor, populi tu summa voluptas.  
 Et tua, quæ mundum radiis illustribus implet,  
 Absentis etiam virtus tibi iungit amicos.

Te rigidi stupuere Getæ: te, maxime ductor,  
 Inclita quos gremio procures Germania nutrit  
 Mirati augustæ regalem frontis honorem,  
 Mirati ingenium præstans, fandique lepores  
 Optauere suis socium contingere regnis,  
 Eque breui hospitio longum deducere sædus.

Salue Dardaniæ spes optima maxima gentis,  
 Magne armis, magne ingenio, qui solus vtraque  
 Laude viges, totūque vni tibi poscis Homerum.  
 Neacides dudum alter eras victricibus armis,  
 Nunc Laertiades, peragratīs gentibus, alter.  
 Neis tibi quid desit, referas ut totus Plyssen,

*Te non agnoscent quidam fortasse tuorum.*

*At nos, dulce quibus pro te, mitissime regum,  
Oppetere, & fidei tibi testem effundere vitam,  
Te colimus, tibi res, tibi nos submittimus Ulrò.*

*Sis bonus ô populûmque iuues miseratus egenum,  
Certa sequens digna imperio vestigia matris  
Cuius fidus amor te nos absente tuetur,  
Tu rege nos, tu pace bea. Sic tempus in omne  
Cura Dei stabilem tibi seruet amica tenorem.  
Sic ubi ter longum Nelidæ impleueris æuum,  
O terræ decus, ô cupidi spes maxima celi,  
Quæ non æqua potest fragilis tibi reddere tellus,  
Accipias solido meritorum præmia calo.*

---

## D A M O E T A S

*Ad Claudiam Retiorum Ducem.*

**H***ættenus aut superûm laudes, aut prælia regum  
Diximus Acolio cantu: nunc rustica nobis  
Musa placet, nunc rura vocant & amicus Apollo  
Pastorum gregibus, qui pastor & ipse Pheræas  
Pauit agens olim per Thessalæ rura iuuenças.*

*Nec minus & votis diuina vocabere nostris  
Claudia, quæ Musas, ipsumque in pectore Phœbum  
Vna geris nostri noua lux & gloria secli.*

M iij



Nam mihi seu veterum splendor spectatur auorum,  
 Siderea seu frontis honos, & gratus ab omni  
 Parte decor, nitidaque illex facundia linguae,  
 Seu magis ingenium præstans, quod vilia vulgi  
 Contemnit studia & sacri se vertice Pindi  
 Sissit, ut impura fugiat contagia terra,  
 Vera pates certè penitus Dea. Quid quod & orbas  
 Vna foues nostra miserans ætate Camænas,  
 Præsidioque tuo doctos amplecteris omnes?  
 Quos inter si quid merui, dum me quoque conor  
 Tollere humo, & veterum lusus effingere vatum,  
 Diua faue, sacrosque tibi ne despice cantus.

Mox & Musarum dulci prouectus amore  
 Aggrediar maiore sono memorare mariti  
 Facta tui, Allobrogum extremis quæ nuper in auris  
 Gessit orans, animos dum passim ad fræna rebelles  
 Siue manu, siue arte adigit, latèque sonantem  
 Eridanum Galli fama iam nominis implet,  
 Hesperiaque aditus & apertas asserit Alpes.  
 Si vacat interea leuibus dare tempora nugis,  
 Ne pigeat querulam Damæta audire cicutam.

INFELIX Arethusa meos cur despicias ignes?  
 Cur quoties operum immunis per prata iuuentus  
 Aut pedibus ducit choreas, aut carmina cantat,  
 Me velut immitem vitas auersa leenam?  
 Tu si me patiare tuum pulcerrima dici,



Nec potior quisquam vario tibi lucida flore  
 Serta legat, iungatque manus & brachia ne fat,  
 O tibi quam dulces fundet mea fistula cantus!  
 Te Clani virides ripæ, te læta sonabunt  
 Flumina, te longo resonabunt murmure valles.  
 Quodque adeò multæ dudum cupiere puellæ,  
 Per pagum digito monstrabere vatis amica  
 Damætæ, & longos tua fama vigebit in annos.

Quod si etiam te dona mouent, ac forsitan illa  
 Plusquam neniolas, & inania carmina curas,  
 Sunt mihi sex nuneo lucentes corpore cygni,  
 Quos ego piscoſo Lemouicis ab amne Vigennæ  
 Attuleram nuper, longæque munera matri,  
 Grata quidem & pigræ solatia blanda senectæ,  
 Tu tamen illa feres. Quid enim mihi gratia matris,  
 Quid patris heu misero bona diuitis omnia profunt,  
 Si tibi despicior, si me aspernaris amantem?

Sum tamen & forma, & florentibus integer annis:  
 Nec mihi contendat nostris in montibus ullus,  
 Seu sit opus lucta, celeri seu vincere cursu,  
 Seu fluuium ingentem validis tranare lacertis,  
 Aut iaculo, aut quauis agilem certare palaestra.  
 Nuper & ipsa aderas, veteris cum in funere Mopsi  
 Ferales de more ageret vicinia ludos,  
 Mæque ferox digitis & voce laceſſeret Aegon,  
 Torua tuens Aegon, reliquos qui robore agrestes  
 Vincit, & ardentes vocat in certamina tauras.

*illum ego iactantemque manus, & multa minantem  
Arripui, & media posttraui latus arena.*

*Hei mihi quòd nulla vel vi superare, vel arte  
Sum potis insano conceptum in corde furorem!*

*Ille coquit me luce, coquit me nocte, nec ullus*

*Aut modus, aut tanto requies venit vlla dolori.*

*Utque leuem attonso stipulam cum exurimus aruo,*

*Lucentes late crepitans furit ignis in agros,*

*Sic furit beu! cacasque vorat mihi flamma medullas.*

*Me rigui fontes, me roscida prata dolentem*

*Aspiciunt, nec opem interea mihi ferre dolenti*

*Aut rigui fontes, aut prata humentia possunt.*

*Ipse pater, mæstis quem saepe incendio querelis*

*Ferre negat Clanus tanta fastidia flammæ,*

*Et nisi sit numen iam fundo are scat, ab imo.*

*O qui me gelidi longinquo litore Ponti*

*Sistat, vbi æterna glacie concreta rigere*

*Stagna ferunt, crudoque gelu duroscere circum*

*Terram omnem, & eanas nunquam cessare pruinas*

*Fors fuit assiduus algens Aquilonibus aer,*

*Leniat ut tantos & frigore temperet æstus.*

*Nam memini senior nobis cum diceret Alcon*

*Tales hinc procul esse plagas: quo tendere quando*

*Fata negant, nec tanta meæ fiducia sorti est,*

*Ite citi nostræ quos tangit cura salutis,*

*Ite, mihi medicas istis in montibus herbas*

*Querite, si tandem sacris depellere succis*

*Infandum sit fas malesano è pectore morbum.*

*Quid loquor ah demens? nil hìc medicamina profunt,*

*Nil magici ritus, aut Vani verba susurri.*

*Ipsè licet medicæ Deus artis Delius adsit,*

*Ipsè suam Vinci fateatur Delius artem.*

*Sola potest Arethusa meos finire dolores.*

*Lympha sitim pellit, rapidum leuat aura calorem,*

*Vina fugant curas, Amor ipsè medetur amanti.*

*Talia dicentem numeris, & plura parantem*

*Dicere, fortè alto Vicini è vertice saltus*

*Venantum auditus clamor, strepitusque latrantum*

*Compressit medio turbatum en carmine vatem.*

## AD IACOBVM AVGVSTVM Thuanum Epistola.

**Q**uod patruus tuus ille, sacri pars magna Senatus,  
Te successorem sibi designauerit vltro,

Nec generis certè communia vincula spectans,

Sed mores animi niueos, cultumque per arteis

Ingenium, scelerisque manus ante omnia puras:

Gratulor hunc meritum tibi fidus amicus honorem.

Gratulor & patriæ, quæ tot iam oppressa ruinis

Præsida te antiquum decus & tuta otia sperat.

Nam vestra hoc proprium gentis mortale bears

Iustitia genus, & leges pacemque tueri,

Explosumque nefus tota depellere terra.  
 Quodque pater, patriusq; olim, quod Præses & ipse  
 Cæpit auius, vel tu demum conamine dextro  
 Perficies, vel mox à te ventura propago  
 Affectum absoluet, melioraque secla reducet.

Non etenim ignauum, non tu consumere tempus  
 Constituis cælebs, & inertu credere somno.

Ipsa sed auspiciis nuper felicibus vxor  
 CANNIA ducta tibi est, & firmo fœdere iuncta.  
 CANNIA magnanimam soboles illustris auorum,  
 Cælestes referens vultuque & pectore diuas,  
 Quæ deinde optato te prolis honore parentem  
 Augeat, & longum tua nomina mittat in æuum,

Felix qui lato crescentes agmine natos  
 Vidit, & hinc seros potuit sperare nepotes!  
 Quid iuuat innumeris tellurem exscindere bobus?  
 Quid prosunt auri multo congesta labore  
 Pondera, quid celsò perducta palatia cælo,  
 Si tibi suprema cum terminus adpetet hora  
 Externo heredi moriens bona cuncta relinquant?

Adde quod hic nobis nascentibus insitus arder  
 Cuique suum instaurare genus, similemque creare  
 Progeniem, & natis vita transcribere munus,  
 Quam quicumque fero neglexit pectore curam,  
 Illum ego duritia cautes æquare marinas  
 Crediderim, & sanctas Naturæ vertere leges  
 Ingratum humano generi, iniisumque beatæ

*Calitibus, quibus & sacra sunt genialia curæ.*

*Tu cui concedunt meliorem numina mentem  
Simplicium veteres ritus imitaris auorum,  
Concessum que tori non aspernaris amorem.*

*Atque ego prima tuæ vidi præludia tædæ  
Iamdudum, primos ventura coniugis ignes  
Conscius, & tanti arcanis admissus amici,  
Dum retinet blando me docta Lutetia nexu  
Absentem dulci à patria, aspectuque meorum.  
Inde mihi reduci lætas ubi nuncius aures  
Perculit, aduentasse diem, cum pulcra subiret  
Nupta domum atque noua decoraret luce penates,  
Quas ego non aras, quæ non ego sacra petiui  
Templa Deûm, quos non superos in vota vocaui?  
Vranie puerum ante omnes, cui cura iugalis  
Prima tori, supplex animoque & voce precabar,  
Hymen ô Hymenæe Hymen cinge aurea sertis  
Tempora, Parisiisque fauens illabere ripis.  
Quæ te cunque tenent sedes, placidissime Diuûm  
I tua quo te festa vocant, iustisque precantum  
Dexter ades votis, nec honestas despice curas.  
Ipsa licet Vati genitrix se iunxerit olim  
Bistonio gelidi vocalem ad Strymonis undam,  
Non tamen vlla vnquam sociauit corpora Cypris  
Aptius aut melius, quàm Cannia ducta Thuano est.  
Illa quidem forma superat præstante puellas,  
Ille viros doctrina vnus supereminet omnes.*

*Hymen, ô Hymenæe, Hymen, da iungere dextras  
 Omine felici, grata Vt concordia sacris  
 Adsit, & æternum fidos comitetur amantibus.*

*Hæc procul. at tantæ pars quantulacunque fuissẽ  
 Latitiæ, forsan præsens meliora dedissẽ,  
 Quando (nec illustres hoc inuidere poetæ)  
 Magna suos inter numerat me Gallia Vates  
 Incultum licet ac nulla arte polita canentem  
 Carmina, quæ cæco tamen ipse amplector amore,  
 Ostentoque lubens, tutisque subinde latebris  
 Educo dubias in aperti luminis oras.*

*Quid faciam? sua cuique placent, cuique est suus error  
 Inditus, & dulci deludit imagine mentem.  
 Vidi ego deformes extanti gibbere natos  
 Qui sic diligeret, sic demulceret ineptis  
 Blanditiis, risum spectans Vt nemo teneret.  
 Quis scit an insipidi fiam quoque fabula vulgi?  
 Sed mea dum placeant Iuteanis atque Pithæis,  
 Augustoque meo, quo nil facundius Vsq̃uam est,  
 Certè ego nec populi ronchos, neque Vana morabor  
 Scommata, quin lauro caput insignitus ouanti  
 Vsq̃ue canam, qualis torrente cicada sub æstu  
 Roris amans, totos sonat importuna per agros  
 Assidue, & fessas messorum verberat aures.*

IN CONVENTVS IVRIDICOS  
 Piſtauij habitos Præſide v. c l.  
 ACHILLE HARLÆO nunc  
 Senatus principe.

**O** Magni columen regni, præclara Senatus  
 Lumina, gens delecta virum, quibus aurea præ-  
 bent

*Lilia sublimem generoso à principe sedem,  
 Saluete Astræi proceres atque omine fausto  
 Piſtonica dudum optati succedite terræ.*

*Sic Leto Æsonidum aduentu miserabilis olim  
 Dulcia concepit vitæ solatia Phineus,  
 Importuna auido cui turpiter vngue volucres  
 Vellebant ex ore cibos, totumque replebant  
 Immundo fœtore locum, neque certa salutis  
 Spes super vlla foret, nisi fessis rebus adessent  
 Optati iuuenes, qui monstra inuisa fugarent.*

*Vobis, illustres animæ, non ductor Iason  
 Præficitur, magno sed Iasone maior Achilles,  
 Qui quondam à tenere nutritus flore iuuentæ  
 Aonias inter Pimplæo in monte puellas,  
 Inde sacræ Themidis melior pia venit ad arma.*

*Nec vobis etiam comes Orpheus additur alter,*

*Bruta sono qui saxa trahat, qui flumina sistat,  
Sed qui Threicio grauior Brissonius Orpheo  
Humanas teneat facundis vocibus aures.*

*Quid superest igitur, nisi vt ipsos grandibus ausis  
Vincatis Minyas? neque enim hic incommoda desunt  
Talia, mille manus latronum, mille nocentes  
Scilicet Harpyia, quas toto expellere calo  
Muneris est vestri & solitas inhibere rapinas.*

*Aspicite vt longo procedant agmine ciues,  
Vt populi festis vos obuia turba salutet  
Plausibus, & latum clamorem ad sidera tollat.  
Responsant colles, responsant florea circum  
Arua, sonansque nemus, praeuertiq; inuia rupes  
Lurdini, & placidi ludit qui Clanus in undis;  
Quaeque iacent rigua virides in valle Crotellæ  
Quiq; pijs seruat Benedicti nomina cliui,  
Nimirum & vobis olim loca nota, verendæ  
Dum Themidis sacram huc pueri properatis ad adem.*

*At dea, quam nostro expulerat vis impia ab orbe,  
Post scelera & cades & quæ fera cunque libido  
Ausæ diu est, sua nunc iterum sua surgere regna  
Sentit, & antiquis liberrima gaudet alumnis.*

*Nec minus & nos, ante quibus grauis atque molesta  
Vita fuit, rerum sedato turbine amicam  
Paulatim aspicimus lucem, ac formidine pulsa  
Dulcia ventura sentimus gaudia pacis.*

*Vos ergo, sacri heroes, quo carmine dicam?*

*Quæ*



*Quæ iuuenes, quæ digna senes præconia tantis  
 Præstabunt meritis, aut præmia debita soluent?  
 Fors & tempus erit cum sæuo erepta periclo  
 Pictonidum gens ritè memor solennia vobis  
 Vota ferat, vobis solennem instauret honorem,  
 Vindicibusque suis altaria ponat & aras,  
 Si liceat, neque Relligio & pia sacra repugnent.  
 Quod poterunt certè merita vos laude nepotes  
 Usque colent, gratoque ferent super æthera cantu:  
 Quique dies huc vos optato fidere vexit  
 Sanctus erit nobis, & cana in secula felix.*

---

### Ad Claudium Binetum.

*S**I quis amor, claudi, tenuis cognoscere vatis  
 Et genus & curas (paucis namque omnia pando)  
 Accipe. Quindecies aderat centesima messis  
 Ter decies iunctis & ter tribus in super annis,  
 Cùm primum Aeneada Cerealem ad Cæsaris urbem  
 Exiit ætherias infans in luminis oras  
 Patrono regis natus patre, mellea cuius  
 Copia nodosi exoluens ænigmata iuris  
 Victurum meruit vicina per oppida nomen.  
 At mihi versificas leges, non Romula iura  
 Discere cura fuit, proque auro carpere laurum.*

N

Non tamen ignavos porrò consumimus annos,  
 Publica sed nobis etiam sunt commoda curæ:  
 Quaque patet latè regio quæ nobile Piæti  
 Nomen habet, viridèmq; bibit qui Santo Carentam,  
 Et qui nostrorum se iactat origine regum  
 Engolimus ager, Thetidique admota Britannæ  
 Rupella, & cultor Lemouix male fertilis agri,  
 Muneris officium nostri patet: Undique certis  
 Huc anni spatii Quæstorum turba minorum,  
 Confluit approperans, & vectigalia defert  
 Annua regalem magni Quæstoris ad arcam.  
 Qui si fortè (fames ut sæpe incessit habendi)  
 Publica priuatos tentent conuertere ad vsus,  
 Castigare meum est, talèmq; auertere pestem,  
 Quæ licet, ac valido audentem compescere freno.

Ipsi etiam Themidis mystæ quam pectore casto,  
 Quam puris manibus faciant augusta verendæ  
 Sacra Deæ, fiscoque fidem & sua munia præsent,  
 Muneris obseruare mei est, sartasque potentis  
 Regis opes omnes, patrimoniâque ampla tueri.

Tu quoque Cyrrhæis alui quem Musa sub Vmbriis  
 Egregiôsque inter iussit florere poetas,  
 Non ideo molli torpes, Binete, veterno.  
 Sed magni Vice Guellæi, qui regia iura  
 Cognitor atque rei seruat communis honorem,  
 Principis interea populiq; negotia curas.

*Scilicet est aliquid patriæ seruire, suamque  
Ferre operam in commune: boni non vltima ciuis  
Ista nota est, sine qua si quisquam viuere possit,  
Ille sibi soli viuet, neque dignus vt illi  
Quisquam alius viuat, obscura qualis in vmbra  
Humani generis latuit teterrimus osor;  
Atque ipsas mediis in Athenis fugit Athenas.*

INIS LIBRI PRIMI.

N ij



SCÆVOLÆ  
SAMMARTHANI  
SYLVARVM  
LIBER II.

AD L. CASTANEVM  
Rupiposæum Abennium.



*Q*UÆ tamen ignavos iam mollis inertia Celtas  
Detinet, aut spatiiis timor improbus  
Urget iniquis,  
Vt sese addicât studio vix segniter vni  
Degeneres? placidas avidè colit ille Camænas,  
Doctus, seu magnum numeris equare Maronem,  
Siue hominum mentes facundis flectere dictis,  
Aut rerum causas, aut abdita promere iura.  
At sit opus valido patriam defendere ferro,  
Augret femineas imbelli voce querellas,  
Et penitus trepida sit civis inutilis Urbi.  
Alter Marte potens, primis quem crudus ab annis

*Ebibit, ingenuas animo non concipit artes,  
 Strenuus ille quidem, & sumptis longè optimus armis,  
 At si succedat rigido pax aurea bello,  
 Negligit inculto ciuilia pectore iura  
 Barbarus, horribili patriam miscétque tumultu.  
 Hinc adeò externas armis neque pellere gentes,  
 Nec satis inter nos pacem licet vsque tueri.  
 At quos culta dedit seclis melioribus Hellas,  
 Bellatrix aut Roma viros, vtrumque subibant  
 Aequè onus, & socio gaudebat Apolline Maiori.  
 Non igitur mirum est, si tot tantásque per orbem  
 Illa vel illa tulit gemino stans numine palmas.  
 Nos malè vicino vix tuta tuemur ab hoste  
 Oppida, & vnius captis in mœnibus vrbis  
 Querimus ingentes titulos, finémque laborum,  
 Quem dare victori prouincia victa solebat.  
 Vsque adeo fractum virtus diuisa vigorem,  
 Sentit, & egregius nequaquam sufficit ausis.*

*Vnus es, ô patriæ rarissima gloria terræ,  
 Quem non degeneris ledant contagia secli,  
 Quique trucem dulci Musa moderere Graduum.  
 Atque equidem sic te nasci volucre sorores,  
 Ius quibus humanæ deducere stamina vita,  
 Perpetuò regni afflictis vt rebus adesses.  
 Seu magnum affari Tarpeia in rupe parentem  
 Esset opus, blandisque ad pacem inducere verbis,*

*Dum te magnanimo legatum à Rege tot annos  
Roma videt, meritumque abeunti reddit honorem:  
Seu toties bacchante odij civilis Erynni  
Regis amor patriæq; salus ad bella vocarent  
Impavidum & populis imponere fræna iuberent.  
Nec si fortè pares felix tibi Gallia multos  
Ferre queat, paribus non speret & illa triumphis  
Debellare suo longinquas tempore gentes.*

*Macte animi, macte ingenij, Ludouice, Deumque  
Non tibi concessas tot amico numine dotes  
Nequidquam esse puta, tanquam sine nomine vulgo.  
Non omnis moriere, tui pars optima letum  
Nesciet, & longa viuet per secula fama.  
Iam tua sidero tollit se gloria cælo,  
Iam tibi gratantes toto ex Helicone Camænæ  
Certatim sua dona ferunt, præq; omnibus vnum  
(Si quid id est, tenuemque haud aspernabere vatem)  
Cæpti operis meritò te prima in fronte locamus  
Insignem, & nostræ resonant tua nomina Sylue.*

## HIPPOCRATIS IVSIVRANDVM

*Latino carmine redditum.*

Ad Franciscum Vertubianum  
Vallam, Medicum Pi&.

**T**E per ego hic, Phœbe ô medicæ pater artis et auctor  
Téque per hîc iuro non inficiande parenti  
Asclepi, & geminas dulcissima nomina natas  
Hygieam, Panacénque, Deósque, Deásque per omnes,  
Quos testes appello fore vt, dum vita manebit,  
Quæ nunc conceptis statuo promittere verbis  
Illa sequar vigil, & seruem indefessus ad vnguem,  
Promissiq, fidem res vt iurata sequatur.

Qui me hanc instituit puerum præceptor ad artem,  
Ille mihi patris instar erit: non segnius illum  
Vsque colam, ac ipsos qui me genuere parentes:  
Illum ego fortunas comitem complectar in omnes:  
Illi, cum sors dura feret, miseratus egeno  
Succurram: totis opibus, tota arte iuuabo.  
Nec minus & fratrum instar erunt, quos pectore toto  
Certus amem, firmoque mihi quos fœdere iungam,  
Tum nati illorum, tum qui nascentur ab illis.

N iij

Quorum si quis erit, pulchro qui incensus amore  
 Virtutis nostras animum conuertat ad artes,  
 Hunc ego gratuito, & nulla mercede docendum  
 Suscipiam. Quin & quouis genitore creati  
 Omnia me discent omnes præcepta magistro,  
 Omnibus vnus ero ductor, Phæbeia princeps  
 Castra sequar, duce me vestigia figere discent:  
 Si modò militiæ dederint sua nomina nostræ.

At sacris, Thymbræe, tuis quicumque teneri  
 Abnuerint, procul hinc illos, procul esse iubeba.

Omnibus hoc vnum studiis, operâque fideli  
 Curabo, vt victus ratio quæcunque salubris,  
 Nec producenda fuerit malè congrua vita,  
 Hanc ego præscribam bonus, & contraria damnem:  
 Vt, quantum potero, maneant me vindice tuti  
 Mortales, fatique furens iniuria cedat.

Non ego vel pretio, vel iniqua petentis amici  
 Adducar precibus, cuiquam vt lethale propinem  
 Pharmacon, aut alius quisquam me auctore propinet.

Nec vero mulier temerati damna pudoris  
 Si qua sit abiecto cupiat quæ extinguere fœtu,  
 Huic ego subjiciam pessos, animam ve latentem  
 Conscius, & nondum risuentia membra necabo.

Faxo mihi sceleris purissima vita nefandi  
 Semper eat, castique decus sine labe pudoris,  
 Nec mihi sanctum vllò vitietur crimine munus.

Vesica inclusus miserè quos calculus angit,



*Haud ego sustineam crudeli excidere ferro.  
Ecquis enim furor est, qua sanas vulnera dextra,  
Hac eadem miseris membris infligere vulnus,  
Sæuūque infando sedare dolore dolorem,  
Et lethum vt fugias aliunde accersere lethum?  
Scilicet has verjet cædens operarius artes,  
Durum hominum genus, & pietate insigne cruenta.*

*Me quæcunque domus venientem exceperit, omni  
Viderit hoc cura satagentem, vt quæ agra iacebunt  
Membra toro dulci arte leuem, mentesque dolore  
Oppressas recreem verbis solatus amicis,  
Fœmina virue suat nullo discrimine habebo,  
An domini an serui: neque amor me cæcus habendi  
Interea, aut Veneris coget male-sana libido.*

*Sine vacem officio, seu quiduis moliar vnquam;  
In vita si forte hominum quid videro, quod sit  
Celandum, celabo lubens, linguamque fideli  
Corripiam freno, nec grata silentia rumpam:  
Nec secus atque mea fidei commissa tenebo  
Arcana, & tacito sub pectore clausa recondam.*

*Sic mihi diuini fauceat bona Numinis aura,  
Sic fortuna meis accedat prospera rebus,  
Quæque mihi merces suscepti optata laboris,  
Laude vehar, vigeatque meum per secula nomen,  
Vt me nulla dies violantem hæc viderit vnquam.  
Sin minus, & vano periuria turpia mendax  
Ore loquar, dubiique ferant hæc irrita venti,*

*Nulla mihi ex animo succedant vota, sed atrox  
Me miserum scuis merset Fortuna procellis,  
Tristiaque inuisæ capiant me tedia vitæ.*

AD P. BLOND. CALEXIVM  
Medicum Iuliodunen.

**I**LLE opifex mundi pulcerrima cuius imago  
Omnis homo sumus, ætheriæ spiramus & auræ  
Particulam, non hæc indulsit munera nobis  
Gratuito: sed enim iusto rem examine librans,  
Cætera cum solo vigeant animalia sensu,  
Diuina & ratio sit solis insita nobis,  
Fecit vt hoc possint nobis præstare videri  
Quæ viuunt letos animalia multa per agros,  
Quæque natant liquidis animalia muta sub vndis,  
Quæque volant tennes animalia picta per auras,  
Quod cum traducant placidum feliciter æuum,  
Nec duris habeant obnoxia pectora curis,  
Vna malis hominum sic vndique vita referta est,  
Vt merito puras in luminis editus oras,  
Tanquam venturæ sortis iam præsciis infans  
Æ fletu incipiat nascentes protinus annos.  
illa autem Ratio, nobis quæ sola malorum  
Materies poterit merito fortasse vocari,  
(Quippe homini hoc pretio per iniquos vendita Diuos)

Repperit ipsa malis solatia debita, mentem  
 Siue premant curæ, seu vexent corpora morbi.  
 Sic ubi quem læsit metuendus acumine caudæ  
 Scorpius, & dirum sparsit per membra venenum,  
 Illatum ipse suos sanat mox sanguine vulnus.

At quamquam longè mens corpore dignior extat,  
 Vt quæ morte carens æternum duret in æuū,  
 Cùm tamen hoc veluti sit carcere clausa, necesse est  
 Corporis affectus mens vt captiua sequatur.

Imprimis querendum igitur qua pellere morbos  
 Arte queas, non celo aliud diuinius vllum,  
 Demissum munus miseris mortalibus vnquam est.  
 Felices quibus hanc ediscere contigit artem,  
 Naturæque sinum referare, & lucida nosse  
 Sidera & herbarum vires aperire latentes.  
 Inde etiam humani fabricam scrutarier omnem  
 Corporis, ac velut in speculo se cominus ipsos  
 Cernere, & his studiis vigili sibi mente parare  
 Vnde queant hominum infirmæ succurrere genti,  
 Et reparare æuū, Naturæque addere vires.

Hinc Phæbus pater, hinc & Phæbi filius olim  
 Ascribi meruit Superis, nec tempora nullos  
 Nostra ferunt, quibus has meritò querita per artes  
 Gloria sidereo tollit se viuida celo.  
 Teque adeò Blondeli animæ pars optima nostræ,  
 Quo melior nemo languore oppressa leuare  
 Corpora, & effætos accersere robur in artus.

*Nec verò sola est aegris succurrere membris  
 Cura tibi, ast alios etiam doctissimus ipse  
 Qua fieri id possit ratione docere laboras.  
 Debita si meritis accedat gratia tantis,  
 Est bene quòd speres. quod si labor irritus, & se  
 Cogatur virtus ipsa contenta manere,  
 Hoc saltem fuerit pretium pro talibus ausis  
 Quod te hominem præstas homini, multòsque iuvando  
 Summum imitare Deum, duce quo dum tu quoque pãdis  
 Quæ producenda ratio sit idonea vita,  
 Ipse tuam innumeros vitam producis in annos.*

---

CHRISTIANORVM, QUI SVB  
 Turca degunt, Oratio.

*S*umme parens, rutili qui templa nitentia cali,  
 Ætéræque imbriferum & vasti maris humida regna  
 Libratámque suo fundasti pondere terram,  
 Principiòque & fine carens, immensa potestas,  
 Primum argilla hominem formas, terræque colenda  
 Præficias, at supremum habitas ipse altus Olympum,  
 Vnde loca obtutu latè omnia cernis acuto.  
 Omnia tu claudis, nec tempore clauderis vllò.  
 Tu cali ætherios præscriptis legibus orbes  
 Dirigis, hos rectis, obliquis motibus illos,

*Alternosque dies alterna diuidis Umbra,  
Vnde vices anni, tempestatesque notamus.  
Tu mare, tu ventosque cies, & fulmina vibras:  
Vtque leui puncto ingentem tua dextera mundum  
Condidit, ad nihilum sic cum volet illa reducet.*

*Ast hominum ingrato gens pectore perdita nescit  
Quanto illam studio vitæ per deuia ducas.  
Fac bonus vt nunquam recto de tramite flectat,  
Nec minus à diris infesti fraudibus anguis  
Assere, quæ primos olim cepere parentes-  
Stellatas ostende vias, quibus ante volatus  
Helias, Enochusque pater petiere nitentis  
Insignes eboris purum super æthera sedes.  
Tum demum accipiet plenissima pectore toto  
Gaudia quisquis erit qui te presente fruatur,  
Augustumque decus sacri admirabitur oris.*

*Alme parens (nam tu mortalibus omnibus æquus  
Iurasti, nec vana fides, fore vindice nato  
Oppressa eximeres vt amaris pectora curis)  
Aspicias vt penetræ tui miserabile templi,  
Et genus electum, & sanctæ domus alta Sionis  
Inuisa externi patiantur iura tyranni?  
Isacidas misereare, tuamque vlciscere gentem.  
Nunc mihi, nunc calo lubet altam educere vocem,  
Promissique fidem querulis exposcere verbis,  
Semperne hos tanto, Deus, in mœrore relinques?*

*Carmina vos montes, vos carmina reddite siluæ.*

*Vos etiam resonate meis caua cantibus antra.  
 Tu Deus hæc audi miserans, & ab æthere celfo  
 Mitte tuum terris populi in solatia* CHRISTVM.

*Flauæ Tigris, placidi partem qui præfluis horti,  
 Quem caput incoluit generis mortalis Adamus,  
 Quæ cecini domino, dominiq; immobile pactum  
 Perfer ad extremos veloci flumine Persas.*

T. COSSÆI EPICEDIVM  
 Ex G. Alberti Gallico.

**I**PSE pater vatum, diuino carmine cuius  
*Viua etiam magni nunc cernimus Hectoris acta,  
 Haud quidquam arte sua Cossæi laudibus addat.  
 Quacunque immensi patet ingens machina mundi,  
 Aëreque, vndosoque mari, celoque, soloque  
 Eximij iuuenis volat vndique nobile nomen,  
 Famæque longinquas nunquam peritura per vrbeis  
 Fertur, & hunc meruit generosum pectus honorem,  
 Absque mora primis quod se patefecit ab annis,  
 Nec se gessit ita, vt passim vulgaribus est mos  
 Militibus, totum peragunt qui segniter æuum  
 In castris, donec mora vix longissima tandem  
 Accinctos operi videt, & se ad fortia demum  
 Facta acuiunt, gelidi cum dura relinquere cani  
 Castra monent. fuit hoc viridi Cossæus in æuo,*

*Haud multis sera quod contigit esse senecta.*

*Ille etenim patrias ubi primum in praelia turmas  
Ducere, & infestos contendere iussus in hostes,  
Sic acer ruit in medios, ut certa futura  
Virtutis documenta daret: mox agmina victor  
Integra dum fracto toties ex hoste reducit,  
Confestim & Regi & populo gratissimus vnus  
Se totum insolito cumulâri sensit honore.  
Tantum vera potest, cui fors comes addita, virtus!*

*Nec satis huic cœpisse fuit, minimûmque putauit  
In cœptis decus esse, nisi pede pergat eodem,  
Ut tandem egregiis Colophona imponeret ausis  
Impiger, & rara posset virtute mereri  
Illorum ascribi numero, clarissima quorum  
Nomina laurigeri splendent laude Gradiui.*

*Hanc autem extremo firmavit funere famam,  
Cum ferus arrepto clypeo (sic Regis amici  
Suadet amor) pulchram petiit per vulnera mortem.*

*Ille quidem moriens nobis æterna reliquit  
Lamenta, ast æterna sibi simul ipse parauit  
Nomina, quæ nullum non admirabitur æuum,  
Bellica dum merito virtus in honore futura est.*

*Ergo suo vitam Regi deuouit in armis  
Sponte sua, certus medio aut occumbere campo,  
Aut superare hostem: neque sic lugenda cadentis  
Conditio, nullum patitur qui funere damnum.  
Pro fragili vita solidum sortitus honorem.*

*Ipse quidem poteras (ea si mens forte fuisset)*  
*Cossæ, ignauum traducere leniter auum,*  
*Stare domi partisque bonis à patre fruiſci,*  
*Quæque tibi magno congesserat ille labore*  
*Deſidia molli in varios conuertere lusus,*  
*Armorumque procul ſtrepitu ſecurus & expers*  
*Terrorum ignoti vitare pericula Martis.*  
*Aut ſi forte pudor te inuiſa vocaſſet ad arma*  
*Nolentem, Vt multos qui regia caſtra ſequuntur,*  
*Tuto ſtare loco poteras, animamque periculo*  
*Surripere, & creperi non vlla ſubire duelli*  
*Damna cauens tibi: ſic flueret molliſſima vita,*  
*Senſimque in ſeros ſeſe produceret annos.*  
*Ignæus at menti vigor inſitus, ipſaque vero*  
*Pectora quæ virtus laudum incendebat amore,*  
*Et Regi promiſſa fides, te ſola iubebant*  
*Bella ſequi, dubiamque animo contemnere ſortem.*

*Hic patuit victrix tua quantum dextera poſſet,*  
*Cordaq; degeneri nunquam depreſſa timore,*  
*Illaque, qua ſeſe decorari Gallia ſenſit,*  
*Digna Deo virtus. O tæque quaterque beati*  
*Heroes, tantum quos Iuppiter æquis amauit,*  
*Vt ſimiles illis animos diuinitus afflet*  
*Quos tibi, Coſſæ, ætatis rariſſima noſtræ*  
*Gloria, magnanimo cuius tot pectore geſta*  
*Clara iuuentuti præbent ſe exempla futura,*

*Vt tua*



*Et tua sectantes olim vestigia discant  
Et pulcrum, dum vita manet, sibi querere laudem,  
Et non obscurum post fata relinquere nomen.*

AD MICH. HOSPITALIVM  
FRANCIÆ CANCELLARIVM  
Epistola, Ex eodem.

**P**ostquam Regis amor sacra tibi munera ceræ  
Commisit, primūque togæ mandavit honorem,  
O qui tum plausus populorum & quanta fuere  
Gaudia! nec sanè immeritò: res nam ipsa docebat  
Aduenisse diem tot votis ante cupitum,  
Cum neque virtuti iam debita præmia desint,  
Nec sola ambitio rerum ad fastigia ducat.

*Nempe aberas procul Allobrogum, Ligurūque  
per Vrbes,*

*Sed tua te in magnis iamdudum cognita rebus  
Præsentem media virtus faciebat in aula.  
Quippe adeò imberbi iam clarus ab inde iuuenta  
Grande tui specimen dederas, nec deinde per omnem  
Visus es ætatem vel vi vel munere flecti,  
Quominus officij recta in ratione maneres.*

*At quamquam his sensim auspiciis tua viuida fama*

Cæperit excelsa se primùm attolere cælo,  
 Non tamen eximiis inimicus defuit ausis  
 Qui tua morderet vesanus nomina liuor.  
 Scilicet ignorans infonti nulla nocere  
 Crimina, quôque magis premitur pulcherrima virtus,  
 Hoc illam magis atque magis se ferre per auras,  
 Pulsôque inuidiæ sublimem euadere fumo.

Ille autem ætheria qui nos regit æquus ab arce  
 Te Deus eduxit primis & fouit ab annis,  
 Përque gradus omneis paulatim euexit honorum,  
 Donec suprema spectandum in sede locauit.

Forſitan hi doleant quibus est mens conscia culpæ,  
 Iurgia qui litēsque serunt, alienaque turbant  
 Otia: nec desini tua quos constantia vexet,  
 Si quando emptæ prius diuendere publica rursum  
 Munera non liceat passim venalia nostris  
 Hactenus, vt merce, alio quas orbe petitas  
 Exponit media venaleis nauta taberna.

Integer at vitæ fore nunc te vindice sperat  
 Concessum placidi spatium traducat vi æui,  
 Nec iam odio nec iam vano compulsa fauore  
 Sordida mens hominum, cecaque libidine habendi  
 Percita iustitiæ temeret venerabile nûmen.  
 Nec Themidis porrò tanquam præconibus olim  
 Sancta ministeria indigne subiecta, videre  
 Eas sit, vt ante fuit, plerûmque addicier illi

Qui licitatus erat collectis scenore nummis  
 Aut aliquo turpi quaestu, furtisve, dolisve,  
 Fors etiam infami corruptis arte tabellis.

Ecce autem egregius iudex iam limine ab ipso  
 Confessus in medio patrum, castoque Senatu,  
 Attollitque manum & constanti pœierat ore  
 Nullo se precio quodcunque hoc munus adeptum.  
 Atque ita periurus celsum de more tribunal  
 Conscendit meditans hoc vnum & pectore voluens  
 Qua tandem arte, quibus possit pensare rapinis  
 Quod prius accepto pro munere prestitit aurum.  
 Iamque minutatim vendit solido ære quod emptum  
 Ante sibi est, abigitque omnem de mente pudorem.

O cecos mores & auari opprobria seclî!  
 Quid mihi tot veterum nodosa enigmata legum  
 Proderit & grandes prudentum euoluere libros,  
 Si sine tot studiis tantorum & mole laborum  
 Siue bonis via siue malis discrimine nullo  
 Per solos pateat sacra ad subsellia nummos?

Huic tu præcipue, vir magne, medebere pesti,  
 Certus non alios posthac conscribere patrum  
 In numerum, nisi qui præstent grauitate fidæque.  
 Te frustra indoctus, frustra importunus adibit,  
 Quanquam illum obnixè commendet epistola Regi  
 Vnius è procerum numero, qua fretus in aulam  
 Irruat & rapidis præuertat cursibus omneis.  
 Qua tamen ille sibi spondebat munera vanus

*Haud referet, iustamque repulsam passus abibit,  
At nihil ambitionis egens (sibi nam satis ipsa est)  
Anteibit virtus fautoribus omnibus vna.*

*Sic demum fugient fraudes, fugientque rapina,  
Sic fugiet, qua nec monstrum deformius vllum est,  
Illa carens oculis inimica Inscitia vero,  
Iudiciisque suum reddes decus atque nitorem.*

*Nec longè has arteis vt perdocearis abibis,  
Sufficient quæ mellifluis præcepta notasti  
Carminibus, dio plenus dum numine cantas  
Qui Regem deceant mores, quæ cura adhibenda  
Vt populo pius atque sibi secla aurea condant.  
At tu si quis amor, si quid te publica tangunt  
Commoda, nec spernis venturæ præmia famæ,  
Ne patiari diu tam docta volumina capsis  
Celari, & mutis sine fruge latere sub umbris.*

*Interea hoc munus placido bonus accipe vultu,  
Quod strepitus interque fori, populique tumultus  
Edebam, nec plura pater concessit Apollo  
Asper & infensus, postquam lucrosa legentem  
Iura fori steriles vidit me relinquere Musas.*

## AD IO. DEFENTIVM.

**F**ortunatus senex, cui nec maturior ætas  
Vlla potest fregisse animos, rectumue morari

*Propositum, patriæ subeas quin pondera molis  
Impiger & tantis rursus obiectere periclis.*

*Fortunate idem iuuenis, quem feruidus olim  
Non vetuit calor ante annos senioribus Vti  
Consiliis, patriæ dum tu quoque fræna teneres,  
Commisssamque urbem longa obsidione leuares.*

*Ipsa tibi Natura parens vtrumque sub æuum  
Temperiem dedit & rebus facit esse gerendis  
Siue manus siue arte habilem nec territa duris  
Temporibus meliorem habuit Respublica ciuem,  
Cui potius primo vāsani turbine belli  
Credere se posset, reuolutæque rursus eodem  
Quem semel experta est hunc gestit habere magistrum  
Iure suo & fides iterum se tradit habenis.*

*Ergo velut pulsa dubia caligine noctis  
Nos recreat noto rediuiuus lumine Titan,  
Sic Vbi te insignem repetito munere lata  
Plebs videt & notos veneratur pendula vultus,  
Dulcia iam optatæ spondet sibi gaudia pacis.*

*Tu modo solennis Urbis ne despice plausus,  
Atque pater patriæ toties assuesce vocari.  
Nec via difficilis fuerit, vestigia tantum  
Ipse tua obserues, tibi tu fidiſſimus vnus  
Dux eris, & certam referes cum laude salutem.*

## ANNÆ ANGLVREI

Givræi Equitis fortiss.

TVMVLVS.

**D***um cecos hominum motus, irâsque, dolôsque,  
 Dum furias, ipsis & digna Gigantibus ausa  
 Despicit e supera malè tutus Iupiter arce,  
 Pertinuit Cælo, rursusque antiqua parari  
 Prælia præuidit, quod præuidet omnia, numen.  
 Ergo suo Diuûm ne defensore careret  
 Regia, qui tantos posset cohibere furores,  
 Et certum instanti caput obiectare periclo,  
 Giuræum euocat ad superos quo fortior Usquam  
 Nullus erat, quique horrifonis Mars acer in armis  
 Alter erat. belli gemino nunc numine Cælum  
 Gaudet, & inuisæ spernit monstra impia Terræ.*

FINIS LIB. II.





SCÆVOLÆ  
SAMMARTHANI  
SYLVARVM  
LIBER III.

---

AD PHILIPPVM PORTÆVM.



ENE, ô Picrides, plus vno viuere seculo  
Exemptum tenebris hominûmque per  
ora vagantem?  
Non equidem assumo tantum mihi,  
nec mea vano

Corda tument fastu. si quis tamen hunc quoque si quis  
Fors olim melior genius mihi spondet honorem,  
Sic eat, & studiis, quàm dedita turpibus etas  
Mercedem vati negat, hanc ventura nepotum  
Tempora dent, largoque moras cum sænore pensent.

Namque (fatebor enim) vatum quoque blandus inescat  
Melabor, & dulcis iam dudum insania ludit.  
Quid faciam? ante alios cælum quibus emicat ignes  
Ipse mihi princeps nascenti illuxit Apollo,  
Et mea Pimplæis deuouit pectora sacris.

○ iiij

Méne etiam placito Superùm pugnare fauori ?

Prima meis studiis populosa Lutetia sedes  
Contigit, hinc primum sacra nemora ardua rupis  
Et semper virides Hæmi patuere recessus.  
Dein celebrem. Astræ sacris sum missus in Urbem  
Pictonidum, si quæ naturam expellere furca,  
Atque leues possem de mente fugare Camænas.  
Sed tamen hoc frustra. nam quo me cumque ferebama  
(Tantus amor) semper comitem se adiunxit eunti  
Fida cohors, iussitque animum iuuenile calentem  
Spernere lucrosas, vulgus quas appetit, artes.

Vix bene contigeram limosi litora Clani,  
Cum Iani occurrit nobis miseranda Perusæ  
Pieris, illa quidem rara lectissima forma,  
Quæque sua doctorum oculos nouitate teneret:  
Verùm imperfecti lugebat damna cothurni  
Usque latens, nec aperta audens se credere scenæ,  
Læuia quòd nuda passim cute crura paterent.  
Donec ego extincti miseratus fata poëta  
Absolui, attexens operi quodcunque vocatus  
Delius, & placida mihi suffecere sorores.  
Nec mora, cum populi iam peruenisset in ora  
Cultior, & genium liber haud ingratus haberet,  
Gaudebam alterius sub nomine nostra libenter  
Scripta legi inuidia vacuus, tutique periculum  
Ingenij tacitè sic me fecisse iuuabat.

Inde petita mihi Biturix, vbi diuite pollens



Eloquio ante omnes Duarenus iura docebat,  
 Et solitus vitans salebras per amœna vireta  
 Insuetum pandebat iter, qua forsitan arte  
 Mens illectari poterat, nisi me sibi totum  
 Vindicet Aonia studium immortale cateruæ.

Inde alia atque alia sedes: nunc aula vagantem  
 Excepit, patriæ nunc blandior aura recepit,  
 Nunc & magna tuos adiç Germania fines,  
 Corniger Arctoa Rhenus quâ labitur vnda,  
 Vangionesque, Vbiosque rigans, & clara Nemetum  
 Mœnia, cum sonitu Batavum descendit in æquor.

Pòst Vbi quâ Druidûm dicta est de nomine tellus  
 Pugnassent ex parte acies vtraque paratæ  
 Nequicquam, & dubio errasset victoria campo,  
 Sperabam infesti sedato turbine belli  
 Iamdudum optatis penitus me tradere Musis.  
 Ecce autem magno misceri murmure rursus  
 Gallia & infandos cœpit renouare furores.  
 Impia, vos patrum ô sancti mihi parcite manes,  
 Dura loquor, sed vera loquor, nimis impia certè  
 Gallia, nec sacro venerandi nomine CHRISTI  
 Censeri iam digna satis, cum iura fidemque  
 Contemnat totiesque suo se sanguine sædet!

Nec minus interea me bella domestica vexant,  
 Anxiæque innumera consumunt pectora lites,  
 Quas socer incautus peperit, frigente senectæ,  
 Intempestivum Veneris dum concipit ignem

*Infelix, miserâsque nouercam inducit in aedes.  
 Hinc patrum immenso patrimonia parte labore,  
 Quæ reliquos inter ciues domus ampla tenebat,  
 Inuasit fera pestus: & hoc in turbine rerum  
 Quisquam Pegaseis possit locus esse puellis?  
 Obstrepit hinc tristis belli fragor, obstrepit illinc  
 Cæca fori rabies, & nubibus irrita donant  
 Omnia, quæ ipse chori princeps dictauit Apollo.*

*Quid loquar impensum curis ciuilibus æuam,  
 Distractâque diu per mille negotia mentem,  
 Dum mihi nunc sacre custodia credita gæzæ,  
 Nunc Urbis tutanda salus, ne tempore duro  
 Turbarent fidos infesta pericula ciues?*

*Multa tamen lusi interea: tantum insita menti  
 Vis potuit, famæq; bonis innata cupido.*

*Meque suos inter numerauit Gallia vates,  
 Seu blanda Aeolio modularer carmina plectro,  
 Seu tenues cantarem elegos, dum stordia latum  
 Ver agit, & studiis gaudet iuuenilibus ætas.*

*Quinetiam intacta querens de fronde coronam,  
 Ausus ego, ingenti vatium applaudente theatro,  
 Longum operæ grauioris opus, quale antea nulli  
 Contigit è nostris Latia tentare Camæna.*

*Et potui, Galloque homini (quæ gratia Musæ  
 Vestra fuit) Graiûm arcani patuere recessus,  
 Cyrrhaque, Parnassusque biceps, Vbi florida plena  
 Serta manu, & sacras licuit decerpere lauros,*

*Dum molles infantum artus quæ pabula firment  
Exequor, & natus in commoda publica seruo  
Mille animas, avidique moror crudelia fati  
Vulnera, & instantes Parcarum auerto rapinas.*

*Inde pium vitæ spirans melioris amorem  
Sacra Deum regi cecini, calique beatis  
Ciuibus, & casto demulsi carmine mentes.  
Exemplo, Portæ, tuo quem numinis aura  
Phæbei primis genuinum afflauit ab annis.  
Dumq; olim teneros molli pede ludis amores,  
Nullus erat qui se dicendi laude poëta  
Auderet conferre tibi: sic ore fluebant  
Mella tuo, & suauem redolebas totus Hymmettum.  
Dein Superum sanctas diuinis vocibus aures  
Lenisti, & sacro clausisti carmine cantus.*

*Fortunate operum, si quid monumenta merentur,  
Nulla tuos vnquam delebunt secula versus.  
Nec tibi prensanda est alienæ fama fauore:  
Dum Priami soboles & Gallica sceptrâ manebunt  
Semper eris, memoriq; diu celebraberis æuo,  
Et patriæ tecum florebit gloria linguae.*

*Non tamen ista tuo sub nomine pauca Verebar  
Edere, teque meis ornandum includere chartis.  
Scilicet ingrati nunquam delebile nomen  
Vt fugiam, scrique sciant me teste nepotes  
Quo candore animi, quo fidus amore sodalem  
Prosequeris, nostrumque iuuas quemcunque laborem.*

Cumque pius princeps tibi iusti signa fauoris  
 Multa ferat, non *Amios* duntaxat honores  
 Miratus, sed & ingenij solertis acumen,  
 Et niueos mores, & natam ad grandia mentem,  
 Ponderéque in mediocrerum tibi præbeat aures,  
 Huic ego si quando placui, tu sponte fauentem  
 Extimulas, primoque faces bonus addis amori.

Salue *Pierij* merito spes optima cætus  
 Dum lateo domine procul à splendoribus aula  
*Pictonicos* inter scopulos, Vbi *Martius* horror  
 Intonat assidue & trepidantia pectora turbat:  
 Interea, si certa fides, absentis amici  
 Nomen ama, & memori constans in pectore serua

## GENETHLIACVM.

**N**on tamen omnino, *Superi*, delere paratis  
*Pictonicum* genus, & ciuili excindere ferro,  
 Cum pulcrum nobis generoso è sanguine prolem  
 Sufficitis forti de semine nobilis *Aelij*,  
 Patria cui debet, *Latio* quod *Roma* *Camillo*  
 Debuit, Vrbe etiam pulsus hoc tempore *Gallis*,  
 Qui sacra nec veriti fuerant violare Deorum  
 Limina, sacrilegi soboles verissima *Brenni*.  
 Non illum solas, præstat quibus impiger, artes  
 Exercere toga iuuat, & fora nota fouere:

Sæpe etiam, patriæ cum res id postulat, arma  
 Tempore sumpta placent, & Pallade claret utraque.

Nempe animis hominum si quando viuidus ille  
 Ardor inest, plenumque inhiat virtutis amorem  
 Desidia impatiens, illaudatque soporis  
 Exultat, studioque ferè haud includitur uno.

Fortunate puer, tali qui patre creatus  
 Quod sectere domi tantæ virtutis habebis  
 Exemplum nullo meritò debile seclò.  
 Fortunate puer, fausto tibi lumine mundus  
 Nascenti arridet, rerumque haud tristis imago  
 Spondet inoffensa latissima tempora vita.

Hoc erat Autumni tanto quod tempore nuper  
 Temperies producta fuit, sudumque serenis  
 Nubibus egelida nitui sub sidere brumæ.  
 Dein cum deformi riguisset frigore tellus,  
 Et glacie concreti amnes, & quicquid iniqui  
 Sæua reducit hyems torpentia corda teneret,  
 Mox veniente die, casta cum matris ab aluo  
 Luminis in dulces oras prodire parabas,  
 Paulatim & frangi rigor, & mitescere calum.

Fallor? an hæc aliquam portendunt omina pacem,  
 Vltricesque iras, rediitque incendia belli,  
 Vltcrius fata ire vetant, superiq; fauentes?  
 Et meritò: quid enim toties furialibus ausis  
 Gallia tam caco ruat in sua damna tumultu,  
 Atque aliis inuicta suo se robore vincat?

Nónne fuit satius iunctis pia prælia turmis  
 Vertere in illeges Turcas, duróque leuare  
 Colla iugo oppressæ per tot iam secula gentis  
 Graiugenûm, fessisque Asia succurrere rebus?  
 Ite, iniunctæ animæ, quo vos possessa profanis  
 Busta vocant repetenda Dci, felicibus ite  
 Auspiciis, aderit fauor alti certus Olympi.

Sic olim auratæ quærentes vellera lanæ  
 Magnanimi heroes, Graiæ socia agmina gentis,  
 Aequor in expertum prima tetigere carina.  
 Quorum & Bistonius iuuenis memoranda canebat  
 Facta comes, fluctûsque insanos voce tenebat.  
 O mihi tale fauens plectrum concedat Apollo!  
 Vos per inaccessas rupes, per inhospita saxa  
 Persequar, his vt visa oculis non auribus hausta  
 Bella canam vates, & longa in secula mittam.  
 Vos non Lethææ mergent obliuia ripa:  
 Vos qua sol oritur, vos quæ se condit in vndas  
 Rumoraget, niueisque volans ad sidera bigis  
 Euehet, & seros mandabit ad vsque nepotes,  
 Fors ego nec tantæ fuero pars vltima famæ.

Me iuuat interea partus cecinisse beatos,  
 Sincerûmque mei testari cordis amorem  
 Carminibus, noti resonat quæ garrula Ciani  
 Ripa, nouûmque suis gaudet me adiungere ciuem.

Vos modò, iuge quibus studium est humana tueri,  
 Calicola, hunc vestro puerum seruate fauore

*Incolumem, & vitæ facilem indulgete tenorem.  
Atque adeò, verbo breuiter complectar vt vno  
Omnia, quæ vel sors, vel continet amula virtus,  
Huic date vt eximij liceat vestigia patris  
Certa sequi & tanto censeri nomine dignum,*

## EPITHALAMIUM

### Ex Gallico R. Bellaquei.

**O** Quæ vecta leui spumosa per æquora concha  
lusiſti inſanos olim, dea, ponere fluctus,  
Descende è celo: túque Hymen ô Hymenee,  
Huc ades, & noctem, qua nunquam faustior vlla,  
Aurea festiuo tollas ad sidera cantu.  
Et vos, ô Nymphæ, quæ prata per herbida letos  
Ducitis arte choros, vitreis qua lucidus vndis  
Parisum lambit sinuosus Sequana litus,  
Nunc immortalem cantu celebrate decorem,  
Et merita amborũ, & nitidam hanc super omnia lucem  
Collucentem igni, quo nunquam purior alter  
Casta Cupidinea consumpsit pectora tædæ.

Dicite diuinæ vultus atque ora puellæ,  
Et penitiſ nulla maculatum labe pudorem,  
Tum niueos pueri mores, cultamque iuuentam,  
Præclarumq; vtriuſq; genus, quod sanguine ab vno  
Francorum antiqua defluxit origine Regum.

*Hic est Borboniæ lux prima, & maxima gentis,  
 Henricum referens virtute & nomine Regem.  
 Illa soror regis dignissima rege marito  
 Margaritis augustæ nomen fatale Nauarrae.  
 O nimium leto celi sub sidere iuncti,  
 Publica priuato qui fœdere fœdera firmant,  
 Gallicâque æterna componunt oppida pace.*

*Ecce diu optatæ iam noctis amica propinquant  
 Tempora, iam tremulas orta sub nube sagittas  
 Procedens Vesper media inter sidera spargit.  
 Lucentem video celi per nubila currum  
 Stellarumque globos, atque agmina longa trahentem.  
 Sume age, pulcher Amor, pharetram, sume ocius arcû,  
 Et lenem alarum ad motum volitantia mitte  
 In blandos tua tela oculos, & mellis odori  
 Cælestem roseis labris infunde liquorem.  
 Sparge hodie quicquid lectorum mittit odorum  
 Aut gens Assyria, aut spectanda nigredine membra  
 Quæ gerit, & crispis nulla caput arte capillis.  
 Fac thymus vt thalamum, fac suauis amaracus ornet,  
 Peruolitentq; Vagæ, ponantq; apiaria circum  
 Florilegæ volucres, condantq; liquentia toto  
 Mella thoro, & donis cælestibus omnia fragrent.*

*Mollis vt Umbrosa lasciuit in arbore vitis,  
 Vt se hedera amplexu vario per robora fundit,  
 Atque tenax tanquam vnguiculis tota implicat vncis:  
 Candida sic teneræ fusus per membra puellæ*



Ora premens, geminúmque sinus turgentis honorem  
 Inferre te optata, tandémque innectere tois  
 Artibus, ut firmo se glutine corpora iungant.  
 Hos inter lusus impressas dente relinque  
 Mille notas, niuci quæ puro in marmore colli  
 Nigrescant, nitidi ut si fortè coagula lactis  
 Deciduum inficiat viridanti ex arbore morum.

Ergo age, delicias fac mille, & dulcia fige  
 Basia mille oculis, & basia mille capillis.  
 Ergo age, delicias dic mille, & pectore ab imo  
 Crebra loquens tremula deduc suffira voce:  
 Quale olim, Zephyri moueat si blandior aura,  
 Populus albescenti tremulum det crine susurrum.

Sit fas flumineas potius comprehendere lymphas,  
 Quotque in Erythraeo voluantur litore arena,  
 Lucida quot rutilent distincto sidera mundo,  
 Quotque natent liquidis animalia muta sub undis,  
 Quàm dulces numerare iocos, & grata duorum  
 Gaudia virgineo bene dissimulata pudore  
 Blanditias inter molles & libera vota  
 Mille modis, quos ætatis calor ipse ministrat.

Ut rosa, seruenti quæ Solis ab igne perusta est,  
 Purpureum amittit languenti flore colorem,  
 Nec spes ulla, nisi hanc nocturnus recreet humor:  
 Sic matura viro secretis virgo calefcit  
 Ignibus, & totas consumitur ægra medullas,

*Suffrans noctem, quæ tantos vna dolores  
Finit, & salutum depellat corde timorem.*

*Surge igitur, lux alma, novos nunc exere vultus,  
Iam sol æruleo flauum caput æquore tinxit  
Prohuc, & immenso currum sub gurgite merfit,  
Surge, bone ô Vesper, neu gaudia læta moreris,  
Basilis fecunda parant quæ promere labra.  
Sparge tuos latè radios, pulcerrime diuûm,  
Sèque duo longis exoluani pectora curi.*

*Vt foliis vidua laurus, & piscibus æquor,  
Florilega sine melle vt apes, sine sideribus nox,  
Ver sine floribus, & nitidis sine solibus æstas:  
Sic sine amore thoris languet, ponitque leporem.  
Hic etenim ales Amor poscens velut incubat ouis,  
Hic teneros primum pullos excludit, amico  
Igne fouens, natisque alimenta optatat ministrat.*

*Quare agite, ô Charitum, & Veneris dulcissima cura,  
Felices animæ, improbulos miscete calores,  
Qui furtim in tepidas liquefacta per ossa medullas  
Labuntur, qualis sub odoris floribus anguis  
Vere nouo serpit gelidus, mutique sub vnda  
In venerem currunt, stimulante libidine, pisces.*

*Tu fac, mitis Amor, thalamû hunc pax aurea semper  
Incolat: interea duce te labentia fallant  
Tempora, & æquali caleant duo viscera flamma,  
Inq. vnâ coëant geminæ per mutua mentes*

*Vincula, neu tristes turbent ea gaudia curæ.  
 Mox letam quoque prole domum sælicitibus auge  
 Auspiciis, castoque vtero nouus exeat infans,  
 Maternum pulcra referat qui fronte pudorem,  
 Ingenioque patrem, atque animis ingentibus aquet,  
 Fac Deus, vt placida certo fluat ordine vitæ  
 Perpetuus tenor ambobus, facilisque senectæ  
 Extremam tumuli seros perducatur ad oram,  
 Demumque vna duos fato lux tollat eodem,  
 Et vebat vnanimis in eadem nauita cymba.*

*Interea nostros felix concordia ciues  
 Iam recreet, coeantque foci, coeantque penates,  
 Sæque animi procerum tam certo fœdere iungant,  
 Exitia vt diræq; neces, populique furentis  
 Intestina odia extremos grassentur in Indos.*

---

IOANNIS MORELLI.  
 Epicedium.

*Ad Camillam eius filiam.*

*Q*uis mihi Pieridum puro de fonte petita  
 Sufficiet nunc verba, quibus mulcere beatos  
 Aggrediar manes, & soluere iusta Morello?

P ij

Quem fortuna virum si non comes usque secuta est,  
Non tamen excelsa, non illi in pectore virtus  
Defuit, & sanctæ decus inuiolabile vitæ  
Quem puerum Musæ Aoniis pauere sub antris,  
Quem iuuenem aula, virum casti fouere penates  
Formantem teneros generosi principis annos:  
At melior tandem securum sortis iniquæ  
Vileſque oblitum curas, neque plura petentem  
Florentis virides sophiæ deduxit in hortos  
Frangia, optatisque senem mox intulit astris.

Ergo, sancte senex, mortali carcere liber  
Accipis in summo iam debita præmia cælo,  
Despiciensque humiles terras penetralia Diuûm  
Celsa tenes, magno loca nunc habitata Thuano,  
Quem nostris ereptum oculis respublica nuper  
Luxit, & elato lacrimas dedit orba parenti.  
Nempe viri tanti alloquus, vultuque beato  
Pascere, ætheriosque vnâ circumspicis orbes  
Arduus, hisque oculis coràm præsentia sentis  
Gaudia, quæ vix olim animo sperare licebat,  
Cum graui obstarent iniussæ pondera terræ.  
Quam tamen, ut fas cumque fuit, dum vita manebat,  
Vincebas, veri antè alios seruantiior omnes,  
Fœdæque vitabas impuri crimina seclî.  
Ac velut in mediæ seruatus tempora brumæ  
Flosculus exacti reuocat noua gaudia veris:

*Sic priscum sanctis renouabas moribus æsum.*

*Sed reliquas inter dotes, & quæ tibi larga  
Munera dij tribuere manu, pars maxima tantæ  
Laudis erat constans in amico pectore candor,  
Quo doctos omnes, doctissimus ipse, fouebas  
Ut licuit, neque si vires ita fortè tulissent  
Sorderent steriles hac tempestate Camæna.*

*Testis erit patrij princeps & gloria plectri  
Ronsardus, qui cùm exoriens, celsi primus Olympo  
Lucifer, os sacrum efferet, fidensque iuuenta  
Dirceum exprimeret patria testudine carmen,  
Nec tanti possent fulgorem ferre poetæ,  
Indocti, quos illa ætas inculta ferebat,  
Tu primus laudare nouoque applaudere Vati,  
Primus & insipida maledicta refellere turbæ  
Cæpisti, & procerum in cætu celebrare merentem.*

*Quid memorem fido tibi iunctum & amore sodalem  
Bellauum? quid mille alios, quorum edita passim  
Scripta tuum referent ventura in secula nomen?  
Et me aliquem hos inter (si Diis placet) esse volebas  
Nescio quæ agresti fundentem incondita Vena  
Carmina, nec Musis, nec Apolline digna Latino.  
Nōne triplex ergo cingat mihi pectora ferrum,  
Si quantum ingenij, quantum mihi Delius artis  
Inspirat, tibi, quicquid id est, non seruiat Vni?*

*At vos ô vatum proceres, quos enthea virtus  
Excitat, & mentes meliori numine complet,*

Composito cineri meritas persoluite laudes,  
 Túque adeò tali dignissima patre Camilla,  
 Rara tui sexus & nostri rarior cui  
 Gloria, quas olim ductore parente Camænas  
 Nosse datum, aërii iuga dum celsissima Pindi  
 Vix paucis adeunda viris, ascendere virgo  
 Non dubitas, sacrasque manu decerpere lauros,  
 Has agedum extincti celebranda in fata parentis  
 Ritè cie, & Stygio reuocans à limine manes,  
 (Quod facis) acceptæ cui debes munera vitæ  
 Redde vicem, & superas reddiduum attolle sub auras.

Certè erit hoc satius, quàm vano lumina fletu  
 Fœdare, & longas incassum iterare querellas.  
 Quandoquidem non his crudelia fata mouentur,  
 Non si soluaris lacrimarum in flumina, non si  
 Tristia Mopsopiæ vincas lamenta puellæ,  
 Cuius in occisum pietas animosa parentem  
 Succesit celo, viuitque in secula fama.

Nam pater Actæis quondam regnator in oris  
 Icæris (Graii nisi fingunt omnia vates)  
 Dulcia in experti primus dum pocula Bacchi  
 Monstrat, & ingratos hoc munere donat agrestes,  
 Quà virides inter Marathon patet ardua salus,  
 Illum turba neci dedit ebria, scilicet haustum  
 Nectare sub dulci sibi credens esse venenum,  
 Quòd madida insolito titubarent corpora lapsu.

Fortè viæ comes & fidus canis iuerat vnà,

Qui morientis heri casum indignatus acerbum  
 Multa vlulans, multis latratibus aëra complens,  
 Currit ad Erigonen, Et, qua potis, indicat illi,  
 (Mirus amor) simul Et sua per vestigia monstras  
 Quà sit iter Sequitur tremulis mæstissima virgo  
 Passibus, atque animo iam tum præsagia sentit  
 Certa mali, carique subit genitoris imago.  
 Ut verò hunc toto proiectum corpore vidit  
 Examines pallentem artus Et sanguine fædum,  
 Tum flauas laniata comas, percussa lacertos,  
 Et gelidum nequidquam amens amplexa cadaver,  
 Tène, ait, ô genitor, tène, ô dulcissime, talem  
 Aspicio? quæ tandem in te manus impia tantum  
 Ausa nefas? nec te sacri reuerentia sceptri,  
 Nec generi humano tot præstita commoda seruant?  
 Vos ô tam muti felices nuper Athenæ  
 Principe, vos populi quotquot meus ille regebat  
 Imperio pater, Et secura pace beabat,  
 Immani meritis à gente reposcite pœnas  
 (Si qua fides) tantumque scelus ne linquite inultum.  
 Quò feror ab demens? etiàmne humana requiro  
 Auxilia? ipse deus, nostro quem saepe receptum  
 Fouimus hospitio, nobis non adfuit Euan.  
 Illicet vna salus properata à morte petenda est.  
 Vix ea finierat, cum sæuo euicta dolore  
 Ipsa sibi vitæ inuisæ retinacula rupit:  
 At superi impavidos mirati virginis ausus,  
 P iiiij


*Protinus aurarum hanc lenibus per inania pennis  
In sublime, canemque simul rapuere fidelem,  
Et noua stellato fixerunt sidera mundo.*

*Te quoque sed fato meliore, Camilla, benignis  
Pro pietate tua superi super ardua tollent  
Sidera & humana maiorem sorte beabunt.*

FINIS LIB. III.







ELEGIAE

---

Ad Scæuolam Sammarthanum.

**I**LLA meo quæris fuerint quàm grata  
 palato,  
 Sammarthane, tua quæ mihi missa  
 manu?

*Sic placuere mihi tum res tum verba legenti,  
 Seria siue tones siue iocosa canas.  
 Siue elegos fundas fecundo ex pectore versus,  
 Siue quod obstupeat Pindarus ipse sonas,  
 Parcus ut in nostri laudandis vatibus æui  
 Mirando nequeam par satis esse tibi.*

TH. B. V.



SCÆVOLÆ  
SAMMARTHANI  
ELEGIÆ.

---

Ad Illustriss. Principem Condensem  
HENRICVM BORBONIVM,

**M**AGNE puer, magnis Francorum è regi-  
bus orbe  
Cui micat in roseo plurimus ore pater.  
Non satis est pulchræ decorari munere  
formæ,  
Quamquam etiam hic parui non faciendus honos,  
Nec satis antiquæ censerî sanguine gentis  
Quæ tenuit valida Troia sceptrâ manu.  
Tu nisi virtuti primis assuescis ab annis  
Impiger & celsa pergis ad astra via.

Qualis vbi educta est generosi seminis arbor,  
Quæ latè virides explicat alta comas,  
Dat nisi grata suo latos in tempore fructus,  
Nec tantum ingrati floris honore nitet.  
Non illam agricolæ cultu dignantur inani,  
Nulla venit sterili gratia, nullus honos.  
Ardua sic magnum spargat nisi facta per orbem  
Et patriam haud segni strenuus auctet ope,  
Dulcia ne princeps optat æ præmia fame  
Speret & à iusta posteritate coli.  
Ergo age paulatim egregiis accingere cæptis,  
Et sequere ingentum fortia gesta patrum.  
Nam neque tot flauas Libycum mare voluit arenas,  
Aurea nec fulgens tot polus astra tenet,  
Fulmina quot belli magno gens orta Capeto  
Protulit, vnde patris semina prima tui.  
Quid memorem his toties coniectū in vincula Belgam,  
Captâque tot bello mœnia, tôtque locis?  
Quid toties gelidas victricia signa per Alpes  
Transmissa, aut Siculi per freta longa sali?  
Non tamen vlla magis te patrum exempla mouebunt,  
Acrius ad laudem nec tibi calcar erit,  
Quàm magni HENRICI per tot iam prælia Virtus  
Cognita, vel summis suspicienda Deis.  
Non illi quisquam antiquus se conferat heros  
Seu res consilio, seu sit agenda manu.  
Quòd nisi temporibus duris hunc fata dedissent,

Qui populo erranti debita fræna daret.  
 Tandudum euersis lugeret Gallia rebus,  
 Et raperet nostras victor Iberus opes.  
 Interea è tenebris veluti Sol aureus exi,  
 Et patrias Vrbes lumine sparge tuo.  
 Certè equidem si quid vatum præsentia possunt,  
 Nostra nec immodicus pectora fallit amor:  
 Ille eris optata firmes qui tempora pacis,  
 Aduentûque tuo nubila cuncta fuges.  
 Dij patrij quorum creuit sub numine quondam  
 Gallia vicinis inuidiosa locis.  
 Augustum hoc seruate genus, seruate quod vsquam est  
 Gallorum & fessis otia longa date.  
 Si qua tamen restant culpæ vestigia, necdum  
 Sanguinis exhaustum creditis esse satis.  
 Omnis ab externis quæratur gloria bellis,  
 Impia nec repetat ciuicus arma furor.

P. RONSARDI memoriæ S.

**H**As tibi Parisiis sacras in collibus aras,  
 Magne parens, grata ponimus ecce manu.  
 Tu patrij Deus eloqui, quo numine quondam  
 Pierias Francum protulit vber opes.  
 Ergo velut Cereri & Baccho sua sacra quotannis  
 P'ouerat, & festos gens operata dies:

Sic tibi quotquot erunt Galli, tua turba, poetæ,  
 Annua solenni carmine vota canent.  
 Iamque tibi primos ecce instauramus honores,  
 Et vita ægredimur dicere facta tuæ.  
 Ut clara antiqua deductus origine gentis  
 Threicio dederis tempora prima Deo.  
 Ut mox & laudis melior è incensus amore  
 Malueris Musas Graia per antra sequi.  
 Nullus erat, tua qui regeret vestigia callis,  
 Saxa per & nullo culmina trita pede.  
 Tu tamen & salebras, & sentibus aspera vincis  
 Omnia, nec cecum te remoratur iter.  
 Donec Hyanteo teneras à fonte sorores  
 Deducas patrios victor ad usque lacus.  
 Inde ubi per medias Nymphis comitantibus vrbes  
 Conspicuum insigni tollis honore caput,  
 Protinus, ut roseo surgit cum Lucifer ortu,  
 Cum tenebris abeunt astra minora suis.  
 Sic rudis incultos aluit quos Gallia Vates,  
 Fugere ad vultus lumina prima tui.  
 Nunc igitur laudēsque hominum, laudēsque Deorum  
 Concinis, aut blandus quæ tibi dictat Amor.  
 Nunc ortus rerum varios, verique latebras  
 Quæris, & audaci tendis in astra via.  
 Martia nunc resonas heroo prælia versu,  
 Francosque à Phrygio principe ducis ausos.  
 Nèue tibi veteres contendant laude poetæ

Quotquot habet Latium, Græcia quotquot habet,  
Nil intentatum mens indefessa reliquit,  
Sive placent citharæ munera, sive tubæ.  
Felicis Ligeris ripæ, felicia Cosmi  
Fana tui, vberibus Turóque diues agris,  
Et quæcunque tuo demulsa carmine gentes  
Hauſere ætherios Vatis ab ore fauos.  
Te nemorum coluere Dea, te sæpe canentem  
Mænaliis Faunus viſit ab vſque iugis.  
Te ſtupuit Natura parens: nec te tua cepit  
Gallia, quæ tanti ciuis honore tumet:  
Sed norunt latè populi, quóſque vltima Thule,  
Quóſque alit Heſperio terra propinqua freto,  
Quique bibunt Iſtri gelidum ſeptemplex amnem,  
Quique Euphrate habitant & loca cincta Tigri.  
Salue cura Deum, ſalue ipſis addite Diuis,  
Vindocini æternum ſidus, honosque ſoli.  
Non tibi querenda eſt alieno fama labore,  
Digna nec ingenio laus ſatis vlla tuo eſt.  
Tu tamen hæc cape vota lubens, ſeu lactea mundi  
Te playa, ſeu magni te tenet aula Iouis.  
Et ſi quis tibi reſtat amor, ſi cura tuorum,  
Nec te operis memorem iam piget eſſe tui,  
Reſpice nos, animiſque fauens illabere noſtris,  
Tractamus patriæ dum noua plectra lyra.

AD IACOBVM AVGVSTVM  
Thuanum. v. CL.


Præfatio in Elogiorum libros.

**F**autor & antistes doctorum Auguste virorum,  
 Quo sine iam studiis nec foret ullus honos.  
 Dum tu longinquo Francisci à funere Primi,  
 Qui tenuit valida Gallica sceptrâ manu,  
 Persequeris gesta immensum quacunque per orbem  
 Seu terra & pelago, seu foris atque domi,  
 Magnum opus & nullis vnquam delebile seclis,  
 Quale nec Ausonia Liuius ante dedit.  
 Ipse ego non aequis tua per vestigia repens  
 Passibus, ad laudem qua datur ire via,  
 Quod potui, doctorum hominum felicibus umbris  
 Elogia hæc gratus qualiacunque tuli.  
 Pierias certe poteram meliora per arteis  
 Moliri, studiis & magis apta meis.  
 Nam mihi si testes fas appellare Camœnas,  
 Nec vetat ingenitus dicere vera pudor,  
 Ausus ego Italiae facunda laceffere cantus  
 Ingenia, & Latio scribere digna sale.  
 Sed fuit hoc olim potioris flore sub æui,  
 Dum nouus in vegeto pectore sanguis erat.

Nunc



Nunc senij graue pondus obest, nunc debilis ætas,  
Nec pote iunctorum vincula ferre pedum.  
Hinc mihi sola placent numerorum lege soluta,  
Quæq; magis facili tramite verba fluunt.  
Sic nempe & viridi fidens qui sæpe iuuenta  
Vicit in Eleo puluere fortis equus,  
Languidior postquam membris illapsa senectæ est,  
Nec calor in cursu qui fuit ante viget,  
Mollia iam tentat vacuo vestigia campo,  
Et refugit metus, carceribusque premi.  
Quis scit an & doctas teneant hæc aptius aures,  
Quàm leuia & teneris carmina blanda sonis?  
Quicquid erit, flos lectæ virum, te pendet ab vno,  
Præsidique aura nititur omne tui.  
Tu bonus exiguum veteris cape munus amici,  
Quem tibi Musarum iunxit honestus amor.  
At vos, illustres animæ, dignissima celo  
Nomina, quæ memori Gallia mente colit,  
Dum struimus vestra monumenta hæc debita famæ,  
Quaque licet iusto fungimur officio,  
Sit quamquam hoc temere nitido lucem addere Soli,  
Nostraque ad laudem non egeatis ope,  
Ne tamen Elysia pigeat spectare sub vmbra  
Hanc curam & tenuis dona pusilla manus.  
Si non ingenio, si non satis arte placebunt,  
Certe animus dantis respiciendus erit.  
Forsan & è vobis aliquis cum legerit, iste



— (Dicet) erit nostri pars aliquando chori.  
*Quamque aliis operam præstat pius, ipsa merenti  
 Posteritas grata reddet amica Vice.*

---

LOD. ALEALMI PRÆSIDIS  
 Aurel. Epicedium.

**E**TSI te propriis possis attollere pennis  
 Iam nouus ex ipso funere factus olor.  
 Tetamen & seros feret Audebertus in annos,  
 Pieria dudum primus in arte senex.  
 Postulat hoc qui vos longo coniunxerat Vsu  
 Non sine Phæbeo numine partus amor.  
 Sed neque non tenui nobis dicere camæna,  
 O simul Astrææ Calliopésque decus,  
 Pars animæ, Lodoice, meæ, quem tristibus Vmbris  
 Eripit & calo numen Vtrumque beat.  
 Nec certè inficior, solio ius dicere ab alto  
 Muneris est longè nobilioris opus  
 Non tamen Aony spernenda est gloria plectri,  
 Cuius blanda homines Vix trahit atque Deos.  
 Errat enim quicumque togæ patribusque seueris  
 Indecores Pindi iudicat esse Deas.  
 Aspice Bellaiumque patrem, cui murice sacro  
 Cinxit honoratum Roma superba caput,  
 Diuinumque senem Xcny de nomine dictum,

Supremus cere quem decorauit honos:  
 Aspice & Augustum quo nunc quoque Præsides fulget  
 Curia tot grauib. conspicienda viris.  
 Quis non scripta legit Latio condita lepore  
 Quæ variis illi concinuerunt modis?  
 Nectua non etiam Veniens mirabitur atas,  
 Inclita, Pegasei laus Alealme chori.  
 Tu quoque defessam post bella forensia mentem  
 Suctus eras sumpta sic recreare chely.  
 Quæque manus recta librabat iura bilance,  
 Hæc eadem facili pectine mouit ebur.  
 Non temere id præstent quibus est in pectore cautes  
 Horrida, Caucasæo frigidiorque gelu.  
 Quò sit ut ignaui pars longe maxima vulgi  
 Negligat Aonio fonte leuare sitim.  
 At quibus ingenij vena se diuite fundit  
 Copia, visque animi fortior intus agit,  
 Non vni insistent cura, sed fusa per artes.  
 Libera mens vario tramite currit iter.  
 Ergo vbi felicem tali se Aurelia sensit  
 Præsides, vicinis inuidiosa locis,  
 O qui tum plausus totam sonuere per urbem!  
 Quàm tumido letus se Liger amne talit!  
 Inde vbi crudeli conspexit funere mersum,  
 Quot fudit lacrymas, quot gemitusq. dedit!  
 Mox tamen ut subiit patri succedere natum  
 Et similem studiis & pietate parem,

Paulatim sese crexit, plausumque dolori  
 Miscuit. & maestæ lætitiæ lacrymæ  
 Ceu quondam pluuio dum pellit nubila cælo  
 Noctem inter dubius Sol micat atque diem.  
 O felix anima & terræ iam erepta periclis,  
 Perpetuum salus, perpetuumque vale.  
 Tis, si qua interea viuendum cura sepultos  
 Sollicitat manes, clausæque busta mouet,  
 Lugubres ne sperne modos, lacrymisque piorum  
 Tale tuo inscriptum marmore carmen habe,  
 Hic Alcalme iaces, ipsi fleuere cadentem  
 Te superi, exequias Musa Themisque ferunt.

---

NOMINE DANIELIS VARENI  
 ad bustum Laurentij  
 patris, Lacrymæ.

**A**T me nec tanto ingenio Natura beauit  
 Et si quod fuerat perculit ipse dolor,  
 Quicquid inest tamen id meritò tibi seruiet vni  
 O decus, o vitæ fons & origo mea.  
 Impius est quisquis non illum in funere luxit,  
 Ipse à quo nitida munera lucis habet.  
 Hinc sacra feralis quondam spectacula pompæ  
 Officij memores instituis sis aui.

Sic pius Aeneas rediit in gloria Troie  
 Manibus in Siculo rite parentat agro.  
 Sic tibi pro ludis solennibus (hoc mihi quando  
 Res angusta negat) carmina pauca fero.  
 Sunt tamen & nobis (sed fors levis omnia versat)  
 Sunt etiam clara stemmata prisca domus.  
 Quaque pater largo restagnans gurgite Nilus  
 Arida fluminis imbribus arua rigat,  
 Si qua fides, Veteri gens nobilitata Canopo  
 Sape memor nostros nunc quoque iactat avos.  
 Unus & insignis facie & florentibus annis,  
 Amplarumque domi diues Orebus opum,  
 Auctus Regina thalamis, quæ surgit in auras  
 Alta Pharos, longo tempore iura dedit.  
 Non illo quisquam fuit observantior æqui,  
 Nec minus ad Martis classica promptus erat.  
 Sed potius duxit tranquilla per otia vitam  
 Degere, & Aonidum mollia castra sequi.  
 Calorum motus varios & nomina norat,  
 Quæq; fauent homini lumina, quæq; nocent.  
 Verùm vbi diuisas sacra in contraria mentes  
 Illusit ficto numine vanus Arabs,  
 Hinc intestinis odiis & bella sub orta,  
 Plebis & ingrata mente fugata fides.  
 Non tulit hanc speciem generosi pectoris Heros,  
 Dùmque ferox leuo corripit arma loue,  
 Cum vita imperium amisit, consorsque iugalis

Fida thori similem sensit & ipsa vicem.  
Filius his prima vix signans ora iuuenta  
Iosippus miseri mens & imago patris,  
Antiquæ patriæ quem debita sceptrâ manebant,  
Si modò sors patriæ quæ fuit antè, foret.  
Quid faciat regno charisque parentibus orbis?  
Cessit, & in subita spes fuit vna fuga.  
Huic se addunt pauci comites, quæcunque parati  
Tristia cum profugo Principe fata sequi.  
Quid loquar ingentes animique & corporis æstus.  
Multaque perpeßos æquore, multa solo,  
Donec defessi tetigere Ligustica tandem  
Littora, quæ longæ meta fuere viæ?  
Hinc serie longa multos succrenit in annos  
Nobilibus soboles continuata viris.  
Quorum si tenues minuit sors improba census,  
Vis tamen in forti pectore auita fuit.  
Non secus Herciniæ longinqua per auiâ saltus.  
Quâ surgit patula plurima sylva comâ,  
Cæsa licet ferro plerunque repullulat illex  
Frondosumq; nouo tollit honore caput:  
Illa quidem aërias non tam sublimis in auras,  
At vigor in foliis qui fuit antè, manet.  
Tuq; adeo ante omnes duro spectate Gradivo  
Multa, Camille, tuo sanguine digna geris.  
Nec melior quisquam seu res pendenda sagaci  
Consilio, valida seu peragenda manu.

Dumque altas superans multis cum millibus Alpes  
 Fortis in Alphonsum Carolus arma mouet,  
 Tu quoque pars aderas huius non vltima palma.  
 Multa vbi virtutis das documenta tua.  
 Nec minus & pulcer iam pubescente sub æuo  
 Hærebat læteri gnatus Aristo comes,  
 Musarum noua cura puer, qui bella perosus  
 Miles Hyantæi maluit esse gregis.  
 Protinus hunc studiis vna communibus omnes  
 Duxerunt auidum per loca sacra Deæ.  
 Iam virides Hæmi saltus, iam tota patebat  
 Quæ fluit è bifido leniter vnda iugo.  
 At sibi tranquillos dum spondet credula cursus  
 Quàm penè est rapido turbine mersa ratis!  
 Principis exilium temerè comitatus amici  
 Multa procelloso tempore dura tulit.  
 Vis tamen illa animi constans in sede remansit,  
 In medio rupes vti manet alta freto.  
 Donec plenum annis, opibusq;, & honoribus auctum  
 Merferunt placido funsre fata senem.  
 Huic bisseña oculos clauserunt pignora, quorum  
 Et tu chare parens ordine primus eras.  
 Ipse etiam addictus placidis ante omnia Musis,  
 Horrida nec Getici natus ad arma Dei.  
 Mille tibi vnde artes, seu quicquid nobilis Hellas,  
 Siue placet Latium nobile quicquid habet.  
 Illa quidem Ausonij diuina scientia iuris

Prima fuit puero cura, nec vna tamen.  
 Non bene fortis equus contractis paret habenis,  
 Nec patitur gyro se breuiore premi.  
 Non bene collectos Tiberis capit auctior imbreis,  
 Aggere nec claudi sustinet usque suo.  
 Ergo & secretas inuit perquirere causas,  
 Et pia Pætonij sensa aperire senis.  
 Inuit & à prima surgentis origine Romæ  
 Fortia magnanimùm facta referre ducum.  
 Sæpe etiam magni penetrans sacraria Pauli  
 Quæ sit vera homini queris & vnde salus.  
 Sæpe leui alternans grauiora negotia ludo  
 Aonium docto pollice tangis ebur.  
 Et media procerum poteras in luce nitere,  
 Quos apud ingenij nomine clarus eras.  
 Conscia sed virtus sibi plus satis ipsa placebat,  
 Ceu nulla externæ sortis egeret ope.  
 Hinc adeo indignata procul fortuna recessit,  
 Nec tribuit rebus tempora lata tuis.  
 At saltem exactos qui post mille labores  
 Fata magis placida morte perire darent.  
 Nec te porrecto manus exitiosa veneno  
 Ante diem Stygias cogeret ire vias.  
 Impie, quis te adeo infandus quis compulit error  
 Tam sacrum auderes vt violare caput?  
 Nec te coniuncti reuerentia sanguinis vlla,  
 Nec tenuit sancto debita iure fides?



*Non tamen effugies: viden' vt funale cruentum  
 Iam rotet ante oculos torua Megæra tuos?  
 Aut cruce tu caruis epulum pendebris ab alta,  
 Aut meritas pœnas hoc dabis ense patri.  
 Sic Phrygium fundens ad busta paterna cruorem  
 Pyrrhus Achillæi sanguinis ultor erat.  
 Cùmque foret virgo fraterni criminis insons,  
 Morte sua pœnas non minus illa dedit.  
 Ah! quoties conata hostem lenire precando  
 Flebilis inuisos concidit ante pedes!  
 Parce precor, si qua est pietas, dux inclyte, parce,  
 Neu fortem innocuo sanguine tinge manum.  
 Hæc ait, & riuos lacrymarum effundit inaneis,  
 Imploratque Deum sæpe, hominumque fidem.  
 Ille animum iusto vindictæ incensus amore  
 Tam blandas rigida negligit aure preces.  
 Plectitur infelix alieno crimine virgo,  
 Vsq̃ue adeò superis displicet omne scelus.*

---

### Lusus in amorem vetulæ.

**Q**uicunque ille fuit, monstrum qui dixit *Amorem*,  
 Crede mihi vero verior ille fuit.  
 Quam varias prima me semper ab usque iuuenta  
 Egerit in formas si numerare velim,  
 Scribentem variis tot tantæque monstra figuris

Deficietque manus, deficietque dies.  
Nec tamen ex illis fuit aut molestior Vlla,  
Quàm quæ nunc animum sollicitudo premit.  
Eheu quàm cæco pectus mihi carpitur igni!  
Credo erit à sola morte petenda salus.  
Quippe (quod est mirum) non has mihi candida flâmas  
Virgo mouet, flammæ quæ leuet ipsa meas.  
Verùm anus (ô pudor) & priscis æquæua Sibyllis,  
Iam nihil ipsa calens est mihi sola calor.  
Debueram certè melioribus ignibus Uri,  
Sed fuit hæc fastus pœna secuta meos.  
Nam Veneris cæcas penitus deponere curas  
Mens erat, & Clario corda Vouere Deo.  
Quis nescit sexus vitium? cum spernere multas  
Inciperem, multis Virginibus placui.  
Sed placui frustra, stabat mihi robore pectus  
Durius, & nullis mobile blanditiis.  
Exarsit subitò contempti numinis ira,  
Dum, mihi quas flammæ obiicit, abiicio.  
Nec mora, qui spernis dignas ardore puellas,  
Accipe quid læsi numinis ira queat.  
Dixit, & ex Vetulæ toruum spectantis ocellis  
Egit in hoc miserum tela sinistra caput.  
Nunc cogor canos mirari sepe capillos,  
Rugosæque genas, pallidulumque labrum.  
Nec mihi (sic sum amens) latus sinus iste videtur  
Esse, nec os vacuum dentibus esse suis.

Quinetiam precibus nostris elata superbit,  
Séque aliquam, sit quòd iam illa rogata, putat:  
Amplexusque fugit nostros, roseisque labellis  
Ora licet buxo pallidiora negat.  
Quidni autem mea lux? certè decor iste senectæ  
Me iuuat, & merito me mihi surripuit,  
Et meritò precibus nostris dignissimus vnus  
Conficit hac longo nos in amore siti.  
Nónne etiam cana est & tota argentea Luxa?  
Illa tamen reliquis ignibus vna præest.  
Esse puto dentes, nulli tamen esse putentur,  
Liberior linguæ cursus in ore tuo est.  
Nec suus & non est rugis decor ignea circum  
Lumina, Phæbeos dum referunt radios.  
Vt tamen ista iuuent oculos animúmque furentem,  
Est in tam sicco corpore nulla Venus,  
Et licet illa meis accedat candida votis,  
Certè nullus habet languida membra calor.  
Hei mihi quisnam igitur finis sperandus amanti,  
Finiat ardores mors nisi sola meos?  
Si quis adhuc vsus Medæ mansit ab arte,  
Et quisquam magico tanta labore potes:  
Te per ego Veneris benè notos omnibus ignes,  
Quos qui non sentit sentiet ille nihil,  
Fac precor exutam rursum induat illa iuuentam,  
Et liceat Veris flore nitere seni.

*Tunc ego crediderim Vestris seruire parentem  
Naturam, atque Deos, atque elementa sacris.*

---

### Ad Baronem Chrysæum.

**T**E quoque ne pigeat, Chrysæe, sequentibus annis  
Pterios inter nomen habere choros.  
Ipsa licet lituos tantum nunc Gallia curet  
Fæta viris, quorum Martia corda calent.  
Non tamen hinc laudum ampla seges, non vera petenda  
Gloria, nec forti præmia digna viro.  
Hæc fuerant olim, dum patrum mascula virtus  
Adderet imperiis extera regna suis,  
Dúmque illam tremere Arabes, Phæboq; propinquus  
Orbis & Eoæ regna beata plagæ.  
Nunc perit solidae laudis generosa cupido,  
Discordesque animos impius ardor agit,  
Hoc tantum vnanimis, quod pro se quisque superbas  
Antiqui imperij perdere tentat opes.  
At placidi vates monstra hæc immania vitant,  
Tractantque innocua mollia plectra manu.  
Felix ille, adeò quem Iupiter æquus amauit,  
Et dulci Nionidum possit amore frui.  
Non illum in iustæ franget vis improba sortis,  
Non dubiò euentu spesue metus ve prement.  
Illum & sui. vmmorum pandentem arcana Deorum

Omnis certatim sexus & ordo colent.  
Cumque aderit suprema dies non totus obibit,  
Nominis at longo tempore viuet honos.  
Huc ades ô dilecte Deo, dilecte Camænis,  
Inuisumque feri desere Martis opus.  
Te sacri reuocant fontes, te culmina nota,  
Mulcerique tuis vocibus antra patunt.  
Victricem querant alij per vulnera laurum,  
Hanc amo qua nullo sanguine tincta venit.

FINIS ELEGIARVM.





EPIGRAMMATVM

SIVE LVSVVM

*Libri duo.*



CL. V.

IACOBO AVGVSTO

THVANO, SENATVS

*Parisiensis Præsidi.*

**N**ON fatis nobis fuit in malis  
versibus pangendis tempus &  
operam conterere, nisi etiam  
lusus nostros in apertum pro-  
ferremus, & quidem iniquo maligno-  
que seculo. Porro dum eos colligimus  
& adornamus placuit exēplum Varro-  
nis imitari, qui ne à grauioribus ad le-  
uiora regressus videretur, quæ de rebus  
diuinis erant vltimo loco reposuit. Itā-  
que sacris Hebræorum canticis, quæ  
Latinæ consuetudini à nobis tradita  
sunt, præposuimus ea quæ ad religio-

nem non pertinebant. Quo in numero fuerunt & Epigrammata, quæ tibi, vir clarissime, offeruntur : non digna illa quidem tanto viro, cui vix vllum in hoc toto scribendi genere hac ætate parem agnoscimus. sed eò certè minus displicitura, quòd vt exilia, sic breuia, non adeò longam tibi molestiæ occasionem datura sunt.





SCÆVOLÆ  
S A M M A R T H A N I  
E P I G R A M M A T V M

*Liber primus.*

Ad Amplissimum v. P H I L I P P V M  
H V R A L T V M Cheuernium  
Franciae Cancellarium.

**C** L A R E senex, veteri cui ductus origine  
sanguis  
Armoricos longo stemmate iactat auos.  
Cuius & in dubiis Regi prudentia rebus  
Cognita, & aduerso tempore certa fides,  
Supremum hoc meruere decus, regnique labantis  
Molem ingentem humeris imposuere tuis.  
Si Vacat, & grauium magna inter pondera rerum  
Nonij memorem non piget esse chori,  
Hos etiam tui quos edimus arte libellos.  
Sume lubens, vatis dulce iocantis opus.  
Quid Vetat ingenuis post seria lusibus Vti,  
Ingratasque bilari pell re fronte minis?  
Dura tot humanam vexent cum tædia vitam,  
Tristia qui lætis temperat, ille sapit.

R

Ad Iacobum Gilotum primæ  
notæ Senatorem.

**V**osô grati animi bonæ ministræ  
Gilotum Charites adite & illi  
Nostram, quâ licet, approbate mentem:  
Me nempe immemorem nec esse nuper  
Accepti officij, piæque curæ,  
Dum nos iudicio tuetur æquo,  
Nec porro vnquam aliis futurum in annis.

Sed & vos etiam bonæ Camæna  
Vestram huc ferte operam, sacróque Pindo  
Nitentes legite vsque & vsque flores,  
Vnde his pro meritis, mei Giloti  
Ornem conspicua caput corona.

Certè illum, mihi vita dum manebit,  
Faxo omnes celebrent canântque gentes,  
Ni sim fors ego tam malus poëta  
Quàm iudex bonus est meus Gilotus.

Ad Franciscum Sanlucium  
Picardiæ Proregem.

**N**E tibi qui desit referas vt totus Achillem,  
Dum pia pro patria fortiter arma geris.  
Quondam etiam dulces Musa digressus in hortos,  
Æonium patrio pectine tangis ebur.

*Nec placidam tractare chelyn post horrida bella  
Negligit hostili sanguine tincta manus.  
Quos titulos, quæ non meruit præconia laudum  
Quique canenda gerit, quique gerenda canit?*

*Beluiliij tumulus ad Margaretam  
eius sororem.*

**A**lter eram Mauors, cali me in templa recepi;  
Terra parum sedes quòd foret apta Deo.  
Mirarisne soror mihi cum sit & altera Pallas  
Cur simili mecum non petat astra via?  
Scilicet in terris homines miserata remansit;  
Exemplo mores formet ut illa suo.

*In quosdam huius ætatis scriptores.*

**Q**uid iuuat obscuris inuolucere scripta latebris?  
Ne pateant animi sensa, tacere potes?

*Lusus.*

**L**asciuo lasciuia mihi dum basta iungis,  
Et repetit cursus mutua lingua suos,  
Concipio dulci in coitu, seque humor in vnum  
Colligit, inque meo corpore corpus alo.  
Haud secus ac Libycis in collibus ipsa per ora

R ij

Concipit optato Vipera iuncta mari.  
 Quod mihi corpus inest, reor esse Cupidinis illud,  
 Usque adeò implacidum sentio quàm sit onus:  
 Et vereor simili ne tecum Vipera fato  
 Iste meæ factus sit mihi caussa necis.

Ad Nicolaum Rapinum.

**V**obis, Parisij, quid imprecabor,  
 Qui meum rapitis mihi Rapinum?  
 Sed vobis quid ego audeam imprecari,  
 Quando vos meus incolit Rapinus?  
 Certè quod licet, orbis ut fideli  
 Turtur compare, iugibus querellis  
 Latè Pætonicas replebo siluas.  
 Accerret Dryadum chorus, suumque  
 Emirabitur insolens poëtam  
 Solum errare per antra, pèrque valles,  
 Solum errare per arua, pèrque colles,  
 Orbatum vnanimi sodale, quicum  
 Alternis patrios Deos canebat.  
 Felix interea, Rapine, felix,  
 Diuino alloquio fruire magni  
 HARLÆI, neque te vlla iam tenebit  
 Nostri cura, sed immemor tuorum  
 Spectabis propius nouem sorores,  
 Quæ iam saltibus Aonum relictis  
 Amant Sequanicas tenere ripas.

At vos (quandoquidem ipsa si quid usquam  
 Nutrit Gallia rari & elegantis,  
 Vobis continuò arrogatis illud)  
 Vos ô Parisij vnicum potentis  
 Europæ iubar, vrbiumque lumen,  
 Meum reddite vel mihi Rapinum,  
 (Nam vester quoque factus ille ciuis)  
 Vel me reddite vos meo Rapino,  
 Vt fiam quoque vester ipse ciuis.

### De Anchise & Venere.

**D**um fouet Anchisem amplexu formosa Dione  
 Ardēt, & in medijs ebria delicijs  
 O, ait, & superæ sedes & sancta Deorum  
 Aula vale, cælum nunc erit Ida mihi.

### Ad Remigium Bellaqucum.

**A**n te quidem lepidò referebas carmine totum  
 Anacreonta, Remigi,  
 Nunc etiam similis magis incipis esse, quod alba  
 Canent vt illi tempora.  
 Discrepat hoc tantum, quòd sobrius ebria cantas  
 - Senis faceti pocula.  
 Quòd si de solito quid forte pudore remittas,  
 Musisq; iungas Liberum,

*Quàm bene vinosus superares vina canentem,  
Qui siccus illum sic refers?*

*Ad Germ. Audebertum.*

**A**udeberte nouem sacer Camænis  
Quæ te depereunt senem puellæ  
Quantum qui valida vel in iuuenta  
Plurimum potis est amari ab illis,  
Perlegi aureolum tuum poëma,  
Quo Cenallitios Myronis hortos  
Vehis Romuleo sub astra cantu.

Sed quid hoc sibi vult? meâme quaeso  
Censuram exigis, & bonus poëta  
Subis iudicium mali poëta?  
Præsertim tibi cum sit ille præsto  
Iudex optimus, optimisque vates,  
Vestæ Præsidium Alealmus Urbis,  
Cuius, si sit opus, potes fideli  
Stare consilio. Sed ipse nullis  
Eges consiliis satis tibi vnus.  
Qui dum carmine delicatiore  
Florentes celebras Myronis hortos,  
Sertis Aonidum caput reuinctus  
Ipsis floridior nitescis hortis.

## Gul. Britoni Niuernensi.

**C**um fortuna vices, Gulielme, celerrima mutet,  
 Nunc premat, inde iuuet, nunc iuuet, inde premat.  
 An secura homini potis est contingere vita,  
 Qui mala vel patitur, vel patienda timet?

Ad Senatum cum Pædotrophiæ opus  
 inchoatum illi offerrem.

**N**ostralicet medio consistant carmina cursu,  
 Non tamen incæptum Musa reliquit opus.  
 Scilicet hanc domini lis importuna moratur,  
 Quam mouit tectis dira nouerca dolis.  
 At vos, conscripti ô patres, clarissima Iuris  
 Sidera, & antiquæ lux rediuiua togæ,  
 Errorum expulsi tenebris perquirite Verum,  
 Nec sinite iniusto fasque piûmque premi.  
 Quæque adeò tanti non vltima gratia facti,  
 Tollite damnosæ tædia longa moræ.  
 Hoc noster querulis poscit vagitibus infans,  
 Atque intermissam postulat æger opem,  
 Vos si nulla mouent insontis vota poetæ,  
 At misera etati debitus adsit amor.  
 Sic vobis si qua est soboles hanc numina seruent,  
 Nec turbet placidas vlla nouerca domos.

R. iiii;

## Mariæ Gilotæ Tumulus.

Corpus hîc Mariæ iacet Gilotæ,  
 Qua nec vlla magis venusta vixit,  
 Qua nec vlla magis pudica vixit.  
 Sed venusta licet, licet pudica,  
 Quantos illa diu tamen tumultus,  
 Quantos illa diu tulit labores!

Nec illam grauis abstulit Senectus  
 Maturam, placido dedit ve letho:  
 Sed ipsa grauior lues senecta  
 Inuasit iuuenem, velûtque duro  
 Tactum vomere flosculum peremit.

O qui me Elysias agat sub vmbra,  
 His vt possim oculis pios videre  
 Applausus, animam quibus recentem  
 Beati excipient subinde Manes!

Te nos interea, Gilota, flemus,  
 Flemus, & Superos monemus ipsos  
 Ne quid fingere pulcri & elegantis  
 Tanto iam studio & labore curent,  
 Cùm vis indomiti superba fati  
 Statim hoc deleat, & nefario ausu  
 Lethæas trahat obrutum sub vndas.



## Ad Theodorum.

**Q**uas mihi tu tribuis, vir laudatissime, laudes  
 Non ego sic sum amens ut meruisse putem,  
 Sed fruar ipse lubens hoc laudum munere, quando  
 Iure tuo mihi das id quod, amice, tuum est.

In B. Irlandi Consiliarij Regij  
 librum de Emphasi  
 & Hypostasi.

**D**iva potens veri, virgo Ioue nata parente,  
 Fidus in aeterno quam fouet ille sinu,  
 Quam sole aspiciunt meliori lumine mentes,  
 Aurea sideris queis patet aula patris.  
 Cernis ut ignauum latè diffusa per orbem  
 Humanum obsideat nox tenebrosa genus?  
 Ut mentita tuum species vanissima numen  
 Nos trahat obiectu decipiatque suo?  
 Ecce tamen vindex, qui te in tua iura reponat,  
 Astræque sacris talia monstra fuget  
 Consultus legum Irlandus, dum pectore puro  
 Te colit, & vultus ardet armore tui:  
 Auspice dum Huralto (cui te formosa videndam  
 Exeris & facili numine tota pates)  
 Ipsum animo cælum petit ut te, Dina, fruatur,

*Perfususque tua nos quoque luce beët.  
 Ecquid erit precij tanto pro munere, cuius  
 Certus in hoc dubio tempore fructus erit  
 Si qua venit certè generosis gratia cæptis,  
 Veri assertorem gloria vera manet.*

### De Cormeria.

**C***Or mea Cormeria eripuit mihi, si cor habebam:  
 Nam cor dum eriperet tunc mihi non cor erat.*

### Ad Iacobum Grenerium.

**N***on ego difficilem possum laudare puellam,  
 Sed neque, se facilem quæ dat, amica placet.  
 Illa parit flammæ, parit hæc fastidia flammæ:  
 Sic amor unde urat pectora semper habet.*

### Ad Petrum Forgetum Regis à sacris mandatis.

**F***orgete optime, si meus potis sit  
 Fari Henriciolus, tibi perennes  
 Gratias agat, alteri ut parenti,  
 Qui suscepis hunc sacras ad aras,  
 Rite dum pius abluit sacerdos  
 Antiqui scelus impium parentis.*

*Sed nati genitor vices obido,  
 Tibique omnia fausta comprecabor.  
 Ne qua vis tibi forte, dum feroces  
 Vasconum petitis per arma gentes,  
 Fatorum ingruat, inuidaue sortis,  
 Sed vota ad tua res fluant secundæ &  
 (Quod præstas meruit tua illa virtus)  
 Sospes innumeros eas in annos,  
 Donec quam nequirit tenellus infans  
 Dicat iam ille senex tibi salutem.*

De Victoria Ioëusæ ducis  
 in Andibus.

**D***l patrij, quorum auspiciis trepidantia victor  
 Agmina & armatos perculit Anna duces,  
 Hæc spolia, hæc vestris dona haud indebita templis  
 Dedicat, inuicta digna tropæa manu.  
 Ille quidem & pauidum Ligerim firmavit, & omne  
 Litus, & Andinæ culta propinqua plagæ.  
 Vos si qua est pietas & tanti gratia facti,  
 Nec periit patriæ nomine partus honos,  
 Vos facite ut magni meruit quem Regis amorem  
 Seruet, & huic solita seruiat usque fide.*

Ad Iacobum Guellæum v. c.  
Cognitorem Regium  
in Sēnatu.

**Q**uo tuus antè parens, nunc munere clarus eodem  
Fungaris, acceptum continuasque decus.  
Quæ tamen ille senex duri post longa laboris  
Tædia, virtutum præmia sera tulit,  
Hæc tibi vel iuueni tribuunt dum mitia fata,  
Maeste animo, spondent & tibi plura seni.

C. Ruellio qui librum ediderat in  
historiarum scriptores.

**H**istoriam meritis minuis dum laudibus, ipse  
Dignam perpetua rem facis historia.

Ad Lemouices.

**C**erne vices rerum varias, occultaque vires  
Natura ut mira proferat arte suas.  
Qui rudis incultis Lemouix in montibus olim  
Rapa modò ediderat, castaneasque nuces,  
Hoc demùm insolitos depromens tempore sætus,  
Æmula Romanis edidit ingenia.

*Hic mihi erunt testes Musis gratissima mille  
 Nomina, quos tellus hæc habet Hesiodos.  
 Gardius ante omnes, & Graij Bosius oris  
 Atque Secundi animam qui Betolaudus habet,  
 Ut taceam Auratum patrem, plenissima cuius  
 Copia Pierias vndique fundit opes,  
 Auratum à quo vno vatum, ceu fonte perenni,  
 Gallorum Aonia labra rigantur aqua.  
 Te quoque quid memorem, fruitur quo Romula tellus,  
 O decus, ô seculi Varro, Auretè, tui?  
 Vos ergo incultæ longè cultissima gentis  
 Ornamenta aliis inuidiosa locis,  
 Vniute, duplici vos titulo mirabitur ætas  
 Postera, virtuti si suus extet honos.  
 Primus honos doctas animum potuisse per artes  
 Excolere, est rarum scilicet illud opus:  
 Hoc autem crasso potuisse sub aëre natos,  
 Alter honos, rarum nec minus illud opus.*

### Montani ducis Tumulus.

**M**ænibus egressum infestis dum persequor hostem,  
 Plumbæolo lethum venit ab orbe mihi.  
 Sed me hinc vita manet totum celebranda per orbem,  
 Quique orbis damnum faciat orbis erit.

## P. Fuluij Tumulus.

**I**am valete ioci, valete lusus,  
 Iam valete sales, valete risus.  
 Nam si certa satis fides Metello,  
 (Verum certa nimis fides Metello)  
 Fuluium inuida sustulere fata.  
 Fuluium aureoli patrem leporis,  
 Fuluium Aoniis sacrum Camœnis;  
 Nec tibi bone non sacrum Lyæ  
 Nobis inuida sustulere fata.

Gratulor mihi quòd fuit negatum  
 Tam triste his oculis videre funus:  
 Haud enim fueram satis futurus  
 Huic planè intolerabili dolori.  
 Nunc qui vate locus turnet sepulto  
 Cùm per fata oculis meis negetur;  
 Illum mente adeo, piàsque amico  
 Persoluo inferias, piùmque luctum,  
 Et dico bona verba, lacrimisq̃ue  
 Solum mollio, quod tegit iacentem.

O quàm nunc merito, piòque fletu,  
 Petronilla, tibi rubent ocelli!  
 Tuas delicias, tuùmque vatem  
 Non solum tibi sæua fors ademit;  
 Sed & cum domino perire iussit  
 Versus tot lepidos & elegantes

*In quibus tua forma sic nitebat  
Expressa, ut vitreis nitent in undis  
Vultus candiduli, venustuliq;  
Haurientis aquam manu Napæe.*

*At tu si sapis, ô puella pulcra,  
Centum basia nunc Mesoniero,  
Mille basia nunc dabis Metello,  
Ut functi officio boni sodalis  
Sparsa carmina colligant, & edant  
In lucem, faciântque iam sepulto  
Quod vellent fieri sibi sepultis.*

*Interim vaga mens boni poëta,  
Quam de corpore tam citò hinc fugauit  
Lues insoliti pudenda morbi,  
Errabit loca per tenebricosa  
Damnans improbulo amoris ignes,  
Quos Urbis dubie mouent puella,  
Laudansq; ingenium Mesonieri,  
Sola cui caprimulga cor perurit,  
Et sanissimus ipse mente cum sit  
Sana vult quoque mentula vigere.*

### Ad Steph. Iodelium.

*S*eu dulces modulari modos, quis blandior alter?  
*S*eu rerum causas aperis, quis doctior alter?  
*H*orrida seu ferus arma moues, quis fortior alter?

Ad St. Pascaſium Rationum  
Regiarum patronum.

**D** iſertiſſime Paſcaſi & patronos  
Conſultiſſime iuris inter omnes,  
Dignitate quod auctus es recenti  
Quis hoc ſortis opus fuiſſe credat?  
Immo qui ratione præſtat vnus  
Hunc vnum rationibus præſſe  
Iamdudum Ratio ipſa poſtulabat.

De P. Felice.

**Q** uæritis vxorem fugiat cur ducere Felix?  
Hoc ſine lætura nominis ille nequit.

Ad R. Bochetum.

**Q** uid non cogit amor? meus Bochetus  
Linqvit ecce domumque, liberòſque,  
Inquit coniugis ora tam placentis  
Vt ſit ipſa minus placens venuſtas,  
Quòſque deperit haud minore cura  
Libros deſerit, otiumque dulce,  
Et me bella per & feros per enſes  
Per incommoda mille me ſequatur.

Quin



*Quin secum & Charites, bonasque Musas  
 Adducit comites, quibus cruenti  
 Martis impia sacra temperemus.  
 Quibus pro meritis quid huic rependam?  
 Nisi ut quem pius antè diligebam,  
 Nempe auunculus optimum nepotem,  
 Nunc penè hūc quoq; plus amem vel ipsa  
 Domo, coniuge, liberis, librisque?*

### Fr. Prothei Tumulus.

**T***umulo sub isto Protheus sepultus est,  
 Non ille, nodo quem teneri nescium  
 Mutari in horas Graia personat Chelys.  
 Sed alter, vno qui manebat in statu.  
 Ut cui perennis membra mulceret sopor.  
 Res mira dictu, seu dies, seu nox foret,  
 Quodcunq; agebat, hoc agebat dormiens.  
 Nec interim illi defuit vis maxima  
 Mentis sagacis, qua suis clientibus  
 Ferret patronus rebus in duris opem.  
 At fuerit ille quamlibet sagax, tamen  
 Vitalis ista vita non est (inquies)  
 Sed vera imago mortis. immò falleris,  
 Humana vita cum merum sit somnium,  
 Bene dormiendū est, vivere ut possis bene.*

## Ad Petrum Ronsardum.

**A** Emula dum Latiis Ronsardi Gallica nostri  
 Conor ego in Latios vertere scripta modos,  
 Me vis maior agit solito, ignotasque per auras  
 Abripit hinc tanti spiritus ille viri.  
 Quique prius proprio cum plectra furore mouerem,  
 Vix bene sum nota serpere visus humi,  
 Summa feror super astra: iuuat quoscunque poëtas  
 Despicere, & sacri pectinis esse patrem.  
 Sic olim ætheris aquila dum regulus alis  
 suscipitur, reliquas despicit altus aues.

Themidi votum pro  
Abele filio.

**D** Vlcibus Ionidum nobis eductus in antris,  
 Molliâque assuetus plectra mouere puer,  
 Nunc citharam abiiciens, veterumque oblitus amorum,  
 Se tibi, magna Themis, tempus in omne dicat.  
 Tu Dea, si niueas huic dant sua semina mores,  
 Ingeniumque aptum qua libet arte coli,  
 Da studij faciles cursus, templisque sacerdos  
 Pura tuis olim fac tibi sacra canat.

## Ad Hentricum Memmium v. c.

**D**um noua mutatas in corpora dicere formas  
 Gestio, quod tenuit Naso secutus iter.  
 Non tamen Argolica referens mendacia gentis,  
 Vera sed aeterno quæ Deus ore canit.  
 Ante alios vno tenuis te vindice Musa  
 Difficiles audet carpere tuta vias.  
 Quippe aliquid nostros numeros, clarissime Memmi,  
 si quid fortè olim lusimus, esse putas.  
 Tu genium mihi concilias, Heliconaque totum  
 Pandis & insolito corda furore moues,  
 Quémque vident tanto vatem censore probari,  
 Certatim Aonides Phæbus & ipse iuuant.

## Ioan. Passeratio.

**S**ic quæ carmina, docte Passerati,  
 Concedunt faciles tibi Camæna,  
 Quem plausum meruere consequantur,  
 Inuitis ego quæ exarata Musis  
 Nostro carmina Memmio dicavi  
 Illi candidus offeras precamur,  
 Absentisque obeas vicem sodalis,  
 Commendesque meos bonus labores.  
 Qui si iudice Memmio probentur,

Sij

*Certè non fuerit mihi verendum  
Quin quouis hominum probante, plausum  
Vel quem non meruere consequantur.*

*In Legem Molinæam de abro-  
ganda testium fide.*

**C***um nullum humane diuino munere Vocis  
Manarit supera maius ab arce bonum,  
Cumque adeò ipsius tantum sit Vocis imago  
Scriptura, ambiguis res male certa notis,  
Quis furor est pondus Vocali demere testi,  
Et solidam mutis rebus habere fidem?  
Prodigij simile est non credere Vocibus ipsis,  
Et Vocum interea nos simulachra sequi.  
Quid facias? ita sunt mores, ita tempore nostro  
Aut Vana, aut Vanis proxima quæque placent.  
Non Vero, at sola gaudemus imagine Veri.  
Non res ipsa, rei sola sed Umbra iuuat.  
Prouidus hinc Princeps, prauique haud inscius aui  
Apta suo nobis tempore iura dedit.*

*Ioan. Bocello cum visum  
recepisset.*

**R***es passim obscuras claro dum lumine spargis,  
O lux, ô patry fama Bocelle fori.*

*Invidit sese tibi lux, longumque negavit,  
 Prodigus acceptæ tu quia lucis eras.  
 Sed quia nulla fuit lux nil cernente Bocello,  
 Se, ne se careat, reddidit illa tibi.*

## Lusus.

**V***Nde sub hiberno formosum sidere cælum  
 Quale solet medio Vere nitere, nitet?  
 Nec secus ac niuei lucent dum cornua tauri  
 Temperat auratas pulcer Apollo faces?  
 Ipsa suis cohibent se decrefcentia ripis  
 Flumina, & exiguo leniter amne fluunt,  
 Maturansque vices, gelidumque oblita Decembrem  
 Natura insolitos pandit aperta sinus.  
 Fallor? an hoc nostri faciunt incendia cordis,  
 Quique novus tanto surgit ab igne vapor?  
 Nam collata mihi poterit frigere videri  
 Fumida sulphureis quæ calet Aetna iugis.  
 Quod si me bruma in media qui torridus vris  
 In rapidæ æstatis tempora duret amor,  
 Iam Phaëthontææ redeunt incommoda flammæ,  
 Nec geminos æstus qui ferat ullus erit.*

## Aureliæ ad Magnanum.

**Q***uid gemis ignauo corrumpens lumina fletu,  
 Magnane, & placidos non sinis ire dies?*

Siccine communi tua vis in amore fatiscet,  
 Quodque puella fero non vir & ipse feres?  
 Nam quid dissimulem, cum sese viuudus ignis  
 Prodat, & in vultu luceat vsque meo?  
 Ipsa mihi ingenuè videor debere fateri  
 Vulnera, quæ ingenuus tam bene fecit amor.  
 Dum patris amplexus petit impia Myrrha nefandos  
 Secretura tacita nocte capebat iter.  
 At quæ legitimi suspirat gaudia lecti  
 Deserta in patriis montibus Alcione,  
 Ipsum inter medios in aperto litore nautas  
 Non dubitat clara voce vocare virum.  
 Ille autem, heu cæcas mentes! heu nescia corda!  
 Voluitur insano mersus in Oceano.  
 Ah tibi ne similis noceat fortuna vaganti,  
 Ah fera ne cæptis cursibus obstet hyems!  
 Quod seu contingat, seu te bona sidera seruent,  
 Quicquid eris, memorem te iuuat esse mei.  
 Dumque vagum procul hinc errans imitare Vlysses,  
 Penelopen certa consequar ipsa fide.

In Liuorem, ex Greco.

**P**essima res liuor, sed enim laudatur in vno,  
 Inuida nam Vltrici pectora tabe ferit.

## In Mezentium.

**C**um sis Deum contemptor impurissimus,  
 Mezentij te nomine appellem lubens.  
 At ille fortis vir fuit, tu semivir.  
 Dicam ergo Gallum, membra cum careant viro?  
 At enim sacerdos Gallus est matris Deum,  
 Tu sacra nulla credis, & nullos Deos.  
 Dicamne scurram, quod iocis vernilibus  
 Aliena captes impudens cibaria?  
 At scurra licet illiberalis, attamen  
 caret veneno, tu venenum totus es.  
 Hoc dum revolvo mente, ridens Cynthia,  
 Quin abige, dixit, pectore hanc curam tuq.  
 Frustra laboras nomen eius querere,  
 Qui nebulo planè nullius sit nominis.

C. Cantoclaro libellorum sup-  
 plicum Magistro, cum am-  
 bo ægrotaremus.

**Q**uam bene certa fides à prima ætate medullis  
 Mèque tuis potuit figere; téque meis!  
 Nimirum sua cuiq; licet sint membra, suumque  
 Corpus, at una tamen vita duobus inest.

*Nec potis insidias tibi Mors inimica parare,  
 Quin simul insidias & paret illa mihi.  
 Sed tamen hoc frustra, nam cum Virtutibus aequas  
 Heroas, certè nescius ipse mori es.  
 Communisque mihi cum tecum Vita supersit,  
 Per te etiam fio nescius ipse mori.  
 Ut mortem effugias, tales tibi cautus amicos,  
 Quisquis es, exemplo iungere disce meo.*

*In P. Nancelij poëma  
 de Ieiunio.*

**T***Am sacris epulis tua nos Ieiunia pascunt  
 Nanceli, docti docte parentis amor,  
 Ut (mirum dictu) quò quisque indulserit illis  
 Largius, hoc fiat sobrius ille magis.*

*Ad Germanum & Nicolaum Aude-  
 bertos patrem & filium.*

**Q***uo te prosequar, Audeberte, versu?  
 Linguarum ò decus, ò pater leporum,  
 Secli munditie politioris,  
 Quod Bezas tulit & tulit Macrinos,  
 Auratos tulit & tulit Muretos,  
 Qui de te meritum nihil poetam  
 Illis versibus aureis beasti,*



Quibus se ipse Maro putet beatum.

Nec debere putem hoc meis Camænis,  
 Nam quid crassius, inficetiûsque est?  
 Verùm me tibi, quo fauore Musas,  
 Musarumque fouet pios alumnos,  
 Commendauit amicus ille noster  
 Landiûa optimus omnium virorum,  
 Qui cum publica & vsque & vsque curet  
 Notus regibus, & grauißimorum  
 Molem sustineat negotiorum:  
 Non potest tamen illa vis sagacis  
 Beata ingenij carere dulci  
 Musarum studio: hinc piasque Musas,  
 Musarumque fouet pios alumnos.  
 Nec me non licet vltimis minorem  
 Dilaudare solet bonus, sed illi  
 Non sum credulus, & tamen vocatæ  
 Si quid fortè mihi dabunt sorores,  
 Tibi seruiet hoc libenter vni,  
 Qui tot me titulis bearis vnus.

Nec te carminibus meis tacebo,  
 O docti patris erudite fili,  
 Qui ceu filius ales ille Maie  
 Summi iussa patris nitente penna  
 Portat acris leuis per auras:  
 Sic pennæ officio elegantioris,  
 Et cui nulla parem tulere secla,

*Per manus hominum politiorum  
 Culti scripta patris ferenda curas:  
 Maior hoc etiam, quòd ille tantum  
 Dicta nunciis exprinxis parentis,  
 Tu simul tua cum patris disertis  
 Scriptis scripta pari lepore iungis.  
 Sic Phoebi ad radios adulta lætæ  
 Vitis progenies suis virescit  
 Ipsa palmitibus, pares & vuas,  
 Et cum vite pares creat racemos.  
 Vivite incolumes vterque longum,  
 O docti pater erudite nati,  
 O docti patris erudite fili,  
 Et vos ut faciles amant Camæne,  
 Sic bonas colite inuicem Camænas.*

### Nicolai Regij Tumulus.

*L*anguida me rapuit febris mea fata dolentem,  
 Non quòd acerba forent, licet immatura, sed inter  
 Proelia magnanimum sine vulnere cedere pudebat.

### Ad Auitum.

*Q*uod tibi morigeram tua se negat vxor, Auite,  
 Et vacuum à rixa non sinit ire diem,  
Tu licet hanc toto cumulus Oriente petitis

Muneribus, blanda sollicitēque prece,  
 Nil agis, aspera res mulier, quam munere nullo,  
 Nullis blanditiis conciliare queas.  
 Viribus hic opus est: animos ut frangere possis,  
 Omnibus hæc nervus est subigenda tibi.

### In eandem sententiam.

**V**T quamvis duros lapides, quos robore nullo,  
 Vi nulla valeas rumpere, gutta cauat.  
 Fœmina sic fluidi mollescit ab imbre mariti,  
 Haud alia melius soluitur arte rigor.

### Laidis vorum Veneri.

**I**lla ego quæ cupidos pellexi Laïs amantes  
 Dum iuvenile meo fulsit in ore decus,  
 Nunc anus hoc Veneri speculum fero, quando videre  
 Nec placet id quod sum, nec licet id quod eram.

### Ad Lectorem.

**S**unt inter tenues quas edo subinde Camœnas  
 Quædam etiam puero carmina lusa mihi.  
 Cernis ut in leuibus puerile sonantia nugis  
 Non leuia ætatis dent documenta sua?  
 Quid faciam? in capsis temerè illa iacere pigebat.

Loripedique Deo tradere certus eram.  
Reppulit hoc à me pietas mitissima crimen,  
Et patrius natis parcere iussit amor.  
Vos mihi quos melior dedit ætas, & quibus olim  
Docta per ora virum tutius ire licet,  
Vos facite vt vestro nomen de nomine sumant,  
Neu pigeat teneris fratribus esse duces.

FINIS LIBRI I.



SCÆVOLÆ  
S A M M A R T H A N I  
EPIGRAMMATVM  
*Liber secundus.*

Ad Clariss. v.

P. FORGETVM FRAXINEVM

Reg. ab intimis consilijs & secretis.

**H**ANC partem quoque Lusum meorum  
Tibi, Petre, dico libenter Vni.  
Tu, si quid Veteri faues amico,  
Quem tot iam officiis tibi obligasti,  
Gratum munus habe, licet pusillum,  
Liberosq; iocos, at innocentes,  
Ab omni Inuidiæ tuere morsu.

Fallor? nominis an tui benignum  
Hoc de te mihi pollicetur omen?  
Nempe hæc insita fraxinis facultas,  
Venena vt procul arceant, suâque  
Serpentum omne genus fugent ab Umbra.  
Quem verò Africa torridis in agris  
Serpentem Inuidiâ nocentiolem,  
Quod lethalius educat venenum?

Ad Fontem Lodoici fratris Pictorum  
Profeneschali.

**L** Impide fons vitreo qui Clani allaberis amni,  
Et pene æquales æmulus addis aquas:  
Quem sibi fraternus labor in iucunda parauit  
Otia, post rauci tædia multa fori,  
Credere mihi non te domino seruire pigebit,  
Nectareo cuius flumine diues eris.  
Tu modò clamosa cum liber ab vrbe lauatum  
Succedet ripis ora, manúsque tuis,  
Præsta te nitidum, & tremulo splendentia fundo  
Saxula fac leni murmure mota strepant.  
Efficiet certè Aoniis permixtus ut undis  
Qualis es aeterno limpidus amne fluas.

Duareni i. c. Tumulus.

**M**agnanimū Henricum Gallis qui sustulit annus  
Idem etiam letho te, Duarene, dedit.  
Ille decus fuerat summorum nobile Regum,  
Doctorum fueras nobile & ipse decus.  
Quot gessit bella ut contunderet ille furorem  
Sive, Hispanæ, tuum, sive, Britannæ, tuum?  
Tu quoque dum vindex Astrææ interritus instas  
Quot cum Barbarie, quantæque bella geris

Post varios casus iam victor victrique manebat,  
 Partaque iam fuerat pacis utrique quies.  
 Sed dum aliquam ad tempus petitis post bella quietem,  
 Aeterna est vobis ecce reperta quies.

Ad C. Iul. Guersentium.

**D**ile mihi (sic rerum causas, doctissime Iuli;  
 Natura ingenio pandat amica tuo)  
 Qui sit constantes animos ut femina laudet,  
 Qua tamen est leuius, mobiliusque nihil?  
 Scilicet hoc proprium est humanae mentis, ut illa  
 Quo caret, id faciat pluri, ametque bonum;  
 Sic oculis, visus, carens magni aestimat illum,  
 Aurea cui clara sidera luce patent.  
 Sic sibi et innata leuitatis conscia, constans  
 Ingenium mulier, quo caret ipsa, probat.

In Gellij noctes Atticas Ad H.  
 Stephanum.

**Q**uis Stephanum esse neget Phæbi de semine cretum?  
 Obscuris adfert noctibus ille diem.

Ad Ioan. Posthium.

**T**elicet insignem Germania iactet alumnum,  
 Neque alat Armorico Gallia iuncta freto;

Nos tamen haud vno celi sub sidere natos  
 Vnus amor, Posthi, iungit & vna fides.  
 Quid mirum? hoc faciunt Musæ communia vatum  
 Numina, quas sequimur castus vterque duces.  
 Passibus haud æquis fateor, nam vix ego repo  
 Lentus humi, celsa tu petis astra via.  
 Verum adeò si quid Naturæ fœdera possunt,  
 Principyque tenet semina quisque sui,  
 Quorum immortales iunxerunt pectora Diuæ,  
 Hos immortalis fœdere nectet amor.

### Ad Paulum Melissum.

Sic rorem ætherium non flore exugit ab vno  
 Quæ tibi dat meritum sedula nomen apis.  
 Seu varios culti numeros imitaris Horati,  
 Et quæ Dirceus carmina cantat olor.  
 Siue arguta refers epigrammata vatis Iberi,  
 Nasonisque elegos, Virgiliique tubam.  
 Hos omnes vt mole libri, sic pondere rerum  
 Exuperas, Venæ copia tanta tuæ est.  
 Iure igitur tali Germania vate superbit,  
 Erectumque nouo tollit honore caput.  
 Nam terra innumeros vt proferat Itala vates,  
 Vnus pro innumeris esse, Melisse, potes.

Veneri



## Veneri.

**V**entris onus Corydon mediis dum ponit in agris,  
 Pendulâque in viridi gramine membra rubent.  
 Hac, ut vicina tum fortè latebat in herba,  
 Lubrica ieiuno vipera dente petit.  
 Quæ corpus reliquum accepto ne fortè veneno  
 Inficiant, medici prouida cura secat.  
 Palpitat infelix succisi more colubri,  
 Sanguineq; aspersam mentula pulsat humum.  
 Hanc mutilus pastor myrti viridantis in umbrâ  
 Ponit Actidaliæ stensque gemenque Deæ.  
 Tu quando vires inuito casus ademit,  
 Parce, Dea, & curis hunc bona solue tuis.

## Helenæ Iouiæ Tumulus.

**T**u quoque raptiæ Helenæ Lacedæmonis amula luges  
 Gallia, nam rapit hanc mortis auara manus.  
 Si rapienda fuit, si sors ita dura ferebat,  
 Cur suis hanc, superi, non rapit ergo Paris?

## In quendam.

**P**hæbus eras nitido formosulus ore maritus:  
 Accedunt capiti cornua, Bacchus eris.

T

## Ad Mufas.

**P**egasides Nymphæ doctorum numina vatum,  
Quas pius aeterno cingit honore pudor.  
Me quoque (nam si quas populi contagia sordes  
Attulerant vestra perluit humor aqua)  
Ne sanctis prohibete adytis, nouus ecce sacerdos  
Carmina nec vobis inficianda cano.  
Nec mihi Quæstor quod honesto munere fungar  
Auro polluta esse putate manus.  
Parcite Pierides è vestris pellere regnis  
Hoc decus, vnde homini vera petenda quies.  
Quid melius puro, quid vel diuinius auro?  
Quàm bene res tantis conuenit illa sacris?  
Omni enim vatum labor est sonus, at suus auro est  
Quo melior bibula nullus in aure sonus.  
Ergo siderei gaudet quoque nomine solis,  
Quod vestro primas in grege numen agit.  
Haud alio optarim Genio magis auspice sanctum,  
Si liceat, sacri montis adire nemus.  
Atque vti nam veniens mea carmina dum leget ætas,  
(Si leget) huic vates aureus esse ferar.

## Iac. Augusto Thuano v. e.

**I** Bis hinc procul arduas per Alpes,  
 Et magna Venetum sedebis vrbe  
 Hospes non nouus, vt subinde fidos  
 De re principis alloquere patres.  
 Quid nos interea potente amico;  
 Fidelique, pioque destituti?  
 Quam triste in lacrymis trahemus auium;  
 Donec te reducem videre sis fas!

O qui carminibus mihi vel herbis,  
 Iuuentæ virides reducat annos;  
 Certè non sine me teratur istud  
 Via quicquid erit: sed obstat atas  
 Quæ tardum facit atque negligentem.

Nec te, Auguste moror, nec in bonorum  
 Sic peccare velim omnium salutem.  
 I quò fata iubent, bonique Diui.  
 Quisquis publica nescit anteferre  
 Priuatis bona, cinis ille non est.

## Paci.

**H**æc ades o requies defessis vnica rebus;  
 Pax bona, Pax cunctis ante ferenda bonis.  
Te vocat absentem suspirans nupta maritum,

Te vocat inculta mæstus arator humo.  
 Aspicias ut ferri dominetur saeva libido,  
 Grasseturq; locis omnibus omne nefas?  
 Vince feros, Dea, vince animos, redde aurea mundo  
 Secula & in Bellum tu tua bella gere.  
 Vah quid ago? belli fragor armorumq; tumultus  
 Errita ventosis nubibus ista ferent.

M. Myroni Regis Archiatro &  
 intimo consiliario.

**D**um pacis auctor bellicos flectis duces,  
 Motumque sedas ciuicum,  
 O nate Regi, nate patriæ Myro  
 Dij cæpta fortunent tua.  
 Sacro medendi suetus ante munere  
 Seruare Regem Gallis,  
 Partes ut omnes impleas, nunc nitere  
 Seruare Regi Gallias.

In effigiem Henrici Galliarum  
 & Poloniae Regis

**H**æc tabula inuicti vultus ostendit & ora  
 Henrici, voluit quem Ultrò gens externa Regem,  
 Indignata sua est, & iniqua cade peremit.

*Nec temerè tulit ille, Deo quod contigit ipse,  
Cuius vna sacris in Regibus extat imago.*

**Iacobo Corbinello Florentino  
In Canticorum versionem.**

**I***nter nequitias & fædi crimina secli  
Miraris castam sacra sonare chelyx?  
Hoc facit Henrici Genius, quem perdata divi  
Temporis impietas non vetat esse pium.  
Ille etiam Thuscos penetrauit ad usque recessus,  
Diuina Angelij mouit & ora tui,  
Qui Syrios Gallo compleuit milite colles  
Asseruitq; pia regna beata manu.  
Non ea vis tenui Musa est, vt numine fretus  
Ipse meo tantum condere coner opus.  
Quod possum, sacra per veterum vestigia patrum  
Carmina diuinis laudibus apta cano.  
Quòd si nulla meos commendat gratia cantus,  
Materia saltem nomine gratus ero.*

**Iacobo Sammarthano patruo.**

**A***mabo patrue, alter Aesculapi  
Medendi studiis & arte pollens,  
Quos simul medicus, simul poëta,*

Et tibi medico & mihi poeta  
 Communes numeros dedit Sepinus,  
 Fac legam semel, ut venusto amico  
 Respondere queam, arrogantiaq;  
 Iusta suspitione liberari.  
 Nam quid ille velit profecto scire  
 Haud quaquam, nisi legerim, potis sum.  
 An praeordia quod sacris poetis  
 Impleat suis incitata Phœbus  
 Diuinare putas licere nobis?

### I. Vulcobio.

**T**E puerum Aonides, iuuenem Respublica fouit,  
 Nunc sibi Religio vindicat alma virum.  
 Singula si haec possunt vera satis addere laudis,  
 Quos poterunt titulos addere iuncta seni?

### In Medeam Ioan. Perusij.

**P**ostquam Ronsardi ductu, mea Gallia, Musæ  
 Mutauere iugis notum Heliconæ tuis.  
 Quas prius ignotas spernebat quilibet ordo  
 Ex coluit notas quilibet ordo Deas.  
 Iamque lyrae cantus resonabas tota, tuorum  
 Materies datum cum foret vnus amor.  
 At sua qui prisco vestiret crura cothurno

Deerat adhuc, tragicos qui struerétque modos.  
 Venit Francorum Iodelius alter Apollo  
 Alitibus natus, sideribúsque bonis.  
 Venisti parua decus & tu, lane, Perusæ  
 Dignus quem socium iungat Apollo sibi.  
 Iámque quod incutiat Romæq, Argísque tremorem  
 Nescio quid sub te grande theatra tonant.  
 Cum meditis iuuenem fera Mors te sustulit ausis,  
 Nec patitur iusto claudere fine dies.  
 En adsum & patulo quantum possum ore sonare  
 Iungo meas Voces Vocibus ipse tuis.  
 Atque utinam seri iungant quoque nostra nepotes,  
 Iunctâque concelebrent nomina nominibus.

In Ælium, ad ciues  
 Piſtauienses.

**Q**ualis ubi Ætæon mutata fronte figuram  
 Exiit, & similis desiit esse sui,  
 Ipse suis canibus, quos prædæ assueuerat olim  
 Discerpto miserè corpore præda fuit.  
 Sic quoque mutata cæpit cùm mente videri  
 Ælius & similis desiit esse sui,  
 Ciuibus ipse suis, quos prædæ assueuerat olim  
 Discerpto in partes corpore præda fuit.

Ne tamen id fieri Diuū sine numine credas,  
 Par fuit his fatum, par quia crimen erat.  
 Viderat arcanum Cybeles hic, ille Diana,  
 Ille Deæ pœnas soluit, & iste Dea.

### Ad Bacchum. Ex Græco.

**H**unc tibi Bacche cadum, quo non modò Vina, sed  
 ipsas  
 Exhaustit potator opes, dat Caluus inanem.  
 Tu facilis cape, quando aliud nil denique restat.

### Calui Tumulus.

**A**sta viator, te nisi forte auocat  
 Repentè nata propter hoc bustum fames.  
 Amor enim edendi conditus mecum hic cubat.  
 Hac vna menti cura, dum vixi, fuit:  
 Hic vnus ori sermo, dum vixi, fuit.  
 Adeò vt viderer vestri in oras luminis  
 Missus ad edendum, planè iners ad cætera.  
 Dum suppetebant ergo fortunæ mihi,  
 Pudore victo feruide hoc vrgens opus,  
 Id, cuius ergo veneram, feci libens  
 Genium secutus atque Naturam ducem.  
 Me sol edentem vidit & cum pelleret  
 Noctis tenebras, & tenebris inuicem



Cùm pelleretur, nec pusillum temporis  
 Punctum remissi, quin vacarem muneri.  
 Neu liberorum cura alendorum patrem  
 Edacitate ab instituta auerteret,  
 Vitam peregi calibem inter fercula.  
 Neu sobriorum discerem consortio  
 Frugalitatem, sæpe vicinis locis  
 Monachorum ego inter sordidos iacui greges,  
 Monacharum & inter candidos iacui greges,  
 Atque hîc edendi quod furens libidine  
 Mens ingerebat, egerebat mentula.  
 Tandem quod ederem cum nihil reliqui foret,  
 Et sic quod agerem nil mihi reliqui foret,  
 Absumpto obuii patrimonio diem,  
 Inutilis que ne forem, esse desij.

### Iano Falconi I. C.

**Q**uem, Falco, mihi das Anacreontem  
 Argivæ decus aureum Camæna  
 Nunc per te Ausonio lepore tinctum  
 Ut exosculor ! Ut lubens reuoluo !  
 Ut mihi videor parum seuera  
 Inter pocula, liberósque cantus,  
 Senex cum sene Teïo iocari,  
 Senilésque animo fugare curas ?

O *Dij, si benefacta quid merentur,*  
*Falconi hoc precium meo benigni*  
*Vos rependite pro suo labore,*  
*Iucundum vt peragat beatus æuvm, &*  
*Qui tam pulchrè aliis ministrat vnde*  
*Molestas abigant grauèsqve curas,*  
*Nulla ipsum exagitent, premant ve cura.*

### In Iuliodunum.

**I**mpia cum nuper ciuili Gallia bello  
*Arsit penè ruens viribus ipsa suis,*  
*Videre oppositas stare hinc atque inde phalanges*  
*Iuliodunæi pingua culta soli.*  
*Non tamen acris hiems infesto frigoris æstu*  
*Passa fuit pigris conseruisse manus.*  
*Quis Deus ô Musæ (nec enim hoc sine numine Diuvm)*  
*His bonus auertit funera tanta locis?*  
*Num quæ Dardanio postquàm sub iudice vicit*  
*Dardanio generi nunc fauet æqua Venus?*  
*Nempe Dionæo fundata hic Casare surgunt*  
*Mœnia, quæ seruant nomen, Iule, tuum.*  
*Cùmque sit & Romæ & Gallis communis origo*  
*Argolicum fugiens Troia subacta iugum,*  
*Cognato acceptos maculari sanguine muros*  
*Non fuit vt posset sustinuisse Dea.*

## In Rufam.

**V**alle sub alarum tibi, cùm caper ante lateret,  
Postquàm nupsisti, iam premit ille femur.

## In eandem, parodia ex Catullo,

**T**urpes delicia senis salacis,  
Rufa putida, quam in sinu tenere,  
Cui penem vietum dare appetenti,  
Et lentus solet excitare curas,  
Cùm vobis nimium libidinosus  
Fœdum nescio quid iubet iocari,  
Irritatus ut acquiescat ardor.  
Tecum ludere velle, sicut ipsum,  
Mêne putida, mêne Rufa censes?  
Tam graue id mihi, quàm ferunt pudica  
Dilecto Bercynthia puello  
Nymphae Sangaridis fuisse crimen,  
Quod testes seuit parum pudicos.

## P. Gemello Lisoræo

**N**am cur inuida, cur maligna febris,  
Hoc me tempore tale nil merentem  
Affligis miserè malo cuncti,

Cum sui tenuem larem poëta  
 Inuisit Lisoræus ille noster  
 Præstantissimus omnium Virorum?  
 Talem nec licet hospitem, ut deceret,  
 Festinè excipere, atque liberali  
 Fessos hospitio fouere, & ipsum,  
 Et longæ comitem viæ Tiremum?

At si quis modus est tibi, molesta,  
 Hinc saltem procul hinc facesse febris,  
 Tantisper mihi dum licebit illos  
 Festinè excipere, atque liberali  
 Gratos hospitio fouere amicos.

Negus, improba, & vsq; & vsq; sæuis?  
 Sæui, dum mihi (quod febriculosis  
 Plerumque euenit) impotens furentia  
 Errorem incutiat doloris æstus,  
 Ita ut non videar mihi dolere,  
 Nec meum officium moretur vlla  
 Morbi opinio quamlibet maligni,  
 Et sic ipsius in febris dolorem  
 Prosit esse mihi febriculoso.

Iano Vauquelino Fra-  
 xinæo.

Quantò spes minor est rei cupita,  
 Tantò, si superi annuant benigni.

Solet gratior eius esse fructus.  
 Atqui non adeò cupit maritum  
 E duris reducem videre castris  
 Tabescens nimio dolore coniux;  
 Ut te, lane, videre gestiebam.  
 Sed quæ spes potuisset esse, dum tu  
 Dinitem aignore Neustriam pererras,  
 Me verò tenet, haud quidem volentem,  
 Formosi Ligeris beata ripa?  
 Ecce nos Biturix amica iungit,  
 Nunc & alloquio frui cupito,  
 Et vultu veteris licet sodalis.  
 Myrtinæ interea rubent ocelli,  
 Dum flent assidue suos amores.  
 Fleant ut lubet, interim fruemur,  
 Et quàm nunc dolet his abesse amantem,  
 Tam gaudebimus hic adesse amicum.

### Ad Ioan. Benenatum.

Quid te Vasconica vexat nouus hospes ab ora  
 Mentis vestræ stemmata prisca domus.  
 Hanc vsus dirimet motam de nomine litem,  
 Ille Venenatus, tu Benenatus eris.

## Eiusdem Benenati Tumulus.

**P**ER Vm pérque dolos fatali conditus Vrna  
 Mortuus hic malè sum qui Benenatus eram.  
 Mortis caussa Venus: nam ceco armauit ab æstu  
 In meruialis corda manúsque feri.  
 O Fati ambiguas leges! quæ cuncta propagans  
 Vitæ aliis caussa est, fit mihi caussa necis.

## Marino Libergeo. I. C.

**M**I Libergee, cuius in labellis  
 Et Themis sedet & natant lepores,  
 Tibi, si quid amas tuum sodalem,  
 Commendo teneros meos gemellos,  
 Quos Musæ placido è sinu beatum  
 Nunc mitto Andegauum, tuósque ad amnes,  
 Haurienda sacri ad fluentia lurs.  
 Quamquam si benè te Marine uouì  
 Quod tangit veteres tuos amicos  
 Hoc tibi satù est, superque curæ.  
 Porrò si quid erit vel hic vel isthic  
 Quod præstare tibi, tuisque nostra  
 Aut industria possit, aut facultas,  
 Me nulla immemorem dies videbit.

Ad Cl. Falconem Risium Senatus  
Aremorici principem.

**O** Decus *Astreæ Falco, quem nescire pavit*  
*Quæ fandi studiis aurea diua præest.*  
*Obtestor per si qua fides, atque auspice Phæbo*  
*Contractus stabili pectore regnat amor,*  
*Dexter ades, Veteremque memor miserare sodalem,*  
*Tempestas dubij quem premit atra fori.*  
*Aspicis ut rabide sua bella cientibus Euris*  
*Fluctuet haud vno turbine pulsa ratis?*  
*Illæ quidem solidis trabibus compacta, salutis*  
*Secura ut merito debeat esse sua.*  
*Adde quod hanc scopulos doctus vitare latentes*  
*Non infelici sub Ioue nauta regit.*  
*Sed tamen horret aquas (quid enim est incertius illis)*  
*Et tutum in tuto nil satis esse putat.*  
*Tu, tibi namque dedit ius hoc Neptunus in æquor,*  
*Pelle pericla manu vindice, pelle metus.*

Cl. Mangotij Tumulus.

**I**N bellicosi natus Vrbe Caesaris  
Mangotiorum nobili de stemmate

Iam primo ab avo patrum fugi larem,  
 Si me quoque alta possem ad astra tollere.  
 Nec Verò inanem me fefellit spes mea.  
 Summus patronus in Senatu maximo,  
 Poëta summus in deserto seculo,  
 Famam paravi, rem paravi, nec mihi  
 Virtutis ampla defuere præmia.

Nunc porro & annis plenus, & superstite  
 Nato beatus maximos in Gallia  
 Gerente honores, quo nec eruditior,  
 Nec probior ullus viuit aut facundior,  
 Solum relinquo latus & cælum peto:  
 Vos ô nepotes discite exemplis meis  
 Quàm sit decorum blanda mollis otij  
 Vitare fomenta, & labore prævio  
 Suprema rerum tendere ad fastigia.

In Scæuolam & Lodoi-  
 cum gemellos mihi  
 natos.

Cum foret & Phineus, dira instigante nouerca  
 Qui generi inferret plurima damna suo  
 Harpyiaq; forent sædo mox vngue parata  
 Quasitos misero pellere ab ore cibos.

Forſitan



*Forsitan & nasci voluerunt fata gemellos,  
 Vnde salus cæco restituenda seni.  
 Nam spes ut teneris quæ gratia lucet in illis  
 Affectu patrio talia monstra fuget.*

### Ad agrum Iuliodunensem.

**A**greſtes Villa, tenui gratiſſima cenſu  
 Prædia, & à proavis regna relicta meis;  
 Ut vos ipſe libens poſt tædia mille reuiſo!  
 Ut patry præſens me beat aura ſoli!  
 Saluete ô, placidôſque mihi præſtate reſceſſus,  
 Dum meditor Latia carmina culta lyra.  
 Fors erit ut ſeculis longo voluentibus æuo  
 Poſteritas noſtri vos memor ipſa colat.  
 Et dicat, Locus hic ille eſt ubi Scauola quondam  
 Ludebat faciles captus amore modos.

### In Sabinum.

**V**xorem poterat forma præſtante Sabinus  
 Ducere, ſed cui res non foret ampla domi:  
 Maluit vxorem forma ſalibusq; carentem  
 Ducere, ſed cui res non foret arcta domi.  
 Scilicet hoc Veneri eſt Plutum præferre, Sabine,  
 Inferna & ſuperis numina numinibus.

## In effigiem P. Brachi.

**B**Rache, si tua quàm Talia Tassum  
 Apte reddidit elegante versu,  
 Tam scitè tua reddidisset ora  
 Præstans ingenio manûque pictor,  
 Nulla viua foret magis tabella.

In Gilberti Blancherelli carmen  
 de Culice ambusto.

**E**Rgo etiam exiles animas (quis credere posset?)  
 Ambitio sua pertentat, famæq; cupido.  
 Paruulus ille Culex nomen dum à carmine capta.  
 Sustinet exuri, & medios moriturus in ignes  
 Ante oculos vatis repetito hinc inde volatu  
 Insilit, vt doctæ sic argumenta camæna  
 Præbeat, aternoque dehinc celebretur ab æuo.  
 Et dubitant homines, vermis quod tantulus audet,  
 Perpetua fragilem vitam pro laude pacisci?

## Iul. Cæsari Bulengero.

**M**æte agedum, Iuli (nec enim doctissime credo  
 Indictum fratris funus abire sines)  
 Mæte pio officio, raptum florentibus annis

*Tartaræa iuuenem Ditis ab arce trabe.  
 Sic suus extinctum reuocauit Castora Pollux,  
 Sed paris officij gloria maior erit.  
 Quandoquidem vitæ rediuiuo tempora fratri  
 Quæ dedit, ipse sibi dempsit iniquus amor.  
 At fratri æternam tibiues dum carmine vitam,  
 Longior accrescet sic quoque vita tibi.*

Mamerto Patissoni.

**M** Amerte optime, qui sacros inerti  
 A caligine vindicas poetas,  
 Doctorumque vetas perire lusum,  
 Hunc incultum etiam tibi libellum  
 Commendo auspiciis tuis in auras  
 Deserto cupidum euolare nido.  
 Quanquam non equidem mihi ipse tantum  
 Assumo, vt merear virum per ora  
 Vagari, sed enim meas Camænas  
 Cum laudent Puteanus & Pithoej  
 Probenz Pibracius, Valens, Thuannus  
 Docti omnes adeo viri & sagaces,  
 Nonne & sim scopulis, & inquieti  
 Longè durior Hadria procellis  
 Si non has ego amem deosculerque  
 Meas vt pote, quas mihi canenti  
 Tot curæ peperere, tot labores?

*Sed quamuis etiam has mihi canenti  
 Tot curæ peperere, tot labores,  
 Debebunt tibi plus tamen, Patisso,  
 Tuo munere si licebit illis  
 Longa Vincere secula & perenne  
 Vatis ferre sui sub astra nomen.*

## Musis.

*S* mea principibus placuit, populoque Thalia,  
 Implevit partes iam satis illa suas.  
 Sin potius Vanis oneraui cantibus aures,  
 Plura quid incassum perdere verba iuuat?  
 Scribite viuidior quibus est in pectore sanguis,  
 Non facit ad molles tarda senecta iocos.  
 Ipse ego nunc mûta & lauro suspensa virenti  
 Aeternum hîc Musis plectra lyrâmque dico.


EPIGRAMMATVM

FINIS.



SACRA CANTICA.

V iij



**Q**uod doctos, lepidos, piósque versus  
Sammarthane tuos vetas perire  
Collectos, & in ordinem redactos,  
Naturam facis omnibus Latine  
Doctis, & lepidis, piúsque gratam,  
Ludi præcipuè bonis magistris,  
Et castis pueris puellulisque,  
Qui te carmina casta vate discent.  
Mam castum esse decet pium poëtam  
Non ipsum modò, censet ut Catullus,  
Sed versum magis ipsius, magisque,  
Qui si sit similis Catullianis,  
Plus quàm mille cinedi obest Catulli.

Iò. Auratus Poëta Regius.



AD  
CLARISS. VIRVM  
ACHILLEM HARLÆVM  
Senatus Parisiensis  
Principem.

**N**on semper cupidi malè-sanos pectoris æstus  
Ludicraue, aut partos immiti Marte trium-  
phos  
Musa canit, terræq; inhiās mortalia spirat.  
Quondam etiam quæ Virgineo sunt digna pudore  
Diuinis aptat fidibus, notumque pererrat  
Voce polum & vani spernit ludibria vulgi.  
Præsertim si quem meritis & honore patronum  
Insignem legit & castas modulatur ad aures.  
Nempe alto Patrum in solio sacra debita Iuri  
Dum facis & populo princeps oracula dictas,  
Te si interpellem leuibus, vir maxime, nugis,  
Vel rerum ignarus merear, vel ineptus haberi.

*Verum age si sacris de fontibus hausta, Deique  
 Prompta sinu tibi dona feram, sanctæ optima vitæ  
 Fomenta, & duros rerum solantia casus,  
 Ecquid erit pretij? quo letus amore poetam  
 Excipies, blandoque dehinc dignabere vultu?*

*Ista quidem est voti merito pars optima nostri,  
 Nec potis vberior Musæ contingere merces,  
 Quàm tanto placuisse viro, quem Gallia latè  
 Sufficit & summis certatim laudibus effert.  
 Non quia conspicuus veterum te sanguis auorum  
 Illustrat, largosque tibi non inuida census  
 Nortia, supremosque togæ concedit honores.  
 Sed quia sorte ista longe dignissimus vnus,  
 Atque adeò maiore, tuæ virtutis amorem  
 Iniicis in puras mentes & amantia recti  
 Pectora: nec si te inferior fortuna tulisset  
 Parcius arderent animi colerent ve merentem.*

*Me certè iubeas penetrare vel vltima Thules  
 Litora, vel siccæ Libyæ flauentis arenas,  
 Quæque loca Euphrates extremo flumine findit  
 Turbidus, Eois vbi ponti spargitur vndis.  
 Quanquam æui pigra instet hyems, hæc omnia caussa  
 Non verear tentare tua, dum nostra voluntas  
 Sic pateat. Sed & est melior, qua me quoque possim  
 Commendare opera & non planè ingratus haberi.  
 Possum ego Pierij diuino munere cantus  
 Virtutes celebrare tuas, noctique profundæ*



*Eximere, & seuas Parcarum vertere leges.  
 Nam licet vnius captus dulcedine cæli  
 Non hominum plausu, non vana duceris aura,  
 Vsque adeone tamen virtuti debita spernes  
 Præmia, vt oblatum non amplectaris honorem?*

*Ille adeo iucundus honos etiam optima mulcet  
 Pectora: nec si olim famæ generosus cupido  
 Deserat humanas rerum in discrimine mentes,  
 Vllus erit qui pro populi Regumque salute  
 Audeat innumeris caput obiectare periclis.*

*Quo tibi tot curæ, tot sumpti sæpe labores  
 Pro patria, si post spatium breue labilis aui  
 Omnia Lethæis nox obruat vna sub undis?  
 Siccine virtutum illa cohors, timor ille Deorum  
 Et pudor & probitas & acerbo tempore Regi  
 Nunquam fracta fides, nunquam mutabile pectus,  
 Inuietoque animus non inficiandus Achilli  
 Vanescant, neque venturo noscantur ab æno?*

*Hoc Musæ prohibete nefas: non plurima vobis  
 Turba deest, tam gratum obeat quæ sponte laborem.  
 Non tot in herbosis sæcundæ saltibus Hyblæ  
 Vere nouo glomerantur apes ad roscida florum  
 Pabula: non tot vbi Autumno vindemia feruet  
 Aligeri coeunt culices & fumida circum  
 Labra volant musti latè fragantis amore,  
 Gallia quot nostro produxit tempore vates  
 Qui liquidas vestri concurrunt fontis ad undas.*

*Atque quidem hos inter quanquam postremus &  
arte*

*Ingenio, tamen hanc potero dum carpere lucem  
HARLÆI egregias non vno carmine laudes  
Persequar, vt magnum longè diffusa per orbem  
Tot decora æternum viuant, æuóque futuro  
Non leuia ad seros veniant exempla nepotes.*



SCÆVOLÆ  
SAMMARTHANI  
SACRA CANTICA.

Ex veteri testamento.

Trium puerorum apud Danielelem.

**Q**uæcunque ille Parens mûdi nascentis origo  
Cødedit, & sancto moderatur cødita nutu,  
Dicite diuinum, vos omnia, dicite Numen.  
Quæ vitreo circû pendêtes fornice lymphæ  
Cingitis immensum vasto curuamine Cælum,  
Ipsûsque adeò magni spatia ardua Cæli,  
Dicite diuinum, vos omnia, dicite Numen.

Felices Genij, puro quibus æthere natis  
Æternum est studium diuina capessere iussa,  
O decora astrigeri longè castissima Olympi,  
Dicite diuinum, vos omnia, dicite Numen.

Phœbe parens, Phœbique soror, duo maxima mundi  
Sidera, quæ in sese redeuntem voluitis annum,  
Et quotquot nitidis rutilatis in orbibus ignes,

*Dicite diuinum, Vos omnia, dicite Numen.*

*Qui caditis grauibus pluuij de nubibus imbres,  
Qui fluitis liquidi per prata nitentia rores,  
Et late ingentes quatitis quæ flamina terras,  
Dicite diuinum, Vos omnia, dicite Numen.*

*Arida flammantes qui finditis arua calores,  
Segnia concretas quæ frigora stringitis undas,  
Quæq; datis lucem nobis, quæ tempora noctem,  
Dicite diuinum, Vos omnia, dicite Numen.*

*Vos etiam aëriæq; niues, & rubra per æthram  
Fulgura, & attonitas terrentia fulmina mentes,  
Dicite diuinum, Vos omnia, dicite Numen.*

*Nec minus & magna sola quàm vastissima terra,  
Vos iuga, Vos dubio pendentes tramite colles,  
Et quæcunque vigent ex ipsa orientia terra,  
Dicite diuinum, Vos omnia, dicite Numen.*

*Et gelidi fontes, & qui de fontibus amnes  
Perpetuos lapsus in apertum voluitis æquor,  
Ipsam etiam, ipso etiam quicumque sub æquore natis  
Squammigeri pisces, & grandi corpore Cete,  
Dicite diuinum, Vos omnia, dicite Numen.*

*Vos etiam puras animalia pictæ per auras,  
Vos etiam latos animalia bruta per agros,  
Et quibus humane concessa est gratia formæ,  
Dicite diuinum, Vos omnia, dicite Numen.*

*Isacidae ante omnes, & queis est cura sacrorum,  
Et quæcunque adeò pietate insignia vera*

*Pectora caelestem Domini spiratis amorem,  
Dicite diuinum, vos omnia, dicite Numen.*

*Et vos felices anima, quas sidera seruant,  
Anania, Azariáque, & casto corde Misael,  
Dicite diuinum, vos omnes, dicite Numen.*

*Vos meritò laudate Deum: quando ille potenti  
Nos dextra eripuit nigri de faucibus Orci.*

*Ille vnus medios clausa è fornace per ignes  
Eduxit miserans, dulcèsq; reduxit in auras.*

*Hunc omnes laudate py, Deus ille Deorum est,*

*Ille suis bonus ac facilis, plenissima cuius  
Gratia, & innumeros Clementia durat in annos.*

### *Iudithæ viduæ Bethuliensis.*

**L***ætis carmina tympanis,  
Lætis læta meo carmina cymbalis*

*Orsi pangite nunc Deo.*

*Laudes blandisonis non sine cantibus*

*Sancto eius date Numini.*

*Belli terribilem qui domet impetum,*

*Qui castra in medio sua*

*Metatus populo, dira parantibus*

*Me subtraxerit hostibus.*

*Canis Assyrius venerat è iugis*

*Horrens vnde Aquilo fremit,*

*Ipsosque innumeris militibus ferox  
Intercluserat amnium  
Cursus, ipsa suis infima vultuum  
Latè opplerat equis loca.  
Iamque atroce animo pollicitus meis  
Sæua incendia finibus,  
Nulli certus erat parcere, sed meæ  
Gentis fortia robora  
Districtis iuuenes confodere ensibus,  
Et lactantis ab ubere  
Duro rapta solo sternere corpora,  
In prædàmque tenellulis  
Molles cum pueris ducere virgines.  
At rerum ille potens Deus  
Conatus tumidi pectoris irritos  
Fregit fœminea manu.  
Non hostem eximij viribus inclitum  
Bellatrix iuuenum cohors;  
Non vasta Supèris mole minantium  
Titanum manus abstulit.  
Formosa facies sola Meraridos  
Iudithæ sibi subdidit.  
Nam post longa animi tædia ciuibus  
Allatura suis opem  
Lugubres habitus, & vidui tori  
Cultum protinus exiit.  
Iucundis faciem sparsit odoribus,*

In nodumq; volatiles  
Nectens arte comas, sicque hominem dolo  
Captans illice, linea  
Huic sese exhibuit conspicuam stola.  
Huic torpentia lumina  
Incessu aurecoli surripuit pedis.  
Huic forma aucupe perditum  
Non pellendo animum supposuit iugo:  
Huic demum exitiabili  
Cervicem miseram fregit acinace.  
Audax horruit illius  
Ingentes animos Persidos incola,  
Medusque obstupuit ferox.  
Tum longis mea gens pressa doloribus,  
Duris fracta laboribus  
Exclamare noua letitia, nouis  
Pulsare aethera plausibus:  
Ad quorum strepitum se pauidi incitam  
Vertunt Assyrij in fugam.  
Illos de teneris nata puellulis  
Mollis turba dedit neci,  
Casos vulneribus turpibus, haud secus  
Ac seruos refugas, meo  
Debellante Deo, cuius ego inclitis  
Laudes perpetuò canam.  
Tu magnus. meritis tu, Pater, vndique  
Fulges clarus honoribus.

*Tu virtute potens cedere nescia.*

*Per te condita seruiant*

*Passim cuncta tibi: quippe simul tui*

*Sermonis crepuit sonus,*

*Illis esse datum est: aura simul tua*

*Afflauit, fabricata sunt.*

*Oris sancta tui verba neque audeat*

*Contra tendere quispiam.*

*Quin ipsi à solido, cum vitreis aquis,*

*Montes subsiliunt solo.*

*Et vultus nitidis à radiis tui*

*Moles confraga rupium*

*Tanquam lenta foco cera resoluitur.*

*At qui te metuunt, eos*

*Indefessus amas: nec facit additis*

*Tota altaria thuribus*

*Suffire, & rapidis largiter ignibus*

*Pingues vrere victimas.*

*At sanctus Domini quos timor afficit,*

*Hos magni Dominus putat.*

*Veh infesta quibus contigit in meum*

*Moliri populis genus!*

*Hos plectet miseris omnipotens modis*

*Summo iudicij die,*

*Certatimque feris ignibus, & feris*

*Totos veribus exedet*

*Aeternis querulos in cruciatibus.*



## Ex Epinicio Deboræ.

**E**la, quid cessas Debora? eia dulces  
Dic modos, prædæque ferox recenti  
Huc ades magni generosa proles

*Abinoami.*

Quosque fors belli tibi comparauit  
Leta captiuos celebrem in triumphum  
Profer, & totam manibus reuinctis

*Coge per Urbem.*

Impetu factæ Cananæ ab oris  
Asperam reges iniere pugnam,  
Quæ vagus Thani spatiosa lustrat

*Arua Magedo.*

Non tamen dites retulere prædas,  
Ipse nam celi fauor, ipsa contra  
Sisaram ex altis quoque dimicant

*Orbibus astra.*

Nunc iò illustres animæ ac beatæ,  
Quæis datum exacto superesse bello,  
Nunc iò tandem dabis fugatis

*Iura tyrannis.*

Prima laus tanta tibi danda palmæ  
Fortis Ephraim soboles, paratis  
Primatu vires Amalecorum

*Excipis armis.*

*Quid satos claro Sabulone dica m,  
Quos amor tantus ciet, Ut qui etis  
Dediti Musis homines & ipsi*

*Arma capeffant?*

*Nec mea indictus fuerit camæna  
Qui simul præstans animi Baraccus  
Valle decliui pedes ingruentem*

*Tendit in hostem.*

*Quæ tamen lentos mora, quis veterinus  
Vos Rubenite tenuit, propinquis  
Quominus vestrum quoque iungeretis*

*Gentibus agmen?*

*Qui sub euersis Aferita muris  
Ad procellosum stabularis æquor,  
Intuis, queso, tibi quæ latendi*

*Causa ruinis?*

*Non ita inuictus Sabulo potensque  
Neptalis pubes, mediis sed ipsam,  
Posceret si res, Voluere campis*

*Ponere vitam*

*Væ sacra infandis domibus Merosæ  
(Hoc enim interpret iubet ipse celi)  
Væ sacra inuiso populo Merosæ*

*Dicite ciues.*

*Nam louæ afflictis per iniqua rebus  
Tēpora, haud quidquā male-fida grati*

*Auxili contra numero ferocem*

*Præbuit hostem.*

*Illæ sed Iacel celebranda, Iacel*

*Nympha præstantis generosa Heberi,*

*Fæminas inter memori vehenda*

*Laude Ceneas.*

*De fuga fesso & gelidam petenti*

*Sisara magna patera bibendum*

*Lac dedit palps, niueoque mulsit*

*Labra liquore.*

*Blandus irrepfit sopor: illa leuâ*

*Ferreum clauum, simul & fabrilem*

*Malleum dextra rapiens, iacentis*

*Tempora fixit.*

*Sternitur tanto labefactus ictu*

*Fæminæ infelix ferientis ipsos*

*Ad pedes ductor, subitoque pallens*

*Erigore membra.*

*Ter solo sese exiliens leuauit,*

*Ter solo sædè reuolutus imo est,*

*Et nigra demum hic miseranda clausit*

*Lumina nocte.*



**Q**uod doctos, lepidos, piósque versus  
Sammarthane tuos vetas perire  
Collectos, & in ordinem redactos,  
Natura rem facis omnibus Latine  
Doctis, & lepidis, piísque gratam,  
Ludi præcipuè bonis magistris,  
Et castis pueris puellulísque,  
Qui te carmina casta vate discent.  
Mam castum esse decet pium poetam  
Non ipsum modo, censet ut Catullus,  
Sed versum magis ipsius, magisque,  
Qui si sit similis Catullianis,  
Plus quàm mille cinadi obest Catulli.

Iò. Auratus Poëta Regius.



AD  
CLARISS. VIRVM  
ACHILLEM HARLÆVM  
Senatus Parisiensis  
Principem.

**N**on semper cupidi male-sanos pectoris æstus  
Ludicraue, aut partos immiti Marte trium-  
phos  
Musa canit, terreq; inhiās mortalia spirat.

Quondam etiam quæ virgineo sunt digna pudore  
Diuinis aptat fidibus, notumque pererrat.  
Voce polum & Vani spernit ludibria vulgi.  
Præsertim si quem meritis & honore patronum  
Insignem legit & castas modulatur ad aures.

Nempe alto Patrum in solio sacra debita Iuri  
Dum facis & populo princeps oracula dictas,  
Te si interpellem leuibus, vir maxime, nugis,  
Vel rerum ignarus merear, vel ineptus haberi.

*Verum age si sacris de fontibus hausta, Deique  
Prompta sinu tibi dona feram, sanctæ optima vitæ  
Fomenta, & duros rerum solantia casus,  
Ecquid erit pretij? quo latus amore poetam  
Excipies, blandoque dehinc dignabere Vultu?*

*Ista quidem est voti merito pars optima nostri,  
Nec potis vberior Musæ contingere merces,  
Quàm tanto placuisse viro, quem Gallia latè  
Suspicit & summis certatim laudibus effert.  
Non quia conspicuus Veterum te sanguis auorum  
Illustrat, largosque tibi non inuida census  
Nortia, supremosque togæ concedit honores.  
Sed quia sorte ista longè dignissimus vnus,  
Atque adeò maiore, tuæ virtutis amorem  
Iniucis in puras mentes & amantia recti  
Pectora: nec si te inferior fortuna tulisset  
Parcius arderent animi colerent ve merentem.*

*Me certè iubeas penetrare vel vltima Thules  
Litora, vel siccæ Libyæ flauentis arenas,  
Quæque loca Euphrates extremo flumine findit  
Turbidus, Eois vbi ponti spargitur vndis.  
Quanquam æui pigra instet hyems, hæc omnia caussa  
Non vercar tentare tua, dum nostra voluntas  
Sic pateat. Sed & est melior, qua me quoque possim  
Commendare opera & non planè ingratus haberi.  
Possum ego Pierij diuino munere cantus  
Virtutes celebrare tuas, noctique profunda*

*Eximere, & seuas Parcarum vertere leges.  
 Nam licet vnus captus dulcedine celi  
 Non hominum plausu, non vana ducris aura,  
 Vsq̃ue adeóne tamen virtuti debita spernes  
 Premia, vt oblatum non amplectaris honorem?*

*Ille adeò iucundus honos etiam optima mulcet  
 Pectora: nec si olim famæ generosæ cupido  
 Deferat humanas rerum in discrimine mentes,  
 Vllus erit qui pro populi Regúmque salute  
 Audeat innumeris caput obiectare periclis.*

*Quo tibi tot cura, tot sumpti saepe labores  
 Pro patria, si post spatium breue labilis æui  
 Omnia Lethæis nox obruat vna sub vndis?  
 Siccine virtutum illa cohors, timor ille Deorum  
 Et pudor & probitas & acerbo tempore Regi  
 Nunquam fracta fides, nunquam mutabile pectus,  
 Inuictóque animus non inficiandus Achilli  
 Vanescant, neque venturo noscantur ab æno?*

*Hoc Musæ prohibete nefas: non plurima vobis  
 Turba deest, tam gratum obeat quæ sponte laborem.  
 Non tot in herbosis fœcundæ saltibus Hyblæ  
 Vere nouo glomerantur apes ad roscida florum  
 Pabula: non tot vbi Autumno vindemia feruet  
 Aligeri coeunt culices & fumida circum  
 Labra volant musti latè fragantis amore,  
 Gallia quot nostro produxit tempore vates  
 Qui liquidas vestri concurrunt fontis ad vndas.*



SCÆVOLÆ  
SAMMARTHANI  
SACRA CANTICA.

Ex veteri testamento.

Trium puerorum apud Danielelem.

**Q**uæcunque ille Parens mûdi nascentis origo  
Cōdidit, & sancto moderatur cōdita nutu,  
Dicite diuinum, vos omnia, dicite Numen.  
Quæ vitreo circû pendētes fornice lymphæ  
Cingitis immensum vasto curuamine Cælum,  
Ipsûsque adèò magni spatia ardua Cæli,  
Dicite diuinum, vos omnia, dicite Numen.

Felices Genij, puro quibus æthere natis  
Æternum est studium diuina capessere iussa,  
O decora astrigeri longè castissima Olympi,  
Dicite diuinum, vos omnia, dicite Numen.

Phæbe parens, Phæbique soror, duo maxima mundi  
sidera, quæ in sese redeuntem voluitis annum,  
Et quotquot nitidis rutilatis in orbibus ignes,



*Pectora caelestem Domini spiratis amorem,  
Dicite diuinum, vos omnia, dicite Numen.*

*Et vos felices anima, quas sidera seruant,  
Anania, Azariâque, & casto corde Misael,  
Dicite diuinum, vos omnes, dicite Numen.*

*Vos meritò laudate Deum: quando ille potenti  
Nos dextra eripuit nigri de faucibus Orci.*

*Ille vnus medios clausa è fornace per ignes  
Eduxit miserans, dulcésque reduxit in auras.*

*Hunc omnes laudate py, Deus ille Deorum est,*

*Ille suis bonus ac facilis, plenissima cuius  
Gratia, & innumeros Clementia durat in annos.*

### *Iudithæ viduæ Bethuliensis.*

**L** *Aetis carmina tympanis,  
Latius lata meo carmina cymbalis*

*Orsi pangite nunc Deo.*

*Laudes blandisonis non sine cantibus*

*Sancto eius date Numini.*

*Belli terribilem qui domet impetum,*

*Qui castra in medio sua*

*Metatus populo, dira parantibus*

*Me subtraxerit hostibus.*

*Canis Assyrius venerat è iugis*

*Horrens vnde Aquilo fremit,*

In nodumq; volatiles  
Nectens arte comas, sicque hominem dolo  
Captans illice, linea  
Huic sese exhibuit conspicuam stola.  
Huic torpentia lumina  
Incessu aureoli surripuit pedis.  
Huic forma aucupe perditum  
Non pellendo animum supposuit ingo:  
Huic demum exitiabili  
Cervicem miseram fregit acinace.  
Audax horruit illius  
Ingentes animos Persidos incola,  
Medusque obstupuit ferox.  
Tum longis mea gens pressa doloribus,  
Duris fracta laboribus  
Exclamare noua letitia, nouis  
Pulsare aethera plausibus:  
Ad quorum strepitum se pauidi incitant  
Vertunt Assyrii in fugam.  
Illos de teneris nata puellulis  
Mollis turba dedit neci,  
Casos vulneribus turpibus, haud secus  
Ac seruos refugas, meo  
Debellante Deo, cuius ego inclitas  
Laudes perpetuò canam.  
Tu magnus. meritis tu, Pater, vndique  
Fulges clarus honoribus.

*Tu Virtute potens cedere nescia.*

*Per te condita seruiant*

*Passim cuncta tibi: quippe simul tui*

*Sermonis crepuit sonus,*

*Illis esse datum est: aura simul tua*

*Afflauit, fabricata sunt.*

*Oris sancta tui verba neque audeat*

*Contratendere quispiam.*

*Quin ipsi à solido, cum vitreis aquis,*

*Montes subsiliunt solo.*

*Et vultus nitidis à radiis tui*

*Moles confraga rupium*

*Tanquam lenta foco cera resoluitur.*

*At qui te metuunt, eos*

*Indefessus amas: nec facit additis*

*Tota altaria thuribus*

*Suffire, & rapidis largiter ignibus*

*Pingues vrere victimas.*

*At sanctus Domini quos timor afficit,*

*Hos magni Dominus putat.*

*Veh infesta quibus contigit in meum*

*Moliri populis genus!*

*Hos plectet miseris omnipotens modis*

*Summo iudicii die,*

*Certatimque feris ignibus, & feris*

*Totos vermicibus exedet*

*Aeternis querulos in cruciatibus.*

Ex

## Ex Epinicio Deborah.

**E**ia, quid cessas Debora? eia dulces  
 Dic modos, prædæque ferox recenti  
 Huc ades magni generosa proles  
 Abinoami.

Quosque fors belli tibi comparauit  
 Lata captiuos celebrem in triumphum  
 Profer, & totam manibus reuinctis  
 Coge per urbem.

Impetu facto Cananæ ab oris  
 Asperam reges iniere pugnam,  
 Quæ vagus Thani spatiosa lustrat  
 Arua Magedo.

Non tamen dites retulere prædas,  
 Ipse nam celi fauor, ipsa contra  
 Sisaram ex altis quoque dimicarent  
 Orbibus astra.

Nunc iò illustres animæ ac beatæ,  
 Quis datum exacto superesse bello,  
 Nunc iò tandem dabitis fugatis  
 Iura tyrannis.

Prima laus tanta tibi danda palmæ  
 Fortis Ephraim soboles, paratis  
 Primatui vires Amalecorum

*Excipis armis.*

*Quid satos claro Sabulone dica m,  
Quos amor tantus ciet, ut qui etis  
Dediti Musis homines & ipsi*

*Arma capebant?*

*Nec mea indictus fuerit camæna  
Qui simul præstans animi Baraccus  
Valle declivi pedes ingruentem*

*Tendit in hostem.*

*Quæ tamen lentos mora, quis veterinus  
Vos Rubenita tenuit, propinquis  
Quominus Vestrum quoque iungeretis*

*Gentibus agmen?*

*Qui sub euersis Aferit a muris  
Ad procellosum stabularis æquor,  
In tuis, quæso, tibi quæ latendi*

*Causa ruinis?*

*Non ita inuictus Sabulo potensque  
Neptalis pubes, mediis sed ipsam,  
Posceret si res, Voluere campis*

*Ponere vitam*

*Væ sacra infandis domibus Merosæ  
(Hoc enim interpret iubet ipse celi)  
Væ sacra inuiso populo Merosæ*

*Dicite ciues.*

*Nam Iouæ afflictis per iniqua rebus  
Tēpora, haud quidquā male fida grati*

*Auxili contra numero ferocem*

*Præbuit hostem.*

*Illa sed Iaël celebranda, Iaël*

*Nympha præstantis generosa Heberi,*

*Fæminas inter memori vehenda*

*Laude Ceneas.*

*De fuga fesso & gelidam petenti*

*Sisara magna patera bibendum*

*Lac dedit palpsans, niueoque mulsit*

*Labra liquore.*

*Blandus irrepfit sopor: illa læua*

*Ferreum clauum, simul & fabrilem*

*Malleum dextra rapiens, iacentis*

*Tempora fixit.*

*Sternitur tanto labefactus ictu*

*Fæmina infelix ferientis ipsos*

*Ad pedes ductor, subitoque pallent*

*Frigore membra.*

*Ter solo sese exiliens lenauit,*

*Ter solo sædè reuolutus imo est,*

*Et nigra demum hic miseranda clausit*

*Lumina nocte.*

## Annæ matris Samuelis.

**N**unc tota pleno pectora gaudio  
 Fauente nobis Numine gestiunt,  
 Attollo nunc frontem superbam  
 Liberâque attonitos in hostes  
 Nunc ora soluo, triste silentium  
 Perosa. tanta letitia effero,  
 Postquam suo tutam benignus  
 Me pater esse iubet fauore.  
 Quis sanctus æquè est, ô Deus, atque tu?  
 Quis, ut loquamur veriùs, vspiam  
 Te præter vnum sanctus? aut quis  
 Eximia tibi comparandus  
 Virtute? iam vos ergo ferociam  
 Oris superbi comprimate, aspera  
 Iam verba cessent: ille quem res  
 Nulla fugit, Deus ille vanos  
 Evertit ausus, & variat vices.  
 Hoc fracta hebescent spicula fortium,  
 Hoc debiles firmantur artus  
 Robore non patiente vinci.  
 Largo repleti qui fuerant cibo,  
 Victum ob parandum nunc operas locant:  
 Et qui fame contra peribant,

Nunc nimio saturantur esu.  
 Tadas inanes, & sterilem torum  
 Quæ expostulabat, nunc sobole affluit:  
 Quæq; affluebat, nunc minuti  
 Damna gemit miseranda lecti.  
 Vita, necisque est vnicus arbiter  
 Creator orbis: cum lubet horrido  
 Detrudit Orco, mox reducit,  
 Cum lubet, ætheriâs in auras.  
 Dites ob orta pauperie obruit,  
 Amplis egenos diuitiis beat,  
 Nunc deprimit summum tenentes,  
 Nunc humiles super alta mittit.  
 Sæpe infimo de puluere pauperem  
 Ad celsa rerum culmina prouehit,  
 Virisque summis assidentem  
 In solio statuit supremo.  
 Immensa terræ qui sola fulciunt,  
 Torquentur eius numine cardines,  
 Quibus super vasti locauit  
 Tempia opifex speciosa Cali.  
 Ergo supremis imperiis potens  
 Tutum piorum certus iter reget:  
 At impiorum sub profundis  
 Muta cohors latitabit umbris.  
 Caduca & impios gens hominum suis  
 Ne forte quidquam viribus arroget,




*Ab arce mundi fulminabit  
Ille ferox pauidos in hostes.  
Regendi habenas suscipiet soli,  
Suum ille Regem robore muniēt,  
Sui ille Regis ter verendum  
Summa caput super astra tollet.*

---

### Esaia Prophetæ.

**T**ibi beate gratias ago Rarens,  
Qui cum furore ardesceres,  
Tamen benignus parcis, & solatio  
Dulci immerentem me foues.  
Cum sit salutis auctor & vindex mea,  
Fidam Deo imperterritus.  
Materia nempe est ille cantandi mihi,  
Dum me ad suas laudes trahit,  
Laudes supremæ debitas potentia,  
Nobis saluti quæ fuit.  
Hoc haurienda fonte vobis est salus,  
Hinc illa abundè profluet.  
Et tunc beato delibuti gaudio,  
Agite, inquietis, gratias  
Iehonæ tonanti, numen illius sacrum  
Prece inuocate supplice,  
Ingentia eius facta latè spargite

*Nomenque clarum attollite.  
 Memorate Dominum, qui canendum gentibus  
 Opus peregit arduum.  
 Festis alacres vos ouate cantibus,  
 Pulcræ Sionis incola,  
 Postquam ille sanctæ gentis augustus Deus  
 Miranda vobis præstitit.*



CANTICORVM  
 PARS ALTERA.

*Ex nouo testamento.*

Zachariæ Sacerdotis.

**Q**uo tibi, summe Deum, veteri quem  
 nata Iacobo  
 Gens colit, atque aris meritum pia libat  
 honorem,  
 Quo tibi nunc dignæ soluentur carmine grates?  
 Quandoquidem populo præsens ades, ille beatus  
 Vindice te tandem nunc libera tempora ducit,  
 Acceptoque tui de semine Dauidis ortum

Erigis optanti promissæ dulce salutis  
 Præsidium, antè tuo pleni quod numine Vates  
 Haud temerè antiquis patribus cecinere futurum.  
 Nempe fero tutos aliquando vt mitis ab hoste  
 Assereres, & seruitij iuga dura lenares:  
 Quo magis in nostros facilis, placidaque pateres  
 Largitor Venia, nec sæderis immemor olim  
 Percussî, Abrahamo dum tu lætissima spondes  
 Iuratus fore secla, truci cum ex hoste redemptis  
 Auspice te nobis posita formidine tandem  
 Te colere, & pia ritè tibi sacra ferre liceret.

Et tu, sancte puer, felicibus edite mundo  
 Auspiciis, summi Domini appellabere Vates.  
 Quippe viam sternes venturo, & nata salutis  
 Munera narrabis fesso prænunciis orbi,  
 Speratamque diu pacem mortalibus ægris,  
 Qua nos ima beat Regis clementia, puro  
 Dum noua lux oritur calo, quæ noctis opacis  
 Immerfos tenebris nitido mox lumine spargat,  
 Nostraque ad optatam ducat vestigia vitam.

---

Mariæ Virginis sanctissimæ  
 Christi matris.

**T**E, Pater alme, canit mea mens, te exultat in vno  
 Spiritus, ô mea spes, ô mea sola salus,

Qui de sidereo sublimis culmine cali  
 Res ancillæ humiles respicis ecce tuæ.  
 Hinc erit ut longum felix ego dicar in ævum,  
 Et populi æterna laude per ora ferar.  
 Ille etenim, cuius nunquam finita potestas,  
 Qui sanctum Augusto numine nomen habet,  
 Cuius amica piis clementia semper aperta est,  
 Pertribuit magnus munera magna mihi.  
 Ille potens, terræ stupeat quæ maximus orbis,  
 Ingenti manuum robore multa facit.  
 Vana quibus nimio turgescunt pectora fastu,  
 Deiectos animi spe iubet esse sui.  
 Cum lubet, elatos folio deturbat ab alto:  
 Cum lubet, abiectos ad loca summa vehit.  
 Hoc ditatur inops, modò quem sors dura premebat:  
 Hoc fit inanis opum, qui modò dives erat.  
 Ille etiam Abrahamo, veterisque nepotibus olim  
 Abrahami certa quod dedit ante fide,  
 Israëlæ satos iuvat, æternumque iunabit,  
 Quem populum in tempus vendicat omne sibi.

---

## SYMEONIS.

Nunc (ut antè receperas futurum)  
 Nunc o nunc genitor benigne, tandem  
 Dimittor placida quiete felix.

*En tuo famulo tuam Salutem  
 Hisce luminibus datur tueri.  
 Hanc tu in luce palam exhibis aperta  
 Nationibus omnibus Videndam,  
 Lumen gentibus aureum prophanis,  
 Aeternum Solymis tuis honorem.*

---

Ex capite A&or. iiii.

**O** Magni ætheris arbiter,  
 Ille es tu sator omnium,  
 Qui terras, mare, sidera,  
 Quæque hæc singula continent  
 Verbo perficis vno.

Cuius numine percitus  
 Rex olim hæc Solima canit,  
 Quis gentes furor incitat?  
 Quò vana populi minæ?  
 Quid fert iste tumultus?  
 Quid factò fremit agmine  
 Principum manus impios  
 Versans corde dolos, quibus  
 Et Deum petat & Dei  
 Regem rite perlunctum?  
 Est vati sua nunc fides,  
 En cum gente nefaria  
 In Christum coeunt tuum

*Herodes animi ferox,  
Proconsulque Latinus.*


*Quid porro hi facient, nisi  
Quod ratum tibi sit prius?  
At ô maxime cœlitum  
Huc ades bonus, & minas  
Horum despice inanes.*

*Iussa fac tua liberè  
Loquamur, neque filij  
Nobis interea tui  
Desit spiritus, æthere  
Qui nos afflet ab alto.*

*Unde & corporibus sua.  
Passim agris redeat salus,  
Et stupentibus impiis  
Sit fas edere plurima  
Latum ostenta per orbem.*

### Decalogus.

**A**ccipito hæc animis, tibi quæ Rex maximus olim  
Imperat, excusso gens recreata iugo.  
Hunc vnum tota venerabere mente, nec vllum.  
Ascribes pictis numen imaginibus.  
Ne iures temerè nulli iurabile nomen.  
Septima lux positis cesset ab officiis.  
Vt longum viuas, Patres cole. neu coramitis  
Ædum inconcessi crimen adulterij.



PSALMI ALIQVOT  
EX DAVIDE.

---

Ad Gulielmum Ruzæum Epi-  
scopum Andegauen.

**C**Vi donem potius sacras. Ruzæe, Camœnas,  
Quàm tibi, sacrorum, Pieridumque decus?  
Nec mea quòd paucis niteant variata figuris  
Carmina, & externa sermo sit arte carens.  
Crediderim idcirco minùs ista futura legenti  
Grata tibi, istorum si modo lector eris.  
Cum referunt nugæque leues, & inania Musæ,  
Quæ per se nullum somnia pondus habent,  
Tunc locus ingenio est, nimia tunc arte politum,  
Materiem sterilem Vincere debet opus.  
At cum vera canit, compto sermone Poëta  
Non eget: ipsa sibi sufficit ampla seges.  
Sic operam aurificis rutilo lapis amulus igni  
Negligit ipse suo plus satis orbe micans.

## Psalmus III.

**H**Ei mihi quàm densi collectis viribus hostes  
 Insurgunt ! quanto coeunt in me agmine turmae !  
 Quinetiam illuduntque mihi, nullamque salutem  
 In Domino esse aiunt. At enim tu maximus ille es,  
 O Deus, incerta qui per discrimina pugna  
 Me tectum vt clypeo felici numine seruas.  
 Tu decus omne meum, per te mihi gloria surgit  
 Altior & summis letum caput erigit astris.  
 Tu quoties querulas promo de pectore Voces  
 Exaudis bonus, & sacra me attendis ab arce.

Certè ego seu vigilem, seu blandos lumina somnos  
 Accipiant, semper tanto custode pauoris  
 Liber agam & placida securus mente quiescam.  
 Me licet innumerae vellent hinc inde phalanges  
 In caput hoc iuratae omnes, impune videbo  
 Agmina, nec lethi me vrgens terrebit imago.

Tu modo (nam seruare tuum est) fortissime surge  
 Dux mihi, neu pigeat solita virtute nocentum  
 Et malas terere, & duros confringere dentes,  
 Ipsa tibi niueis fulgens Victoria pennis  
 Seruit, & ipsa Salus, te lecti pendet ab vno  
 Spes populi, tu nota illum bonitate fideque  
 Conserua, & largis cumula, pater optime, donis.



## Psalmus IIII.

**M** Agne Parens (nam te angustis in rebus amicum  
Iam memini expertus toties)

Infantis miserere, & non iniusta petenti  
Nunc præbe quoque te facilem.

Quo tamen vsque meæ sic insidiabere famæ  
Nescia gens hominum veri?

Si dubitas, idem ille sibi qui sponte sacrauit  
Me Deus, & dedit esse pium,

Constanti fouet vsque fide: quodcunque precabor  
Non vacuas sinet ire preces.

Indultum errori satis est, agnoscite summi  
Numina non temeranda Dei.

Hæc animo taciti per noctem euoluite curas  
Pertæsi vitæ ac scelerum.

Sed neque suffitu, pecudum nec pinguibus extis  
Vos iubeam cumulare focos.

Nulla magis Domino placet hostia, quàm sibi recti  
Conscia mens, & certa fides.

Optet opes vulgus: quærendi cæca libido  
Sollicitet viles animas:

At tu siderei blando me lumine vultus  
Irradies pater alme tui,

Non illis ego vel quæ rumpant horrea messes,

Et ( si non satis est superque pœna  
 Exhaustum hæcenus, ipsa luminum quod  
 Præ mœrore acies hebet, vigensque  
 Induit silicernium iuuentus )  
 Iugi me imbre iuuet replere ocellos.  
 Testis tu mihi Luna tot laborum  
 Dum furuis tacitè vehes quadrigis,  
 Et largo madidum cubile fletu.

Fallor? audiit an meas querelas  
 Terrarum dominus deusque cali,  
 Optatamque diu attulit salutem?  
 O sint ergo procul procul nocentes,  
 Perfusique nouo rubore malas  
 Turpem præcipites fugam capeffant.

---

Psalmus cxvii.

**M**aximi laudes Dei  
 Quotquot estis vndiq;  
 Nationes pangite.

Dicite eius gratiam,  
 Qua nihil benignius;  
 Dicite eius & fidem,  
 Qua nihil constantius.

## Psalmus CXX.

**O** Qui rebus in asperis  
Nunquam non placidus mihi

Das aurem, pater optime,

Audi rite precantem.

Tu me falsa loquentium,

Tectis eripe fraudibus,

Tu pelle hinc procul impia

Mala toxica linguae.

Quid verò tibi proderis,

Quem fructum paries tibi,

O lingua inuida, qua nihil

Est nocentius vsquam?

Non sic militis impigri

Pungunt acris spicula,

Non sic feruidus aridas

urit ignis aristas.

**O** me iam miserum diu,

Qui vitam in gemitu traho

Inusam, inter inhospitas,

Dura nomina, gentes!

Hostes pacis & otij

Gentes, quas ego si velim

*Fando flectere, mollia  
Reddunt verba feroces.*

---

Psalmus CXXXIII.

**Q**uid esse melius, quid potest iucundius  
Quàm sese amantum mutuò fratrum fide:  
Non ille, Aronis quo madet sacrum caput,  
Vnguenti amicus imber aequè recreat,  
Liquenti odore dum senis barba pijs  
Sinusque ad ipsam vestis oram perpluit.  
Non ille guttis albicans lucentibus  
Ros qui supina spargit Hermonis iuga.  
Non qui Sionis colle sensim defluens  
Subiecta opimat arua. Sic enim domus,  
Fratrum beata quæ patet concordia,  
Demissam ab alto sentit indulgentiam,  
Multisque leta semper affluit bonis.

---

Psalmus CXLVIII.

**F**elices animæ, sacras  
Quæ cæli colitis domos,

Vos celi dominum & soli  
Pio tollite cantu.  
Vos puri Aligerum chori,  
Vos prompta aetherij patris  
Parere imperio agmina,  
Deo pangite laudes.  
Et Solis iubar aureum,  
Et Lunæ iubar æmulum,  
Et Vis cetera luminum  
Deo pangite laudes.  
Illum & siderei poli,  
Illum & sidereos super  
Polos pensilia aquora  
Pio tollite cantu.  
Qui nutu creat omnia,  
Qui nutu regit omnia,  
Fas & omnia debitas  
Illi dicere laudes,  
Quæ porro statuit semel  
Firmis condita legibus.  
Seruant perpetuo suum  
Indefessa tenorem.  
Sed & vos etiam infima  
Deum tollite laudibus.  
Qui terra colitis specus  
Picti terga dracones,

*Qui liquentia verritis*

*Cauda remige marmora*

*Delphines maris incola,*

*Deo pangite laudes.*

*Nives, fulgura, grandines,*

*Imbres, quique simul Deo*

*Iubente omnia vertitis*

*Caco turbine venti,*

*Montium aspera culmina,*

*Collium iuga frondea*

*Arborumque comantium*

*Omni à stirpe propago,*

*Omnes undique bestiae,*

*Omnes undique reptiles,*

*Et quae versicoloribus*

*Auras finditis alis.*

*Orbis denique Principes,*

*Reges, & populi, & quibus*

*Potestas datur infima*

*Iura dicere plebi.*

*Puella & pueri integri,*

*Quicquid est iuvenū & senū,*

*Laudate aetherij patris*

*Sanctum in secula nomen.*

*Hic est ille potens Deus*

*Et celi simul & soli*


*Aeterna propriam siti*

*Sospitans ope gentem  
israele satum genus,  
Si qua est pro meritis fides,  
Illi concine debitas  
Grato pectore laudes.*

28

FINIS POEMATVM  
Scæuolæ Sammarthani.





## PSALMI XXII. PARAPHRASIS

AVTHORE LODOICO SAMMARTHANO

Prouinciæ Pictonicæ Profenesch.

**T** *U* *que* conuexis ad nos descendis ab astris,  
*Quam* non humane tetigit contagio sortis,  
*Sed* nitido puram diuina potentia cælo  
*Excipit*, exceptamque docet, doctamque remittit,  
*Clio* sancta refer, quibus auxit Christus egentem  
*Muneribus*, presentiq; auctum numine firmat.

*Nam* veluti vigil innocuas viridantibus agris  
*Pastor* oues agit & securas vndiq; seruat,  
*Sic* statuit sancti pia me per pabula campi  
*Omnipotens* Deus & diuino gramine pascit.

*Ille* sitim & sacro restinxit crimina riuo,  
*Fælicem*que iterum decorauit imagine prima,  
*Et* prima reducem me libertate beauit.

*Mens* equidem errabat per denia lustra ferarum  
*Illecebris* donec captam fallacibus ad se  
*Attraxit* Deus & fida in statione locauit.

*Quo* duce si libeat dubias migrare per umbras  
*Vel* certa mortis manifesta pericla subire,  
*Haud* trepidus menti arrecta timor ingruet, atra



*Ex oculis agra euanesceat mortis imago.*

*Est mihi solamen diuturni virga doloris,  
Membra tuo clemens baculo defessa leuasti,  
Celestique auidus tandem saturarer vt esca  
Sacratas media mensas de luce parasti,  
Quas vidit fidei visisque intabuit hostis.*

*Diuino cernix oleo perfusa nitescit,  
Fœcundusque calix animam conspergit, & omni  
Abluit illuue spurcam, maculisque repurgat.*

*Quin tua me nunquam pietas, qua me & mea curat,  
Sedula destituet, dum spiritus hos reget artus.*

*Ac tandem humane transacto tempore vite  
Diuinum fœlix traducam leniter auium.*



# EX PSALMO XX. AD DEVM

PRECES PRO CHRISTIANISS. REGE

HENRICO IIII. Authore Abelio

Sammarthano Scæuolæ F.

**D***um populus sine lege ruit, dirasque precatur  
Impius, & sacri deceptus imagine falsa  
Bella iniusta mouet, verumque lacessere Regem  
Audet & insano demens concurrere ferro,  
Te Deus exaudire velit, Rex optime Regum*

HENRICE, & saluum præsentî numinè seruet,  
 Auxiliumq; tibi cælo metuendus ab alto  
 Mittat, & augusta te firmet ab arce Sionis.  
 Cùmque etiam pia sacra feres, & debita voti  
 Persolues, memor omnipotens tua munera blandè  
 Accipiat Deus, atque immisso cælitus igni  
 In flammam & cineres oblata holocausta resoluat.

Denique quicquid ages, animo quacunque reuolues  
 Diuina vsque tuis aspires gratia cæptis.

Nempe altos aderit circum Victoria currus,  
 Nos tibi plaudemus reduci, te sospite lati  
 Próque aris tibi próque focus pia signa feremus.

En nostras placida cepit Deus aure querelas  
 Et summi, nec vana loquor, de culmine Olympi  
 Magnanimum infidis Regem defendet ab armis:  
 Certam adeò diuina suis fert dextra salutem.

Curribus ergo alij exultent, iactetque feroces  
 Alter equos, pleno memorabimus ore Tonantis  
 Augustum nomen, patris auxiliumque petemus.

Nec mora gens inimica ruet, genibúsque reflexis  
 Victoris cadet ante pedes, & supplice vultu  
 Multa gemens veniam generoso à principe poscet.  
 Interea capita in terras abiecta prememus,  
 Et superum erecti tollemus ad æthera vultus.

Quare ades ô Regemque, fauens, regnumque tuere,

*Et cum sacra tibi ponemus vota, querelasque  
Edemus, valeant euentu vota secundo,  
Et nostris pater omnipotens attende querelis.*

# EIVSDEM ABELII SAMMARTHANI

AD EVNDEM REGEM CHRISTIANISS.

Epinicion ex Psalmo xxi.

**A**rbiter armorum omnipotens, quo pendet ab vno  
Rerum certa salus, fusa quod gente nefanda  
Rex pius & partis felici Marte tropæis  
Exultat, pater alme tuum est, tibi gaudia fundit  
Victor ouans, memori grates tibi pectore reddit.

Nam verum illudit vano dum numine numen  
Impius, & rabidos cæco sub corde furores  
Voluit, ut HENRICVM sceptris expellat auitis,  
Borbonidumq; genus regali à stirpe recidat,  
Ad te confugiens supplex quodcunque petiuit  
Ille tulit, longeque adeo potiora petitis  
Sæpe tulit, victumque hostem dare terga coëgit.

Hinc porro & patriæ sacrum diadema coronæ,  
Et nunquam optati decus inuiolabile sceptri  
Armorum strepitus inter, dubiosque tumultus  
Nobilium vnanimi assensu gestare dedisti.

*Vtque tibi puram petiit sine crimine vitam  
Protinus illasæ longissima tempora vite.  
Concedis bonus, atque annos sine labe fluentes:  
Nectus vsquam illi placido fauor altus Olympo  
Defuit, aut mollis pacato lumine vultus.  
Vnde quidem multa letus cum laude vigebis  
Æternum & florens memori celebrabitur æuo.*

*Nimirum simul intrepidus te fudit in vno  
Ilicet infesti perierunt funditus hostes,  
Nec diuina tuæ fugerunt verbera dextra,  
Flammantesque iras: vt enim fornace sub ima  
Æstuat ignis edax & sæua incendia miscens  
Deuorat annosæ durissima robora siluæ,  
Sic etiam iusta Deus altè accensus ab ira  
Fudisti gentem inuisam, scelerataque deinceps  
Semia, progeniemque futura in secula perdes.*

*Illam quidem horrendo nimium se polluit ausu,  
Et spirans immane nefas tua numina lesit  
Dira, amens, Regem infanda dum cæde peremit  
Ipsa suum, heu nostro scelus execrabile sacro!*

*Ac licet insidias tendat, vitæque minetur  
Magnanimi Heroïs qui nunc ad fræna rebelles  
Cogit & acceptas rerum moderatur habenas,  
Tu tamen hunc, pater, ætheria seruabis ab arce  
Incolumen, ferroque hostes flammaque fugabis,  
Impiæque ardentes vibrabis in ora sagittas.*



In Scæuolæ Sammarthani  
Poëmatum libros.

**H**IC *Musa sylvas perpetuum comâ  
Latâ virentes, inter & herbida*

*Semper recente prata flore*

*Prouocat Aoniam canendo.*

*Hic in reductis vallibus abdita*

*Crypta latebis mistus Oreadum*

*Festis choreis, Najadûmqur.*

*Hic saliens Heliconis vnda*

*Novum Poëta robur, & ingenî*

*Vires inhalat, fortia principum*

*Seu gesta partitur virorum*

*Æolæ fidibus camænæ:*

*Seu dulcè ridens Phyllis in angulo*

*Prodit latebras indice se suas,*

*Et lubrico vultus hiantem*

*Insidiosa procum moratur:*

*Seu thyrsus acri liberior ioco*

*Catullientem ludit anum : iocis*

*Seu Dorium melos relictis*

*Fert animus grauiore plectro*

*Sonare, cantus Isacidûm pios*

*Donat Latina psallere tibia,*

*Vt numinis laudem erudita*

*Carmine posteritas loquatur.*

*Vt hac se uero pectine Barbitos  
Pulsauit, agris pharmaca m. ntibus  
Amica, Natura latentes  
Persequitur calamo recessus.  
Infantulorum parua crepundia,  
Morbos, medelas, pectora, corpora  
Canendo format, Vtriusque  
Artificem stndij peritus  
Æquare Phæbum, qui medica præest  
Et musica dux, author, & arbiter,  
Myrto caput lauroque cinctus,  
Et croceis hederæ corymbis.  
Videbis Vno Pindarici libro  
Cæique dulcem carminis alitem:  
Videbis Ascræis vagantem  
Collibus Hesiodi camænam.  
Redux Olympo nobilis Orphej  
Fluenta sistit, saxa mouet lyra,  
Mulcet Tigres, suberba dulci  
Colla iugo subigit Leonum.  
Queris Maronem? Queris Horatium?  
Vterque viuos hic genij sui  
Prodit lepôres: hic & ipse  
Nomen Apollo suum sacrauit.*

ADAMI BLACVODÆI  
Pictauensis Consiliarij.



## SCÆVOLÆ SAMMARTHANO

Quæstori Galliæ dicabat Renatus à  
Cumontio Dominus de FIEF-  
BRYN anno 1605.

**T**emporibus nostris en produs Livius alter,  
Orator vehemens, atque poëta grauis.  
Seu tentes Elegos, seu longum dicere carmen,  
Ipse tibi Naso cedit, & ipse Maro.  
Inter Romanos celebratur Tullius vnus  
Eloquij Latij cui datur omnis honos.  
Hos solus numeris æquas, beneq; arte loquendi,  
Quæq; viros ornant quattuor vnus habes.  
Ingenij varias doctes tibi numina donant,  
Illustremq; domum prospera quæque beant.  
Fælix ob fratres, fælix & coniuge, nec non  
Prole tuas sequitur quæ numerosa vias.  
Fortunate senex, inter tibi sanguine iunctos  
Lator ego affinem me voluisse Deos.

## S C Æ V O L Æ

S A M M A R T H A N O.

**S** Cæuola qui patrios renocas ad sidera manes,  
 Assuetus geminæ plectra mouere lyra,  
 Calliopes ne prius mirer, Clius ne laborem?  
 Magnus vterque labor, summus vbiq̃ue lepos.  
 Quæ quibus anteferam? numeris seu lege solutis  
 Ferris, & egregios tollis in astra viros:  
 Seu tu Dircaum penna sectaris olorem,  
 Parnassi ve alia ludere parte iuuat:  
 Das famam viuis, vitam das lumine cassis,  
 Illud amicitia est, hoc pietatis opus.  
 Maeste animo, venerãde senex, tibi carmine parta  
 Gloria nobilibus crescet ab exequiis.

IANVS PREVOTIVS

Auratus.





V. C.

CL. PUTEANI

memoriæ. S.



*Udet fateri, lente inersque barbite,  
Iam nona mensis appetit,  
Puteanus ex quo seculi splendor sui  
Urgente fato extinctus est,  
Nec dum sepultis tanti amici Manibus  
Pias dedisti lacrimas.*

*sed cum sub imis bareat præcordijs*

*Hoc funere acceptus dolor,*

*Nullaq; possit arte, nullo tempore*

*Nostrium leuari tedium,*

*Ut sit aliquantò serior, semper tamen*

*Hic luctus opportunus est.*

*Adeste vos ergo Deæ & iustissimis*

*Utro fauete nanijs.*

*Hic vester ille est, luce quem prima editum*

Fouistis in blando sinu,  
Qui vestra coluit sacra sedulus puer,  
Factusque demum grandior,  
Sive ille Græca, seu Latina conderet,  
Ante vnus ibat ceteros,  
Vatūque censor ipse Vates optimus  
Phœbi tuebatur Vices.  
Seuera donec inuolans in hunc Themis  
Totūque Vendicans sibi,  
Me sequere, dixit, faxo tam rara indoles  
Emergat isto ex otio.  
Tu quicquid olim Roma victrix gentium  
Sancitū æquis legibus,  
Antiquitatis quicquid in sinu latet  
Me consequeris auspice, &  
Hæc tibi per artes summa honorum ad culmine  
Certissimam sternes viam.  
Te purpuratum splendidos inter patres  
Augusta cernet ciuitas,  
Te populus omnis iura dicentem colet,  
Colent & ipsi principes.  
Hæc Dea; nec anni deinde multi effluxerant,  
Rata cum fuerunt omnia.  
Tumuit superbus amne toto Sequana,  
Tumuit ocellus Gallie

Lutetia ingens facta nunc ingentior  
Tantis alumni laudibus,  
Et ciue in illo nacta Budæum alterum  
Ad sidera caput extulit.  
Quis enim tribunal ad supremum doctior,  
Quis venit vnquam iustior?  
Quis comitate, quis pudore præstitit,  
Virtutibusque ceteris,  
Quibus micabat hoc nefando seculo  
Ceu nocte sidus aureum?  
Sed lustra nondum vixerat planè decem,  
Cum debili in corpusculo  
Paulatim adultus calculus teterrimos  
Primum dolores attulit,  
Mox lethum et ipsum, lugubremque vatibus  
Causam canendi præbuit.  
Ipse ego senili membra cui torpent gelu  
Desueta longo tempore  
Ad plectra redeo, penèque oblitus mihi  
Tremula manu tento fides,  
Nunquam huic labori præstiturus me parem,  
Nisi qui mihi cor excitat  
Amor in sepulti nomen ardentissimus  
Dissolueret frigus meum.  
Vos patre digni liberi, quos emula

*Doctrina virtutis comes  
Ducit parca laudis ad verum decus  
Paterna per vestigia,  
Beatiores vivite, & quos abscidit  
Annos parenti pertinax  
Bonis nocere Parca, nunc tandem equior  
Vobis rependat singulis.*

Sçæuola Sammarthanus M. P.



PAG.



<i>Pag.</i>	<i>Lin.</i>	<i>Errata</i>	<i>Emendationes</i>
3.	11.	lacymans	lacrymans
10.	26.	signe	sine
27.	18.	omen	omnem
47.	22.	frangrantia	fragrantia
62.	2.	sæue	sæuæ
66.	4.	insensa	incensa
107.	8.	Nemefiis	Nemesis
116.	20.	puplica	publica
113.	8.	Atgiuæ	Argiuæ
129.	7.	Stauerim	Srrauerim
132.	14.	præmiüs?	præmius
235.	12.	inter	iter
138.	8.	siue	sine
142.	19.	fueri	fuerit
146.	20.	omneum	omnium
163.	14.	rutillas	rutilas
ibid.	23.	Nonstrisque	Nostrisque
167.	15.	Maruotia	Mauortia
175.	16.	Millæ	Mille
176.	20.	in sula	insula
179.	16.	Causeis	Caucafeis
ibid.	24.	ispe	ipse
180.	17.	tant os	tantos
184.	15.	auris	oris
186.	2.	postrau	prostrau
187.	12.	en	in
193.	16.	in super	insuper

<i>Pag.</i>	<i>Lin.</i>	<i>Errata</i>	<i>Emendationes</i>
206.	vlt.	Castra	Castra
209.	20.	mnere	munere
216.	5.	celebrem.	celebrem
218.	18.	flordia	florida
219.	13.	Hymmettum	Hymettum
ibid.	18.	aliena	alieno
225.	11.	fuspira	fuspiria
ibid.	22.	seruenri	seruenti
226.	14.	posicis	positis
ibid.	16.	optatat	optata
229.	10.	efferet	efferreret
230.	11.	reddiuiuum	rediuuium
23.	9.	Examines	Exanimes
240.	5.	spudiis	studiis
258.	21.	qui	quid
265.	20.	arinore	amore
267.	1.	obido	obibo
276.	10.	temere	demere
278.	21.	Greco.	Græco.
302.	16.	uoui	noui
310.	9.	Mam	Nam
313.	25.	fragantis	fragrantis
314.	1.	quidem	equidem
318.	17.	eximij	eximiiis
321.	1.	debora?	Debora?
323.	16.	Fœmina	Fœminæ
325.	10.	ob oita	oborta
ibid.	26.	impios	impos
331.	25.	commitas	committas
336.	22.	silē ea	silentia
347.	25.	Incolumen,	Incolumen.

FINIS.

VA1  
1528182



